

BIBLIOTECA NAZ.
Vittorio Emanuele III

XXIV

E

39

HERMENEGILDI PINI

C. R. S. P.

DE VENARUM METALLICARUM
EXCOCTIONE

VOLUMEN I.

QUO IN V. LIBROS TRIBUTO

Explicantur, quæ ad eam rem generatim faciunt.



MEDIOLANI, ex Typographia Josephi Marelli.

CUM APPROBATIONE.

M.DCC.LXXIX.

NOTICE

TO THE
MEMBERS OF THE
SOCIETY



OF THE
SOCIETY
OF THE
CITY OF
NEW YORK

FERDINANDO

EXCELSISSIMO UNGARIÆ, ET BOHEMIÆ
PRINCIPI

AUSTRIÆ ARCHIDUCI

BURGUNDIÆ, ET LOTHARINGIÆ DUCI
INSUBRIÆ AUSTRIACÆ GUBERNATORI
&c. &c. &c.

HERMENEGILDUS PINUS

S. P. D.



LUA facit eximia, ac singularis humanitas, PRINCEPS EXCELSISSIME, ut quinque hi libri in REGIÆ CELSITUDINIS TUÆ nomine appareant: quod quidem argumento est, Te optime videre, Rem Metallicam cum publica utilitate, in quam tota animi contentione intendis, esse conjunctam. Te profecto non

latet, in Austriaca quoque Insubria, quæ alioquin omnibus fere rebus ad vitæ usus commoditatesque necessariis abundat, plures metallorum, ac Ferri præsertim venas effodi, quæ tamen vel propter earum cognoscendarum inscientiam, vel propter imperitiam earundem excoquendarum parvo emolumento esse solent. Ex quo fit, ut ingens pecuniæ vis quotannis ex florentissima hac regione ad exterarum gentes perveniat metallorum comparandorum causa. Intelligis autem, PRINCEPS SAPIENTISSIME, e publicis æque privatisque rationibus futurum, si metalla, eaque & copiosa, & optima ex venis conficiantur, quin Cives lignorum caritate laborent, aut alio ex capite detrimentum capiant: id quod existet, si ii, qui rebus metallicis dant operam, ex libris discere possint optimam venarum tractandarum rationem, atque si opportunis in locis venæ excoquantur, præsertim vero in iis, ex quibus vel ob longinquitatem, vel ob difficultatē itinerum ligna in Urbes comportari nequeunt. Hæc porro præ me gerebam ex eo usque tempore, quo **MARIÆ THERESIÆ** Semper **AUGUSTÆ** munificentia ac numine suffultus Fodinas, atque Officinas Ungaricas inviserem; hæc spectavi, ex quo Fossilium, aliarumque rerum naturalium Collectioni ejusdem **AUGUSTISSIMÆ** ac **PIISSIMÆ** **MATRIS TUÆ** nutu, auspiciisque Mediolani instituatæ præfectus fui; ad hæc denique retuli Libros hosce meos, quos si Tibi probavero, qui

*multis egregiisque doctrinis eruditus es, ac rerum
optime æstimandarum, gerendarumque scientia maxime
vales, facilius iis quoque, qui in re metallica stu-
dium, operamve suam ponunt, probabo; meque la-
borum meorum non exiguos cepisse fructus gratulabor.
Vale.*

*Dabam Mediolani ex Collegio Divi Alexandri
Kalendis Julii An. MDCCLXXVIII.*

PROSPECTUS

VOLUMINIS PRIMI.

PROŒMIUM pag. 1

LIBER PRIMUS. *De Venarum excoquendarum
præparatione* 27

Cap. I. *De Venarum delectu* 29

Cap. II. *De Venarum comminutione* 32

Cap. III. *De Venarum lavatione* 40

Cap. IV. *De Venarum, & pyriuidis uſtione* . . . 55

LIBER SECUNDUS. *De ratione Venarum ex-
coquendarum in fornacibus vulgaribus* . . . 72

Cap. I. *De Fornacibus vulgaribus* 73

Cap. II. *De domiciliis, quibus fornaces aliaque ad
excoctionem necessaria concluduntur* 93

Cap. III. *De ratione, qua focus, & catini pa-
rantur* 96

Cap. IV. *De Machinis, quibus ventus in forn-
aces inspiratur* 103

Cap. V. *De ignis, ac venti administratione* . . . 118

Cap. VI. *De Venarum appositione* 136

Cap. VII. *De emissionem materiæ liquefactæ* . . . 143

Cap. VIII. *De excoctionis fine* 166

LIBER TERTIUS. *De ratione Venarum exco-
quendarum in fornacibus concameratis* . . . 168

Cap. I. De fornacibus concameratis	pag. 168
Cap. II. De Venarum uestione, & excoctione in fornacibus concameratis	178

LIBER QUARTUS. De purgatione, & secretionem Metallorum 189

Cap. I. De iis, quæ generatim ad purgationem, & secretionem Metallorum faciunt	190
Cap. II. De operis, quibus metallum quodlibet ab uno aliquo, vel a pluribus secernitur	203

**LIBER QUINTUS. De optima rei Metallicæ
gerendæ ratione** 251

Cap. I. De iis, quæ Metallicus spectare debet, antequam venæ alicujus fossionem aggrediatur	252
Cap. II. De impensis in metalla faciendis	255
Cap. III. De experimentis metallicis	269





PROÆMIUM.



SEpe numero mecum ipse cogitavi, quid esset, cur plures in omnibus doctrinis, quam in metallica excellentes extitissent. Nam quocumque me animo, & cogitatione converterem, permultos in quoque genere perfectos videbam non mediocrium disciplinarum, sed prope maximarum. Quis enim est, ut cetera prætermittam, qui, si clarissimorum hominum scientiam ex rerum perceptarum subtilitate, & multitudine metiri velit, Metallico Mathematicum non anteponat? Quis tamen ignorat, quàm brevi mathematica disciplina processerit, novisque ac pene infinitis inventis aucta fuerit, in qua difficile est enumerare, quot viri, quanta scientia, quantaque in suis studiis varietate, & copia fuerint, qui scriptis suis non modo istarum rerum Studiosos maxime juverint, verum etiam libro-

Vol. I.

A

rum multitudine eos pene obruerint? At res metallica tantum abest, ut universa sit tractata ab aliquo Scriptore, ut ex iis etiam, qui disperse scripserunt alius alia de re, singulas ejus partes pauci abolverint. Siquidem ex veteribus unum Plinium habemus, qui de his rebus egerit, qui tamen perpauca laborandi rationes attigit. Ab Plinii vero ætate ad Georgii Agricolæ tempora duo libri vulgari Germanorum sermone editi sunt, alter de materiæ metallicæ, & metallorum experimento admodum confusus, cujus operis parens ignoratur, alter isto non melior de venis, de quibus etiam Pandolphus Anglus scripsisse fertur. Locum denique de metallis fundendis, fegregandis, agglutinandis, nostra lingua tractavit Vanoccius Biringuccius Senensis, vir disertus, & multarum rerum peritus (*), qui rationem quoque quarumdam venarum excoquendarum breviter perstrinxit; sed hæc valent potius ad Italiæ laudem, quod nempe ex hac florentissima Europæ regione primus rerum metallicarum minime contemnendus Scriptor prodierit, quam ad earundem rerum studiosum perfecte informandum. Quod quidem munus metallici erudiendi eodem fere tempore, quo Vanoccius sua edidit, su-

(*) *Hanc laudem Vanoccio Biringuccio tribuit Georgius Agricola in epistola, qua libros suos de re metallica Ducibus Saxonix nuncupat.*

scepit commemoratus Agricola Germanus, vir supra reliquam eruditionem græcis, atque latinis literis imprimis eruditus. Hic enim quicquid ipse vel in metallicis Germaniæ fodinis atque officinis vidit, vel a fide dignis cognovit, vel in veteribus, aut ejus ætatis Scriptoribus legit, accuratissime expendit; idque duodecim præsertim libris, quos de re metallica inscripsit, tam dilucide, tantaque orationis elegantia, atque rerum copia fecit, ut qui hos evoluit, sibi videatur valles illas, & montes, & fodinas, & officinas & machinas non legere, sed spectare: qui si nostra ætate scripsisset, quæ in re metallica multum processit, unus esse potuisset pro multis Scriptoribus. Post ipsum de venarum fossione, de delectu, de lotura, de ustione, deque Machinis, quæ in fodinis, atque officinis metallicis usurpari solent, pertractarunt Erkerus, Beyerus, Voigtelius, Opelnus, Naucerus, Loehneifus, Galferus, Poda, Delius, Sprengelius, Jugelius, de Gensanne, & Lehmannus. Nuper autem Monnetus, quæ ad venarum fossionem, venarumque urendarum excoquendarumque præparationem pertinent, clare, & dilucide (quæ est Gallorum laus) explicavit, sequutus præsertim præclarum illud opus, quod ea de re nomine Collegii metallici Fribergensis anno MDCCLXII. editum est. At Roeslerus, & Kellnerus varias excoquendi rationes in Saxonia præsertim receptas aperuerunt, fundamenta artis me-

tallicæ, prout eorum ætas ferebat, scrutati sunt Loe-
hneifus, & Oreschalus, duo itidem Germani, quo-
rum nomen compertum mihi non est, differuerunt
alter de secretionem argenti ab ære, quod recentio-
res cuprum appellare solent, alter de venarum cu-
prearum maceratione; aliquas laborandi rationes,
quæ ad metalla in Indiis usurpari consueverunt,
protulit Alphonsus Barba, quas breviter perstrinxit
doctus quidam Gallus, qui de auro, argentoque ex
certis venis secernendo nonnulla quoque de suo addi-
dit; ac demum de metallicis quædam attigerunt
Petrus Saxholmus, & Mathesius. Sed hæc vetera.
Nostros autem temporibus de venis ferri lavandis,
& excoquendis, deque ferro purgando docti quidam
Galli multa publicis literarum monumentis manda-
runt, Reaumurius nempe, Buffonius, Jarsius, Gry-
gnonius, Coudrayus, Courtivronus, Bouchus, & Ro-
bertus. Venarum cuprearum excoctionem diligen-
ter persequutus est Cancrinus; institutiones metal-
licas confecerunt Wallerius, Delius, alterque Scri-
ptor, cujus nomen adhuc me latet; ac præcepta
quædam rei metallicæ ad usum opportunissima attigit
quoque Clarissimus vir Joannes Antonius Scopoli
in suis Mineralogiæ principiis. Schluterus vero om-
nes fere excoquendarum venarum rationes in ce-
lebrioribus Europæ officinis usurpatas in unum vo-
lumen collegit, eodemque tempore & Swedem-
borgius idem fere opus aggressus est, quamvis

P R O Æ M I U M.

5

ea dumtaxat ediderit, quæ ad cupri, & ferri venas attinent. Novas quasdam vel non admodum usitatas venarum excoquendarum rationes, quæ in fornacibus concameratis peraguntur, Cl. de Genfanne diligentissime exposuit. Multa denique de apta venarum tractandarum ratione persequutus est celeberrimus vir Joannes Cramerus eo opere, quod germanica lingua nuper edidit. Atque præter hos, quos *singillatim* nominavi, alium quempiam, quod ego sciam, de re metallica scripsisse vix invenies; nisi velis brevium illarum tractationum hoc loco habere rationem, quæ in Commentariis Academicarum sunt dispersæ, aut metallicis operibus accensere artificia venarum experiundarum, quæ Chymistarum magis, quam Metallicorum sunt propria: quo in genere multi plane summa cum laude versati sunt, præsertim vero Stahlius, Wallerius, Cramerus, Gellertus, Lehmannus, Scopoli, Maquerus, Baumeus, Sageus, Gherardus, aliique, quorum opera recenset Vir præclarissimus Jacobus Spielmannus in Catalogo, quem suis Institutionibus Chymicis adjecit. At illi, quos in re metallica scripsisse diximus, etsi separatim ejus partes omnes attigerint, eorumque plures, quæ ad institutam ipsorum rationem pertinerent, expleverint; ex his tamen corpus hujus artis absolutum confici nequit. Nullus enim ratione & via eam integram literis mandavit, pauci aliquam identidem rationem afferunt eorum,

quæ præcipiunt, atque illi ipsi, qui luculentius venarum excoctionem persequuti sunt, veluti Agricola, Schluterus, & Swedemborgius, non multum metallicæ scientiæ studiosos juvare possunt. Cum enim res, quæ ab aliis fiunt, plerumque simpliciter narrent, atque vel nullas, vel ineptas causas afferre soleant (*), cur ita potius, quam secus aut fiat, aut fieri debeat, negotium plerumque faciunt suis lectoribus, qui postquam eorum libros diligenter evolverint, quid ipsis in infinita illa, quam legunt, venarum tractandarum varietate sequendum sit, vel ambigunt, vel ignorant.

Jam vero, cum res metallica nullo umquam tempore non fuerit exulta, maximeque tum publicis tum privatis rationibus eam perficere interfuerit, quis non jure miretur tam exiguum virorum in hac arte præstantium numerum inveniri? Sed facile ejus rei causam inveniemus, si animadvertamus, quam longe lateque res metallica pateat, & quot ex artibus studiisque sit collecta. Etenim

(*) *Hellosius in Proæmio ad versionem gallicam operis a Schlutero conscripti hæc habet: J'ai jugé, qu'il convenoit de le refondre, d'en supprimer les répétitions, qui sont un peu trop ennuyeuses, d'en changer la théorie plus conforme aux idées grossières des ouvriers allemands, que convenables au Physicien, dont les principes sont beaucoup plus certains, que ceux de l'Auteur.*

Metallico scientia comprehendenda est omnium fere fossilium, quæ ad venas occurrunt, sine quibus venæ ipsæ nec fodi utiliter, nec apte excoqui possunt; tum Architecturam teneat oportet, ut diversas machinas, substructionesque ipse fabricari, vel potius fabricandi rationem aliis explicare queat; deinde mensurarum disciplinæ ignarus esse non debet, ut venarum extensiones, directionesque judicet, atque metiri possit, quam alte fodiendi sint putei, ut ad cuniculos usque, qui eo ducuntur, pertineant. Nam quid ego plura dicam de artificii venæ tundendæ, lavandæ, cremandæ, experiundæ, in quibus, nisi experientissimus sit, magnam metalli jacturam faciet? Quid dicam de excoctione ipsa, quæ igne, quæ solium flatu, quæ fornacum præparatione pro infinita venarum varietate moderanda est; quæ sola per se ipsa quanta sit excoctorum ars declarat, in qua cum multi elaborent, quis ignoret, quam pauci sint, qui in ea excellant? Quamobrem mirari desinamus, quæ causa sit excellentium metallicorum paucitatis, cum ex iis rebus universis metallica constet, in quibus singulis elaborare permagnum est. Quæ quidem rei incredibilis magnitudo, ac difficultas in causa est, cur homines non solum ingenio, & doctrina, verum etiam studio & exercitatione abundantes partitionem quamdam artis fecerint; neque voluerint in universo genere singulos elaborare, sed ab reliquis operis venarum præsertim excoctionem

seposuerint. Neque ego amplius complectar his libris, quam quod huic secundo generi summorum hominum prope consensu tributum est: quin imo ea tantum persequi constitui, quæ ad venas metallicas pertinent, venas dico auri, argenti, plumbi, stanni, ferri, & æris: non quod cetera contemnam, quæ ex fodinis eruta Metallici tractant, sed quod illa frequentius occurrant, & utilius excoqui soleant. Quoniam vero ex iis, quæ ad venarum excoctionem faciunt, alia sunt earum omnium communia, alia cuiusque venæ quasi propria, in duas partes tractationem hanc tribuere optimum duxi, quarum prima complectitur ea, quæ ad venarum excoctionem generatim faciunt, in altera singillatim dico de cuiusque metalli venis, quomodo excoquendæ vel ex ipsis metalla conficienda sint. Quo in opere duo perficere constitui, primo, ut quæ vel sparsa vel disiecta in Metallicorum libris inveni, vel ex bene peritis hujus artis didici, vel denique ipse vidi in metallicis officinis, sub uno aspectu ponerem, & expenderem; deinde ut multa, quæ ab aliis prætermissa, vel non satis adhuc explicata fuisse animadverterem, experimento & ratione nixus vel adjicerem, vel aperirem; omninoque efficere curavi, ut hæc metallicæ pars non tam ex usu diversarum regionum, ut hætenus fieri consuevit, quam ex ratione explorataque experientia videretur expressa. Plus autem quam ego adpromit-

tam, quæ me expectaret, qui arbitraretur me esse proditurum ea, quæ in Hungariæ, aut Germaniæ Officinis de industria exteris occultari consueverunt. Nam, quod spectat ad hanc rem, ea quoque, quæ ego viderim, adpromitto; quæ autem occultantur, ego sane nec vidi, nec trado. Neque vero hæc aut vidisse aut tradere ad institutam a me rationem multum facit. Nam, ut iterum dicam, non ego eo specto, ut quid Hungari, quid Germani ad certa venarum genera faciant, exponam; sed ut ratione & via explicem ea, quæ ad optimam venarum cujusque generis metalli excoctionem pertinent: quibus si industrius Metallicus apte utatur, poterit ipse per se ea quoque assequi, quæ alii occultant, vel etiam his meliora efficere.

Sed vereor, ne hic labor meus in varias reprehensiones incurrat. Nam quibusdam displicet hoc totum scriptionis genus, quasi in re versetur neo utili, nec decora. Quidam autem id sane non reprehendunt, sed dicunt, malle se hæc in Germanorum libris, atque officinis discere; Italos se, quod ad rem metallicam spectat, non magni æstimare. Aliquos denique futuros suspicor, qui me ad alias literas vocent; genus hoc scribendi, etsi illiberale non sit, personæ tamen esse negent. Quibus omnibus breviter respondendum esse censeo. Quamquam rei metallicæ vituperatoribus satis responsum est a Geor-

gio Agricola primo libro de Re Metallica, quem si isti legere voluerint, non dubito, quin hanc habituri sint non modo hominum generi fructuosissimam, verum etiam cuique maxime decoram. Iis autem, qui dicunt, se in Germanorum libris legendis operam malle consumere, non obstitere, si in Germania eam provinciam, quam nos aggressi sumus, suscepissent viri illi præclarissimi, qui non modo istarum rerum usu, & exercitatione, verum etiam studio, & doctrina ceteris præstant. At ne eos quidem, qui apud Germanos degunt, video esse contentos iis, quæ hætenus hoc in genere scripta sunt. Profecto nos quoque ex eorum libris multum profecisse non modo non dissimulamus, verum etiam cum quadam grati animi recordatione profitemur. Quod si nos non interpretum fungimur munere, sed tuemur ea, quæ apud illos laude digna invenimus, quæ sane sunt multa, eisque nostrum præterea iudicium, & nostrum scribendi ordinem adjungimus; quid habent alii, cur Italos de re metallica scribentes tam fastidiosè contemnant? An quod præter illa, quæ Plinius, ac Vanoccius Biringuccius de metallicis tradiderunt, nihil fere in eo genere Itali memoriæ prodiderint? At ne ipsa quidem Germania ante Agricolam quemquam habebat, quem ea in re sequeretur. Quotquot tamen rei metallicæ dant operam, Agricolam legunt, hominem politioribus literis doctrinisque in Italia institutum, qui etsi non Metal-

licum se, sed Medicum profiteretur, attamen in hac scientia adeo excelluit, ut non modo meruerit a Summo Imperatore Carolo V. regis fodinis præfici (1), verum etiam præter alia multa opus de re metallica ediderit omnium seculorum memoria dignum, in quibus omnibus elucubrandis illud tempus se consumpsisse scribit (2), quod ei *vacuum erat a curandis ægrotis, a valetudine sustentanda, a cura rei domesticæ*: id quod ab iis animadverti velim, qui putant nihil præclari hoc in genere edi posse, nisi ab iis, qui totos dies, noctesque in Metallicorum Officinis versentur. Ceterum si qui sint Italiae tam inimici, ut nihil præclari in re metallica ab ea proficisci posse pertinaciter arbitrentur, non succenseant tamen huic libro nostro, qui sane nolentibus se legendum non offeret. Optime autem facient isti si, quemadmodum dicunt, in Officinis Metallicorum, quibus Germania imprimis abundat, assidui sint. Multa enim in iis ediscent, quæ ex librorum lectione vix percipere possint. Vidimus nos quoque plures laborandi rationes, quibus sive Hungari, sive Germani, sive Sabaudi, sive Itali ad

B 2

(2) *Vide Proæmium ad opus inscriptum: Traité de l'Art-métallique extrait des Œuvres d'Alvarez Alfonso Barba.*

(2) *In epistola ad Georgium Commerstadium.*

metalla utuntur (1); novimus quam multum studio & opera eorum, qui officinis præsunt, ætate nostra huic arti accesserit. At si quispiam in iis tantum, quæ fieri viderit, consistat, multum certe aberit a perfecto metallico. Videt enim quo modo unum vel alterum venarum genus tractetur, non vero quæ sit optima cujusque venæ tractandæ ratio (2); neque id in operariorum schola discet umquam. Frustra enim ab ipsis rationem quæres eorum, quæ faciunt (3), quæque ipsi sæpe de industria occul-

(1) *Ex metallicis Italiæ, ac Sabaudicæ officinis juvabit eas hoc loco commemorare, quæ mihi videntur esse præstantiores. Ac æris quidem venæ excoquuntur in Sesia valle ad Scopellum, ac Civarolum, itemque Andurni in agro Vercellensi, atque in vicinia Augustæ Prætoricæ; Plumbi argentosi item ad Andurnum, atque ad Pesejum in Sabaudia. Ferrum vero constat ad Locarnum in Sesia valle, ad Postuam ibidem, in valle Augustana, in Etruria, in agro Brixienti, ac Bergomenfi, in valle Saxina. Aurum denique ~~montano~~ elicitur ex venis hydrargyro in Sesia valle, Pestarenæ in Anzasea, Crodi in Antigoria.*

(2) *V. Jars. in Act. Ac. Paris. ad an. 1770. p. 424.*

(3) *Schluterus idipsum confirmat cap. 32. inquit: On trouve dans presque toutes les fonderies des manieres d'operer differentes: & cap. 31. hæc habet: La plus part des chefs d'ouvriers même les plus habiles ne savent que travailler. Ainsi les élèves un peu intelligents doivent les suivre avec assiduité, & faire en sorte de démêler dans leur pratique quel est la raison du succès.*

tant. Quamobrem nisi totam habeas comprehensam animo scientiam, ex istorum magistrorum institutis sæpe errabis in eo ipso, in quo te optime agere arbitraberis. Non fert is locus, non hæc dicendi ratio, ut singula commemorem, quæ in opificiis venarum excoquendarum usu receptis emendari commode possunt. Liceat tamen mihi unum exempli causa afferre, quod in secretionem argenti ab ære animadverti, cum Mariæ Theresiæ semper Augustæ munificentia ac numine suffultus officinas Hungaricas inviserem. Metallicos non latet, ad secretionem argenti ab ære oportere æs argentosum cum certa plumbi mole liquefacere, eoque modo panes metallicos conflare, qui igni tam leni subijci debent, ut plumbum cum argento, non vero æs liquecat, & liquefactum ex panibus exfudet; id quod duplici igne fieri consuevit. Primo enim panes istos in fornacem *liquatoriam*, eamque apertam imponunt, eosque carbonibus ardentibus circumdant, quorum calore certam plumbi argenti portionem dimittunt, tum eosdem refrigeratos in fornacem concameratam, quam *sudatorium* vocant, transferunt, in qua igne luculentiori reliquum plumbum ex iisdem exfudat. In hac autem liquatione (sic enim labor iste appellatur) duo nec contemnenda incommoda existere observabam, quorum alterum in eo situm est, ut duplex ignis panibus istis admoveatur, cum unus mihi videre-

tur sufficere , alterum in eo , ut secundo igne non exigua cupri pars in æs ustum vertatur . Cum autem ibi a viro artis metallicæ peritissimo exquirerem , cur non uno eodemque igne tota liquatio absolveretur , respondit , non aliter rem hanc perfici posse . Non eram nescius , plura in re metallica fieri , quorum ratio vel nullo modo , vel non ita facile reddi possit . Itaque tum viri apud me valuit etiam sine ratione auctoritas . Verum mihi rem diligentius consideranti multa sese obtulerunt , quæ suadent aliter ac usu receptum sit , atque utilius liquationis opus perfici posse . Hæc enim , nisi mea me fallit opinio , ratio est , cur iterata nec continua plumbi eliquatio inducta sit ; nimirum , cum oporteat calorem eo magis augere , quo minor plumbi quantitas in panibus remanet , periculum foret , ne si , igne non intermisso , totum plumbum ex ipsis elicere contenderemus , ipsum quoque æs liqueceret . Cum enim plumbum cupro admixtum liquefcere incipit , cupræ massæ partes commovet , agitat , atque ad fusionem disponit . Si ergo , eo cupri statu manente , augetur ignis , cuprum , quod jam ad fusionem pronum factum est , vehementiori igne accedente , liquefcere facile posset . Contra , si ex quo certa plumbi moles ex panibus effluxit , isti refrigerare permittantur , cessat in cupro ea dispositio ad fusionem , quam prima plumbi eliquatio in ipsum induxit , neque ea redit , etsi ad eos recalefaciendos

idem ac antea caloris gradus ipsis admoveatur. Cum enim tunc minor plumbi portio cupro admixta sit, minus quoque ad fusionem prorum istud efficitur: Quæ si ita sint, quisque videt, quam facile unico igne liquatio perfici possit, dummodo iste tantisper remittatur, posteaquam certam plumbi quantitatem panes dimiserint: quod fusius explicabimus, cum de secretionem argenti a cupro sermo erit. Id vero, quod diximus, sufficiat, ut intelligamus, non omnia, quæ in officinis metallicis peraguntur, optima esse existimanda, eoque minus, quod difficillima semper acciderit emendatio consuetudinis apud operarios receptæ. Isti enim plerumque nova exequi nesciunt, vel etiam omnes fraudes adhibent, ut tentamenta, quæ vel Domini, vel Præsides Officinarum proponunt, male cedant, tum quod semper suspicentur in rebus novis magis sibi esse elaborandum, tum quod videant una cum veteri consuetudine totam artem scientiamque suam, cui uni fidunt, debere corrumpere: de qua quidem hominum istorum vel pertinacia, vel imperitia docti Metallici, veluti Swedemborgius, Hellotius (1), de Genfanne (2), & Jarsius jure

(1) *Hel. in Proæmio ad volumen I. operis superius commemorati hæc scribit.* Ils sont presque tous obligés [les Concessionnaires] de faire venir de divers endroits de l'Allemagne, des Mineurs, & des Fon-
deurs, qui quelque habiles qu'on les suppose, doi-
vent toujours être dirigée par quelqu'un qui soit

conqueruntur . Hæc enim in caussa est , cur artis metallicæ progressionis non minimum retardentur .

plus habile qu'eux : sans quoi , ces sortes d'Ouvriers , & les Fondeurs plus que les autres , bornés à une routine qui fait tout leur sçavoir , se trouvent déroutés , s'ils ont à fondre une mine différente de celles qu'ils ont fonduës , ou qu'ils ont vû fondre dans leur pays . Il ne faut pas croire non plus , que les Saxons , qui sont les meilleurs Ouvriers de l'Allemagne en ce genre de travail , quittent aisément leur patrie , où leur subsistance est assuré tant en santé , qu'en maladie . Ceux qui viennent en France sont pour l'ordinaire les moins habiles ; & il y a tout lieu de croire , que si l'on eut été content d'eux en Saxe , ils n'auroient pas quitté les mines de ce pays , pour passer dans un autre , où les nourritures sont plus chères , & ne sont pas celles auxquelles ils sont accoutumés .

(2) *De Genf. in Proæmio ad opus inscriptum* De la fonte des mines par le Charbon de terre , *sic habet* : Les habiles Fondeurs sont très-rares , les autres ne sont ordinairement que des hommes de routine ; ce sont des espèces de machines , où plutôt d'instrumens monotones , dont on ne peut tirer qu'un même son . Sont-ils accoutumés à fondre une espèce de mine , ils la fondront toujours assez passablement ; sortez-les de là , ils ne savent plus on ils en sont ; & s'il parviennent enfin à se mettre un peu au fait , ce n'est jamais qu'après avoir fait bien des bévues , & toujours aux dépenses du maître qui les paie pour les faire Je n'ignore pas combien on a de pei-

Qui denique malunt alia scribi a nobis, isti, quoniam arbitrantur, nos in alio quoque genere cum laude posse versare, humaniores in nos sunt, quam ut mereantur tamquam curiosi reprehendi. Hos itaque potius precabimur, ut nunc quidem hoc nostro minime nobis injucundo labore contenti sint; qui cum in limanda veritate occupatus sit, atque in re ver-setur tum privatis tum publicis rationibus maxime utili, quis tandem hunc arbitrabitur nobis non satis decorum? An res rustica nemini unquam illiberalis esse potuit, eique cum laude dare operam potuerunt, qui a cœtibus hominum secreti sublimem quamdam vitæ rationem profiterentur, metallica autem mihi non erit decora, sine qua nec agricultura, nec artes reliquæ, quarum opus in actione situm est, quidquam possunt efficere? Si qui vero sint, qui id quidem in nobis non reprehendant, remissius tamen id velint fieri, hi difficilem quamdam temperantiam postulant in eo, quod ex tam multis, tamque arte inter se copulatis collectum est, ut facilius non suscipi, quam semel susceptum cœreri reprimique possit.

ne à tirer les ouvriers de leur ancienne routine; ils ne sauroient se figurer qu'on peut faire mieux que ce, qu'ils sont accoutumés de faire, & il n'y a rien qu'ils ne mettent en usage pour s'y tenir; mais on ne doit point les écouter, lorsqu'on est assuré de l'utilité du changement.

Vol. I.

C

Ceterum quo magis metallica abhorret ab omni orationis cultu, eo minus hi libri nostri sunt perpolititi. Dedimus tamen operam, ut qui hos evolveret, in inculta illa, atque horrida non incideret, quæ nemo attingit, nisi qui eandem licentiam scribendi sibi vult permitti. Ac si quidem non raro utimur vocabulis, quæ apud aureæ ætatis Scriptores frustra quærentur, id nobis, ut arbitror, nemo crimini vertet, qui noverit in qualibet arte multam esse nominum novitatem, tantoque majorem, si illa ex pluribus disciplinis, quas veteres aut nullo modo, aut vix attigerint, sit collecta. Itaque arbitrati sumus nobis licere vocabulis uti, quæ politiores vel Metallici, vel Physici, vel Chymistæ jam diu fecerunt sua, si tamen eorum copiam nobis veteres non suppeditaverint. Quin etiam id quoque aliquando mihi ipse sumpsi, ut res aliquas brevitate gratia nominibus notarem novis, veluti cum massam illam ex materia metallica, & sulphure aliisque corporibus compositam, quam Georgius Agricola *panem ex pyrite constatum* appellat, *pyritidem* vocavi, nomine scilicet ex pyrite, cui massa illa similis est, derivato. Quod si aliqua ex his cuiuspiam videantur duriora, quam ut latinæ aures ferre possint, cogitet iste eorum pleraque in officinis Metallicorum esse procusa: ac si ne ita quidem ejus auribus mollescant, aut imponat ipse magis propria, aut proferat veterum literis usitata. Atque hæc de

nominibus. De ipsis autem rebus sæpenumero magis vereor, ne reprehendar, cum ea ætate scribam quæ in metallica tantum processit, ut numquam magis. Quod si facerem quasi erudiens hujus artis magistros, jure reprehenderer; sed ab eo plurimum absun, neque, ut ea isti cognoscant, quæ ipsis notissima esse non dubito, scribo; sed ut iis, quibus placent certæ rationes, ac præcepta rei metallicæ, aliquod ad eam facile percipiendam afferrem adjumentum: præsertim vero Insubriæ nostræ scripsi, quam doleo ex venis metallicis, quibus sine dubio fecunda est, parum hætenus profecisse. Ac duo quidem maxime video esse in causa, cur apud nostros metallica fere deserta hætenus jacuerit, primo quod plurimos noverint ex agris bene cultis fructus cepisse uberrimos, deinde quod paucos ex fodinis divites factos esse, multo autem plures bonorum jacturam fecisse audierint. At enim, utut vera hæc sint, ex his tamen perperam quis conficeret florentissimæ huic Italiæ regioni fodinarum cultum minime esse accommodatum. Non ego tantopere insanio, ut velim agros bene cultos devastari, venarum inquirendarum causa, aut quempiam a re rustica ad metallicam subito revocare. Habeant sibi Agricolaæ uberes campos, colantque fertiles colles frugum gratia. Est enim agricolarum quæstus si non uberior, at certe magis stabilis, quam metallico- rum, quod nempe agri in perpetuum fruges efferre

soleant, cum fodinæ desinant tandem metalla effundere. At sunt præterea montes steriles & prærupti, valles tenebris circumfusæ, aliaque loca nihil frugum ferentia, quæ non exigua hominum multitudo incolit, qui ob inopiam eorum, quæ ad victum eis necessaria sunt, vel miseram vitam in natali solo degunt, vel extra patriam peregrinari coguntur, ut rationibus suis aliquo modo consulant. Hos autem montes præruptos, has valles tenebricosas, in quibus magnam metallorum vim natura condidit, cur non effodiant ii, quibus rei familiaris amplificandæ cura est, aut qui alias honesti quæstus faciendi rationes non habent? An quod multis metallorum fossio detrimento fuerit? At hæc vetus est querela non nostrorum modo, sed eorum omnium, qui nesciunt quid intersit inter doctum, usuque peritum Metallicum, atque artis ignarum. Ille venas expeditur, & tentat, atque delectas tantum fodit, unamquamque vero, prout cuiusque natura postulat, tractat; iste sine ullo delectu & discrimine venas fodit, sine arte excoquit. Ac artis quidem peritos ex venarum fossione fructus capere uberrimos multa exempla loquuntur. Nam argentaria metalla Fribergi, quæ ad octingentos annos (*), plumbaria Goselariæ, quæ ad sexcentos, Schemnicii, & Cremnicii communia argenti, & auri, quæ ad mille an-

(*) Vide *Agricolam De Re metallica lib. I.*

nos, ferraria Styriæ, quæ ad mille & ducentos; ferraria item Ilvæ in Italia, quæ ad duo annorum millia & eo amplius(*) inexhausta durant, non modo privatos homines, verum etiam Reges & Principes divitiis auxisse Annalium monumenta docent. Quamvis quid externa commemorem, cum nemo ignoret ex nostris quoque hominibus eos, qui si non doctrina, attamen aliquo rerum istarum usu valerent, non exiguam ex fodinis cepisse utilitatem? quid vero quod multos in dies videmus ex fodinis ferrariis rem familiarem vel sustentare vel augere? quis autem dubitet, utiliores has ipsis futuras, majoremque hujus metalli, ejusque optimi copiam, ac minori carbonum impensa ex venis esse conflatu-ros, si cum rerum usu scientiam conjungerent? multo autem uberiores fructum eos fuisse percepturos, qui in venis argentariis, vel plumbariis, vel alterius metalli ferro pretiosioris secundis studium operam-que suam collocassent? Verum quotus quisque hominum nostrorum memoria fuit fodinarum vel Dominus vel Præfectus, qui unamquamque venam, prout oporteret, tractare noverit? Istorum enim plerique optime suis rationibus consultum esse arbitrabantur, si in aliquos operarios ex officinis Germa-

(*) *Vide libellum nuper a me editum, cui titulus Osservazioni Mineralogiche sulle miniere di ferro di Rio, ed altre parti dell' isola d' Elba.*

nicis advenientes incidissent, aut eos ex aliqua regione fodinarum cultu celebrata consulto advocassent, quasi vero isti totius artis esse soleant periti, cum nihil sint minus. Nam, ut mittam homines istos plerumque ex suis regionibus discedere, quod tamquam artis imperiti, vel improbi a Dominis fuerint vel dimissi vel ejecti, eorum alius fodiendi disciplinam percepit, alius lavandi, alius cremandi artificiiis confidit, alius fabricatur machinas, alius fornaces, alius excoquendi artem occultat; singulorum vero industria ad eas tantum venas se profert, quas apud suos tractare consueverunt, quæ a reliquis plerumque plurimum differunt. Quamobrem mirari desinamus, si eorum, qui aut istis se commiserint, aut sine rerum usu ac doctrina ad metalla se contulerint, alii venam magnis sumptibus effossam deseruerint, alii in ea excoquenda oleum, & operam perdiderint, nullus maximam, quam poterat, utilitatem ex fodinis perceperit; sed potius istorum exemplo monitos faciamus eos, qui rei metallicæ dant operam, ut animo rei magnitudinem complectantur, neque iis aut præceptis, aut magistris, aut exercitationibus, quibus utitur vulgus metallicorum, sed aliis quibusdam id, quod expetunt, consequi se posse confidant; quibus si aliquo ad id assequendum adjumento erit labor hic meus, maxime gratulabor me non publicis modo, verum etiam privatis rationibus laborasse. Neque enim eos audiendos esse censeo, qui di-

cunt Metallicæ cultum Insubriæ rationibus non conducere, quod hæc rebus ceteris ad vitæ usus necessariis abundans, lignorum tamen ac carbonum caritate laboret, quæ in dies magis augetur, si sylvæ ac nemora succiderentur fodinarum causa. Si quidem venæ plerumque fodiuntur, atque excoquantur iis in locis, qui tam altis, tamque præruptis montibus ab urbibus ceterisque pagis hominum frequentia celebrioribus dividuntur, ut nec ligna, quorum illic infinita copia est, nec carbones ex lignis confecti, inde efferri sine magnis sumptibus possint; ex quibus locis idcirco nulla istarum rerum in urbes comportatio fit; verum ibidem per prærupta montium [quod egomet sæpe vidi] magna arborum pars vel vetustate collapsa, vel aquarum ventorumque vi prostrata ac disiecta frustra putrefcere permittitur. Quid igitur detrimenti capient civēs, si illæ sylvæ, illa nemora, ex quibus nihil horum ad ipsos pervenit, succidantur metallorum causa? Id tamen, inquit, detrimento erit eorumdem locorum incolis. Imo vero idipsum istis utile accidet. Cum enim magna ipsis suppetat lignorum copia, agris fere careant; ubi sylvæ, & nemora succiduntur, ibi, fruticum & arborum radicibus extirpatis, possunt frumenta serere: qui novi agri brevi tam uberes efferent fruges, ut damnum, quod lignis carius emendis incolæ faciunt, cum usura refarciant.

Restat, ut quædam explicemus, quæ ad hujus operis intelligentiam faciunt. Primo autem eos, qui ex libris nostris proficere se quidquam posse confidunt, monebo, ut se ad eorum lectionem non conferant, nisi prius aliqua lapidum, succorum concretorum, atque venarum, quas mineras vocant, cognitione imbuti sint: quas res si ignoraverint facile ex multis Scriptoribus possunt ediscere, præsertim vero ex clarissimis viris Linnæo (1), Wallerio (2), Cronstedtio (3), Char- teuifero (4), Joanne Antonio Scopoli (5), Wol- terfdorsio (6), Cramero (7), Vogelio (8), & Sa- geo (9). Artificia quoque venarum experiundarum non ignorent: quo in genere *Docimasia* laudati Crameri eis sufficiet. At venarum lavandarum opificia sa- tis ex nobis cognoscent. Etsi enim hanc metallicæ partem ab venarum excoctione aliqui sejungant, illam tamen cum hac adeo copulatam esse per- spexi, ut illius saltem elementa non esse a me

-
- (1) *Système nature* tom. 3.
 - (2) *Mineralogia*.
 - (3) *Essai de mineralogie*.
 - (4) *Elementa mineralogiæ systematicæ*.
 - (5) *Principia mineralogiæ systematicæ*.
 - (6) *Système mineralogix*.
 - (7) *Elementa docimasix*.
 - (8) *Practisches mineral system*.
 - (9) *Elemens de mineralogie*.

prætermittenda existimaverim: qui plura ea in re voluerit, adeat aliquem ex iis, quos superius commemoravi, præsertim vero Agricola, Podam, Delium, atque Monnetum. Quoniam vero ad certa quædam principia, ut recta instituendi ratio postulat, omnia venarum excoquendarum artificia revocavi, nec paucis plane comprehendere potui infinitam illam rerum multitudinem, ac varietatem, in qua ars ista versatur, aliquibus fortasse quædam a me videbuntur omissa, vel non satis explicata. Quamobrem eos, qui hæc legent, monitos velim, ut non tam præcepta, quam præceptorum causas rationesve considerent: quod si faciant, nihil ipsi, ut arbitror, eo in genere desiderabunt, poteruntque ipsi per se ea, quæ singillatim non commemoravi, facile assequi, vel etiam felicius, quam fieri soleat, aggredi. Si quando autem ea, quæ fiunt, simpliciter narro, vel quædam absolute præcipio, quin eorum rationem afferam, eadem mihi probari censenda sunt, vel quod per se pateant, vel quod ex iis, quæ ante dixerim, consequantur. In machinis quoque, & fornacibus describendis etsi brevis fuerim, nihil tamen ad earum intelligentiam deerit. Curavi enim earundem effigies diligenter exprimi, ex quarum lineamentis melius quam verbis istarum rerum & formas & mensuras cognosces. Gallicis autem men-

furis (1) usus sum, quod eas nullus doctorum ignoret: qua ex caussa pondera quæque (2) ad gallica revocavi.

(1) *Pes gallicus æquat $\frac{6}{11}$ brachii mediolanensis, quo Architecti utuntur, ita quidem ut 11. pedes æquent 6. brachia ejusmodi. Quilibet autem pes in 12. pollices dividitur, horum vero quisque in 12. lineas.*

(2) *Libra gallica in duas marcas dividitur, quarum unaquæque ex 8. unciiis constat; ac 119. libræ galliæ æquant 200. libras minores mediolanenses, quarum unaquæque ex 12. unciiis item mediolanensibus constat.*





LIBER PRIMUS

*De Venarum excoquendarum
præparatione.*

I.



Um natura metallum quodlibet pro-
creare soleat impurum, & mixtum
non modo cum terris, succis bitu-
minosis, ac lapidibus, verum etiam
cum alterius generis metallis; ne-
cesse est, antequam excoquantur,
eas res fossiles plerasque a venis
metallicis, has vero, cum mixtæ ex pluribus sunt,
a se invicem, quoad fieri potest, separare. Si
enim, discrimine remoto, hæc excoquantur, im-
pensæ pereunt, quod ex terris, & lapidibus con-
sistentur recrementa tantummodo inania, ex succis
vero bituminosis quidam impediunt, vel difficilio-
rem efficiant metallorum excoctionem, ex mixtura
denique diversi generis metallorum, vel protra-

hatur, vel frustra suscipiatur eorum depurandum labor. Ut vero ea, quæ mixta excoqui utiliter nequeunt, secernantur, venas oportet discernere, malleis vel pilis rondere, cribrare, lavare, urere, vel torrere: quibus modis easdem ad excoctionem, prout opus est, præparare solent periti Metallici. Ad hanc porro venarum præparationem necessaria sunt machinamenta, officinæ, fornaces, quæ omnia suis locis explicabo. Hoc loco id unum monebo, quod ad omnes machinas pertinet, has nempe plerumque a rota moveri, quam aqua in ejus pinnas vel delabens vel impingens versat; atque adeo peritissimi viri esse, rotam omnesque machinæ partes ad aquarum vim, quæ ei in promptu fuerit, ita accommodare, ut ea maximum quem potest effectum gignat. Quod si locus aquam ei non suppeditaverit, equorum aliorumque animantium vires eidem substituat, aut aliis artificiosis machinamentis utatur, quæ pro rerum ac locorum opportunitate ex mathematicorum libris deligere poterit; cujusmodi sunt illa, quibus ventorum vel vaporum calore exhalantium vis ad machinas movendas usurpatur. Generatim vero id teneat, quidquid vel natura vel arte ita comparatum est, ut se moveat, aliis quoque corporibus movendis aptum esse.



CAPUT I.

De Venarum delectu.

II.

Periti metallici, cum venas effodiunt, mox in ipsis puteis aut cuniculis materiam metallicam discernunt a lapide inutili, quem in ipsa fodina, si locus in ea sit, relinquunt. Quod si fossor vel ob imperitiam non fecerit, vel ob venæ naturam facere non potuerit; quamprimum id, quod effossum est, ex fodina fuerit extractum, omne lustrari debet, venæque pars metalli particeps discerni ab ejus parte metalli experte: quin etiam fragmenta in partes minores frangenda sunt, ut isto etiam modo præstantiores partes a vilioribus & inutilibus discernantur: id quod duobus modis fit, vel in area, vel in abacis. Aream oportet esse ex lapidibus durissimis arcte stratam; in hanc autem fragmenta majora conjiciuntur, ut malleis comminuantur. Constant isti ex ferramento ponderoso, & manubrio ligneo non admodum crasso, ut flecti possit, sed longo ad pedes tres & dimidium; ut operarii ejus pondere inclinatione vehementius venarum fragmenta percutere possint. Pedes autem corticibus quasi ocreis arment, manus chirothecis prælongis tegant, ne glareæ de fragmentis defilientes eos faucient.

Quibus modis
rudis quidam
venarum delectus
fit.

III.

Sed diligentior venarum earundem delectus in abacis fit. Sunt autem abaci mensæ quædam, ad quarum latera, & tergum asseres ex iis pedem eminentes affixi sunt; frons, cui operarii assident,

Quomodo
diligentior venarum
delectus
in abacis fit.

patet, ibique locati sunt duri & lati lapides, vel in abacis ipsis infixæ sunt laminæ ferreæ, quibus fragmenta venæ comminuendæ imponunt. Eorum vero alii venæ massas malleo lato percussas frangunt, & in unum vas conjiciunt, alii easdem in minores adhuc partes tundunt, & præstantes a vilioribus, atque venas diversi generis discernentes, eas separatim in diversa vasa injiciunt: quorum primi *malleatores*, alii *discretiores* appellantur. Utrumque hoc munus non viri modo suscipiunt, sed etiam mulieres, & pueri, quorum multi uni eidemque abaco assident. Commodius tamen labor iste perficeretur, si abaci ita essent extructi, ut ad quemlibet non plus quam duo operarii assiderent, malleator nempe à fronte, secretor a tergo, alveis vel corbibus inter unum alterumque abacum interpositis. Hoc enim modo in idem vas uterque conjicere posset venas præstantiores, & secretor in corbem malleatoris mox rejiceret fragmenta grandiora, ut iste iterum ea comminuat.

IV.

Est autem secretoris munus venas mixtas Quæ venæ secretari debeant. secernere. Mixtas cum dico, eas intelligo, quæ vel ad lapides, vel ad venas alterius generis metalli in massulas ita adhærescunt, ut malleo, aliove simili instrumento avelli ex iis possint. Nam quæ per lapidem, vel per alias alterius generis venas ita sunt dispersæ, ut hoc modo separari ex iisdem nequeant, compositiæ potius dicendæ sunt, aliterque tractandæ. Primo itaque seorsim in vasa injiciat metalla, quæ vel nativa, vel forma calcis, vel a sulphure soluta natura procreavit; massulas autem metalli divites cum a lapide avellit, caveat, ne illarum quidpiam ad hunc adhærens relinquat.

Pseudogalenam, quam vocant, & pyritem ex ferro, & arsenico compositum, pyritem quoque sulphureum, nisi forte ad certas operas utilis futurus sit, rejiciat. Zincum, bismutum, & cobaltum ab aliis cujusque metalli venis diligenter sejungat; venam denique ferri a vena tum cupri, tum stanni. Sed venæ cupri & argenti; argenti itidem & plumbi, cum mixtæ excoqui possint, non semper, nec eadem diligentia erunt secernendæ. Generatim vero illæ venæ, in quibus multum metalli inest, ab his in quibus paucum, secernere oportet, ut separatim excoquantur. Atque hæc de venarum delectu satis hoc loco sint.

V.

Sed qui venas argenti, vel auri ditissimas effodiunt, in eadem officina, in qua abaci sunt, certum spatium asseribus sex pedes altis sepiunt, ejusque solum asseribus itidem tegunt, ut nulla rima appareat. In hoc vero quasi cubiculum venas, quas diximus, invehunt, easdemque secernunt viri, quorum fides perspecta sit. In hoc etiam metallorum, quæ nativa sunt effossa, veluti argenti rudis massas dilatant, quas deinde forcibus concidunt, ut liquari facilius possint. Has vero, & quæ sunt pretiosiora in tuto domicilio Præses officinæ asservet.

VI.

Delectui venarum nonnunquam lotura quædam præmittitur, cum nempe metalli divites sunt, & terra involutæ, ut, hac quasi larva ab aquis detracta, facilius internoscantur. Cum ergo id facere oporteat, ad ipsos puteos, vel cuniculos, ex quibus educuntur venæ, paratus sit lacus aqua fere plenus, in quem mox conjiçiantur; tum bacillo agitentur, ac demum aqua permittatur ex eo effluere.

Quæ cautio
adhibenda in
delectu venarum
auri vel
argenti ditissimarum.

Quando vena
lavandæ sint,
antequam se-
cernantur.

Si periculum sit, ne aqua effluens secum rapiat ramenta metallica, ea vel per cistam ex viminibus arte contextam transmittatur, quæ eadem ramenta sistat, vel in fossas adducatur, in quibus ea possint subsidere.

CAPUT II.

De Venarum comminutione.

VII.

Quibus modis
venæ commi-
nuantur.

VENÆ comminuuntur vel ut laventur, vel ut mox excoquantur. Cum lavandæ sunt, minutissime tunduntur; sed ad excoctionem satis est nucis avellanæ vel vulgaris magnitudinem eis dare; quod sæpe in ipsis abacis perficitur. Quo vero difficilior liquefcent, eo magis comminuuntur, ut eas ignis facilius penetret. Comminuuntur autem vel malleis, vel pilis præferratis. Malleos vel trahunt viri, vel movet machina. Uno ictu sæpe in minutissima fragmenta tunduntur venæ, quæ huc illuc disperguntur; sed fragmenta grandiora colligere oportet, & iterum malleis subicere. Ne vero, cum pretiosum metallum in ipsis inest, hujus pars aliqua in pulverem resoluta evolet, aliquantulum madefiant. Hæc venarum tundendarum ratio valuit, quoad seculo XVI. pile inducæ sunt, quæ Metallicis majorem omnino præstant utilitatem. Pilis autem venæ vel udæ, vel siccæ comminuuntur. Venas udas vocamus aquis, dum pilis tunduntur, madefactas: quo modo etiam interdum pile uda vocamus item aquis madida: contra venas siccas, vel pile sicca appellamus, si nullæ iis sint affusæ aquæ. Machina, qua venæ udæ tunduntur, constat ex capsâ, in

Fig. 1. 4. 5.

Quibus ex causa pars metallica ex venâ tusa in aquis fecernatur, aut cum terrena materia commixta remaneat.

quam pila præferrata a dentibus axis rotæ elevata delabuntur, atque venam ipsis subiectam, & cum aqua commixtam tundunt. In ejus vicinia fossæ existunt, in quas aquæ una cum vena tusa derivantur, ut in iis pars metallica & gravior suo pondere secernatur a lapidea & leviori. Secretionem ejusmodi, quæ est veluti quoddam loturæ genus, assequi non possumus, nisi certis cautionibus adhibitis, quarum præcipua hæc est, ut quælibet venæ particula, quoad fieri potest, æqualem magnitudinem obtineat. Cum enim aquæ ad se attrahant corpora in iis demersa, impedimento sunt, ne hæc proprio ponderi libere obsecundent; eo autem magis aquæ ista ad se trahunt, quo major est eorum superficies comparate ad eorundem massam. Quamobrem, si quæ particulæ sint graviore, sed tenuiores, fieri potest, ut tardius vel eodem tempore una cum illis in aqua subsidant, quæ, etsi leviores sint, majorem tamen obtinent massam comparate ad earundem superficiem. Eadem causa facit, ut venæ nimium attenuandæ non sint, ne forte aquis innatent: quod maxime cavendum est, cum pars metallica leviuscula est, & pretiosa, veluti si agatur de vena argenti, vel cupri in lamellas figurata. At cum metalla minus adhærescant ad aquas, quam lapides, quod isti aquam magis combibant, quam illa; plerumque utilis accidet tenuior venæ comminutio, maxime cum hoc modo pars metallica a lapidea magis avellatur. Sed machinam paullo diligentius explicemus. Fossa excavatur profunda tres pedes, lunga quantum satis sit, ut certum capfarum numerum capiat, quarum unaquæque tres saltem pedes lunga sit. Capfæ cujusque fundum tegitur solea ferrea, cujus utrumque latus cuneatum in trun-

*Pila una quo-
modo extrahitur.*

cum subiectum adigitur; prior vero, & posterior ejus pars eidem trunco affiguntur clavis ferreis. Sed alii, cum animadverterint ferrum usu consumi, ejusque ramenta cum vena comminuta commisceri, fundum ex lapidibus contusis parare malunt: quod qui fiat paullo post dicemus.

VIII.

Ad latera capsæ cujusque statuuntur duo tigna querna *b*, lata novem saltem pollices in quolibet latere; a capsâ pedibus tribus duo tigna transversa continenter conjunguntur, quorum capita intrinsecus parum recisa jacent in formis exterioribus tignorum statutorum, atque ibi cum ipsis terebrantur; perque foramen hoc rotundum penetrat clavus ferreus, cujus alterum caput perforatum est, quod cuneo trajecto sic coercetur, ut tigna arctius constringat; cuneus autem ita in illud includitur, ut, cum opus est, facile extrahi possit. Aliqui, ut machinæ majorem dent firmitatem, tignis stratis *dd* eam quasi imponunt, quæ transversis *ee* conjungunt; statuta autem tigna *b* obliquis *u* obfirmant. Sed satis erit tigna statuta in capsarum fundum, eorumque superiora capita in formis trabium domicilii includere.

IX.

Capсарum parietes *f* ex quernis asseribus tres pollices crassis fiunt, qui ad anteriorem machinæ partem ex officinæ solo extant duos pedes, ne quid in ipsas incidat, neve quid ex iis desiliat: cui periculo quoque occurritur, si capsæ virgultis, aut asseribus obtegantur. Parietes istos asseribus externis *g* in solum infixis, hos vero tignis stratis *ee* alii obfirmant, quodque cavum inter asseres restat, terra replent, quam bene tundunt. Ad alte-

rum capſarum latus, quod eſt prope rotam *G*, quæ machinam verſat, aqua per canaliculum in eas inſluit; atque hæc unà cum vena comminuta ex iſſdem effluit vel per canaliculos, vel per oſtium, ad quod pro foribus ſita eſt vel lamina ferrea foraminum plena, vel crates ex filis ferreis aut æneis retis inſtar contextæ; cujus aut laminæ aut cratis foramina minora, vel majora faciunt, prout magis vel minus ſubtilem volunt eſſe venam comminuendam.

X.

Pila *NZ* efficiuntur ex tigillis craſſis quinque vel ſex pollices in quolibet latere, longis quatuordecim pedes: in eorum parte inſima caput ferreum *Z* firmiter, & recte includitur, quod durifſimum eſſe oportet, & pondo quinquaginta vel octoginta librarum pro diverſa venæ tundendæ duritiæ. Habeat vero quodque pilum retro brachium *v*, quod inferius ſevo linire oportet, ut eo facilius a dente *w* attolli poſſit. Illud autem axis dentes rotundati *w* viciffim attollunt, ut pilum decedens in capſam lapides in ea conjeſtos contundat, & comminuat. Dentes certo ordine, & numero in axe locandi ſunt, prout citius vel tardius pilorum motus perfici debet. In figura 2., quæ axis circumferentiam explicatam exhibet, inſpicere licet, quid in hac re fieri poſſit, cum ex novem pilis machina conſtat. Sed ut recta nec nutantia attollantur, & decident pila, in certo ſpatio continenda ſunt bacillis ferreis, vel tigillis in tigna tranſverſa *m* recte infixis.

Fig. 6.

Fig. 5.

XI.

Qui capſarum fundum ex lapidibus conſtituiſis parant, eos eligunt, quibus granitum nomen

Quomodo patetur capſarum fundus.

est; atque tantumdem eorum in capsas injiciunt, quantum fatis sit, ut, postquam a pilis fuerint contusi, ad justam altitudinem fundus assurgat. Tum, aqua in rotam immissa, permittunt pila moveri, quorum ictibus cum satis duruerit fundus, sistunt eorum motum. Sed ut lapides, dum comminuuntur, ad se invicem adhærescant, aliquantulum aquæ ipsis affundunt. Fundus ejusmodi ad eas venas accommodatus est, quæ, cum tunduntur, ad ipsos lapides, ex quibus ille factus est, non adhærent.

XII.

Vena comminuenda in capsas injicitur diversis modis. Alii ex infundibulo *p* eam demittunt hoc modo. Istud sustentant ligno rotundato *T*, ita ut hinc inde libratum sit: bacillum *on* ita tignis transversis accommodant, ut a brachio *r* ex superiori parte unius pili extante percuti possit, cum pili caput ferreum capsæ fundum contingit; ac tum deprimere possit infundibulum: quo modo, statim atque nihil subiectum pilis sit, ex infundibulo decedit in capsam certa venæ portio. Alii vel corbis vel batillis in capsam, cum opus est, injiciunt venam; sed, cum sæpe operarii ad hoc munus tardi veniant, juvat quasi admonitorem in machina constituere, qui eos moneat, quando nova materia injicienda sit. Id autem facile assequi possumus, si nimirum in tignum statutum *bb* laminam ferream, vel æneam in ea altitudine infigamus, ut cum pili caput ferreum, vena in capsis deficiente, fundum contingit, ea percutiatur a brachio ferreo, quod ex proximo pilo emineat. Alii demum statò tempore, puta post duas vel tres horas, venam in capsas injiciunt: quod tempus variat pro diversa materie comminuendæ natura.

Fig. 5.
Qua ratione in
capsas conjici-
tur vena
comminuenda.

XIII.

Aquæ una cum vena comminuta ex capillis effluentes canaliculis in officinæ solo excavatis excipiuntur, qui in fossas exonerant. Illi autem eo magis declives sint, quo longius distant fossæ. Secus enim tanta materiæ copia in iis subsideret, ut brevi obstruerentur. Sed fossas in ipso domicilio, ubi venæ in tabulis lavantur, constituere præstat, ut & commodius ad loturam deferantur, & tutius asferrentur. Cum vena tenuius comminuenda est, ea octo aut novem fossis excipitur; sed si crassius, minor earum numerus sufficiet. Fundus vero earundem, & utrumque latus ex asseribus fiant, ne terra sorbeat metallorum ramenta, aut aquis madafacta in ipsas fossas incidat. Ad Fribergum ea est fossarum dispositio, quam figura 7. exhibet. Primæ *og* fundum declive est versus aquarum ductum; quo in loco est profunda pedes duos. Altera *ho* eandem habet profunditatem ac prima, sed longior est. Tres, quæ subsequuntur, profundæ sunt pollices viginti; istis minus profundæ sunt fossæ *ko*, *lo*; sed quæ ultimæ est proxima, est quatuor pedes profunda, ultima sex; atque ex hac in rivum, vel flumen aqua derivatur. Ex altera fossa in alteram aquæ perveniunt per canaliculos versus aquarum superficiem sitos; ne vero, quod in iis subsidit, iterum attollatur, sistitur aquæ influentis impetus asserculis inter unam alteramque interpositis. Ex iis autem, quæ paullo supra diximus, facile intelligitur, in primis fossis subsidere particulas gravioras, in mediis leviores, in postremis levissimas, quæ cum tardissime descendant, idcirco fossis profundioribus, & ceteris duplo vel triplo grandioribus excipiuntur, ut diutius aqua in ipsis

Fossarum dispositio.

Fig. 7.

consistat. Contra, quæ mediæ sunt inter primam, & ultimas, minus profundæ fiunt, eo quod in his subsidere debeant ramenta metallica, quæ ex antecedentibus effluerunt: quæ, quod sint leviuscula, una cum limo fundum peterent, nisi ob minorem fossarum profunditatem limus & arenulæ leviores in aqua innatantes citius una cum hac præterfluerent in subsequentes. Id porro, quod in singulis fossis refedit, post certum tempus separatim eximitur, & separatim lavatur.

XIV.

Vila sicca. A pilis udis, quæ modo explicavimus, non differunt sicca, nisi quod ad ista nulla affundatur aqua, & in capsarum fronte nulli parietes erigantur, ut facilius in eas vena injiciatur, atque ex iis facilius extrahatur. Fundus autem earum solea ferrea necessario tegitur; quod lapides contusi tenacitatem non retineant, si madefacta non sint. Ad unum vero eundemque axem pila tum sicca tum uda constitui possunt; quin etiam iisdem pilis modo udam venam, modo siccam tundere licebit, prout res hoc aut illud postulaverit. Siccæ autem comminuuntur venæ, quæ, quod metalli divites sint, loturæ non indigent, vel quæ nequeunt lavari sine magna jactura præstantioris partis; cuiusmodi sunt venæ cupri in lamellas figurati, quod ob levitatem seu tenuitatem particularum una cum limo aquæ rapiunt.

XV.

Quæ venæ pilis udis tundantur, & quibus ex causis plus minusve tenues sunt.

Udæ comminuuntur venæ, quæ lavandæ sunt, easque magis, vel minus tenues facere oportet, quo gravior, vel levior est pars metallica, quæ ipsis inest, vel potius pro diversa earum natura. Quo diutius sub pilis perstant, atque hæc magis

ponderosa sunt, & altius attolluntur, eo tenuiores illæ evadunt. Porro pila ex altitudine VIII. saltem pollicum, XVI. ut summum delabi debent. Diutius autem perstant sub pilis, quominus aquæ in capsis inest, quove minor est aquæ in eas influentis, vel ex iis effluentis vis. Ac si quidem aqua una cum vena comminuta ex capsis per foramina cratis effluat, ea minuscula, vel majuscula exit pro diversa foraminum magnitudine. At si per canaliculos ex capsis derivetur in fossas, venæ una cum aqua effluentis magnitudo pendet maxime ex eorum distantia a fundo: volunt autem aliqui eos a fundo distare XVII. vel XVIII. pollices, cum tenuis admodum esse debet vena; X. vero, vel XI. pollices, cum crassiusculam esse oportet. Sed & celeritas, qua pilorum ictus iterantur, in causa est, ut magis minusve tenuis vena per canaliculos effluat: quo enim celerior est eorum motus, eo magis agitur aqua, & continuo attolluntur particule etiam graviore, quæ, antequam iterum subsidant, ab aquis sæpius extra capsas rapiuntur. Venam durissimam urere interdum juvat, ut, duritie deposita, facilius comminuitur. Quod maxime præstandum est, si cum ea ferrum commixtum sit excoctioni venæ nocivum. Ferrum enim, cum crematur, levius fit, ita quidem, ut ab aquis facilius rapiatur. At quo major est venæ durities, itemque quo minus pila sunt ponderosa, & tardius attolluntur, minor ejus copia stato tempore comminuitur. In Machina ad Fribergum constituta, quam descripsimus, ferunt qualibet hebdomada comminui centum lapidis non durissimi exiguos currus.

Quantam venæ
molem certo
tempore pile
tundant.

CAPUT III.

De Venarum lavatione.

XVI.

Quæ sint ve-
narum lavan-
darum ratio-
nes.

Quæ venæ,
& quomodo in
cribro laven-
tur.

Fig. 3.

DUæ lavandi rationes sunt plurium metallorum communes: lavantur enim vel in cribro, vel in tabulis devexis. Ceteræ vel ad has revocantur, vel quorundam metallorum sunt propriæ. In cribro lavantur venæ, quæ crassiusculæ sunt, sed quæ nunc magnitudinem vix æquent. Ad hoc opus paratum sit labrum *P* latum tres saltem pedes, & dimidium, totidemque sit profundum. Ad latus in loco editiori sita sit capsula *R* e fronte patens, in quam res lavandæ, vel cribrandæ imponuntur. Cribra quoque in promptu sint, quorum foramina in aliis sint latiora, in aliis angustiora; sed quæ latiora sunt, vix tertiam pollicis partem æquent. His paratis, lotor venam conjicit in cribrum in altitudinem trium, vel quatuor pollicum, eamque complanatam recte in aquam demergit; tum leniter in circulum ducit, & succutit cribrum: quo succussu id, quod foramina penetrare potest, transmittit in subiectum vas, reliquum in cribri fundo remanet. Hoc triplex esse solet, metallicum, quod inferiorem locum obtinet, faxeum, & terreum, quod superiorem, mixtum ex utroque, quod medium inter duo illa est: gravius enim semper descendit, levius vis aquarum sursum fert. At, si vena ex metallis diversi generis mixta sit, quorum non idem sit pondus, id, quod residet in cribro, multiplex est, & unumquodque ex ordine cuiusque gravitatis diversum locum obtinet. Hæc porro se-

paratim auferuntur radio, qui tabella tenuis est ferme semicirculi figura: postea iterum alia materia in cribrum conjicitur, & succutitur. Caveat autem loto, ne cribrum, dum succutit, inclinet ad latus: nam glareæ, & arenæ ex una parte amoverentur, ac iterum materia metallica commisceretur cum inani. At ramenta metallica ex cribro collecta simul cum aliis coquantur; minutulæ arenæ, quæ in vase *P* resederunt, iterum lavantur in cribro angustiori, vel in angustissimo, cujus fundus setis est contextus; quodque radio aufertur, si vena metalli dives fuerit, in tabulis lavatur, si pauper abjicitur. Hæc lavandi ratio utilis est, cum vena pretiosa est, & dives, atque, deficientibus pilis, malleis comminuitur. At ubi pila constitui possunt, possunt autem, quoties locus aquarum copiam suppeditaverit, est prorsus rejicienda. Nam, etsi in cribro venæ eodem tempore & lavari, & discerni quandoque possint, attamen delectus earum æque fieri potest in cribro ac in abacis, eademque minori impensa pilis comminuuntur, & in tabulis devexis lavantur.

XVII.

Constant autem tabulæ istæ ex canali declivi *cb*, & ex capite *a*, quod altius est quam canalis. Earum duplex est genus. In aliis enim inchoatur, in aliis absolvitur venarum lavatio. Quæ primi sunt generis ita fere extruuntur uti in figg. 8. 9. 10. exhibentur. Canalis ex asseribus inter se coagmentatis constat; ad ejus partem infimam cataracta *d* versus fundum perforata existit, cui subjectus est canalus transversus *r*, qui, quod ex tabula effluit, excipit, & in fossas exonerat. Aræ canalus devexi asser stratus *c* quasi gradus imponitur; idemque ca-

Vol. I.

F

Qua ratione
venæ in tabu-
lis lavantur.

Fig. 8. 9.
10.

Tabulæ, in
quibus rudis
venarum lava-
tio suscipitur.

Fig. 8.

Fig. 11.
12. 13.

Tabulæ, in
quibus diligen-
tior venarum
lavatio peragi-
tur.

nalis ita declivis locatur, ut cum horizonte angulum 20. vel 30. graduum intercipiat. Sed alterius generis tabulæ artificiosius sunt elaboratæ; ac illæ quidem, quæ ad Fribergum usurpantur, quæque ceteris præstant, ita se habent ut in fig. 11. 12. 13. Canalis devexi fundum seu aream ex asseribus faciunt arcte inter se conjunctis, & cum tignis, quæ crassa sint quatuor, vel quinque pollices, & totidem extent ex area. Caput ex canali eminet VII. vel VIII. pollices, illudque duobus asseribus quasi gradibus *11*, *22* distinguitur. In primo spatio *312*, quod ab his asseribus intercipitur, eriguntur duo asserculi *17* in angulum vergentes, quorum altitudo est trium pollicum. In hoc receptaculum aqua influit ex canaliculo *g*, quæ assurgens delabitur in proximum receptaculum *3112*, ex quo iterum assurgens in gradum *x* defluit, cui proximus est asserculus transversus *u*, quem attollunt, cum linteis tabulam contegunt, ut subipsam postremi lintei caput insinuent. Omne hoc artificium eo spectat, ut aqua leniter in gradum influat. Ut vero facile exoneret aqua redundans, in fundo receptaculi foramen *r* existit, quod turbine claudunt, vel, eo detracto, aperiunt, prout opus est. Ad infimam canalis devexi partem duo asserculi *m* in aream oblique insiguntur, ut materiam metallicam sistant, dum aqua cum limo & arenulis ex eodem effluunt. Ejusmodi tabulæ, veluti *xy*, in eodem conclavi locari possunt, in quo fossæ superius commemoratæ concluduntur *. Ad cujusque caput supremum sit canalis *y* cum fistula *g*, ex qua aquæ in ipsum caput influunt; ad imum vero caput in conclavis solo aliquot fossæ *s*, *t* cavatæ sint, quarum aliæ excipiant materiam metallicam, quæ, postquam

Fig. 7.
* §. XIII.
Fig. 13.

pura facta est, ex tabulis permittitur effluere, aliæ arenam iterum lavandam, vel eam, quæ metalli inanis est. Fossæ autem istæ asseribus septæ sint, atque ita extructæ, ut aquæ, postquam materia gravior subsiderit, in canalem *rr* exonerent, qui ad rivum vel flumen pertineat. Ut vero unaquæque materia ex tabulis effluens separatim in alterutram fossam influat, lotori in promptu sit capsula mobilis *B* uno latere patens, atque hanc aquis ex tabula effluentibus ita subjiciat, ut illius pars patens modo unam modo alteram fossam spectet, prout in una vel altera earum materiam cum aquis permistam derivare ei opus fuerit. Ceterum in conclavi aliquot fornaculæ extruantur, quæ si opus fuerit, hyeme ardeant, ne aquæ in tabulis congelant.

XVIII.

Jamvero cum in primis tabulis vena lavanda est [quod plerumque fit, antequam in secundis diligentius lavetur], ejus quatuor vel quinque centumpondia lotor in tabulæ caput injicit, & aqua in ipsum per fistulam, quæ ad ipsum caput est, immisâ, certam venæ portionem, puta quindecim libras, in aream adducit rutro ligneo. Sic enim appellamus instrumentum *A* confectum e peritica in asserculum longum XIII. pollices, latum VIII. infixa. Hoc autem rutro a parte canalıs fere media versus caput assidue reducit venam ab aquis deorsum delatam: quo motu id, quod gravius est, in superiori parte residet, reliquum vel in inferiori subsidet, vel una cum aqua per cataractæ foramen in subiectum canalem delabitur. Aliam deinde atque aliam venam eodem modo in aream adducit, & agit; sed, cum certa ejus portio subsiderit, cautius eam dimovet, ne iterum at-

Fig. 8.

n. I.

Quo modo
vena primo la-
vetur.

Fig. 14.

tollatur. Cum denique lotor id, quod refedit in area, satis purum esse animadvertit [quod plerumque prodit fuscus quidam color, quo nitet] fistulam, per quam aqua infuit in caput, occludit; mox ea, quam continet canalis, effluit: quod cum primum factum fuerit, vel, cataraetâ sublatâ, per infimam canalís partem venam eximit, vel seorsum ejicit glareas majusculas, quæ in suprema canalís parte resident, seorsum mediocres, quæ in medio subsidunt, seorsum limum, qui in infima subsidit: atque hæc omnia loturæ diligentiori reservat. Quoniam vero limus, qui in fossas defluxit, cum ramentis metallicis mixtus esse solet, iste quoque, si opus fuerit, iterum lavatur. Ut plurimum tamen, quæ materia primo ab aquis extra tabulam rapitur, metalli tam egena est, ut eam iterum lavare e re non sit.

XIX.

Diligentior
venæ lavatio.

Ratione non admodum dissimili lavatur vena in tabulis secundi generis. Hujus quinquaginta libras plus minusve, prout crassiuscula vel tenuior est, lotor injicit in capitis gradum, eamque puram facit scopis sursum versus quasi verrens supremam partem; verum non æqualibus ductibus, sed modo rectis modo obliquis: tandem copiosiore aquam in aream immittit, ut puriorem faciat venam. Quo facto, id, quod refedit, per infimam tabulæ partem eximit, id ipsum interim agitans, ut aquæ, quod reliquum est terrenum ac saxeum, eluant. Alia deinde atque alia vena eodem modo lavatur, & quod in fossas defluxit, dum venæ lavarentur, colligitur, ut iterum lavetur.

XX.

Hæc, quæ summatim de venarum lavatione

præscripti, experientissimum lotorem postulant, aptamque tabularum dispositionem. Primo autem necesse est aquam non præcipitem, sed lenem in venam influere, ne cum limo arenisque levioribus etiam ramenta metallica extra aream rapiat. Hanc quoque ob causam nimia non sit canalis devexitas, sed venarum naturæ plane accommodata. Etenim ad levioris & tenuioris loturam minor esse debet canalis declivitas, quam ad crassioris, & gravioris. Nam ob majorem declivitatem ocus aquæ defluunt, venæ autem, quo tenuiores levioresque sunt, tardius in aquis subsidunt. Quamobrem, nisi tenuior & levior vena in canali minus devexo lavetur, aquæ hanc in area subsidere non permittent, sed extra tabulam rapient. Qualis autem esse debeat tabularum declivitas experiri poteris hoc modo. Venæ lavandæ certam portionem in tabulam injicito, tum ejus caput ita elevato, ut quantum volueris declivis fiat; aquâ autem in eam immissâ, vide utrum metallica materia transferatur ab aquis, an in iis subsidat. Si extra tabulam, vel nimis longe a capite transfertur, ejus caput deprimito; sin subsidat una cum limo & arenulis, illud attollito, quoad animadverteris satis purum subsidere quod metallicum est. Hanc porro declivitatem retineto. Si ita extruantur tabulæ, ut magis minusve declives fieri pro lubitu possint, vel earum caput attollendo, vel partem ei oppositam deprimendo, quod factum difficile non est, experimentum ejusmodi instituere licebit, quoties diversa venæ natura postulaverit, sed firmæ ac fixæ solent constitui, atque adeo id perfici nequit, nisi cum tabulæ novæ extruantur. Tum vero earum plures in diversis declivitatibus gradibus oportet esse paratas, quarum quæ loturæ ve-

Animadversiones ad rectam venarum lavationem.

næ crassiusculæ inserviunt, ita declives sint, ut cum *horizonte* angulum 20. graduum intercipient; æ autem, in quibus limus, & arenæ tenuiores lavantur, declivitatem habeant 7. vel 8. graduum. Sed longitudinis etiam, atque latitudinis tabularum habenda ratio est. Ac tenuior quidem vena longiores postulat, ut cum tardius subsidat, diutius in iis persistet. Nimum tamen longæ non sint, ne ultra quam par est labor protrahatur. Volunt autem tabulas non esse XVIII. pedibus longiores, nec XII. breviores. Ad latitudinem quod spectat, eas ita oportet facere latas, ut interim dum lotor in una aræ parte venam sursum versus reducit, in altera nimium longe a capite non rapiatur ab aquis: quod quidem periculum tum maxime existit, cum celerius aquæ in tabulam defluunt. Plerumque tabulas faciunt latas II. vel III. pedes; latiores tamen fieri possunt, si in iis limus lavandus sit, ut qui lenissimis aquis lavetur. Ipsa quoque rutri latitudo non minimum habet ad loturam momentum. Nam quo major ea est, citius certe vena versus caput reducit, citiusque lavatur; sed quia ex rutri latioris objectu aquæ magis coercentur, istæ altius assurgunt, & celerius, quam par est, ad latera defluentes secum rapiunt graviora quoque metallorum ramenta. Ceterum postquam certa dispositio ac forma tabulis data est, ex majori vel minori aquæ copia, quæ in ipsas immittitur, maxime pendet recta diversarum venarum lavatio. Quod quatenus fieri debeat ex iis, quæ diximus, haud difficile intelligitur.

XXI.

Quæ incommo-
da existant in
vulgari lavandi
ratione.

Etsi vero lotores in suo munere diligentissimi sint, attamen in metalli ramentis certa pulveris terreni portio remanet, atque cum materia ter-

rena, quæ ex tabulis effluit, pars aliqua metalli perit. Quorum alterum existit primo quod multæ ex terrenis particulis sint metallicis crassiores, deinde quod ramenta metallica, dum in aquis descendunt, offendant in terrenas particulas, quas deorsum urgent. Alterum vero accidit, quia pars pulveris metallici leviuscule est, atque adeo ab aquis extra tabulas rapitur, utpote qui tam diu in ipsis non consistat, ut possit subsidere. Hisce incommodis ut lotores occurrant, materiam versus caput assiduo reducunt: quo artificio contendunt efficere, ut & pulvis terrenus, qui cum metallico in superiori tabulæ parte refedit, iterum in aquis sublatus possit defluere; & quæ ramenta metallica una cum terrea materia longius a capite aqua pertrahit, versus caput reducta possint & ipsa subsidere. Sed dum hæc fiunt, primum labor multum producitur, deinde pars pulveris metallici, qui versus caput jam refedit, iterum in aquis sublatus deorsum ab istis rapitur; pars vero pulveris terreni versus caput reducti iterum cum metallico commiscetur. Ac si quidem secretio materiæ metallicæ a terrena ex uno aquæ motu penderet, difficile non foret, hunc ita moderari, ut unaquæque materia pro diverso ejus pondere in diversis tabulæ partibus sua quasi sponte subsideret. Ad id enim sufficeret tabulam tam declivem ponere, ut aqua eo tardius deflueret, quo longius a capite recedit: quem in finem caput summum *A* tabulæ imo *I* altius esse deberet aliquanto minus decima tabulæ longitudinis *AI* parte. Nam quemadmodum Cl. Bossutius (*) expertus

Fig. 14.
n. 1.

(*) *Traité d'Hydrodynamique.*

Quomodo nova quidam tabularum dispositione hisce incommodis occurrere possit.

Fig. 14.

Fig. 14.
n. 1.

Fig. 13.

Fig. 14.
n. 1.

est, tunc aqua ex canali declivi eadem celeritate effluit, qua illa in ipsum influit, cum illius altitudo *AM* æquat decimam longitudinis *AI* partem: quæ celeritatis diminutio ex attritus impedimentis maxime oritur. At ea res ex tam multis, tamque æstimatu difficilibus pendet, ut quæ incommoda in venarum lavatione existere diximus, tolli prorsus nequeant. Eadem tamen minuet, qui hoc artificio utetur. In area nempe tabulæ duo tabellæ *urDC*, *trDE* aggeris instar *urt* locentur, quarum una *ur* acclivis sit, altera *st* declivis; similisque tabella acclivis *ma* in ima tabulæ parte constituatur. Hoc artificio pulvis metallicus, qui in vulgaribus tabulis ab aqua longius a capite rapitur, objectu tabellæ acclivis *ur* in superiori earum parte consistet, aut, si ultra aggerem feratur, eundem sistet alter agger *ma*. Nam ex tabulis *ur*, *ma* ea tantum aquæ portio defluere potest, quæ aliquantulum a tabulæ fundo distat, ea nempe, in qua particulæ leviuscule innatant. Atque hoc sane modo illud quoque detrimentum declinatur, quod in tabulis existit, ex quibus aqua effluit per os *OR* tabellis *Rm*, *Om* coarctatum. Nam cum aquæ facilior per istud exitus pateat, celerius versus ipsum ea confluit, & secum rapit non minimam partem pulveris metallici. Quoniam vero aggere *urt* in duas quasi partes divisa tabula est, lotor tutius poterit modo in una, modo in altera materiam puriorem rutris facere, quin aquarum motus materiam, quæ in alterutra resederit, turbet. Pro diversa autem venæ lavandæ natura licebit aggerem *urt* magis minusve capiti proximum ponere, vel altiorem aut humiliores facere, vel tabellam *ur* plus vel minus acclivem locare. Ceterum qui venæ lavationem in novo hoc

tabularum genere fuscipiet, reliqua teneat, quæ de vulgaribus diximus.

XXII.

Nonnunquam area linteis extensis, & radio æquatis contegitur. Horum primum tenet infimum locum, in quo secundum ita collocatur, ut ipsum paullulum tegat, in secundo similiter tertium locatur, & deinceps alia in aliis. Si enim contrario modo collocarentur, aqua defluens metallorum ramenta raperet sub ipsa, & labor inutilis fusciperetur. Ultimi autem caput sub asserem transversum, de quo paullo supra diximus *, insinuatur. Ad venam tenuiorem ac ditiores hæc lavandi ratio præfertim usurpatur. Ejus LXXV. libras in caput canalis lotor injicit, quam rutro in lintea adducit, eandemque per totum illud spatium, quod linteum supremum occupat, reducit versus caput. Ut primum vero in hoc linteo venam puram fecerit, eundem laborem iterat in proximo, & sic deinceps. Denique lintea aufert, eaque separatim lavat in lacubus prope positis. Quæ in superioribus linteis subsidit, pura solet esse, sed quæ in infimis, impura est, iterumque in tabulis lavatur. Lintea in lotura metallorum idcirco inducuntur sunt, quod ramenta metallica facilius ad ea adhærescant; sed cum terrenæ quoque particulæ facilius in iis consistant, nullam fere utilitatem metallicis præstant; atque adeo in Saxonia, aliisque regionibus hodie deferuntur. Usui tamen esse possunt, si arenæ grandiusculæ cum metallicis ramentis permixtæ lavandæ sint. Copiosiores enim, ac rapidiores aquæ, quibus eas lavare oportet, lapillos majusculos per lintea devolvunt, ramenta autem metallica non item, quod ob tenuitatem asperitatis linteorum quasi septis coercerant.

Quod momentum ad venarum lavationem habeant lintea in tabulis extensa.

* §. XVII.

Lavatio in al-
veo.

tur. Eadem ex causa talis materia lavari potest vel in tabulis, quarum area vel cavis & canaliculis plena sit, vel pellibus aut pannis, aut cespitibus contexta. Ramenta enim metallica cum pauca arenula vel in tabularum cavis resident, vel tegumentis adhærent. Ea autem in tabulis, vel in alveo iterum lavantur. Alveus iste levis & altus duos digitos transversos figura fere naviculæ similis est, nempe priore parte latus, posteriore angustus, in cujus medio plerumque canaliculus est transversus. Cum in eo lavanda vena est, lotor eum in manibus tenet, & agit, ac sæpe altera manu posteriorem alvei partem succutit: quo motu metallorum ramenta pura subsidunt in canaliculo, vel, si hic desit, posteriorem locum occupant; arenæ, quod leviores, ex eo excidunt. Hanc lavandi rationem præsertim usurpant Metallici vel experimenti gratia, vel cum aurum facere volunt purum, ut cum hydrargyro commisceant. At nonnumquam in alveo ampliori venas purgant, quem duobus funiculis ex trabe suspendunt, ut facilius agitari possit. In eum arenam conjiciunt, & aquam infundunt; deinde eundem agitant, & succutunt; tum aquam limosam caute effundunt, rursusque in id, quod refedit, infundunt puram: quod iterum ac sæpius faciunt, quoad metallica ramenta in posteriore alvei parte satis pura refederint, arenæ in priori. Has autem abjiciunt, illa ad excoquendum reservant.

XXIII.

Machina ad
quarundam ve-
narum ferri la-
vationem ac-
commodata,
quam Robertus
cœcogitavit.

Quidam ad venas ferri, quæ cum terris commixtæ, & friabiles sunt, machinam usurpant, quas uno eodemque tempore comminuunt, & lavando purgant. Machinæ una est rota, quam rivi impetus ejus pinnas percutiens versat. In Axe FG tres

CAPUT III.

51

arcus ferrei *C, D, E* infixi sunt ita dispositi, ut dum unus ex superficie aquæ in lacu *IKLM* positæ emergit, alter sub ipsam demergatur. Plures tamen quam tres arcus ejusmodi axi esse possunt, dummodo aquarum in rotam influentium vis illi versando sufficiat. Lacus ex asseribus est factus, quos bracteis ferreis contegunt; estque latus sex vel septem pedes, altus tres aut quatuor. In hunc continuo aqua influit per fistulam *N*, atque in ima parte lacus foramen *O* existit latum sex pollices in quolibet latere, quod asserculo claudunt cum opus est; in suprema autem ejus parte est canaliculus *rr*, per quem tantumdem aquæ ex lacu effluit, quantum in ipsum per fistulam *N* influit. Quæ materia per foramen *O* effluit, exonerat per devexum canalem *Oe* in alterum lacum *PQRS* latum pedes *V.*, longum *VI.* atque hunc sæpe excipit alter lacusculus, in quem aqua influit per alium canaliculum devexum *uu*, qui similiter, cum opus est, asserculo clauditur.

XXIV.

Jam vero cum venam lavare volunt, foramen *O* claudunt, & lacum *KLM* aqua replent usque ad canaliculum *rr*; tum in illum venam injiciunt in altitudinem duorum pedum, si minutissima vena sit; at, si grandiuscula fuerit, minorem venæ molem in ipsum imponunt. Aquâ autem in rotam immisâ, versantur arcus in axem infixi, qui venam assiduo agitant, & comminuunt; quo motu terræ leviusculæ attolluntur in aqua, atque una cum hac per canaliculum *rr* effluunt, exonerantque in canalem *pp*: quæ vero partes graviores sunt, nempe metallicæ, subsident, sicque brevi vena purgatur: quod, quando factum sit, operarii assiduo rerum usu norunt, ac præsertim ex rotæ motu tardiori. Arcus

Fig. 15.

enim ferrei venam purgatam, quòd gravior sit, difficilius dimovent. Tum autem canaliculum *u* afferculo claudunt, detrahuntque tabellam ex canali *O*, atque ita vena tum ob aquæ defluentis impetum, tum ob arcuum impulsam effluit in subiectum lacum *PQRS*, in quo, quæ gravior est, mox subsidet, levior una cum aqua in proximum lacusculum *ux* ex supremo margine tabellæ ad canaliculum *u* locatæ exonerat: in hoc autem postremo lacu iterum subsidet, quod gravius est, reliquum in rivum defertur & negligitur. Ut primum lacus prior *KLM* vena vacuus est, idem labor, ut antea, iterum suscipitur. Interim vero operarii venam, quæ in lacusculis subsidit, lavant. Quem in finem tertius lacusculus a priori *IV*. vel *V*. pedes remotus paratus est, in quem aqua per canaliculum continuo influit, quæ per alium iterum effluit. Operarii itaque venam ex lacubus batillis ejiciunt, eamque inter priorem ac posteriorem congerunt; tum eorum unus corbem, in quam alter venam injecerit, in lacusculum *abcd* immittit, & succutit, quo succussu vena minutula per foramina, vel fissuras corbis transmittitur, reliquum in fundo corbis remanet, quod, si opus sit, iterum comminuitur; id vero, quod transmissum est, partim, quòd levius sit, una cum aqua ex lacusculo effluit, partim, quòd sit gravior, in hujus fundo residet, quod inde exemptum ad excoctionem reservatur. Aliam machinam recenset Monerus (*), in qua vena quælibet friabilis eodem tempore & comminui & lavari potest. Ea ita fere se habet uti mola; sed loco sa-

(*) Traité de l'exploitation des mines, chap. IX.

reæ molæ quatuor rastra in crucis formam disposita circa axem revolvuntur in lacu, qui latus est XI. pedes, altus II.; quem in lacum vena ex infundibulo demittitur.

XXV.

Ex iis, quæ diximus, patet, loturam ad eas tantum venas adhibendam esse, quas * compositas vocavimus; eas vero lavari, ut pars metallica a non metallica secernatur, sicque illa in minorem molem redacta utilius excoqui possit. Quamvis enim aliquid de metallo in aquis deperdatur, id tamen minus detrimentum affert Metallicis, quam si totam venæ molem excoquerent: id enim si fieret, major carbonum copia consumeretur; & plus metalli in magna recrementorum quantitate, quam illa suppeditaret, remaneret. Illud præterea facile quisque intelliget, ex commemoratis venis eas tantummodo lavare oportere, ex quibus pars metallica rite secerni a non metallica possit: cui secretioni nonnumquam obstat vel nimia metallicæ materiæ levitas, vel magna non metallicæ gravitas. Si enim materia metallica, quam volumus facere puram, tam levis sit, ut aquis innatet, vel tardissime in ipsis subsidat, aut si materia, quæ a metallica secernenda est, tam gravis sit, ut illa una cum hac, etsi satis ponderosa, eodem fere tempore fundum petat, nullam utilitatem ex lavatione sperare possumus. Hinc venæ argenti albæ, & pleræque venæ argenti divites, itemque venæ cupri in lamellas figuratæ, aliæque ejusmodi, in quibus pars metallica cum lapide commixta nimium levis est, non laventur, sed siccæ in minutula fragmenta comminuantur, quorum quæ certam metalli copiam in se continent, excoquantur, reliqua

* §. IV.

Utilitas ex
venarum lava-
tione existens.

Quæ venæ la-
vandæ sint
nec ne.

vero vel abjicientur, vel ad alios usus reservabuntur, si quibus forte utilia futura sint. Idipsum fiat si venis multum pyritis sulphurei, vel venæ ferri ponderosæ, vel spathi gravis insit: quæ materiæ idem fere pondus obtinent ac materia metallica in venis latens: atque in his quidem juvabit experiri utrum materiæ istæ ustulatione evadere possint tam leves, ut in aquis secerni a parte metallica possint. Generatim vero, ne multa materia metallica aquis innatet, juvabit venam tufam in aqua parumper macerare, antequam tabulis imponatur.

XXVI.

Quid præcave-
re oporteat in
lavandis, & af-
servandis qui-
busdam venis.

* §. VII.

Caveant autem laborum Præsides, ne quod ex lavatione venarum maxime pretiosarum restat, abjiciatur, antequam experimento constiterit, tam parum metalli in eo remansisse, ut non sit operæ pretium illud inde elicere. Fit enim nonnunquam, ut, quæ venarum partes ditiores sunt, tardius subsidant: quod accidit vel ob causas paullo ante commemoratas*, vel quod venæ æquabiliter tufæ non fuerint, vel quod pars metallica in venis latens ita in calcem versa fuerit, ut volumine multum excreverit: id quod fieri videmus præsertim in venis argenti, plumbi, & cupri, quæ diu in aëre expositæ manserint. Acida enim in his latentia ob aëris humorisque vim sese explicant, atque adeo magis magisque metalla dissolvunt, vel ad calcis statum ea dejiciunt: quam etiam ob causam ex iis excoctis minus metalli conflatur. Quamobrem, ut hisce incommodis occurras, has venas, si mox excoqui nequeant, ab aëre tueberis hoc modo. Fossam parato, cujus fundum & latera asseribus tegito, rimasque argilla vel musco occludito. In hanc autem venam jam tufam conjcito, in quam tantumdem aquæ influat, quan-

CAPUT III.

55

tum ex eadem effluit, ita tamen ut aqua ex venæ superficiæ tres vel quatuor pollices semper extet. Cum porro excoquenda erit, eam inde eximes, & horis XXIV. in sole siccescere permittes. Eadem, quæ paullo ante diximus, detrimenta in iis quoque argenti venis existunt, quæ arsenico redundant: istæ enim si diu coacervatæ maneant, magno cum calore effervescent. Id autem cum animadvertitur, mox in solum explicentur, ut refrigescant.

CAPUT IV.

De Venarum & pyritidis uestione.

XXVII.

DUabus præsertim ex caussis venæ uruntur, vel ut ex duris molles factæ facilius tundi malleis, pilisve possint, vel ut comburantur res illæ, quæ excoctioni metallorum sunt infestæ, cujus generis sunt sulphur, arsenicum, zincum. Istæ enim, quod volatiles sint, metallorum magnam partem secum in aëra rapiunt, dum venæ in vehementissimo fornacum igne excoquantur; quod vero ad metalla adhæreant, nec tam cito ex istis evolent, quam hæc ipsa liquefcunt, metallis ipsis liquatis arctius conjunguntur, ex quibus vel crementum efficiunt, vel massam impuram, & fragilem. Hæc autem detrimenta vel nullo modo, vel non ita magna existunt, si venæ, quibus ea corpora admixta sunt, antequam excoquantur, crementur, vel torreantur. Sed non omnes neque eodem modo cremandæ sunt: quod quatenus fieri debeat, pendet tum ex diversa venarum natura, tum ex ea, quam sequi volumus, illarum tractandarum ratione. Ex venis enim quorum-

Quibus ex
caussis venæ
uruntur.

Quibus ex venis metallum purum in prima excoctione confari possit nec ne.

dam metallorum, etsi sulphureis, apte tamen crematis, possumus cum primo excoquantur, metallum purum conflare, ex aliis non item. In primo genere sunt venæ plumbi, & argenti, in altero venæ cupri, & stanni; quæ etsi iterum, ac sæpius urantur, plerumque tamen in prima excoctione liquefcunt in massam sulphuri, aliisque corporibus admixtam, quam Agricola *panem ex pyrite conflatum* appellat, nos novo quidem, sed commodiori vocabulo *pyritidem* dicemus, nomine ex pyrite, qui ex sulphure præsertim constat, derivato. Hunc vero iterum ac sæpius urere oportet, & recoquere, ut ex eo metallum vel purum, vel quod purgari mox possit, eliciamus. Ex venis autem ferri primo excoctis non quidem pyritides [liceat nobis novum nomen usu terere]; atramen metallum impurum, quod ferrum crudum appellant, confari solet. Quamobrem venas, ex quibus metallum purum mox conflare possumus, & volumus, acrioribus, si opus est, vel etiam iteratis ignibus uremus; reliquas vel crudas, vel parum uistas excoquemus. Sed hæc, quoniam magnum ad rectam venarum excoctionem habent momentum, paullo diligentius explicemus. Ac primo perspicuum est, metalla nativa, & quæ calcis formâ procreata sunt, ustionis plerumque non indigere. Venæ itidem cupri, quibus paucum sulphur admixtum est, non crementur. Ex venis enim cupri primo excoctis, si a paucis discesseris, confari nequit nisi pyritides; earum vero excoctionem sulphur adjuvat. Qua in re præclarum extat exemplum a Swedemborgio recensitum. Narrat enim ad Cuprimontem in Svecia venam cupri, quæ in quolibet centumpondio octo vel novem sulphuris libras, & quindecim, vel sexdecim cupri contineret, quæque

difficile liquefceret, & lapidi calcario esset admixta, plus metalli suppeditasse, cum cruda, quàm cum usta coqueretur.

XXVIII.

At venæ ferri, etsi sulphuris expertes sint, aliis tamen ex caussis urendæ sunt. In his enim ferrum calcis forma inest; calx autem ferri multum aërem in se continet. Nam, cum ipsum arte in calcem vertitur, quodlibet ejus centumpondium libris LXXXII. nonnunquam augetur, quod ponderis incrementum ex aëre præsertim proficiscitur. Calci autem ferreæ forma metallica redire nequit, nisi ex ea aer iste evolet. Si porro id in fornace, cum vena excoquitur, fiat, in aërem, qui paullatim ex hac evoluitur, pars caloris ex carbonibus erumpentis penetrat, atque is una cum eodem aëre evolat: ex quo fit, ut minor in fornace ardor remaneat. Quocirca necesse est, leni igne ipsam urere, ut certâ aeris portio ex ea evolet. Quoniam vero præter aërem multus quoque humor venæ inest, ob quem eadem caloris imminutio in fornace existit, venæ ustio id quoque efficiet, ut iste ex illa exhalet. Quia denique ferrum cum terris arctissime in vena copulatum est, ob hanc quoque causam ipsa urenda est, ut metallum terreis hisce vinculis solvatur. Hæc autem ita prorsus fieri ex eo evincitur, quod hujus metalli venæ, postquam crematæ sunt, molles admodum fiant, & a magnetæ attrahi soleant, cum ante ustionem ab eodem non attraherentur. Plerumque tamen sufficiet easdem unico, eoque leniori igne cremare, qui ad XXIV. horas persistet. Nam, si vehementius & diutius urantur, ferrum, quod in ipsis inest, vel magis in calcem vertitur, vel vitream quamdam crustam induit; unde cum venæ excoquuntur, difficilior e terris secernitur.

Vol. I.

H

Cur venæ feri
uri debeant.

XXIX.

Alii tamen contendunt, frustra venas ejusmodi, quæ sulphure careant, cremari, aut si alicujus ultionis indigeant, satis uri in fornacibus, interim dum in igne perstant, antequam liquecant. Cujus rei confirmandæ causa addunt, in Tirolis venas Kleinbodenses, quæ vel *speculares*, vel *spatiosæ* sunt, crudas excoqui, nec cremari aut venas, quæ ad Eisnartzum in Stiria effodiuntur, aut eas, quæ in Agro Brixienti inter præstantiores habentur. Quibus ego libenter assentirer, si aut in vehementissimo igne terræ tardius, quam metallum, cui junctæ sunt, liquecerent, aut in officinis, in quibus præstantissimum ferrum conflat, venæ ejusmodi non cremarentur. Nam, ut de aliis taceam, in Svecia, quæ rei metallicæ optima magistra est, omnes venæ ferri torrentur, imo illa quoque crematur, quæ ad Dannemoram effoditur, quæ ferri ditissima est, & sulphuris prorsus expers, ac non modo a magnete attrahitur, verum etiam facillime liquecit.

XXX.

At sulphur, & arsenicum minus nocent excoctioni metallorum, quam Zincum. Illa enim accelerant, istud retardat venarum liquationem. Quamobrem diligentius urendæ sunt venæ, quibus Zincum inest, quod quidem eas non exhalant, nisi acrioribus ignibus subjiciantur: quamvis ne hoc quidem modo prorsus comburitur, quemadmodum in metallo ex pseudogalena cuprea confiato videre licet, quod non cuprum, sed aurichalcum est.

XXXI.

Atque hæc de venis, quas generatim urere oportet, dicta sint. Nunc ad urendi modos venio. Uruntur autem vel in area, vel in fornace. Aræ

Qui sint venarum urendorum modi.

vel sunt parietibus septæ, vel undique apertæ, quarum alias Focos, alias simpliciter Areas appellabimus. Utræque lateribus coctis vel lapidibus nativis in igne persistentibus, vel etiam recrementis stratæ sint, ne ignis humorem attrahat; tecto autem obtegantur, ne pluviae aut nives calorem restinguant. Sed cum sulphur, quod venæ exhalant, colligere volumus, tectum per æstatem removendum est, ne scilicet ob nimium calorem sulphur comburatur. Quoniam vero tectum aliquot dumtaxat tignis impositum est, ut area lateribus undique aperta sit, juvabit alia tigna statuere, quibus asseres transversæ conjungi possint, qui vel nives, vel pluvias, vel ventum, qua parte tectum subire contendunt, sistant, ac coercerant.

Areae quomodo extruantur.

XXXII.

Ambitus murorum, qui in focis ducuntur, vel ad circulum, vel ad quadratum accedat. Hoc enim modo murorum minori ambitu certa capacitas concluditur: quod impensas ædificandi minuit, calorem magis continet. Satis autem erit aream summum nonaginta pedum quadratorum facere capacem, atque ad eam murum ducere altum quinque pedes. Nam, si nimia venæ moles in eodem foco cumuletur, ejus pars infima nimis ardet, suprema non satis crematur. Parietes ita crassi fiant, ut vim ignis, & pondus venæ urendæ sustinere valeant. Recrementa ferrea laterum instar conflata materiam suppeditant aptissimam ad parietum ejusmodi extruccionem. At, ubi hæc in promptu non sit, parietes fiant, vel ex lateribus coctis vel ex lapidibus in igne persistentibus, eorumque commissuræ jungantur vel argilla, vel sabulo, vel recrementis in pulverem resolutis. A fronte autem focus pateat, quò in aream materia urenda invehi, usta evchi commode possit.

Quæ sit aptior arearum forma.

Cum reſtanguli extruuntur foci, uno latere pateant, ſed ſi curvati ſiunt, eorum area ferri equini fere ſimilis
Tab. IV. ſit, quemadmodum in figura 16. 17. videre licet.
fig. 16. 17. Hoc enim modo ignis ardor, qua parte focus patet, minus diſſipatur.

XXXIII.

Qua ex materia ignis fiat in arcis.

Cum venæ in arcis cremantur, ignis ſit vel ex lignis craſſioribus, vel ex carbonibus, vel ex faſcibus virgultorum. Sed ceteris præſtant ligna craſſiora. Flamma enim, quam hæc concipiunt, venam æquabilius longiusque corripit; eâ vero abſumptâ, reſtant adhuc prunæ ardentes, quæ calorem diutius conſervant. Ligna autem eligantur, quæ copioſam flammam concipiant, cujuſmodi ſunt abiegna; ea-que ſicca ſint, ne humor ex viridibus & humidis exhalans ignis minuat vim. In quibuſdam tamen Hungariæ officinis ad uſtionem venæ cuprææ, ac pyritidis ex eadem conſtati, uti conſueviſſe lignis viridibus ac madefactis tradunt Schlüterus (1), & Swedemborgius (2), ne ſcilicet materia nimis cito ureretur, ſeu ne arſenicum, quo vena illa redundabat, ob vehementiorem ignem, quem ſicca concipiunt, ſecum in æra raperet magnam metalli partem. Cui rationi, etſi non multum tribuendum cenſeam, conſuetudinem tamen non improbo, quod ab iis inducta ſit, quos alias quoque venæ huius urendæ methodos & noviſſe & pertentaſſe mihi perſuadeam. Carbonibus urere juvat venas, quæ mitiorem ignem poſtulant, cujuſmodi ſunt galenæ, quæ ſi vehementius ardeant, liqueſcunt; eas item, quæ ar-

(1) *Vol. II. cap. 34.*

(2) *Vol. III. pag. 151.*

senico redundant. Istud enim facilius ex ipsis exhalat, si materia phlogistica, quæ formam metallicam ei tribuere possit, ad ipsum accedat. At carbonem fossilem, seu lithantracem venarum præsertim cuprearum usioni ineptum esse putat Schlüterus, quòd bitumen in eo latens, dum ardet, magnam metalli partem vel comburat, vel absumat. Id autem, etsi verum sit, usui tamen erit lithantrax excoctus, qui nempe bitumen in igne exhalavit. Excoquitur vero lithantrax vel eo fere modo, quo carbonarii ligna in carbonem mutant, vel ea destillandi ratione, qua in Comitatu Saarbruckenensi usurpari primum cœpit, quamque explicavit Cl. de Genfanne (*). Quin imo ad Carronem in Scotia, aliisque magnæ Britanniae regionibus, vena ferri lithantracæ crudo crematur. Turfa denique ad idem opus inepta non erit.

XXXIV.

Jam, qua ratione cumulus venæ urendæ componatur, videamus. Arcæ insternitur pulvis ex carbonibus resolutus, ne vena, aut metallum, quod nonnumquam vena dimittit, ad solum adhærescat. Super hunc pulverem ligna componuntur ita a se invicem remota, ut aer cumulum subire possit, & fragmenta venarum per eorum intervalla penetrare nequeant. Super hæc ligna iterum alia transversa simili modo locantur, quæ cum subiectis cratis figuram referunt. Id vero iteratur usque dum strues lignorum duos, vel tres pedes alta fiat. Demum super hanc venæ fragmenta injiciuntur, quibus cumu-

Qua forma cumulo venæ urendæ danda sit in arcæ.

(*) *Traité de la fontè des mines par le feu de charbon de terre, Vol. I. chapitre XII.*

lus ad certam altitudinem puta quatuor vel etiam septem pedum ducitur. In medium cumulum & prope ipsam lignorum struem conjiciantur venarum fragmenta grandiora, quæ pugni magnitudine esse solent, item quæ difficilius liquecunt, quæque sulphure redundant. Hæc enim omnia vehementiorem ignem postulant. Ad hæc ista venarum dispositione illud quoque assequimur, ut sulphuratæ, statim atque ignem conceperint, sua vi ardeant, postquam etiam ligna consumpta sint; aer vero per interval- la, quæ inter fragmenta grandiora existunt, cumulum subiens, ignem animet atque diffundat. Et si autem venarum fragmenta grandiora minutulis sint admixta, possumus tamen facili artificio efficere, ut illa fundum petant. In hunc finem a fronte foci agger ex vena urenda extruatur in ea altitudine, quam cumulo dare volumus, qui agger, qua parte aream spectat, declivis sit. Ex solo ad verticem aggeris pertingat tabulatum *tr* acclive, ut operarii eò venam advehere cisis possint: quò cum isti per- venerint, cisos ita invertant in aream, ut per ag- geris declive fragmenta in aream devolvantur: quo modo, quæ sunt grandiora, vel ponderosiora, citius fundum petent. At, si quæ sit venæ portio minuta in pulverem resoluta, ea seponenda est, ut ma- defacta cumulo illinatur. Quod si ejus aliquid præ- terea supersit, istud vel in medio locetur, ut ignis vim, quæ in eo loco solet esse vehementior, coer- ceat, vel sub ipsam lignorum struem insternatur, ut ibi, quoniam facilius crematur, minus ardeat. Quo- niam vero certi generis lapides venis, cum excoquun- tur, sæpe adjiciuntur, isti, si urendi sint, sub ipsam crustam locentur.

Tab. IV.
fig. 18.

XXXV.

Dum cumulus componitur, aliquot canales transversos æquis spatiis a se invicem, & a centro remotis in eo fiant, qui sint veluti ignis, ærisque spiracula. Aliis tamen satis videtur rectum canalem *mn* in medio relinquere, qui a summo ad imum pertingat, ut per eum prunæ ardentes in lignorum struem immitti possint. Juvabit etiam aliquot bacilla lignea æquis spatiis a fundo remota in cumulum inferre, qui extent duos pedes, quò eos possit minister extrahere, atque ex iis explorare, quo in statu ignis sit.

Qua ratione
ignis spiracula
in cumulo fiant.

Fig. 19.
n. 2.

XXXVI.

Diximus minutulam venam madefactam cumulo illiniri; at alii, si hæc iis defuerit, eundem tegunt vel pulvere ex carbonibus aut recrementis metallorum resoluto, vel etiam sabulo. Aliquam enim crustam cumulo inducere oportet, tum ut ab imbribus nivibusque tutus sit, si sub dio est, tum ut intus in eo calor contineatur. Quò autem crassior est crusta, eo magis calorem continet, eoque mitior ignis existit; contra si vel tenuis sit, vel nulla crusta cumulo inducatur, iste ardet vehementius, citiusque ligna comburuntur. Fieri tamen solet quatuor ut summum pollices crassa. Sive autem vena, sive sabulum, sive pulvis quilibet in hunc usum adhibeatur, materia madefiat, tum illinatur cumulo, & batillis tundatur: id quod plerumque fit, postquam strues bene incensa est, & vaporem crassiores vena exhalavit. Cum vero necesse sit, vapores atque ignem expirare; hic illic, ac præsertim in fronte nulla crusta cumulo inducatur. Iste porro ne fiat septem pedibus altior: secus enim, quæ venarum fragmenta a strue lignorum remota sunt, vix cremantur, &

Qua materia
cumulus con-
tegatur.

Fig. 19.
n. 1.

quæ prope ipsam sunt nimis ardent, vel etiam liquefcunt: quibus tamen incommodis possumus occurrere, si lignorum vel carbonum partem venæ subijciamus, partem eidem interponamus. Cum area nullis parietibus septa est, coagmentatio clementer assurgens pyramidis vertice truncatæ forma figuratur, ut, si cumulus subsiderit, in se ipsum recidat. At in focus vena a parietibus sustentatur, & cumulus istis quoque altior fieri potest.

XXXVII.

Quo tempore,
& modo ignis
cumulo admo-
vendus sit.

Cumulo composito, per ea spiracula, quæ diximus, ligna incendantur; idque fiat diluculo, ut ante solis occasum densior fumus, qui scintillis admixtus est, exhalet, sicque periculum incendii proximis domiciliis de nocte non immineat. Cujus periculi avertendi causa ignis cumulo non admoveatur, cum venti vehementiores spirant. Ut vero ignis æquabiliter in omnem partem diffundatur, initio aperta sint spiracula, quæ deinde vel omnino, vel ex parte occludenda erunt, ut ardor magis coërceatur, nec admodum vehemens sit. Præstat enim initio leni igne venam urere, maxime cum multum sulphurea est, ne scilicet liquefcatur. Sunt tamen quædam venæ, quæ mox vehementius urendæ sunt, cujusmodi erat vena illa cuprea, sulphurea, viridis, & multo pyriti admixta, quæ, ut scribit Swedemborgius, cremabatur horis triginta sex igne adeo vehementi, ut pars liquefceret; ex qua sic usta plus metalli conflabatur, quam cum leniter ureretur. Quo in statu ignis sit, ex bacillis in cumulo infixis conjicere licet. Hæc enim initio extrahi nequeunt, quod fragmentis venæ constringantur, sed prout majorem, minoremve eorum partem ignis consumpsit, facilius difficiuliusve extrahuntur. Quæ vero magis usta sunt,

Qua ratione
ignis in cumulo
ardens guberna-
ri possit.

produnt luculentius ardere cumulum eo in loco, ex quo fuerunt extracta. Quod si velimus ignem ab uno in alium locum ducere, satis erit crustam crassorem facere, & spiraculum occludere, ubi major ejus vis deprehenditur; hanc vero detrahere, & spiraculum referare eo in loco, ad quem ducendus ignis est. At si cumulus subsidens ruat, quod plerumque a fronte fit, mox rimæ, superinjectis venæ fragmentis, occludantur; si vero crusta rimas agat, quod ob nimium ardorem fit, nova illinatur.

XXXVIII.

Cum primum vena nihil exhalat, detrahenda est, ut vel excoquatur, vel iterum cremetur. Cum mox excoquenda est, eam operarii in fragmenta comminuunt nucis magnitudine: quod dum faciunt, diligenter inspiciunt, an aliqua sint fragmenta nondum satis usta, quæ seponunt, ut eadem iterum urant: ejusmodi autem esse solent, quæ a strue lignorum, vel a carbonibus magis distabant, quæque in area fronte erant posita. Sed sæpe, antequam venam dimoveant, in eam adhuc calentem aquas immittunt hac de causa, ut magis mollescat, & friabilis fiat. Nam, cum vis ignium ejus humorem exsiccavit, aqua facilius in eam penetrat, eandemque dissolvit. An vero satis usta sit ex certis signis conjicere licet, velut ex ejus colore, aliisque qualitatibus, quas, quisque suo modo, in venis quas tractant, Metallici experientia edocti notare solent. At si pluribus ignibus subjicienda vena sit, necesse est, antequam id fiat, eam in minora fragmenta comminueret, tum ut, quod intus latet excoctioni nocivum, facilius exhalet, tum ut ex ea pulvis, vel minutula arena detrahatur. Dum autem comminuitur, fragmenta, quæ satis usta occurrunt, ad excoctio-

Quando vena detrahatur ex cumulo; & quid in ea præstare oporteat.

nem reserventur; quæ autem cruda, vel parum usta sunt, seponantur, ut conjiciantur in eam partem cumuli, in qua luculentior ignis ardere solet.

XXXIX.

Quæ venæ semel, quæ pluries urendæ sint,

§.XXVII. ex iis, quæ initio diximus, conficere licet.
Venarum plures urendarum ratio apud Ramelsbergum usurpata.
 Ramelsbergi, ut habet Schlüterus, venam, quæ plumbi sex ad quadraginta libras, & argenti vix unciam in quolibet centumpondio continet, quæque multo pyriti admixta est, hoc modo cremant. Struem lignorum altam pedem unum & dimidium disponunt in area aperta, eique superimponunt venam in altitudine pedum quatuor, cui crustam fere pedem crassam inducunt ex atramento sutorio factam. Postquam ignis ad quindecim dies exarserit, in superiore parte cumuli foramina viginti, vel vigintiquinque faciunt, in quibus sulphur ex vena emanans concrescit. Istud vero ter in die detrahunt, & in aquam injectum in officinam invehunt, in qua purgatur. Ut vero aëris inspiratione ignis luculenter ardeat, venam ex inferiori parte cumuli hic illic detrahunt. Perstat autem ignis ad tres menses; quo tempore, decem vel viginti centumpondia sulphuris crudi seu impuri colligunt. Sed si cælum vel pluvium, vel udum fuerit, aut si dies æstuosi sint, parum, vel nihil sulphuris concrescit. Transferunt deinde venam in alterum ignem, quam in altitudinem pedum IV. congerunt super struem lignorum pedem altam, longam XLVI. pedes, totidemque latam; lignis autem subjiciunt minutulam venam in altitudinem pedis unius. Sic autem uritur ad sex hebdomadas; tum in tertium ignem deferitur, in quo simili fere modo ac in secundo uritur; ultimo in fornace crematur. At vena Halz-

Quomodo detrahatur sulphur ex vena in cumulo concrescens.

bruchenſis, quæ argenti uncias duas, & dimidiam, plumbi vero XXVIII. ad LXV. libras in quolibet centumpondio continet, ter tantummodo uritur, quod facile liqueſcat. Uritur autem in focis; ac primus quidem ignis fit ex LX. arborum truncis, & VII. corbibus carbonum, in eoque uruntur LX. venæ centumpondia, VII. vel VIII. dierum ſpatio: in ſequentes ignes congerunt CXX. venæ centumpondia, etſi in quolibet eorum minorem lignorum copiam comburant, quam in primo.

XL.

At ſive in areis, ſive in focis vena cremetur, duo incommoda prorfus declinari nequeunt. Cum enim caloris continendi cauſſa vix ille aer cumulum ſubire permittatur, qui neceſſarius eſt, ut ignis ardeat, vena nec facile, nec perfecte exhalat. Quoniam vero in non exigua altitudinem eadem congeritur, ab igne æquabiliter non corripitur, ſed quæ venæ pars a lignorum ſtruce remota eſt, minus, quam opus ſit, uritur; quæ vero prope ipſam eſt, sæpe liqueſcit. Quamobrem ad venarum uſtionem aptiores videntur eſſe fornaces concameratæ. Iſtæ enim continuo aërem aspirant, expirantque; in iis autem non modo calorem augere, & minuere pro lubitu licet; verum etiam ignis fieri poteſt ex faſcibus virgultorum, lithantrace crudo, imo & turſa: quæ res non multum uſum habent, cum in focis vel in areis venæ uruntur. Schlüterus, cum venam Ramelsbergſem tertio in areis uſtam ultimo torrere cœpiſſet in fornace, id quoque aſſequutus eſt, ut ex ea excocta plus metalli eliceret (*). Fornax autem ita ſe

Incommoda,
quæ exiſtunt,
cum vena in
areis, aut in
focis crema-
tur.

Ad uſtionem
venarum ap-
tior eſt fornax
concamerata.

(*) Schlüt. Cap. V.

Fornacis ad
ustionem vena-
rum a Schlue-
zo adinventæ
descriptio

Tab. V.

Fig. 20.

21. 22.

Fig. 20.

Fig. 22.

Quomodo ignis
gubernetur,
cum in pem-
memorata for-
nace vena uri-
tur.

habet. Terra effossa, substructio *MNOL* fit, in qua duo sunt humoris receptacula *DG*, *AF*, quorum capita ex officinæ solo extent. Substructione ad altitudinem *XB* ducta, a lateribus atque a tergo eriguntur parietes. Sint autem isti ex lapidibus in igne persistentibus facti, eorumque commissuræ sabulo vel argilla conjungantur. Ex iisdem lapidibus focus fiat, quorum commissuræ arenula compleantur, sitque ad anteriorem partem declivis, ut vena facilius agitari rutris possit, & dum per oculum in porta *N* perforatum intropiscitur, sub aspectum cadat, sicque animadverti possit, quo in statu ea sit. Fieri autem focus potest ex laminis quoque ferreis quatuor circiter lineas crassis, quas, ne sulphur exedat, argillâ obducere oportebit. Tum camera *rPn* extruatur a fronte patens, in qua quatuor foramina *a*, *b*, *c*, *d* fiant a foco remota pollices quinque, ut ex iis fumus in canalem *VZ* perveniat, ex quo per caminum eluctatur. Apertura muro recto occludatur, qui diruitur, cum focum reficere necesse est: id quod post *XVIII.* vel *XXIV.* menses fieri solet. In eo autem sint duæ portæ *N*, *O* cum foribus ferreis, altera in medio, altera a latere, atque ad quamlibet lamina ferrea *K* accommodetur, cujus objectu fumus, & flamma caminum subeant. Fornax ita extructa leni igne siccetur, cumque in ea ustionis opus inchoandum est, ita per aliquot dies calefiat, ut camera candescat. Tum vero Magister per portam, quæ in medio est, in fornacem immittit venæ comminutæ *XV.* centumpondia, eaque complanata, ligna crassiora una cum fascibus virgultorum per alteram portam seu fenestram in focum injicit, & portas claudit. Post trium horarum spatium forem prioris portæ aperit, & rastro, quod de catena pendet, venam agitat, ut ci-

tius exhalet, neve ad focum adhærescat. Deinde ignem auget, portas iterum claudit, ut vena candens perstet; eam vero ad quamlibet horam iterum eodem modo agitat. Hora nona ita auget ignem, ut vena quasi lique scat; decima autem hora eam ex fornace extrahit, novamque in ipsam injicit, eademque ratione cremat. Alii portis semper apertis venam torrent; quo modo, etsi calor magis dissipetur, quam cum clausæ sunt, facilius tamen vena, quod portis apertis aer copiosius renovetur, vapores exhalat. Necesse est autem ignem pro diversa venarum natura temperare. Nam cum sulphureæ tantummodo sunt, plerumque sufficiet eas obscure rubescere; si arsenicum cum iisdem mixtum sit, initio quidem satis erit ipsas obscure rubescere, sed, ut illud omnino exhalet, paulatim ita augendus erit ignis, ut tandem clare rubescant. Si denique Zincum in venis insit, necesse erit eo igne ipsas urere, qui iisdem ferre liquandis aptus sit. Ab hac fornace non multum differt illa, qua Angli præsertim utuntur. Sed in ista focus, in quo ignis sit, distinctus ab eo est, in quem vena conjicitur. Hæc autem, quoniam non modo ad ustionem, verum etiam ad excoctionem venarum usurpatur, tunc a nobis explicabitur, cum de fornacibus concameratis, in quibus venæ excoquantur, scribemus.

XLI.

Restat, ut de pyritidis ustione dicamus. Uri autem solet in focis rectangulis, latis pedes VI., longis XII., & a fronte apertis, quos sub testæ, & in loco a furibus tuto constituere oportet. Illorum tres uni fornaci, in qua pyritides conflatur, sufficiunt. Cum enim modo sexies, modo decies, vel plus etiam quam decies urendus sit, primum in pri-

Qua ratione
pyritides ura-
tur.

mo foco crematur, deinde, cum refrigeratus fuerit, translatus in secundum iterum crematur, tum deportatur in tertium, postea reportatur in primum, conservaturque is ordo, quoad satis ustus sit. Necesse est autem primos ignes tam acres esse, ut sulphuris pars crassior e pyritide evolet: quod ni fieret, in sequentibus ignibus, cum jam mollior factus sit, & in minutula fragmenta comminutus liqueceret; quod detrimento esse solet. Nam liquefactus in solum defertur, ubi refrigeratus nihil exhalat. Possumus tamen huic incommodo occurrere, si aliquot pyritidis crassiora fragmenta super struem lignorum imponamus. Ad hæc enim materia liquefacta pensilis adhærescet, quod ignis ab ima cumuli parte jam recesserit, cum materia liquefcere incipit. Quo metalli ditior pyritides est, eo acrioribus ignibus uratur. Cum enim in eo minus sulphuris inlit, non ita facile liquefcit, atque adeo sine periculo ita uri potest, ut vix ullum, vel paucum sulphur in eo remaneat. Ad primum ignem satis erit fragmenta ita crassa facere, ut ea manibus prehensa operarius in cumulum deferre possit. Ad secundum fragmenta eadem in duas tresve partes dividantur; ad tertium fiant pugni magnitudine, sed aliquot fragmenta majora in usum, quem diximus, reserventur. Ultimo fiant nucis avellanæ magnitudine. Primi ignes ex lignis crassioribus in altitudinem octo vel decem pollicum positis fiant, aliquot insuper carbonum mensuræ, puta sex vel decem, pyritidi interponantur; in focum autem conijciantur CL. centumpondia pyritidis, cui subicere licebit aliquot venæ centumpondia. Sed in ultimis ignibus duplo major lignorum, & carbonum copia incendatur, ut sulphur intus in pyritide latens evolare possit. Dum pyritides fraa-

gitur, ea fragmenta seponantur, quæ plus ceteris usta sunt: hæc enim, ordine immutato, sæpe transferrî possunt puta a secundo in quartum ignem. Ex pyritide usto, & recocto conflari solet partim metallum, partim pyritides alter, qui iterum urendus est, ut recoquatur. Sed, si velimus ex pyritide metallum omnino conflare, necesse est, sæpius eundem urere: puta decem vel etiam tredecim vicibus. Atque hæc de pyritidis ustione, sive cupreus iste sit, sive plumbeus, sive alterius generis metalli, satis sint. Nam, quæ ad cumuli dispositionem, ignisque gubernationem spectant, ustionis venarum sunt communia.

Tab. V. Fig. 23. *Ichnographia conclavis, quod sexdecim focos capit.*

AB, AB parietes, quibus focus continetur. C, c portæ. D, D tigna statuta, quibus tectum superponitur.

Conclavis, in quo pyritides arit, defecio.

Fig. 24. *Sectio unius foci secundum rectam YZ.*

St paries foci posterior. r V paries, qui a latere foci est. FI r S ignis, seu aëris spiraculum.

Fig. 25. *Scenographia Conclavis.*
C, C portæ. DG tigna statuta, quibus tectum superpositum est. LMHKOM tectum, ejus pars diruta fingitur, ut interiora conclavis pateant. n x apertura, ex qua fumus eluctatur. ABBA focus. F spiracula.



LIBER SECUNDUS

*De ratione Venarum excoquendarum
in fornacibus vulgaribus.*

XLII.



Etsi cum venæ discernuntur, cribrantur, lavantur, plurimum detrahatur de terrenis illis corporibus, quæ cum metallis mista esse solent, multa quoque pars sulphuris, alteriusve volatilis materiæ ex iisdem adimatur, cum torrentur aut cremantur; in illis tamen remanet aliquid, quod metallorum speciem ab oculis removet, efficitque informe quiddam, & rude: quod quidem non aliter secerni ab iis potest, nisi excoquantur. Excoctione enim id plane assequimur, ut suus cuique color, ac splendor insideat, ut ductile, ut purum fiat, quale ad usum hominum exquiritur.

XLIII.

Peragi autem excoctio potest igne vel directo, vel reflexo: quorum primum in fornacibus fit, quæ in suprema parte apertæ sunt, quasque, quod frequentius usurpentur, vulgares appellare licet, alterum in iis, quæ camera tectæ sunt, atque adeo concameratæ nuncupantur. Quoniam vero istæ venarum excoquendarum rationes multum inter se differunt, eas singillatim explicabo; ac primum de illa, quæ igne directo peragitur, dicam, orsus a fornacibus.

CAPUT I.

De Fornacibus vulgaribus.

XLIV.

Fornaces, quas vulgares appellavimus, vel altæ sunt, vel humiles, vel inter has mediæ. Altas eas dicimus, in quas Minister venam, & carbones nequit injicere, nisi scalæ gradibus adscendens. Mediæ, in quas Minister in solo officinæ stans, aut uno gradu adscendens venam conjicere potest. Humilibus denique eas accensimus, quæ tam altæ non sunt, quam mediæ, & foci fere similes sunt. Ad aliquam ex his fornacibus facile revocantur illæ omnes, quas Schlüterus Cap. VII. commemorat, aliisque nominibus designat. Sed, quæcumque demum extruendæ sint, eo loci constituentur, in quem præceps aqua ad rotas machinarum versandas derivari queat, & in quo venti perspirando exhalationes ita dissipare possint, ut molestiam operariis non creent. Sint præterea prope fodinam sitæ, nec longe a silvis, ne majores impensæ in venarum, ac carbonum, lignorumque transportationem faciendæ sint. Vallis itidem fornacibus proxima sit, in quam recrementa inutilia commode conjici possint. In solo autem udo vel paludoso non constituentur. Nam vis ignium humorem ex terra elicit tam ad fornacis focum, quam ad catinum, & parietes, eosque madidos inflat, inflati vitium faciunt, & sæpe magno cum fragore non sine hominum periculo dissiliunt. Appulsus itidem humoris vim ignium ita minuit, ut liquationem venarum vel retardet, vel etiâ sistat: quod fieri scribit Swedemborgius, etsi aquæ tres vel quatuor pedes a

Diversa fornacum vulgarium genera.

Quæ cautiones generatim adhibendæ sint ad fornacum constructionem.

Vol. I.

K

foco distent, atque inter has, & ignem lamina ferrea interposita sit. Ne hæc incommoda existant, necesse est tum etiam, cum fornaces in loco satis sicco extruuntur, sub foco, & catino, atque, si fornaces altiores sint, in ipsis quoque parietibus quædam spiramenta facere, quæ ad aërem pateant, ut ex iis humor, quem ignis ex terra quasi attrahit, libere, & solute expiret. Si fornax in solo ædificetur, quod solidum sit, sub ipsam substructio fiat ex lapidibus coctis, vel nativis; at, si ædificio ferendo idoneum non sit, substructioni subigantur tigna in cratis figuram coagmentata, ut fornax huic basi innixa firma consistat. Parietes interiores fornacis fiant ex lapidibus nativis, qui injuriis ignium maxime resistant. Nam, lateres cocti, etsi in igne persistant, cito tamen vitium faciunt, & franguntur, cum excoctor decutit cadmias, quæ, interim dum excoquerentur venæ, ad parietes adhæserunt. Optimi quoque sunt lateres ex recrementis ferreis conflati. Cum plures fornaces ad eundem murum extruuntur, eæ inter se minimum distent sex pedes, ut excoctores, eorumque ministri vim caloris facilius sustinere possint. Ut denique diutius ignium vi resistant, ferreis vinculis constringantur.

XLV.

Fornacis media descriptio.

Atque hæc ad omnes fornaces pertinent. Fornax autem media ita extruatur. Terra effossa, substructio fiat *FERDBAHGFO*, in qua sint duo spiracula transversa *ON*, *ML*; eademque tam alta ducatur, ut domicilii solum æquet. Sed cum in eam altitudinem ducta fuerit, in qua a solo distet pedibus duobus, & totidem pollicibus, spiracula latis lapidibus, crassis pollices IV. obtegantur. His autem superiniciantur recrementa metallica in altitudinem

pedis unius, & pollicum quatuor: quæ, ut sunt foraminum plena, & metallicæ materiæ admixta, humorem intercipiunt, & calorem magis coërcent. Iſtis demum argilla ſuperponatur alta pollices quinque, eaque fiſtucatione ſpiſſetur. His peractis parietes externi *FDEKMBLAFD* primum ducantur, deinde interiores *NFAOLTZB*. Muro poſteriori fenestra ſit in foramen deſinens, per quod ventus in fornacem inſpiratur. Inſpiratur autem vel follibus, vel tubo hydraulico, quemadmodum infra explicabo. Ac ſi quidem folles adhibeantur, foramen illud excipit fiſtulam æneam vel ferream, in qua follium nares collocantur. Sin autem tubus hydraulicus uſurpetur, in illud immittitur fiſtula, quæ ex eodem tubo eminet. At ex parietibus interioribus tres tantummodo initio extruantur, poſterior nempe, & qui ſunt a lateribus. Frons enim patere debet, quoaduſque focus paratus ſit. Tribus hiſ parietibus, & fronte capacitas fornacis concluditur, cujuſ longi-

Fig. 27.

tudo *ON* eſt pedum $2\frac{3}{4}$, vel $3\frac{1}{2}$; latitudo *OT* pedum $1\frac{1}{2}$, vel $2\frac{1}{4}$. Suprema eorundem parietum pars *YONT* verſus interiora fornacis declivis ſit, ne quid ex iis, quæ in fornacem conjiciuntur, in illa conſiſtat. Fornix *NSO* deinde conſtruatur; itemque fornix *SAG*, qui ſumum metallis non carentem concipiat, & coërceat, eundemque, poſtquam ad ipſum pars metallica a fumo ſublata adhæſerit, per foramen *A* emittat, ex quo domicilium ſubiens per ejus tectum patens eluctatur. Idem fornix hanc præterea metallicis præſtat utilitatem, ut ignis ardorem coërceat, & augeat. At alii, cum venam non pretioſam excoquunt, permittunt ſumum per caminum rectum libere evola-

Fig. 29.

re. In fornacis fronte media paretur catinus, in quem materia liquefacta derivanda est. Sed sapius duo parantur, quorum alter in medio fit, & aliquantulum ex solo officinæ extat, alter fit a latere in ipso officinæ solo, in quem ex primo materia liquefacta derivatur. Horum autem primus superior dicitur, alter inferior: quinimmo tertius catinus aliquando extruitur ad alterum catini superioris latus. His præstitis, lutum interius fornaci illinatur, tum ut hiantium parietum cava, si quæ fuerint, compleantur, tum maxime ut id saxa tueatur ab injuria ignium: deinde leni igne fornax siccetur; ac demum, si vena mox excoquenda in ea sit, focus paretur ex mixtura argillæ, & pulveris carbonum: quod qui fiat paullo infra dicemus.

XLVI.

At frons, quam patere diximus, occludatur, vel pariete ex coctis lateribus facto, vel fore ferrea, quæ, qua parte focum spectat, argilla obtecta sit. Paries iste in eam altitudinem ducatur, ex qua excoctor in solo officinæ, vel in catini superioris marginibus stans possit commode venas in fornacem injicere una cum his, quibus eadem excoquantur. Quo circa fiat altus pedes circiter $5\frac{1}{2}$.

Infimæ autem ejus parti os existat, seu foramen aliquot pollices altum, & latum, ut per illud in fornacem, cum opus est, contos ferreos excoctor immittere possit, perque focum versare. Os ejusmodi, quod aliqui oculum appellant, rotundum fieri solet; aliquando tamen rectanguli figura ei datur. Porro paries ille anterior, quem modo descripsi, diruitur, quoties fornacem, vel focum reficere oportet; idemque potest fieri humilior, cum vena excoquenda fa-

cile liquefcit: quo enim eft humilior, minor in fornace ardor exiftit. Vena autem facile liquefcens leniori igne excoquitur.

XLVII.

Tab. VI. Fig. 26. Ichnograftia fubftrudtionis.
ML, NO humoris fpiracula.

XLVIII.

Tab. VI. Fig. 27. Ichnographia fornacis medix.
FDEKMBL parietes externi. NFALBZ parietes interni. GVH feneftra, quæ follium nares recipit. Vr fiflula. NFAOLTZB parietes interni. P. catinus fuperior. R catinus inferior. Q aliter catinus inferior.

XLIX.

Tab. VI. Fig. 28. Orthographia parietis pofterioris.
N humoris fpiraculum. EK folum officinx.
HXG feneftra, quæ fiflulam excipit. V foramen, in quo fiflula collocatur.

L.

Tab. VI. Fig. 29. Orthographia partis anterioris.
EK officinx folum. C fpiraculum humoris.
n ejus operculum. t recrementa foco fubftrata. r argilla foco fubjecta. P catinus fuperior. R catinus inferior. q aliter catinus inferior. V foramen, quod fiflulam excipit. TYNZ frons fornacis. ZBNTYOMF parietes interni. BENGHDKF parietes exteriores. I foris aperta.

LI.

Tab. VI. Fig. 30. Orthographia fornacis feclæ fecundum rectam VI in Ichnographia ductæ.

EK officinx folum. IM humoris fpiraculum.
On lapides, quibus fpiraculum obteclum eft. LB recrementa foco fubjecta. rt argilla foco fubftrata. sg focus. P catinus fuperior. XC feneftra, quæ na-

res follium excipit. V fistula. SNT paries interior. XK paries posterior externus. SAG testudo. TV paries posterior internus.

LII.

Tab. VI. Fig. 31. Scenographia fornacis.

P catinus superior. R catinus inferior. Q alter catinus inferior. f os fornacis. Td focis ferrea. NSO fornix, sub quo patet fornacis pars superior. A foramen, per quod ex testudine fumus eluctatur.

LIII.

*Fornacis altæ
descriptio.*

Fornaces altæ, si ab iis discefferis, in quibus venæ ferri excoqui solent, a medijs plerumque non differunt, nisi majori parietum altitudine. Quales istæ sint ex earum lineamentis cognoscas. Ac illa quidem fornax, quam hoc loco describo, sumpta est ex tabula 37. Schlüterii. Aliter tamen pro diversa locorum, & venarum opportunitate extrui poterit: quæ de re suis locis dicam.

LIV.

Tab. VII. Fig. 32. Ichnographia fornacis altæ.

BAQRXED parietes exteriores. PEDBAN parietes interiores. Pr uN capacitas fornacis. II catinus superior, vel semita. C, C catini inferiores. KML fenestra, quæ nars follium excipit. O fistula. G gradus, quibus ascendit minister, ut venas aliaque in fornacem conjiciat. F exitus scalæ, ubi paries F excisus est. H fenestra, per quam fumus eluctatur.

LV.

Tav. VII. Fig. 33. Orthographia fornacis sectæ secundum rectam EA.

M humoris spiraculum. XX officinæ solum. C, C catini inferiores. I catinus superior, vel semita in foco excavata, quæ ultra fornacis os protenditur. O fistula. PKLN fornacis frons patens. FmB for-

nix, seu testudo, sub quam fumus per foramen in pariete ad latus fornacis cavatum eluctatur. G gradus.

XLVI.

Tab. VII. Fig. 34. Orthographia fornacis sectæ secundum rectam IM.

XX officinæ solum. cQ humoris spiraculum. CC canales, quibus humor ad aërem patet. KL fenestra, quæ nares follium excipit. O fistula. VP os fornacis. IO semita, seu catinus cuius pars intra fornacem, pars extra eam est. N pulvis ex argilla, & pulvere carbonum factus. r m recrementa foco subtracta. Y t focus. VK frons fornacis ex lapidibus facta. SO paries internus posterior. T fornix. Tghi testudo. Z pars fornacis, sub quo gradus existunt.

LVII.

Tab. VII. Fig. 35. Scenographia fornacis ejusdem.

XX officinæ solum. I catinus superior. CC catini inferiores. PVYN os fornacis. VKLY frons. KSTL capacitas superior. STO fornix. G gradus.

LVIII.

At fornaces, in quibus venarum ferri excoctio perficitur, paullo diligentius sunt explicandæ. Primum itaque, terrâ effossâ, substructio YV in altitudinem VII. pedum deprimatur, in eaque sint humoris spiracula ZZ', qui per tubos æneos, vel ferreos exspiret. Quod si in solo udo fornax constituenda sit, fossa circa eam, vel ad ejus latus ducatur, in quam aquæ ex solo manantes influant, & inde extra domicilium exonerent. Spiracula vel lapidibus latis, vel fornice contegantur. Spiraculorum tegumento, in ea parte, in qua focus seu catinus constituitur, lapis s: in igne persistens, pedemque crassus superponatur, qui, quòd foci fundum efficiat, vel solum officinæ YH æquabit, vel isto paullo al-

Fornacum, in quibus vene ferri excoquantur, descriptio.

Fundamenta.

Fig. 36.
37. 38.

tior erit. Iste vero lapis per annum in sole, vel prope fornacem ardentem siccatus sit, ne cito vitium faciat. Alii inter lapidem hunc, & spiraculorum tegumentum arenam *ux* interponunt, vel recrementa metallica, ut humorem a foco magis avertant.

LIX.

Substructionis longitudo ac latitudo tanta fere sit, quanta est altitudo fornacis: Fiunt autem altæ plerumque XXI. pedes, sæpe XXV., nonnumquam XXX. Porro, substructione ad altitudinem soli ducta, ex lapidibus coctis, vel nativis fiant parietes externi *YA*, *YA'*, qui a summo aliquantisper coarctantur, quod ibi minor sit ignium vis. In iis crebra spiracula *OM* sint, quæ ad ærem pateant, eaque facile fient, funibus vel bacillis ligneis in parietes, dum extruuntur, immisissis, iisque deinde extractis. Suprema parietum pars *C'A'* complanetur, atque ad eorum margines muri *C'D'* ducantur, quorum objectu venti listantur, ne in fornacem inspirent, neve molestiam operariis creent; quos quidem muros coronam appellant. Aliqui fornacem camino quasi obtegunt, ut, quoniam ejus gula ex domicilii tecto extat, tuta a pluviis sit. In ejusdem vicinia conclave extruere oportet, in quod carbones, & vena excoquenda inferantur. Ad latus illud fornacis, in quo folles locantur, sit porta, vel fenestra *PK* versus exteriorem partem dilatata, ut folles diduci possint, similisque porta *CABD* sit in anteriori parte, ut excoctor ad catinum possit accedere. Muri autem isti, in quibus fenestræ patent, cum versus interiora fornacis angustati sint, fornicibus, ac tigillis ferreis fulciantur, ne corruant. Verum si, tubo

Altitudo fornacis.

Fig. 37.
38.

Fig. 36.

hydraulicò ventus in fornacem inspirandus sit, prior illa fenestra minus dilatata fiet, quàm cum folles sub ea locandi sunt (*).

LX.

Parietes interni $H'FG$ ex optimis lapidibus in igne persistentibus, & argilla coagmentatis exstruantur, iique ab exterioribus aliquantulum distent, ut quæ pars AHF' vacua restat, arena compleatur; quæ quidem duplicem utilitatem præbet. Primo enim humorem, qui ex internis parietibus erumpit, combibens in aëra per spiracula OM exhalat; deinde, cum ii ipsi reficiendi sunt, id detrimento non est proximis parietibus, utpote qui cum illis nullo modo sunt conjuncti.

Parietes interni.

Fig. 37.

38.

LXI.

His parietibus concluditur interna fornacis capacitas, cujus plures sunt partes, eaque propriis nominibus distinctæ. Quæ enim pars GG' ceteris latior est, venter dicitur, qui a fundo distat tertia fere parte totius altitudinis XE . Sub ventrem est focus superior $GTT'G'$, sub istum vero focus inferior $XXX'T'$: quæ pars gulâ $K'E'$, & ventre terminatur, instar coni est, quam figuram, inversam tamen, habet & focus superior; sed focus inferior

Capacitas interior.

(*) In plerisque Italiæ fornacibus ventus, qui tubo hydraulico excitari solet, ad anteriorem fornacis partem, eam nempe, in qua materia liquefacta emittitur, inspiratur. Quod idcirco inducendum fuisse arbitror, ut operarii ignium ardoribus minus sint expositi. Hoc enim modo flatus in partem ipsi oppositam flammam urget, atque adeo per aperturas, quæ fiunt, cum materiam liquefactam emittunt; non erumpit.

Vol. I.

L

Fig. 36. cylindricus est: quæ figuræ omnes ejus sunt generis, ut basis earum veluti $GhG'h'$ sit elliptica. Ellipsis autem axis major GG' ab anteriore parte fornacis ad posteriorem est directus, efficitque hh' naxis ejusdem longitudinem, cum axis minor latitudo spectet.

LXII.

Fig. 43.
44.
Gula.

Alii non conii, sed conoidis figuram partibus istis dant, cujus basis circularis est. Verum etsi in circulo certa capacitas minori murorum circuitu concludatur, & æquabilis diffundatur ignis; ad venarum tamen excoctionem utilior accedit elliptica figura. Primo enim follium flatus, cum minus absit a pariete iis opposito, in hunc impingens melius reflectitur, sicque ignis vis augetur, & ventus liquidum ferrum in undas agens a recrementis magis purgat. Deinde cum excoctores ferrum agitant, aut ferrum purgant, facilius contos, aliaque instrumenta per omnem catini circuitum versant, & revolvunt. Idcirco autem fornacis pars superior a summo versus focum dilatatur, ut minori carbonum copia certus calor in foco excitetur; deinde ut vena, antequam in eum locum deveniat, ubi luculentius ardet ignis, paulatim incalescens apte liquecat. Luculentius autem ardet ignis in foco superiori, tum quod flatus follium densior ibi spiret, tum quod major carbonum copia eo in loco sit. Porro quædam esse debet proportio inter gulæ aperturam, & fornacis capacitatem. Nam, si illa nimis coarctatur, aer, quem folles inspirant, cum inde non possit libere evolare, ignem non multum animat, atque adeo excoctio venæ lentius perficitur. Contra si nimium ampliatur, vena ocius quidem excoquitur, sed magna pars ferri uritur, ma-

gna quoque carbonum copia frustra consumitur. Volunt aliqui, inter quos Buffonius, (*) aream gulæ æquare quartam partem areæ, quæ in ventre est, alii tertiam, alii denique quintam. Præstat autem gulam paullo grandiore facere, eique aliquot lapides vel laminas ferri crudi ita imponere, ut versus mediam fornacem adductæ, reductæque in eo tandem situ stabiliantur, in quo animadversum sit, venam melius liquefcere.

LXIII.

At focus superior GT' idcirco in ima parte instar coni coarctatur, ut materia in fornace existens sustentata in inferiorem focum, antequam liquefacta sit, non delabatur. Ejus autem parietes GTI , qui vel ex arena tusa, vel ex lapidibus in igne persistentibus fiunt, eam declivitatem habeant, ob quam vena liquefacta in iis non consistat, sed in catinum facile defluat. Quod quidem certius assequentur, qui parietes istos linea convexa $G' r T'$ terminaverint. Isto enim modo major foci superficies igni exposita est, adeoque si quæ materia tenacior ad eum adhærescat, facilius liquefcet.

Focus superior.

Fig. 37.
38.

LXIV.

Focus inferior, seu catinus TXT' plerumque cylindricus fit, isque in fornacibus XXV . pedes al-

Focus inferior.

(*) Buffonius, volumine II. pag. 64. Supplementi ad historiam naturalem, aream, quam fornacis capacitati tribuit, circulem facit, asseritque excoctionem venarum optime peragi, si diameter ventris, cui quinque pedes tribuit, sit duplo major diametro gulæ, seu, quod idem est, si gulæ area æquet quartam partem areæ, quæ in ventre est.

tis est tres pedes profundus, longus XVI. pollices, Tab. XII. latus XIII. At in fornacibus altis XXX. pedes ali-
 fig. 43-44. qui catinum infundibuli forma extruunt, eumque longum faciunt pedes duos & dimidium, latum XX. pollices, altum sex pedes. Cum catinus in parte superiori ampliatus est, ferrum, quod in ipsum devolvitur, ignis vi magis expositus est; adeoque in amplissimis fornacibus, in quibus magna venæ copia excoquitur, infundibuli forma catino erit accommodata. Secus enim periculum foret, ne, calore deficiente, ferrum duresceret. Satis autem erit cylindricam facere eam catini partem *KB'b'y*, in qua ferrum, antequam ex fornace emittatur, solet consistere. At focus inferior ita extruatur. Ad latera lapidis, quem in fundo foci esse diximus, erigantur secundum longitudinem duo lapides XIII. saltem pollices crassi, IX. pollices profundi, & longi pedes tres, quos costas appellabimus. Isti tantum inter se distent, quanta esse debet foci latitudo; atque in parte posteriori jungantur alio lapide æque ac priores crasso, & profundo. His tribus lapidibus circumcirca injiciatur arena, quæ, cum ea ignis in vitrum verterit, rimas omnes expleat.

Tab. XII. In fronte locetur vel lapis, vel massa ferrea *iesh*,
 fig. 43-44. veluti incus, quæ tam alta sit, ut ex ejus summa parte defluere possint scoriæ, cum ex foco emittuntur; ad dexteram verò hujus vel massæ ferreæ, vel lapidis apertura restet lata palmum, atque ad fundum usque foci fere pertingens, per quam ferrum emittendum est. Hæc ipsa cum excoctio inchoatur, occluditur mistura ex argilla, & arena facta, eademque misturâ obfirmatur idem lapis, quæ declivis ponitur, ut facilius per eam scoriæ defluant. Supra hunc lapidem, seu incudinem fenestra sit tam

ampla, ut per eam operarius curvato corpore in fornacem ingredi possit, cum focus reficiendus est, vel cum massæ, quæ ad eundem adhæserunt, detrahendæ sunt. Fenestra occludatur tenui pariete, vel lamina ferri crudi, ita tamen ut inter hanc, & incudem apertura aliquot pollices alta restet, per quam excoctor in fornacem contos immittere possit: tenuis autem sit ille paries, ut facilius ferrea instrumenta in omnem foci partem versari queant. Hæc apertura demum occludatur argilla cum arena commixta, ut facile, cum scorix emittendæ sunt, conto in eam adacto perforari possit. At lapis, quem diximus, seu incus in fronte foci non collocatur, nisi post quatuor vel quinque dies, ex quo venæ excoctio inchoata est. Cum enim primis diebus vena liquata ad focum soleat adhærescere, necesse est continuo eam inde divellere, ne forte focum penitus præcludat. Is autem labor non ita facile suscipi posset, si in fronte foci lapis ille afforeret. Quamobrem per id temporis agger ex arena factus apponitur ad frontem, ferri liquati continendi gratia. Reliqua foci inferioris pars ex crassioribus lapidibus fiat, & ita complanatis, ut, etsi nullum iis interponatur lutum, vix tamen rimæ appareant. Nam ne argilla quidem vehementissimi ignis injuriis resistit. Parieti catini foramen *c* sit, quod a fundo XIII. ad XXII. pollices absit, & a posteriori muro distet tertia fere parte longitudinis catini *ab*. In illud fistula infigitur, quæ excipit nares folium, vel tubum machinæ hydraulicæ, ex quo ventus expirat. Ea sit plerumque ex ferro crudo, definitque in semicirculum, cujus area æqualis est nari follis, ut nempe ventus eadem vi in focum inspi-ret, qua ex follibus expirat: Ut plurimum vero

Fig. 36.
38.

Quam formam,
& quem situm
habeat fistula.

radius semicirculi est longus pollices duos & dimidium, vel tres. Alii ex argilla eam faciunt; sed post aliquot dies renovanda est: in vitrum enim versa liquecit. Catinus ut plurimum in media fornace est. At in Sveciæ fornacibus plerumque ita situs est, ut recta *BD* a puncto medio gulæ ad perpendicularum ducta non in medium catinum incidat, sed catini parietem illum radat, in quo fistula est. Quod idcirco fieri scribit Swedemborgius, ut ventus eo melius ad parietem oppositum pertingat, & inde rejectus per superficiem ferri liquati revolvatur; sicque tamquam e centro per fornacem ascendat.

LXV.

Qua ratione
capacitati fornacis certa forma datur.

At enim, ut parietes interni ad eam figuram componantur, quam fornacis capacitati dare volumus, duo annuli ferrei parentur, quorum alteri ea figura, & magnitudo sit, quam habere debet pars fornacis suprema, alteri ea forma sit, quæ ventri danda est; in utroque autem sint crebra foramina sibi invicem respondentia. Postquam vero parietes externi fuerint extructi, prior ille annulus eo loci constituatur, ubi gula fornacis extruenda est, alterum in ea altitudine, in qua venter futurus est; ita autem sibi invicem respondeant, ut recta ex centro annuli superioris ad perpendicularum demissa in centrum inferioris incidat, atque per utriusque foramina funes recte extendi possint: quibus ita dispositis parietes interni componantur ad eam figuram, quæ istis funibus quasi circumscripta est; similique modo focus extruatur. Sint autem annuli, atque ille præsertim, qui in ventre est, ex pluribus partibus compositi, ut postquam parietes fuerint ducti, extrahi ex fornace possint. Verum, si fornacis capacitas coni aut conoidis formam habeat,

cujus basis circularis sit, facilius ea extruetur armamento *ABCD* mobili, ad quod paullatim circa *Fig. 46.* axem *AB* versatum lapides accommodentur. Ceterum si lapides in igne persistentes Metallico in promptu non fuerint, interiori fornacis capacitati crustam ex optima argilla factam inducat, quæ pedem unum, vel duos crassa sit.

LXVI.

Tab. VIII. Fig. 36. *Ichographia fornacis in Galliis usurpatæ, & officinæ partis. (*)*

DA fenestra in fronte fornacis. *q KF* fenestra, quæ solles *R* excipit. *H, H* humoris spiracula. *ca db* focus inferior. *N* incus seu lapis os fornacis occludens. *G h' G' h* focus superior. *m u r r* canal, in quem aqua defluit. *r r* rota. *st* axis rotæ solles comprimentis. *fg* cauda follium. *L f* veltres, qui circa axem e pondere *l* versati solles diducunt. *un p* pons. *ZZ* conclave, in quo carbores, & vena asservantur.

LXVII.

Tab. IX. Fig. 37. *Orthographia fornacis sectæ secundum rectam GG'.*

YV substructio. *ab* tigna, quæ in cratis figuram substructioni inserviunt, cum in solo non satis firmo ædificatur. *Z* humoris spiraculum. *YY* officinæ solum. *EE' G' T' x TE* capacitas fornacis. *rgfBD* fenestra in fronte fornacis. *EG* paries interior. *F'AY* paries exterior. *AF'H'* paries medius, qui arena vel recrementi completur. *D'C'yy'* murus, quo suprema fornacis pars concluditur, seu corona.

(*) Plures ejusmodi fornaces more gallico extructas habes in Encyclopedia, atque in libro inscriptio *Art des Forges.*

LXVIII.

Tab. IX. Fig. 38. Orthographia fornacis sectæ secundum rectam hM.

KP fenestra, quæ folles excipit. VV humoris spiraculum. Reliqua ita fere se habent, ut in figura priori.

LXIX.

Tab. X. Fig. 39. Ichnographia coronæ.

CDAB paries. E ostium, quo ad coronam patet aditus. FKHG gula fornacis. I paries excisus, ut operarius ad gulam fornacis propius accedere possit, in eamque commode venam injicere. V fenestra, quæ in officinam patet prospectus.

LXX.

Tab. X. Fig. 40. Orthographia officinæ sectæ secundum rectam PN in fig. 36. ductam.

rr rota. tt axis rotæ folles comprimentis. BADC corona. Q conclave. TRSV pons ligneus conclave cum corona conjungens. qq gradus, quibus in conclave ascenditur. GHKLL' fulcimentum in fornacis fronte. GHK fornix, quo aditus sub fulcimentum patet. Mm fulcimenta secta, quibus fenestra nOP obfirmatur. u, u humoris spiracula. I foramen, quod fistulam excipit.

LXXI.

Lineamenta alterius fornacis, quæ ad Laurwiggium in Norvegia ad venarum ferri excoctionem usurpatur (*).

(*) Hanc protulit Jarsius in suis itinibus metallicis, atque huic similem vidi nuper extructam in finibus agri Vercellensis, in qua multo utilius, quàm in iis, quæ in usu Bergomensi sunt, quæque in reliquis fere Italiæ partibus usurpantur, venæ excoquuntur.

Tab. XI. Fig. 41. Ichnographia substructionis, seu pedamenti.

ABCD humoris spiracula. CF, BG, HA, DE tubi, qui a spiraculis ad solum officinae pertingunt, ubi in aërem patent.

LXXII.

Tab. XI. Fig. 42. Ichnographia fornacis horizontaliter sectae in ea altitudine, in qua solles consistunt.

CABD pars anterior fornacis, seu fenestra exterius dilatata. EIFG focus inferior. H incus. GR fissura, qua ferrum emittitur. gf, hi bacilla ferrea, quae parietes continent, ne vi ignium vitium faciant. F'KQP fenestra, sub quam solles diducuntur, & comprimuntur. qKL foramen, quod fistulam excipit.

LXXIII.

Tab. XII. Fig. 43. Orthographia fornacis sectae secundum rectam ab in fig. 42. ductam.

Zi officinae solum. a, b, c humoris spiracula. cd, bn tubi, quibus humor in aërem patet. OM foramina, quibus humor ex parietibus exspirat. ux sabulum. st lapis in foci fundo situs. fr foramen, quo recrementa emittuntur. fq lamina ferrea, qua foramen, seu fenestra fq occluditur. YhZ fenestra exterius dilatata, sub quam Ministri, cum opus in fornace exequuntur, consistunt. NQ bacilla ferrea. Kf' paries interior. Ad paries exterior. AO paries medius. P'A' A corona.

LXXIV.

Tab. XII. Fig. 44. Orthographia fornacis sectae secundum rectam dc in fig. 42. ductam.

PKF fenestra, sub qua solles locantur. Reliqua ita se habent, ut in figura priori.

LXXV.

Tab. XIII. Fig. 45. Fornax Svecicâ (*).

TV officinæ solum. XZTV pedamentum.
Y humoris spiraculum. a b lapis in foci fundo. GDEF
focus. FECA capacitas fornacis. BD recta ex-
media parte gulæ ad perpendicularum ducta, quæ in fistu-
læ orificium incidit. RQPO corona. HDKbV fe-
nestra exterius dilatata, sub qua folles locantur.

LXXVI.

Fornaces, quas modo descripsi, venis ferri ex-
coquendis aptissimæ sunt. Cum enim hoc metallum
parvo pretio vendi soleat, necesse est ipsum mini-
mâ quâ potest impensâ conflare: quod quidem Me-
tallici assequuntur ope altissimarum fornacum, in
quibus nempe magna venæ moles minori carbonum
impensa certo tempore excoquitur. Modus tamen
est quidam in earum altitudine retinendus. Nam,
quo altior fornax est, eo tardius carbones ad fistulam
usque subsident, ubi maximus ardor esse debet,
ut vena perfecte liquecat. Quoniam vero carbones
interim dum a summa fornace ad imam descendunt,
ardent, atque ardendo materiam inflammabilem, ex
qua ignis existit, dimittunt, hinc fit, ut, si fornax
nimium alta fuerit, ad fistulam perveniant viribus
ita destituti, ut nequeant eum calorem suppeditare,
qui ad venam perfecte excoquendam requiritur.
Commemoratæ fornaces solent perdurare ad centum
& eo amplius annos, etsi sæpe ob vim ignium ri-
mas agant. At alii quamquam altissimis fornacibus

(*) Vide Swedemborgium de Ferro pag. 25., &
Jarvis itinera metallica pag. 116.

utantur, attamen, ut ædificandi sumptus minuant, parietes faciant tenuiores, quàm præceptum a nobis sit. Alii humiliores usurpant fornaculas, quòd venarum quarumdam naturæ magis sint accommodatæ. De his autem suis locis dicemus, cum id e re esse arbitrabimur. Hoc loco duo nobis restant dicenda, quæ ad fornaces illas pertinent, in quibus venæ cujusque generis metalli, excepto ferro, excoqui possunt. Primo itaque operæ pretium est ad fornaces, in quibus venæ pretiosæ, aut metalli divites, aut minutim contusæ excoquuntur, cameras amplas construere, quæ materiam metallicam cum fumo sublatam excipiant, & coërceant. Quo modo duæ plerumque fornaces *A, B* conjunguntur (*) sub unam testudinem *DmZX*, quam murus, ad quem illæ sunt exstructæ, & pilæ *V, V* sustinent, sub quæ excoctores munus suum perficiunt. Eadem testudo habet duo foramina *K, L*, per quæ fumus e fornacibus ascendit in cameram *Dpqm*, cujus interiora *DNpqt*, & pavementum *QNOP* conspicua sunt, quòd in hac effigie prior paries dirutus fingatur. In ejus media supra testudinem parte est caminus *RS*, cui sunt foramina *R, r*, per quæ fumus ex fornacibus in cameram usque ad ejus testudinem *py* ascendens, &, cum eluctari non possit, iterum descendens caminum subit. Hoc autem modo fit, ut interim dum fumus in camera *Dpqm* continetur, crassior pars materiæ metallicæ cum eo sublata ad cameram adhærescat, quæ cadmia non raro in stitias concrefcit; tenuior vero pars, quam tardius fumus dimittit, caminum ingressa bracteis ferreis, quæ hunc in finem in camino infixæ sunt, adhæreat.

Quomodo ad fornaces quoddam cameram extruuntur capaciores.

Fig. 47.

M 2

(*) Agricola de Re metallica lib. IX.

At in altero cameræ latere est fenestra *M*, in quam vitrea specularia sunt imposita, quæ lumen transmittant, quin fumus exire ex ea possit; in altero est janua, quæ interim dum venæ excoctio peragitur, tota clauditur, ut fumum coërceat; aperitur autem, cum operarius aut fuliginem, aut pompholigen, aut cadmiam detracturus in cameram ascendit. Bis autem singulis annis ea fuligo cum pompholige permixta abstergitur, & cadmia decutitur: quæ omnia aquis salis aspersa rursus cum venis excoquantur (*).

LXXVII.

Quid animad-
vertere debeat
Metallicus, ut
ad terræ venæ
excoctionem
fornacem ac-
commodatio-
nem deligat.

Alterum, quod nobis dicendum restat, in eo versatur, ut videamus, quænam ex commemoratis fornacibus ad venarum excoctionem utilior sit. Quæ in re, etsi nihil generatim constitui possit, aliqua tamen innuemus, ex quibus pendet hujus quæstionis solutio. Sane fornaces altæ in eo præstant mediis, quod minor carbonum copia in certa definitaque venæ mole excoquenda consumatur. Cum enim altiores sint, major ignis vis in ipsis existit, quam in mediis, majoremque venæ molem excipiunt. Deinde in altis fornacibus excoctio continenter peragitur spatio quatuor, vel sex hebdomadarum, cum in mediis post sex ut summum dies intermitteri soleat; ex quo fit, ut ardor, quem parietes altarum fornacum semel conceperint, excoctionem venarum adjuvet, ac præterea minuatur impensa carbonum, quæ in calefaciendis fornacibus facienda est. At hoc ipso, quod vehementior in illis ardeat ignis, venæ, quibus inest metallum, quod facile comburitur, cujusmodi est plumbum, utiliter in iisdem excoqui plerumque ne-

(*) Agricola de Re metallica lib. IX.

queunt, nisi metalli inopes sint. Quod enim istæ parum metalli in se contineant, parum de eo ignis consumit comparate ad magnam venæ molem, quæ alioquin, ut dictum est, citius & minori impensa carbonum excoquitur. Ceterum venæ omnes, præter venas ferri & stanni, utiliter excoqui possunt in fornacibus mediis; atque in his quoque, si vena id tulerit, poterit ad aliquot hebdomadas continenter peragi excoctionis opus. Sed quoniam magna est in venis differentia; experientissimi Metallici erit videre, quænam ex istis fornacibus ad certæ venæ excoctionem magis sit accommodata. Quo in negotio ne prorsus errer, quod Dominis officinarum magno detrimento esset, videat primo molem carbonum, quæ consumitur, deinde consideret quantum venæ certo tempore liquecat, & quantum metalli, & quale eo tempore confletur, uno verbo omnium sumptuum rationem habeat, qui ad excoctionem in alterutra fornace susceptam fiunt, eosque inter se conferat. Neque enim certa excoquendi ratio ceteris anteferenda est, quod in uno aliquo capite utilior accidat, verum utilitas ex summa rerum omnium, quæ ad excoctionem faciunt, æstimanda est.

CAPUT II.

De domiciliis, quibus fornaces alique ad excoctionem necessaria concluduntur.

LXVIII.

Fornaces domicilio concluduntur, quod in tres partes distributum est. Prior in se continet aliquot conclavia, in quorum altero est fornacula venis experiundis, in aliis concluditur metallum vel

Quæ sit domiciliis dispositio

Tab. XV.
fig. 48.
49. 50.

recoquendum, vel purgandum. In posteriore sunt folles, eorum sedilia, machina, quæ folles comprimit, organum, quod eosdem diducit. In media fornaces existunt, eaque recipit venam excoquendam, additamenta, carbones, aliaque, quibus opus est excoctoribus. Parietum, qui domicilium ambiunt, pars inferior ex lapidibus extruitur in altitudinem pedum decem, pars autem superior ex tignis, & asseribus fit, ut impensæ ædificandi minuantur. At, cum sæpe ædificia ejusmodi incendio conflagent, satius est, ea omnino ex lapidibus facere, si quidem fodinæ venam copiosam ac divitem Dominis earum suppeditaverint. Tectum, quod e tegulis fictilibus constat, tignis crassioribus impositum fit: qua autem parte imminet fornacibus, tignorum obliquorum capita statutorum capita non attingant, sed ab his aliquot pedes absint, ut per eam partem tecti, vel camini patentem fornaces fumum emittant. Ne vero tigna obliqua incidant in recta, partim caveatur bacillis ferreis, quæ ex singulis ad singula eis opposita pertineant, partim tignis, quamquam raris, quæ itidem a nonnullis obliquis ad recta, quæ ex eorum regione sunt, pertingant, & ipsis dent stabilitatem: quibus & obliquis, quæ spectant tigna recta, affigantur crebri asserculi, iique luto illinantur, ut ipsis ab incendio periculum non sit: quæ cautio adhibenda est ad ea quoque tigna, quæ sunt fornacibus proxima. Domicilium plus minusve longum fit pro numero fornacum extruendarum, quarum in uno domicilio esse solent plerumque sex, raro plures, sæpius minus multæ. Sufficiet autem hoc loco illud apponere, quod Schlüterus descripsit: ex quo licebit sumere exemplum ceterorum.

LXXIX.

Tab. XV. Fig. 48. Ichnographia domicilii.

KGEF pars prior. X, X conclavia. ADEG pars media. M, M pilæ, quæ caminum sustinent. ABCD pars posterior. H, H ostia. a, a axes rotarum, qui solles deprimunt, quique aliquando pila simul attollunt, quibus venæ in capsis c d comminuuntur. Y y rivus, ex quo aquæ in canalem k g influunt, per quem in rotas machinarum devolvuntur. L canalis, ex quo aquæ, postquam in rotas inciderint, extra domicilium exonerant. h, h sedilia follium. R gradus, quibus in rotas descenditur. N lacus, in quo cuprum refrigeratur. AD paries, ad quem fornaces existunt, in eoque ostia, veluti m, patent, quibus excoctor solles contemplaturus, aliudve facturus, egreditur. P fornax, in qua vena excoquitur. Q fornax, in qua ex lithargyro plumbum conflat. R focus, in quo cuprum purgatur. S fornax concamerata, in qua argentum ex plumbo secernitur. r fornax calorem per fidilia, vel tabulas ferreas, ex quibus constat, effundens, quam hyeme ardere necesse est, ne aquæ in rotis congelient.

LXXX.

Tab. XVI. Fig. 49. Orthographia ejusdem.

ZO domicilii solum. H ostium. ZN conclave. P fornax. A paries, ad quem fornaces sunt. B solles. h, h ejus sedilia. K g canalis, ex quo aqua in rotam Q delabitur. VY vectis pondere Y oneratus, quod sollem diducit. cr alter vectis: quibus, & operculo sollis religata catena est. rr dentes axis, qui vectis cr caput deprimentes sollem comprimunt. F canalis, ex quo aquæ extra domicilium exonerant. DA tignum statuum, ML tignum obliquum, LD vectum, seu caminus patens.

LXXXI.

Tab. XVI. Fig. 49. n. 2. *Scenographia domicilii, in quo pars tecti diruta fingitur, ut in ejus interiora prospectus pateat.*

ZZ domicilii solum. DA paries, ad quem sunt fornaces P, Q, R, S. B, B folles. H ostia domicilii. X conclavia. T ostia conclavium. Y rivus. K g canal, ex quo aquæ in rotam delabuntur. FL camini, ex quibus fumus eluctatur.

LXXXII.

Conclavia, quibus ea, quæ ad excoctionem necessaria sunt, concluduntur.

Non longe a domicilio aliud conclave ex asseribus extruatur, in quo ea carbonum copia asservetur, quæ per hyemem ad venarum excoctionem necessaria est. Neque enim utile est, carbonem ex lignis conficere, cum glacies, aut nives terram occupaverint. Ita autem illud a fornacibus absit, ut ei ab incendio periculum non sit. Aliud denique conclave similiter sit, in quod invehantur fasces virgultorum, qui in fornacibus concameratis comburendi sunt. Sit autem ex asseribus factum a se invicem pedem distantibus, ut aer fasces cumulatōs subire possit: quibus idcirco substernantur ligna quædam crassiora: secus enim facile putrescerent.

CAPUT III.

De ratione, qua focus, & catini parantur.

LXXXIII.

Quomodo paratur mixtura, ex qua focus, & catini fiunt.

FOCUS, & catini fornacum confici solent ex argilla, & pulvere ex carbonibus resolutō. Ac argilla quidem effossa in sole exponitur, ut siccescat, deinde cribratur, vel quasi in farinam molitur, ac tandem cum pulvere carbonum mixta, &

madefacta pilis tunditur, ut bene omnia misceantur. Quod si nimium pinguis argilla fuerit, ea, antequam cum carbonum pulvere misceatur, cremetur, ut ignis pinguitudinem absumat. Quod cum faciendum est, ea aliquantulum madefiat, tum plures cumuli conici ex carbonibus attollantur, qui lati sint pedes duos & dimidium, totidemque alti; istis autem argilla eadem inducatur crassa tres vel quatuor pollices, inque ea crebra foramina pollicem lata fiant, quæ ad carbones usque penetrent, ut ex iis ignis exspiret; illud vero, quod ex vertice cujusque cumuli descendit, ceteris latius sit: per istud enim ignis carbonibus admoendus est. Carbonibus consumptis, quod post XXIV. horas eis accidere solet, detrahatur argilla, eaque in pulverem comminuta ad temperaturam, quam diximus, utilis erit. Verum argilla in globos formata uri quoque potest in fornacibus, interim dum, opere excoctionis finito, refrigerant. Temperatur autem argilla pulvere carbonum, ne nimium in igne durefcens rimas agat, neve ad ipsam materia liquefacta renacissime adhæreat. Id enim cum sit, pars metalli comburitur, eo quod tenax facta tardius, quàm par est, ex foco effluat: ad hæc massæ duriores, cum eximuntur, magnam foci partem secum pertrahunt, omninoque eum labefaciunt. Quocirca necesse est cum argilla miscere carbonum pulverem, præsertim cum ex isto materia inflammabilis assiduo erumpat, quæ materiæ in focum delapsæ, ac nondum forte reductæ metallicam formam tribuit, ac vetat, ne metallum jam reductum iterum in calcem vertatur. Sed quo plus pulveris carbonum cum argilla misceatur, focus eo mollior factus minori tempore persi-

Mistura eadem
quomodo, &
quando fieri de-
beat gravior,
aut levior.

fit. Quamobrem periti excoctoris erit, hanc temperaturam leviozem, vel graviorem facere, idest cum argilla plus minusve pulveris carbonum miscere, prout venæ natura, & tempus excoctioni præstiturum postulaverint. Nam ad venam, quæ ad focum facile adhæret, quæque metallum suppeditat, quod facile comburitur, aut in calcem vertitur, levior mistura adhibenda est, neque hæc multum tundi debet, ne nimium dure scat. Graviorem autem facere oportet, cum venæ vel ob sulphur, quod in se continent, vel ob alias causas valde incallescunt, & focum erodunt; aut cum venæ argenti ditiores excoquendæ sunt. Magno enim detrimento est, si ex iis quidpiam deperdatur. Cum itidem excoctor animadverterit, focum, dum vena excoquitur, in crustas attolli, eum graviori pulvere reficiet. Plerumque mistura sit ex æquis argillæ, & pulveris carbonum partibus, sæpe cum duabus argillæ partibus una pulveris carbonum miscetur. Quo autem gravior mistura est, & quo magis tunditur, ac crassior foco inducitur, diutius iste persistit: plerumque tamen in fornacibus mediis post sex dies refici solet, in altis post quatuor, vel sex hebdomadas.

LXXXIV.

Quomodo focus
parcitur.

Jam vero cum focus parandus erit, pulvis ex argilla, & carbonibus mistus ita madesiat, ut in pilæ figuram nivis instar facile formari possit. Tum minister cum in fornacis solum paulatim injiciat, & pilo ita tundat, ut focus fiat solidus. Pilonem autem teres sit, & æneum, ut istud calefieri possit, atque ita ad ipsum pulvis non adhærescat: quo circa duo pila ejusmodi habeat in promptu, ut, dum uno utitur, alterum calefiat. Misturam autem ita tundat, ut digitus vi in ipsam adactus sui vestigium in ea

non imprimat. Sed magis tundat strata inferiora, quam superiora, ne si forte ista vitium fecerint, vitium ad illa quoque transeat. Cum vero novum pulverem adjicit, rastro pulverem tusum asperet; quo ille cum hoc tenacius conjungatur; atque hoc modo focum paullatim in altitudinem pedis unius ducet; quem versus catinum declivem esse oportet, ut materia in ipsum facile possit defluere. Quod si vena admodum sulphurata sit, & facile focum exedat, & penetret, huic incommodo occurrere poterit, lapide sub ipsum subjecto, per quem materia, si focum penetraverit, in catinum defluat. Juvabit quoque foco leviozem pulverem illinire, ut, si excoctionis initio ad eum materia liquefacta adhærescat, possit ea detrahi, quin foci partem secum pertrahat.

LXXXV.

His peractis, catinum hoc modo perficiat. Foveam ad id paratam mistura ejus simili, quam ad focum usurpavit, compleat, eamque bene tundat, uti paullo ante diximus: quod ipsum iteret, usque dum pulvere tuso fovea completa sit: mox eam curvata lamina ferrea inferius acuta excindat, ut catinus fiat rotundus, & latus novem, vel decem pollices, profundus duodecim. Hunc vero ita excisum iterum tundat; sicque catinus erit paratus: similique modo catinum inferiorem, si isto ei opus sit, perficiat. Juvabit autem pulverem leviozem quinque pollices crassum catino superiori insternere, ut recrementa ad ipsum minus adhæreant. Focus denique, & catini leni igne exsiccentur.

LXXXVI.

Atque hæc generatim valent, quodcumque demum metallum, dummodo ferrum non sit, ex ve-

Catinus, quo
ratione para-
tur.

Tres exco-
quendarum ve-
narum ratio-
nes præcipua
explicantur.

Quomodo pa-
retur focus,
cum excoctio
sit ore fornacis
clauso.

Quomodo idem
paretur, cum
excoctio sit ore
semper aperto.

Quomodo fo-
cus paretur,
cum excoctio
sit ratione in-
ter illas me-
dia.

nis excoquendis conflandum fuerit: quas quidem ve-
nas hoc libro præsertim spectamus. Sed quoniam
tres maxime sunt venarum excoquendarum rationes,
videndum est, quæ foci ratio singulis sit magis ac-
commodata. Excoquuntur enim vel ore fornacis ad
tempus clauso, vel ore semper aperto, vel ratione,
quæ quasi media inter istas est. Primo modo focus
parum declivis fit versus catinum, qui extra fornacem
est; os vero fornacis, cum excoctio venæ per-
agitur, luto occlusum est, quod conto aperitur, cum
materia liquefacta in catinum derivanda est. Altero
modo focus fit magis declivis, ita tamen ut, qua
parte fistulam spectat, summum sit pedem altior
parte ei opposita. In medio foco semita quædam can-
nalis instar existit, lata quatuor pollices, alta septem
ad catinum usque pertingens, qui extra fornacem
est: qua in semita materia liquefacta paullatim col-
ligitur, atque inde in catinum per os patens con-
tinuo effluit. Quocirca excoctor focum istius fornacis
paraturus bacillum, quod ad superiorem usque
catinum pertineat, in ipsum imponat; tam autem ca-
tino, quam foco præparato, bacillum retrotractum
ex fornace eximat, ut os pateat: focum præterea,
ac inferiorem oris partem adeo non tundat, ut dure-
scant. Cum enim materia liquata, quæ continenter
effluit, tenax sit, hæc ad pulverem, quo focus, &
os fornacis constant, adhæresceret, nisi tam mollis
iste foret, ut illa defluendo hujus partem aliquam
inde avellere, ac secum pertrahere posset. Postre-
mo modo os fornacis similiter patet, atque semita
in foco cavata ad catinum pertingit; sed hujus pars
dimidia est extra fornacem, dimidia intra eam. Os
autem, cum patet, ut plurimum manifestum est,
quandoque autem occultum, & latens. Utcumque

autem se habeat, opus est altero catino, in quem priore, cum fere plenus fuerit, perforato, materia liquida influat: quod quidem foramen ita paratur. Bacillum conicum, cujus unum caput crassum sit, duos circiter pollices, alterum quinque inter utrumque catinum, superiorem dico & inferiorem, ita collocatur, ut angustius ejus caput fundum superioris attingat, alterum oblique pertingat ad inferiorem: catinis vero perfectis, bacillum eximitur, & foramen, quod restat, pulvere leviori occluditur, ut conto cuspidato facilius aperiri possit.

LXXXVII.

Excoctio, quæ ore fornacis ad tempus clauso peragitur, ad eas venas, quæ difficile liquefcunt, vel quæ ex partibus constant, quarum aliæ tardius, aliæ ocius liquantur, utilis est. Si enim os continuo pateret, additamenta, & quæ venarum partes facile liquefcunt, ex fornace, antequam venarum partes duriores calefiant, & liquantur, effluerent, atque adeo aliqua earum portio aut ignis vi combureretur, aut cadmiis prorsus non liquefacta commisceretur. Nam cum liquefactum non liquefacto superfunditur, id, quia undique defluit, similiter non liquefacit. Contra, cum eadem ore fornacis ad tempus clauso excoquuntur, necesse est ipsas, & additamenta in foco simul permisceri, & liquefieri. Quamvis enim pars aliqua materię in fornacem impositæ citius aliâ liquefcat, quia tamen illa in fornace conclusa est, partem non liquefactam, cum in focum delabatur, corripit, & liquefacit.

Ad quas venas
accommodata
sit excoctio ore
clauso.

LXXXVIII.

Altera metallorum conflatura, quæ ore patente fit, venis, quæ facile liquefcunt, accommo-

Ad quas venas
accommodata
sit excoctio ore
patente.

data est. Cum enim ex his magna metalli moles brevi confletur, molestum foret læpius os perforare, ac præterea non exiguam metalli partem ignis consumeret, si istud diu in fornace concluderetur. Verum, cum ex his ipsis aliæ citius aliis excoquantur, ad eas, quæ in primo genere sunt, focus magis fiat declivis, ut metallum ocius ex fornace effluens minus comburatur; catinus quoque ab ore fornacis aliquantulum distet, ne nimius ignis a flatu folium impulsus in ipsum irruat, & metallum comburat; arctior demum sit semita, sed paullo profundior, ut minor metalli superficies igni, & aëri exposita sit. Contra quæ in secundo genere sunt, focum minus declivem postulant, ut ipsæ una cum additamentis in eo diutius permaneant, sicque melius liquefiant. Citius enim vel tardius materia liquefacta ex foco effluit, prout iste magis minusve declivis est; tamdiu autem recrementa in foco residere debent, quoad usque vena in eum delapsa excocta sit. Interdum e re quoque erit, duos catinos parare, in quos alternis materia ex fornace influere permittatur.

LXXXIX.

Ad quas venas
accommodata
sit excoctio ra-
tione media.

Postrema excoquendi ratio ad eas venas præfertim usurpatur, quæ facile quidem liquefunt, sed quæ paullo difficilius metallum, quod in se continent, dimittunt. Quod enim facile liquefiant, opus est, ut statimatque liquefactæ sint, continenter ex foco in catinum effluant: quod vero metallum difficile dimittant, necesse est materiam liquefactam diutius ignis vi subijci: id quod assequimur, si catini dimidia pars intra fornacem sit: cavendum tamen est, ne idcirco metallum in catino collectum ignis comburat: quod periculum maxime existit, cum venæ plumbi, aut cupri excoquantur.

CAPUT IV.

De Machinis, quibus ventus in fornaces inspiratur.

XC.

IN fornacibus vulgaribus, ac sæpe etiam in con-
cameratis venarum excoctio peragi nequit, nisi
ventus in ipsas continuo inspiretur. Ac duobus qui-
dem modis inspirari solet, nimirum vel follibus, vel
tubo hydraulico. Alteram hanc venti excitandi ra-
tionem in Italia primum inventam fuisse, atque in-
de in Gallias, aliasque regiones fuisse translata-
m, innuere videtur Swedemborgius (*). Fabricari au-
tem hæc machina solet fere hoc modo. Tubus re-
ctus *CI* statuitur longus pedes XXVII., latus pe-
dem, & pollices IV. Est autem factus ex duobus
truncis abiegnis intus cavatis, atque circulis ferreis
inter se coagmentatis. Ac superior quidem ejus pars
CF conica est, cujus supremum os *C* est latum pol-
lices tredecim, infimum *F*, quod contractio dicitur,
quatuor. Infra hanc contractionem iterum tubus
dilatatur, qui per totam longitudinem *FI* latus est
pollices IX. Eidem sunt decem spiramenta *G, G*,
per quæ aer in ipsum illabitur, quorum sex æque
distant a vertice *C*, quatuor infra hæc sunt, atque
a superioribus pollices IV. absunt. Oblique autem

Duobus modis
ventus in for-
naces inspira-
tur.

*Tab.
XVII.
Fig. 51.*

Descriptio Ma-
chinæ hydrau-
licæ ventum
inspirantis.

(*) Swedemborgius *L. de Ferro* §. VIII. pag. 143.
hæc habet: *Modus hic parandi ventum ante 90. annos
Italix est inceptus, & inde in alias regiones dein trans-
latus, si narratis fides habenda sit.*

hæc foramina in tubi corpore perforata sunt, ita quidem, ut cujuslibet os intimum sit tres pollices humilior, quam externum. Ad tubi partem superiorem pertingit canalis *TC* parum declivis, ex quo aqua leniter delabitur in tubum *CI*: iste autem fulcitur duobus brachiis ferreis *VZ*, ne tigna vel asseres ejus actu facile putrescant. Ejusdem tubi pars infima *I* immissa est in operculum dolii *ABKN* quatuor pedes alti, & pollices *VI*, atque sub ipsam sita est lamina ferrea *dc*, vel lapis latus tres pedes, quem sustentant duo bacilla lignea *XS* in dolium infixæ. Prope dolii fundum existit foramen *A*, ex quo tantumdem aquæ effluit, quantum in tubum ex canali influit. Quem in finem cataracta *QRS* prope dolium locatur, quæ elevata aut depressa, aqua ad certam altitudinem in eo consistat, ne altior facta nimis coarctet spatium, in quo aer colligitur, neve, si humilior sit foramine *A*, aer per istud ex dolio erumpat. Ex operculo demum fistula *LE* eminet, quæ tubus expirans appellari potest; eaque lata est pedem, desinitque in os aliquot pollices latum, per quod ventus in fornacem inspiratur. Habet autem valvam ligneam *M* corio tectam, quæ plus, minusve aperta, ventus temperatur, vel etiam sistitur, ne in fornacem inspiret.

XCI.

Jamvero hujus Machinæ artificium ita se habet. Aqua per canalem in tubulum conicum *CF* defluit, quem aqua fere plenum continuo esse oportet. Cum autem hujus infimum os *F* coarctatum sit, ex hoc non collecta in unam massam, sed in plures massulas dispersa influit in tubum *FI*. Quo modo, multiplicata ejus superficie, majorem aeris copiam,

Explicatur artificium hujus machinæ.

dum delabitur, offendit, eamque deorsum urget, & densat. Cumque recte, & ex magna altitudine decidens subjectam laminam magna vi percutiat, ea in particulas prope innumeras dividitur, ex quibus secedit aer, qui cum aqua commixtus est, & reliquo aëri, qui vel ab aqua ex canali adveniente adducitur, vel per spiramenta in tubum ingreditur, conjungitur. Omnis autem iste aer fistulam magna vi subit. Cum enim ipse a delabente aqua comprimitur, densior fit eo, qui fistulæ incumbit, adeoque cum nulla alia via egredi possit, necesse est, eum ex fistula expirare. Quod quidem eo vehementius fit, cum fornax ardet. Ignis enim vi rarefcit aer. Facile autem intelligitur, eo majorem ventum existere debere, quo major aquæ copia ex canali in tubum derivatur, & quo major est longitudo tubi, & aquæ densitas: atque hinc est ut major, quemadmodum ferunt, sit ventus hyeme quam æstate. At, cum necesse sit æquabilem ventum in fornacem inspirari, idcirco ad canalıs caput cataraeta locatur, cujus ope eadem semper aquæ copia in tubum delabatur. Machina, quam descripsimus, tantum aëris suppeditat, quantus sufficit ad metallorum purificationem. Sed ad eorundem, ac presertim venarum ferri excoctionem, vel grandiore machinam, vel duos, tresve ejusmodi tubos statuere oportet. Ac si quidem aquam copiosam locus suppeditaverit, grandiori tubo ventus ille comparari poterit, qui ad venarum excoctionem necessarius est; at si non multum aquæ in promptu sit, præstat eam in duos vel tres tubos derivare. Cum enim, tubis multiplicatis, aquæ decidentis superficies multiplicetur, plus venti in istis excitatur, quam in unico tubo, cujus capacitas æquet illorum capacitatem, & in quem

Quam aëris
quantitatem
hec machina
suppeditet

eadem aquæ copia influat, quæ in illos derivatur. Cum plures tubi ejusmodi statuuntur, quilibet eorum eodem modo fabricatur, quo paullo ante diximus. Sed ex operculo cujusque dolii tubulus extat, quorum quisque ad unam eandemque fistulam pertinet. Sive autem ex uno, sive ex pluribus tubis aer in fistulam derivetur, necesse est, machinam ita extruere, ut, cum ad venæ ferri excoctionem usurpatur, quolibet horæ quadrante 13650. pedes cubicos aëris inspiret. At aer, quem machina ista suppeditat, humidus esse solet & justo frigidior, quod nempe permixtus sit cum tenuissimis aquæ partibus: cui incommodo etsi aliqui occurrant duobus asseribus ad intimum os fistulæ appositis; non tamen horum objectu id, quod volunt, plane assequuntur.

XCII.

*Aptior machi-
na ejusdem
dispositio.*

Fig. 51.

Aptior dispositio huic machinæ tribui potest hoc modo. Aqua nempe tubo inspirante *IG* excipiat, cujus caput imum *I* infra officinæ solum ad multos pedes, puta quindecim, pertingat; hocque in loco dolium *NB* constituatur, cum quo ille conjungendus est. Ex dolii operculo loco fistulæ *LE* tubus expirans plus minusve longus extet, qui recte vel oblique, prout loci opportunitas tulerit, in fornacis vicinia pertineat. Cum hujus capite supremo conjungatur tubus ex corio, vel aliis animantium pellibus factus, qui in fistulam aeream desinat. Hoc modo cum pelles flexiles sint, fistula atque adeo ventus in quamlibet partem facile dirigi poterit. Præterea aer minus humidus in fornacem inspirabitur. Vapores enim crassiores ob tubi longitudinem nequeunt ad fistulam usque attolli, sed proprio pondere in dolium relabi necesse est. Plures

ejusmodi machinæ eodem in loco ita extrui possunt, ut ventus, qui ex unoquoque tubo expirat, in unum communem tubum conveniat. Ac si quidem plures fornaces in eadem officina sint, ex hoc ventus distribui ad unamquamque fornacem poterit. Hunc in finem ex isto communi tubo, cujus capita obstructa esse debent, quemque *horizontalem*, & in vicinia fornacum locare oportet, tot tubi expirantes extent, quot sunt fornaces, atque cuique eorum fistula sit eo modo, quem paullo ante dixi, parata. Ex hac dispositione hæc quoque utilitas consequetur, ut, cum fornacum aliqua non ardet, [quod sæpe accidit] ventus, qui in fornacem hanc non inspiratur, reliquis distribui possit. Quod cum faciendum erit, sufficiet tubum illum expirantem, qui ad eam fornacem est, occludere. Ex his autem, quæ diximus, intelligitur, aërem minus humidum e tubis illis expirari, qui remotiores a doliis sunt. Quod ipsi quoque operarii norunt. Cum enim in quadam Italiæ officina vena ærea melius excoqueretur in una fornace quàm in altera, quæ illi prorsus erat similis, atque ab excoctore sciscitarer, quam hujus rei arbitraretur esse causam, hanc plane ex doliorum distantia derivavit. Aliquod certe detrimentum metallorum excoctio, & purgatio capit ex vapore illo, quem una cum aëre machinæ istæ expirant. Quocirca ad hæc opera potior habendus est folium flatus.

XCIII.

Fiunt autem folles vel simplices vel duplicati. Qui simplices sunt alio tempore aërem aspirant, alio expirant, atque adeo flatum continuo non inspirant. At qui sunt duplicati, cum aërem aspirent interim dum eundem expirant, sine intermissione ventum

Folles vel simplices vel duplicati seu compo-
positi.

Follis simplex
& ligatus quo-
modo con-
struatur.

Fig. 52.
53. & 55.
n. 1.

Fig. 55.
n. 1.

Fig. 55.
n. 1.

emittunt. Utrique hodie fieri solent omnino ex li-
gno, eo quod diutius durent, quàm ii, qui ex co-
rio sunt facti. Quamobrem ligneos tantum hoc loco
explicabo, maxime cum alii vulgarissimi sint. Ordinar
autem a simplicibus. Isti duabus præsertim partibus
constant, corpore nimirum *SDCBAHI*, & capite
SRGEF. Corpus iterum distinguitur in capsam
SIXCZG [fig. 52. 53. 55.], quæ in sedilibus *OY*,
PQ fixa est, & operculum *HIXBA*, quod versatur
circa axiculum *IT* in ipsum follis caput immis-
sum. Totum follis corpus angustatur versus caput; ac
capsæ quidem tria latera recta sunt, sed posterior
pars *XC* in arcum circuli flexa est, cujus centrum
est in axiculo *IT*, eademque curvatura est parti
posteriori operculi, ut nimirum attolli deprimique
possit. Habet vero fundum capsæ duo foramina spi-
ritalia *a, b*, eaque operculata. Operculum istud,
quod instar foris est, constat ex tabella subtili, &
pelle caprina eam regente, cujus pars pilosa spe-
ctat terram; pilosa itidem pelle conteguntur mar-
gines foraminum, ut horum operculum, cum de-
primitur, aditum aëri magis intercludat. Ne vero,
cum aer follem subiens illud attollit, in partem
oppositam dejiciat, loro *aob* continetur, cujus unum
caput infixum in fundo est, alterum connectitur cum
ipso operculo. Præstat autem, unum tantummodo
spiramentum facere tam latum, ut operarius per il-
lud follem ingredi possit, cum reficiendus est. Cum
capsæ fundo caput *SITG* connectitur, cujus pars
anterior bractea ferrea cingitur, ne ob caloris vim
rimas agat: qua ex causa tegitur quoque assercul-
lis, quibus illinitur gluten factum ex secalis fari-
na cum pilis animantium commixta. In ipso autem
capite includitur naris *EF*, per quam aer in forna-
cem inspiratur.

XCIV.

At operculum *HIXA*, quod ad follis corpus *Fig. 52.* pertinet, est veluti altera capsula, in qua, cum deprimitur, includitur inferior illa, quam descripsimus, ejusque latera, veluti *DZBC*, loco corii sunt, quod ad folles vulgares adhiberi solet. Ita enim sunt comparata, ut aërem contineant, quem follis, cum operculum attollitur, aspirat. Ac si quidem calor ligna non constringeret, nec humor, quem facile combibetur, inflaret, omnis aëri aditus facile intercluderetur, semel atque latera operculi ad latera capsæ essent bene applicata. Verum, etsi initio id accuratissime fieret, ob causas tamen commemoratas, cito situm mutarent. Quapropter ne ullum umquam spatium vacuum inter capsarum latera restet, hoc artificium ingeniosum sane adinventum est. In marginibus laterum capsæ, ejusque partis posterioris tabellæ veluti *SAVB* (*fig. 55.*) decumbentes collocantur latæ duos pollices & dimidium, crassæ pollicem, longæ pedes quatuor: ad tergum istarum laminæ chalybeæ *eir* disponuntur, eæque flexæ, quæ, quôd *elasticæ* sint, tabellas easdem contra latera operculi continuo adigunt, etsi hæc a lateribus capsæ duos circiter pollices forte absint. Laminarum ejusmodi caput unum infixum in ipsis capsæ lateribus est, alterum ad tabulas libere pertingit. Sed alii in *Fig. 55.* capsæ latera insigunt tigillos *cg*, quos versus caput *n. 1., &* supremum findunt, atque in fissuram partem mediam laminarum immittunt, quorum capita *r, c* *n. 2.* libere, ac solute tabellas premunt. Sed istæ tabellæ ita præterea collocandæ sunt, ut, dum ultro citroque moventur, nec attolli, nec deprimi possint, sed recte per capsæ margines excurrant. Quem in *Fig. 55. n.* finem in latera capsæ tigilli *mno* insiguntur ex *1., & 3.*

Qua ratione
præcavetur, ne
aer per follis
corpus exsiret.

Fig. 54.

capsæ ejusdem marginibus aliquantulum extantes, inque parte extante excisus est canaliculus exterius spectans, in quem ita includuntur capita recisa *SA*, *VB* tabellarum (*fig. 55. n. 2.*) ut ultro citroque moveri possint. His itaque tabellis per omnes capsæ margines ita dispositis aëri aditus intercluditur. Quibus ita paratis, caput folliis, & pars capsæ inferioris huic proxima tegatur bracteis ferreis *h, h*, ne carbones, quos sæpe folles ex fornace attrahunt, ligna comburant; atque in parte fere media ejusdem capsæ alia bractea ferrea *km* erecta locetur, quæ impedimento sit, ne carbones semel attracti ultra bracteas perveniant. Operculo, & capsâ perfectis, oleo olivarum cum paucis saponis commixto, eoque multum calido interius inungantur latera operculi, & margines tabellarum, qui eadem latera spectant. Ut vero capsâ inferior in operculo includi possit, tabellæ eadem, quæ ex capsæ marginibus extant, removeantur ad margines usque capsæ ejusdem, eoque in loco contineantur asserculis in capsæ lateribus infixis, qui detrahentur, cum margines operculi ultra tabellas descenderint.

XCV.

Cautiones ad
rectam folliis
constructionem.

Folles ejusmodi ex lignis abiegnis, iisque in sole, vel ad ignem siccatis sint facti; tabulæ autem inter se ita sint coagmentatæ, ut nullæ extant rimæ: quocirca cujusque tabulæ caput aliquantulum recisum, & glutine oblitum in formis immittatur, quæ in proximarum tabularum caput cavatæ sint: tum cochleis ferreis capita conjungantur, ut tabulæ firmæ consistent. Nullus præterea in asseribus, qui capsæ latera contingunt, nodus sit, ne hæc ligni pars, quæ ceteris durior est, attritu absumat operculi latera: cum autem aliquis ejus-

modi nodus existit, ejus pars aliqua detrahatur, atque in ejus locum substituaturs fragmentum asseris ceteris assimilis.

XCVI.

Follium corpus longum sit VII. vel X. pedes, cum ad fornaces mediocres adhibentur; sed qui altioribus fornacibus inserviunt, sint XIV., vel XV. pedes longi. Magni folles habeant latas nares. Si enim angustæ fuerint, ventus nimis arcte, & acutè inspiratur fornaci: unde materia liquefacta refrigeratur, & circa fistulam ferruminata sæpe obstruit os fornacis. Quo autem latiores erunt nares eo major venti copia certo ac definito tempore ex follibus erumpet. Ac in magnis quidem naris sit longa

pedes $3\frac{1}{4}$, ejusque orificium sit latum pollices $2\frac{1}{4}$, sed in mediocribus fiat latum pollices circiter duos & dimidium. Alii narem cujusque folliis ita construunt, ut, una detracta, aliam vel latiore, vel angustiore eidem substituere possint: quod sua utilitate non caret. Observavit autem Cl. Reaumurius follem, cujus corpus esset longum pedes septem, & dimidium, latum tres, & dimidium in posteriori parte, & pollices XIV. prope caput, qualibet vice expirare 20151. pollices cubicos aëris. Sed folliis grandior non tamen maximus, qualibet vice expirat pollices aëris cubicos circiter 98280., seu 57. pedes cubicos. Folliis vero mediocris intra horæ quadrantem attolli, & deprimi solet 206. vicibus, grandior 120. Ex quo conficitur follem grandiore intra horæ quadrantem expirare libras aëris 1680. Porro bini ad singulas fornaces pertingunt, ut alternis ventum inspirent, atque sedilibus ita imponuntur, ut capsula stabilis permaneat, ac præterea

Quantitas aëris, quam folles expirant.

Fistula in qua
folium nares
collocantur.

Qua ratione
folles compri-
mantur, & di-
ducantur.

uterque follis procedat in fistulam, in qua utriusque naris collocatur, capitibus eorum arcte conjunctis. Hæc fistula, quæ vel ex ferro, vel ex ære, vel etiam ex lapidibus fieri potest, imponitur in illud foramen, quod ad id in pariete fornacis parari diximus, ejusque prior cava pars, quæ fornacem spectat, tam ampla est, quemadmodum se habet cujusque naris orificium, ut nempe eadem vi ventus in fornacem inspiret qua ex follibus erumpit; sed teres omnino fieri non solet, verum dimidiæ fere ellipsis forma ei datur, cujus axis minor terram spectat, quo scilicet ventus melius teneat eam directionem, quam ei dare volumus. Exterius autem fistula se dilatat, ut utriusque follis nares excipiat, qui in hanc ita immittuntur, ut a parte ejus priore distent pollices circiter quinque, vel septem pro diversa fornacis magnitudine. Qua in re prætereundum non est, quod Swedemborgius observavit, majorem nempe ventum fornaci inspirari, cum nares ad certos usque limites ab ore fistulæ magis absunt. Ad follium posteriorem partem statuitur machina, quæ illos comprimit, organum quod eisdem diducit. Machina constat ex axe dentato, quem versat rota hydraulica. Plerumque tres dentes cujusque follis caudam *K M* (*fig. 52.*) vicissim deprimunt, qui ita distribuendi in axe sunt, ut alternis unus deprimat follis operculum, interim dum alter follis ab organo diducitur. Diducuntur autem folles a vecte, ex cujus brachio pendet catena, quæ cum illorum cauda est conjuncta; alterum vero brachium eo pondere est onustum, quod operculum possit attollere: quod in figura 49. est explicatum.

XCVII.

At follis duplicatus, seu compositus quomodo

se habeat videre licet in figura 56. tab. XVIII., quæ hunc ipsum exhibet secundum longitudinem sectum (*). Eius pars superior $aTPb$, in qua est caput P , ita fere se habet, ut follis simplex; cum hoc autem conjungitur capsula inferior $RCqG$, quæ est veluti alter follis, cujus latera, veluti Ry, Im , conjuncta sunt cum fundo RDp folliis superioris: fundus autem CG , qui itidem instar capsulæ se habet, mobilis est, & versatur circa axem G . Atque hujus quidem machinæ, quæ in Helvetiis primum usurpari cœpit, artificium in hoc situm est. Cum follis inferior diductus est, operculum rab folliis superioris, quod circa axem F versatur, depressum est, ita ut recta ab parum distet a recta MK . Cum vero fundus folliis inferioris SG attollitur in altitudinem SR , aer in capsula $SRIm$ conclusus comprimitur, atque adeo forem, quæ est ad spiramentum C , clauditur, atque per spiramenta H, I , quæ in fundo folliis superioris existunt, hujus operculum $TabV$ attollit in altitudinem ra , interim dum per narem P expirat. Sed cum in folle superiori ita diducto aeris ab folle inferiore suppeditati portio remaneat, hæc comprimitur a pondere operculi $rabV$, quod paulatim deprimitur, atque adeo fores, quæ ad foramina H, I existunt, claudit, omninoque per narem P expirat. Hoc autem tempore fundus SG suo pondere descendit, & per spiramentum C , cujus foris objectu aeris externi aperitur, novumque aerem aspirat: quo modo ventus continenter fornaci inspiratur. Sed qua ratione folles ejusmodi extruantur, diligentius, quamvis breviter, explicemus. Primo paretur fundus

Quæ ratione
folliis compo-
tus extruatur,
& aerem con-
tinuo aspirat
respiquetque.

Vol. I.

P

(*) *V. opus supra laudatum Cl. de Genfanne.*

Tab. XIX. fig. 61. 62. folliſ ſuperioris, cujus ichnographiam habes in *fig. 61.*; qui quidem inſtar capſæ eſt, atque ita elaboratus, uti fundus folliſ ſimplicis. In eo ſint duo ſpiracula *KIHL*, & *M* operculata, unum tamen ſufficiet, ſi paullo grandius ſit. Deinde caput ex ulmi, vel alterius arboris trunco intus cavato confi-

Caput folliſ
que modo pe-
tetur.

Tab. XVIII. fig. 57. & 58. ciatur. In ejus ſuprema parte cavatus ſit canaliculus *d*, in quo axis, circa quem operculum verſatur, revolvi poſſit; ſimiliſque canaliculus *u* ſub imam partem ei reſpondeat, qui bacillum ferream poſſit recipere; pars etiam *bci* ita cavata ſit, ut latus *V*, (*fig. 56.*) quod operculum verſus caput terminat, in ea moveri una cum operculo libere poſſit: quo circa latus *bc* ad arcum circuli ſit formatum, cujus centrum ſit punctum *c*; atque ſimiliter curvatum erit latus *V*, ut nullus aëri pateat aditus. Demum idem caput in ea extremitate, quæ cum fundo conjungi debet, utrimque

Fig. 57. 58. paululum excindatur in rectanguli formam *rsyu*; exciſa quoque ſit ima pars *op*, ut caput cum lateribus, & fundo capſæ ſimiliter exciſis coagmentari poſſit.

Fig. 58.

XCVIII.

Capite cum capſa conjuncto, operculum paratur tam latum, ut ejus latera diſtent a fundi marginibus quarta pollicis parte. Ejus altitudo tanta ſit, ut, cum diducitur, non plus attollatur ex *M* in *N*, quam pedes duos & dimidium, ac ſemper ejus pars aliqua veluti *rM* contegat capſæ fundum. Latera vero ejusdem operculi tam longa ſint, ut ab extremo latere *V* extet portio *VE*, in quam ſibula ferrea *F* inſigatur: alia præterea ſibula recta utrimque in caput parumper exciſum infixæ ſit, quæ tria habeat foramina *c*, *f*, *d*, quorum primum excipiet

Operculum
folliſ que ra-
tione extru-
tur.

Fig. 56.

Fig. 59.

axem, qui per foramina itidem fibulæ in operculum infixæ transiens, idem operculum cum capite conjungit; in altero infigatur bacillum ferreum, quod fibulas rectas contineat, iisdemque det firmitatem. In postremum alter axis immittitur, qui per foramina *r, r* fibulæ *SSr* in fundo capsæ inferioris infixæ transiens hoc ipsum cum capite conjungit.

Fig. 60.

XCIX.

At follis inferior ita se habeat. Quoniam iste in operculo follis superioris, dum comprimitur, includitur, necesse est illum isto esse breviorē & angustiorē: satis tamen erit latera operculi superioris distare a lateribus inferioris quarta pollicis parte: sed inter latera posteriora major erit distantia, ut locus sit bacillo ferreo *Zz*, quod follem, ut infra dicam, cum sedilibus conjungit. Latus posterius *Ry* ad arcum circuli formatum sit, cujus centrum sit in axe *G*, circa quod fundus *SCG* versatur; reliqua follis inferioris latera ita fere se habeant, ut latera superioris; omnia autem in fundo follis superioris fixa sint. Ad capsam *SCG* quod spectat, ea ita fere elaborata sit uti capsæ follis superioris: habeat nempe spiramentum *C* operculatum, easque tabulas, quæ aërem contineant*. Sed præterea in fundum infigatur tigillum stratum *ct*, ad quod firmiter adhæreant duo alia tigilla obliqua, quæ ad tigillum *tu* pertineant: quod quidem cum tigno curvato *Xur* conjungitur; caput vero unum *r* hujus tigni continetur alio tigillo *q* in fundum capsæ similiter infixum, in altero est bacillum ferreum *Xb*, quo fundus capsæ *SG* attollitur.

Follis inferior
quò modo ex-
trahatur.Fig. 61.
56.

Fig. 56.

* §. 94.
Fig. 60.

C.

Follis hoc modo elaboratus in sedili collocatur, quod ita se habet, quemadmodum illud fig. 62.

Qua ratione
follis compo-
nens sedili im-
ponatur.

P 2

Fig. 62. exhibet. Contignationis superioris *F E G H* capacitas pollice major sit circuitu interiori, quem latera capsæ inferioris concludunt. Mobilis itidem sit, ut folliis attolli, atque deprimi queat; tignum *F E* ita conjunctum sit cum reliquis tignis, ut possit detrahi, tignorum vero *E G*, *F H* partes *ab*; *cd* sint excisæ in altitudinem duorum pollicum, atque in latitudinem pollicis unius, ut margines laterum capsæ inferioris recipiant, firmiterque contineant.

Fig. 56. Ne autem vis, qua fundus capsæ inferioris attollitur, follem e loco dimoveat, cavetur bacillis ferreis $\gamma\gamma$ in fundum folliis superioris, atque in tignum *E F* infixis. Attollitur vero a manubrio, quod movet rota hydraulica, atque ut plus minusve comprimatur aer in folle inclusus, plura foramina *X*, *X'*, *X''* in bacillo *X b'* sunt perforata, quorum unum vel alterum, prout opus est, cum veste *X r* conjungitur. Artificium, quo folles simplices diducuntur, ac comprimuntur, paullo supra tetigi.

Quo artificio
folles diducan-
tur & compri-
mantur.

Tab. XVI.
fig. 50.

Multis tamen modis idipsum perfici potest non in simplicibus tantum, verum etiam in duplicatis: id quod ex locorum opportunitate, & Artificum ingenio maxime pendet. Sic motui folliis duplicati, sive ex corio, sive ex ligno sit factus, sequens ratio erit accommodata. Manubrium nempe curvatum *H I* in axiculum *H*, circa quem revolvitur rota aquarum impetu acta, stabiliter includatur; vestis vero inflexus *D B C* ita collocetur, ut circa axiculum *B* revolvi possit. Ejus brachium unum *D B* connectatur cum bacillo *D F*, quod circa axiculum *D* mobile sit; alterum vero brachium *B C*, & manubrium *H I* conjungatur bacillo *C I*, cujus utrumque caput mobile sit in axiculis *C*, *I*. Hoc modo, cum rota circumagitur, punctum *I* modo magis, modo mi-

nus aberit a puncto *B*; atque adeo caput *D* brachii *DB* modo attollet, modo deprimet bacillum *DF*, atque una cum eo capsam follis inferiorem. Ne vero, cum aquæ repente crescunt, nimis cito follis moveatur, præcaveri poterit catenâ *AI*, quæ utramque follis caudam *AS*, *IR* jungat, quæ quidem tam longa sit, quantum a cauda operculi sublatis distat cauda capsæ inferioris, cum ista compressa est. Hoc enim modo capsula inferior non deprimetur, nisi quatenus operculum sua sponte comprimitur. Ad hæc in cauda *IR* sit foramen, per quod bacillum *Dd* libere penetret, ita quidem ut istud possit descendere, cum capsam inferiorem non attollit. Sic enim, etsi velox sit bacilli motus, attamen, quod catena retardet capsæ inferioris descensum, minus celeriter follis movebitur. Nam non potest ipse comprimi, nisi cum uncus *a* in bacillo infixus caudam *LR* offendit. Hinc æquabilis quidam motus in eo existet. Quod si operculum pondere oneretur, istud citius comprimitur, adeoque celerius follis movebitur, majoremque flatum in fornacem inspirabit. Follis duplicatus, quem descripsi (§. 96.), eam habet magnitudinem, quæ venis in fornace concamerata excoquendis sufficit. At si eo uti velis ad venas in fornacibus mediis excoquendas, paullo grandior facies. Hoc loco non est prætermittendum artificium, quo, referente Alphonso Barba (*), Peruviani follibus carentes utuntur, ut ventum in fornacibus excitent. In istarum nempe parietibus crebra foramina faciunt, in quæ tubos immittunt sursum spectantes. Fornaces autem

Quo artificio
Peruviani ventum
in fornacibus
excitant

(*) Traité de l'Art metalique.

in editoribus locis, & ventorum vi expositis ædificant; ex quo fit, ut tunc saltem, cum venti vehementiores spirant, venas excoquere possint; quod nempe aer magno impetu in earum capacitatem per tubos irruens ignem animet quantum satis est ad venarum excoctionem.

CAPUT V.

De ignis, ac venti administratione.

CI.

AD rectam venarum excoctionem, quæ in fornacibus vulgaribus suscipitur, tria præsertim faciunt, nimirum ignis ac venti administratio, venæ excoquendæ appositio, metalli liquefacti emissio: quæ qua ratione peragantur explicare nunc aggredior.

CII.

Causæ, ob quas
ignis metalla
liquefacit.

Et si natura ignis nobis adhuc incomperta sit, ea tamen de re non multum laborabit Metallicus, cui satis est vim ejus ex effectibus, quos in corporibus gignit, cognoscere, certasque leges, quibus ille agit, tenere. Ac magna quidem vis, quæ in igne cernitur ad corpora liquefacienda, duplici ex causa oritur. Primo enim, cum tenuissimus sit, maximeque mobilis, facile corporum cava permeat, eorumque partes minimas commovet vehementissime atque agit, easque a se invicem tandem sejungit. Deinde, quemadmodum fluida quædam solvunt certa corpora, veluti aqua salia, salia vero acida quosdam lapides, ac metalla; ita ignis corporum omnium solvendorum vim habet; id quod ex chymica, quam vocant, affinitate proficiscitur. At ut ignis, quem corpora semel conceperint, ardeat, ne-

cesse est, novum aërem assiduo ad ipsum aspirare. Si enim candelam accensam sub vase conclusas, eam non modo cito extinguere animadvertes; verum etiam aërem in vase conclusum adeo diminutum invenies, ut istud pondere aeris ei incumbentis compressum e loco dimovere difficile possis; eundem vero aërem, si quemadmodum solent Physici, experiaris, *phlogistica* seu inflammabili materia redundare cognoscas. Quorum primum argumento est, ab igne aërem quasi absorberi, vel certe materiam, quæ ex ardente corpore erumpit, aëris vim minuere; alterum causam suppeditat, cur in aëre non renovato ignis restringatur. Nam cum ignis ardet, ejus atq. aëris fit quedam mutua solutio. Quemadmodum ergo in reliquis corporum solutionibus, cum fluidum certam materiam dissolvens eâ expletum, ac saturatum est, hujus sistitur solutio, ita aer, cum *phlogisto* saturatus est, aliud insuper in se recipere recusat, sicque ignis, qui eatenus in corpore ardet, quatenus ex hoc *phlogistica* materia potest erumpere, hanc nequit emittere, atque adeo, quasi suffocatus restringitur. Sed hoc loco quæret fortasse quispiam, qui fiat, ut in fornace, quæ undique clausa sit, carbones semel incensi continuo ardeant? Id enim passim in Suecia fieri observavit Swedemborgius (1), quoties nempe fornaces, in quibus venæ ferri excoquendæ sunt, initio calefunt: quod ipsum de industria, ac diligentius experiri instituit Cl. Buffonius (2). Ac iste quidem Philosophus in fornacem XXIII. pedes altam carbonum libras 5400. imposuit, quibus cum ignem

Cur aer necessarius sit igni, ut ardeat.

Cur ignis in fornace, etsi undique clausus sit, ardeat.

(1) Swed. de Ferro pag. 51.

(2) Buffon. Supplement. vol. I. pag. 369. & seqq.

admovisset, permisit eos omnino incendi, quoad-
usque flamma ex suprema fornacis parte eluctare-
tur. Tum vero hanc undique clausit, conclusam-
que reliquit ad quindecim dies. Quo elapso tem-
pore, cum eam reclusisset, invenit carbonem in al-
titudinem pedum quatuordecim, & pollicum quin-
que subsedisse, idest consumptas fuisse carbonum li-
bras 3600.; calorem vero in lapides calcarios, qui-
bus parietes fornacis constabant, penetrasse ad pro-
funditatem pedum quinque; quin imo ignem eod-
em in calcem vertisse ad profunditatem pedis di-
midii in ima fornacis parte, duorum vero pedum in
parte ejusdem media. Verum, etli aëri externo nullus in
fornacem pateret aditus, non tamen absque aëre ar-
debat ignis. Constat siquidem magnam ejus copiam
suppeditari a lapide calcario, cum ignis eum in
calcem vertit; humorem vero, qui intus in lapidi-
bus est, cum ignium vi exhalat & rarefcit, aëris
instar fere se habere; aëris denique certam quanti-
tatem ex carbonibus, cum ardent, erumpere. Quo-
circa aer iste omnis, cum in fornace esset conclu-
sus, atque paullatim ex corporibus, quibus inerat,
erumperet, continuo ad ignem renovabatur; atque
adeo mirum videri non debet, si ignis ibidem exar-
serit.

CIII.

Magna tamen est differentia inter ignem hunc
sopitum, ignemque vivum, quem vel aer liber at-
que solutus, vel ventus animat. Ac Buffonius quin-
dem in eo experimento, quod ipse instituit, hæc ani-
madvertit. Primo ignis sopitus quindecim dierum
noctiumque spatio lapidem calcarium in calcem ver-
tit, consumptis 3600. carbonum libris; iste autem
lapis ejus naturæ erat, ut non minori tempore in

Quia differen-
tia sit inter
ignem sopi-
tum, & vivum.

calcem vertere posset ignis vivus. Sed iste duodecim horarum spatio commemoratum carbonum pondus consumit. Quamobrem ignis sopitus, cum lapidem calcarium in calcem vertit, consumit carbonum pondus, quod triginta vicibus minor est eo, quod ignis vivus consumit, id quod verisimile est. Addit vero volumen aëris, quem vel humidi parietes exhalaverint, vel fornax initio contineret, vix æquasse volumen quod 24800. pedes cubici capiunt: quod aëris volumen cum ignis vivus dimidiæ horæ spatio absumat, conficit volumen aëris ab igne sopito consumpti esse 720. vicibus minus eo, quod ignis vivus absumit. Assumens autem calorem, seu ignis vim eo magis crescere, quo major est copia materiæ, qua alitur, & aëris quantitas, quæ ad ipsum appellit, conficit ab igne vivo eum effectum, quem diximus, non potuisse produci, nisi ejus calor 71000. vicibus major fuisset eo, quem ignis sopitus edidit. Verum tota hæc supputatio pluribus ex capitibus corrui, imprimis autem ex eo, quod non habuerit rationem totius aëris, quem lapis calcarius, cum in calcem vertitur, dimittit. Facile tamen ex iis, quæ præclarissimus iste vir adnotavit, eadem supputatio emendari potest. Scribit enim lapides calcarios, ex quibus interiores fornacis parietes constabant, ab igne in calcem versos fuisse ad profunditatem IV. pollicum in parte minus calida fornacis, duorum vero & eo amplius pedum in media fornace, atque in tota ejus extensione. Cum porro illa alta esset pedes 23. conficitur molem lapidis in calcem versi æquasse 700. circiter pedes cubicos. Jamvero lapis iste, cum in calcem vertitur, amittit circiter $\frac{1}{4}$ ponderis sui; at-

Emendatur ea,
quæ Buffonius
scribit de aëris
quantitate ab
igne sopito con-
sumpta.

que hæc materia, qua ipse minuitur, vel aer est, vel humor in igne ita rarefcens, ut æris tenuitatem æquet. Quamobrem cum lapidis calcarii pes cubicus sit pondo librarum saltem 200., intelligitur quemlibet pedem cubicum ejusdem lapidis suppeditasse 75. æris libras, atque adeo ex tota illa calcis mole expirasse 52500. æris libras. Si ergo assumamus æris, libras 70. contineri volumine 850. pedum cubicorum, patebit totum illud æris pondus respondere 637500. pedibus cubicis æris. Quod si Buffonio demus, ignem vivum dimidiæ horæ spatio absumere æris pedes cubicos 24800., conficiemus illam æris molem ab eodem igne absumi debere horis circiter 13. Hinc aer ab igne sopito consumptus 27. tantum vicibus minor est eo; quem ignis vivus absumit; cumque præterea materia, quæ ignem sopitum alit, sit 30. vicibus minor ea, quam eodem tempore ignis vivus comburit, constituendum est eum, quem diximus, ignis sopiti calorem fuisse non 71000., sed 810. vicibus majorem eo, qui ab igne vivo proficisci debuisset, ut lapidem calcarium in calcem verteret. Ex quo sane aliquam utilitatem capere possunt, qui ex hoc lapide calcem conficere contendunt. Ne tamen putemus, quoscumque effectus ab igne sopito æque ac a vivo, vel etiam utilius produci posse. Nam, ut alia mittam, venarum liquefactio, & excoctio igne sopito peragi plerumque nequit, etsi diutissime in eo remaneant. Sic venam ferri, quam in commemorata fornace concluderat Buffonius, post dies XXII., totidemque noctes non modo non liquefactam, sed ne ad se quidem adhærentem invenit.

CIV.

Sed leges expendamus, quibus ignis vel calo-

ris vis augetur. Perspicuum est, ignem luculentius ardere, quo major ejus copia certo definitoque spatio continetur, & quo celerius ex materia, quæ ipsum alit, erumpit. Et ignis quidem, cum ex corporibus effluit, nititur quaquaversus sese diffundere: quo modo, cum rarefcit, minorem vim in dato spatio exerit. Quamobrem, ut luculentius ardeat, certo definitoque spatio arte coërcendus est, ita tamen ut aer plus minusve ad ipsum renovari possit, quatenus nempe nobis opus est, ut certum effectum utilius assequamur. Quamobrem ignem, quem venis excoquendis admovemus, in fornacum capacitate, ad quas aer appellat, continemus; contra, cum agitur de venis urendis, satis est ignem fere sopitum ipsis admovere. At celeritas, quæ ignitæ partes ex corporibus ardentibus effluunt, duplex est. Vel enim ea spectatur, qua earum aliæ aliis succedunt, vel ea, ob quam ipsæ certum spatium certo tempore percurrunt. Primo modo ex majori ignis celeritate augetur ejus vis, quatenus major ejus copia certo tempore in certo spatio colligitur, altero quatenus ejus impetus augetur. Jam vero, quod ignis copiosior, atque celerior ex ardentibus corporibus effluat, facit vel eorum natura, vel aëris appulsus. Sunt enim quædam corpora, quibus si semel ignem admoveris, quàm citissime incenduntur, incensaque dissipantur; alia, quæ ignem semel conceptum diutius alunt, alia demum, quæ etsi ignem concipiant, cum tamen vix vel nullo modo alunt. Arte quoque id assequimur, ut quædam corpora igni alendo, augendoque aptiora, fiant: sic ligna igne fere sopito cremamus, ut ex iis humor igni nocivus exhalet, eaque in carbonem vertantur: quo facto, cum materia inflammabilis,

Quibus legibus
ignis vel calor
vis augetur.

quam ligna in se continent, comparate ad massam, quæ in carbonibus restat, major in istis quam in illis sit, puriorem ac vehementiorem ignem illi suppeditant. At quam partem habeat aer ad ignem animandum augendumque, ex iis, quæ supra diximus, facile intelligitur. Ex quibus perspicuum est, eo luculentius ardere ignem debere, quo magis aer ad ipsum appellens renovatur, seu quo vehementior, ac densior in ipsum inspirat. Atque huc spectat usus follium, de quo paullo infra dicemus. Quoniam vero cum luculentius ardet ignis, major quantitas ejus materiæ, quæ ipsum alit, consumitur, hinc flatus follium ita temperandus erit, ut non plus venti fornacibus inspiretur, quam necesse sit ad excoctionem venarum peragendam.

C V.

Is sane de re metallica optime mereretur, qui certam rationem inveniret, qua omnes caloris gradus, quos ignis vis in fornacibus edit, metiri liceret;isque majorem adhuc utilitatem Metallicis præberet, qui constitueret, quænam inter venti quantitatem fornaci inspirandam, & materiam comburendam potior proportio sit, ut certus caloris gradus existat. Sed hæc ex rebus tam multis, æstimatuque tam difficilibus pendent, ut vix ulla earum constituendarum spes supersit. Studeat tamen Metallicus ea diligenter cognoscere, quæ ad rectam ignis administrationem conducunt. Ac primo quidem ad venarum excoctionem adhibeat carbones, quos peritus carbonarius paraverit (*). Si enim parum ulti fue-

Quales esse debent carbones comburendi pro diversis venarum moribus.

(*) De ratione carbonum ex lignis conficiendorum vide *Supplementa Encyclopædiæ*.

rint, nimium humorem igni nocivum in se continent; sin autem multum, magna materiæ inflammabilis portio absumpta in iis est: quorum utrumque efficit, ut minorem ignem suppeditent. Idem detrimentum existit, si vel nimium minuti, vel maximi sint. Nam cum minutuli sunt, quoniam confertissimi in fornacem descendunt, aditum aëri intercludunt, atque adeo suffocatus quasi ignis existit. Ex maximis vero, cum nimis exiguam habeant superficiem comparate ad eorum massam, tardius certa ignis quantitas evolvitur. Quapropter pro diversa fornacis magnitudine majores vel minores deligantur. Præstant autem ii, qui ex betula, ex fago, ex quercu, populo, castaneo, aliisque durioribus lignis sunt facti: isti enim vehementius ardent, quam ii, qui ex lignis minus duris, veluti pinu, & abiete parantur; atque adeo minor eorum copia, quàm istorum certo tempore consumitur. Ad venarum ferri excoctionem, quòd istæ ceteris difficilius liquecant, carbones duriores ac grandiores reserventur, veluti fagini & querni; sed in fornacibus mediis, in quibus venæ excoquuntur, quæ igne non vehementissimo liquecunt, mediocres ipsi sint. Magni enim folium flatum impediunt, ne per fornacis os exire possit in catinum, eumque calefacere. Duriores autem cum minus duris misceantur. Nam, si omnes duriores sint, tardius excoctio peragitur: si autem omnes sint molles, major eorum quantitas comburitur. Quisque autem perspectam habeat naturam eorum, qui ei in promptu fuerint. Nam, etsi ex iisdem lignis, quæ aliis in regionibus crescunt, facti sint; cum tamen pro diversa cæli temperie arborum durities, & vis multum variet, magna quoque in carbonibus ex iisdem paratis esse, solet dif-

ferentia. Sint præterea sicci ac recentes. Nam ex iis, qui semel exarserint, ac deinde vel in aqua, vel in aëre restincti fuerint, debilior existit ignis, quòd nempe materiæ inflammabilis, quæ in ipsis inerat, non minima portio ardendo consumpta fuerit. Qua in re Buffonius observavit, carbonēs igne sopito combustos de volumine parum, de massa multum amisisse. Nam tum etiam, cum aquam ipsis superinjectam combibissent, eorum pondus erat tertia parte minus eo, quod obtinerent, cum recentes essent. Et si vero carbonēs ejusmodi ad excoctionem venarum non valeant, possumus tamen iis uti vel ad fornaces exsiccandas, vel ad catinos calefaciendos, vel demum etiam in focis, in quibus bacilla ferrea non admodum crassa calefiunt, ut malleis procudantur.

C VI.

An lithanthrax
& turfa ad ex-
coctionem ven-
narum usui esse
possint.

Sed hic quæret fortasse quispiam, utrum ad venarum excoctionem lithanthrax, & turfa usui esse possint. Cui ego respondebo ex lithanthrace ignem sane fieri vehementem æque, vel plus etiam, quam ex carbonibus; eum tamen, si crudus sit, venis, quæ in fornacibus vulgaribus excoquuntur, minime esse accommodatum. Cum enim in istas fornaces carbo, aut lithanthrax una cum venis atque additamentis injiciatur, iste, quòd bitumine redundet, tum recrementa, tum metallum ipsum inquinat, effecitque, ut ex illis tenacioribus factis istud secerni nequeat. Quod si de lithanthrace usto quæ-
ratur, videndum est, qua ratione paratus fuerit. Si enim eo fere modo ustus sit, quo carbonarii ex lignis carbonēs conficiunt, minorem quidem, quam cum crudus est, bituminis copiam in se continet; attamen tanta adhuc in eo latet, ut non

minimum detrimentum metalla ex eo saepe capiunt. Sic ferrum, quod ad Carronem in Scotia ex venis lithanthrace sic usto excoctis conflatur, ejusmodi evadit, ut ex eo ferrum optimum procudinumquam possit: attamen ferrum crudum ita fere ductile est, quemadmodum ferrum cusum esse solet: id quod utile accidit iis, qui vasa ferrea efformare contendunt. Quod si lithanthrax coctus sit ea destillandi ratione, quam Cl. de Genfanne explicavit (*), aptus plerumque erit ad venarum quarumcumque excoctionem. Certe ex venis ferri, quæ in comitatu Saabrukensi lithanthrace ita parato excoquuntur optimum ferrum elicitur, quod, cum purgatur, ac procuditur, ductile prorsus evadit. Verum cum non eadem cuique lithanthracis generi natura sit, quisque studeat experiri, quod habet in promptu, ut ex eo maximam, quam potest, utilitatem capiat. Ad turfam quod pertinet, hæc plerumque constat ex herbis, arbutisque putrefactis, ex terrena materia, & pauco bitumine. Quod terrena materia ei admixta sit, minus ardet, quam lithanthrax, aut carbo ex lignis confectus. Quod vero bitumine non careat, metalla, cum in igne ex ea facto liquefunt, inficit. Quibus ex caussis, cum cruda est, inepta videtur venarum excoctioni. At, si usta sit, vel eo modo, qui nuper ad montem Berkerium in Germania inferiori adinventus est, vel alia apta ratione, non inepta ad excoctionis opus evadet. Certe Beckerus turfam Hollandicam apte crematam in eum usum usurpari posse contendit; in Vestmania autem turfa, quæ prope fodinas Bre-

(*) *Traité de la fonte des mines par le feu du charbon de terre. Chap. XII. Tom. I.*

fioci effoditur, comburitur in focus, in quibus bacilla ferrea calefiunt (*). Sed ad hæc opera deligatur turfa præstantior, veluti ea, quæ multum ponderosa est. Nam, quæ est leviuscula, lenem ignem suppeditat, & facile a flatu follium diffatur. Sæpe autem juvabit cum turfa, vel etiam cum lithanthrace carbonem vulgarem miscere; omninoque, si hæc fossilia inepta invenias excoctioni metallorum, utiliter ea adhibebis, cum vel fornaces, vel catinos calefacere tibi opus sit.

CVII.

Quoniam vero, uti diximus, cum venæ in fornacibus vulgaribus excoquuntur, necesse est, eas per medios carbones trajicere, curabit excoctor cognoscere, qua in parte vehementior ardere soleat ignis, & quo tandem modo possit eum ducere, quo velit. Ac initio quidem excoctionis magis ardet ignis versus mediam fornacem, quam ad parietes; sed calor, quem paullatim lapides concipiunt, adeo augetur, ut major evadat eo, quem carbones emittunt: id quod fornacibus, in quibus venæ ferri excoquuntur, præsertim accidit: istæ enim ad plures menses ardere solent. Quam multum vero ignis in lapides penetret argumento est humor ille, quem spiramenta expirant, qui etsi initio frigidus sit, paullatim tamen ita calidus fit, ut ejus calorem vix ac ne vix quidem manus sustinere possit: præterea, cum fornax diruitur, argilla, quæ lapidibus interposita est, laterum instar cocta ad trium saltem pedum profunditatem conspicitur, quæ autem versus interiora fornacis existit, in vitrum

Qua parte fornacis luculentior ignis ardeat.

(*) Vide Volum. VII. Acad. Svecicæ ad an. 1745.

versa invenitur. Cum ergo corpora, quo densiora sunt, majorem calorem concipere soleant, & diutius servant, mirum videri non debet, si lapides, quibus parietes constant, magis quandoque ardeant, quam carbones. Ex quo illud quoque intelliges, lapides, quos diuturnus, ac vehemens ignis exsiccaverit, minus quam recentes calorem continere; ex recentibus autem eos ad fornacum parietes extruendos aptiores esse, qui densiores sint. Cum enim isti majorem concipiant calorem, & diutius servant, majorem ejus copiam in fornacis capacitatem reflectunt, venamque idcirco magis calefaciunt. Luculentius autem ardet ignis in vicinia fistulæ, tum quod ipsum coërceat materia, quæ assiduo in fornacem injicitur, tum quod eum ipsum animet folium flatus. Sed cum iste frigidus erumpat, maximus calor in ea fornacis parte non existit, quæ ori fistulæ proxima est, verum in ea, in quam ventus, postquam calefactus sit, ignem impellit, nempe versus parietem fistulæ oppositum. Quoniam vero ventus, ac ignis objectu parietum reflectuntur, nonnumquam maximum calorem in aliis quoque fornacis partibus excitant. Omnino autem quo magis materia in fornacem injecta a fistula abest, eo minus ardet. At qua in parte vehementius arserit ignis, recognoscet excoctior ex parietibus, quos, finita excoctione, exustos viderit. Læves enim vitri instar esse solent, quos flamma leniter lambit. Quod si velit ignem ex una parte fornacis in aliam ducere, satis ei erit, venam in eam partem injicere, in qua luculentius ardet ignis. Iste enim venæ objectu, cum inde nequeat libere erumpere, alio se conferet, ubi exitus ei pateat. Sic si venam in anteriorem fornacis partem injiciat, ignis hinc repulsus versus fistulam

Vol. I.

R

confluet, venamque circa fistulam forte ferruminatam excoquet.

CVIII.

Ex quantitate
& directione
venti in fornacem
inspirati
maxime pendet
recta venarum
excoctio.

Quibus modis
major ventus
in fornacem in-
spiratur.

Quo modo cer-
ta directio ope
fistulae detur
vento.

Sed ad ignis temperationem, rectamque venarum excoctionem venti administratio maxime facit, qui ut apte fornaci inspiretur, habenda praesertim ratio est ejus & quantitatis, & directionis. Pendet autem quantitas venti ab folium magnitudine (*), a celeritate, qua diducuntur & comprimuntur, ab aeris densitate. Quam magnitudinem dare oporteat follibus, superius dictum est. Celeritas autem major vel minor in eorum motu existit duabus praesertim ex causis. Primo prout latiores, vel angustiores sunt eorum nares: nam cum latiores sunt, major aeris moles ex ipsis, definito tempore, erumpit, atque adeo citius comprimuntur; deinde prout major vel minor aquae copia in rotæ machinam versantis pinnae immittitur: quod fit, cum magis attollitur, vel deprimitur cataraeta ad caput canalis locata. Cum vero folles eum ipsum aërem aspirant, respirentque, qui circa ipsos est, patet, tum majorem ventum ipsos fornaci inspirare, cum aer densior est: atque hæc plane est ratio, cur nocte magis ardeant fornaces quam per diem, hyeme magis quam æstate. Sed quod cælo udo lentius excoctio peragatur, quam sereno, in causa sunt humores, qui aëri admixti sunt. Ad venti directionem quod pertinet, iste ita dirigi debet, ut partim sursum, partim deorsum spectet, quo ignem tum su-

(*) Quæ de administratione venti ex follibus erumpentis dico, ea facile aptari poterunt ad quamlibet alteram flatum in fornaces inspirandi rationem.

pra fistulam, tum infra eam positum animet, ac præterea liquefactam materiam in tenues undas agat, atque ita metallum a recrementis facilius secedat. Vento certa directio induci solet ope fistulæ, in quam nares follium immittuntur. Præstat plerumque fistulam horizonti parallelam ponere. Hoc enim modo minus carbonum consumi solet, nec lente excoctio peragitur. Sed sæpe plus minusve versus focum declivis locanda est. Ut vero noscamus, utrum eam, quam volumus, assequuti simus fistulæ directionem, satis erit, fornace parata, tabulam madefacere, eique pulverem ex carbonibus resolutum inspergere; hac vero ad parietem fistulæ oppositum erecta, bis vel ter folles diducere. Nam ex pulvere, quem ex ea difflaverint, patebit, quo ipse pertingat. Eodem modo investigare licebit, quam in partem ventus reflectatur: quem in finem tabula eadem ibi erigatur, quo noscere volumus, utrum ventus reflexus per-venturus sit nec ne. Neque enim aliter quam experimentis venti in superficiem impingentis reflexio constitui potest. Nam, quemadmodum Cl. Genneté (*) expertus est, ventus a follibus inspiratus non ita reflectitur, ut angulus *incidentiæ* æqualis sit angulo *reflexionis*; verum sæpe ille isto est octuplo major, sæpe cum eodem certam ac definitam proportionem non habet. Quin imo cum objectu materiæ in fornacem impositæ aliter ventus inspiret, & reflectatur in fornace ardente, & venæ ac carbonum plena, aliter in frigida, & vacua, certius investiganda erit ejus directio, & reflexio, cum, finita excoctione, refrigerata fornax sit. Nam in eam fornacis partem,

(*) *Gen. Nouvelle construction de Cheminées.*

Ex situ quoque
fistula pendet
venti directio.

quæ magis erit exarsa, majori vi ventum inspirasse conficietur. Ad hæc ut flatus folium per fornacem apte distribuamus, videamus quoque oportet, quantum fistula a foco, & quantum e pariete versus interiora fornacis eminere debeat. Quo illa propior foco est, vena diutius in igne perstat, antequam ad fistulam eandem delabatur, ibique liquefeat. Quamobrem ad excoctionem venarum, quæ liquatu difficiles sunt, prope focum fistula locabitur. Cavendum tamen est, ne flatus, quod proximus sit materiæ liquefactæ, hanc nimis refrigeret, neve ejus multum comburat, aut in calcem vertat. Contra, si fistula nimis absit a foco, vena cum citius quam par est, ad ipsam perveniat, cruda in focum delabitur, vel in foco subsidens refrigeratur, quod flatus ab ea fornacis parte nimium remotus non multa vi in carbonem, qui circa ipsam sunt, inspiret. Quantum fistula a foco distare debeat in altis fornacibus, in quibus venæ ferri excoquantur, superius diximus, at in fornacibus mediis satis plerumque erit, eam a foco abesse quatuor, vel quinque pollices. Idcirco autem necesse est fistulam aliquantum e pariete eminere, ut flatus versus mediam fornacem inspiret, atque inde æquabiliter per totam ejus capacitatem ascendat: id quod objectu carbonum vix fieri posset, si illius os ex pariete non extaret. Verum cum fistulam sive ex ære, sive ex ferro facta sit, cito ignis exedat, & comburat, ac præterea molestum accidat ejus directionem mutare, quod sæpe, atque in ipso excoctionis cursu facere necesse est; idcirco Metallici artificum excoctarunt ingeniosum sane, quo facile ventum ducerent, quo vellent. Curant nempe circa fistulam vix, ac ne vix quidem ex pariete extantem ferru-

Quo artificio
fistula inducatur
ex produ-
ctio, quæ natus
appellari solet.

minari partem materiæ in fornacem impositæ; quod cum factum sit, eamdem, si opus est, bacillo per fistulam immisso perforant in ea directione, quam vento dare volunt. Hanc fistulæ productionem, seu crustam nasum appellant, a quo plerumque pendet recta venarum excoctio. Aliqui nasum hoc modo fistulæ inducunt. Fornace carbonibus fere completa, iisque incensis, baculo per fistulam immisso foramen in ipsis faciunt, quod nasi veluti semita sit, atque in illud duos recrementorum alveos insinuant: quod ipsum quater, vel quinquies faciunt, quoad nasus fistulæ accreverit. Ne vero igne mollior factus flectatur, eidem aliquot lateres supponunt: quo facto venæ excoctionem incipiunt. Alii cum necesse est in ipso excoctionis cursu venti directionem mutare, argillam in os fistulæ immittunt, & ultra parietem adigunt, eamque perforant in ea directione, quam vento dare contendunt. Alii demum, ut diximus, ea ipsa materia, quæ excoquenda est, nasum parant, qui eo facilius fistulæ ferruminatur, si hæc aliquantulum ex pariete extet, & luto oblita sit. Hunc in finem primo in fornacem injiciunt venam tenuiorem, quæ, cum facile liquecat, cito fistulæ ferruminatur; statum vero lenem inspirant, ne mollior facta in focum defluat. Cum autem ventus ex fistula erumpens se dilatat, frigidior versus os fistulæ est, quàm in parte ab ea remotiori, atque adeo ibi materiam circumstantem refrigerat, ac tenaciorem efficit, sicque in naso foramen continuo existit, per quod status fornaci inspiratur; ac ille in eam usque partem producitur, in qua tantus est calor, ut materia liquida facta in focum paullatim defluat. Hoc itaque naso ventus per fornacem distribuitur, eoque æquabilius, si foraminibus scateat: quod non raro

Quid præter
nasum, & quid
præcavendum
sit, ut recte se
habeat.

accidit. Hanc præterea nasus præstat utilitatem, ut venam una cum carbonibus sustentet, ne nimis cito, & cruda, sed liquida, & paullatim in focum devolvatur. Quod si flexilis fuerit, poterit eum excoctor, quo velit, dirigere. Curet autem, ut iustæ longitudinis sit. Nam prout brevior vel longior est, vena citius, aut tardius liquefcit. Ad venas liquatu difficiliore, quæ in fornacibus mediis excoquuntur, satis erit nasum longum facere pollices novem. Numquam vero ultra dimidiam fornacem protendi permittatur. Tum enim ventus æquabiliter per fornacem diffundi nequit, atque adeo nimis lente excoctio peragitur, & sæpe metallum in catino refrigescit, cum flatus in ipsum nequeat ignem adducere. Quod si longior, quam oporteat, nasus evadat, minuendus erit, injectis aliquot carbonum alveis, vel recrementorum facile liquefcientium. Hoc enim modo cum vel ignis vis, vel materiæ excoquendæ fluiditas augeatur, paullatim nasus defluendo minuetur. Nonnumquam vero detruncandus erit conto per os fornacis immisso. Quod si adeo excreverit, ut ad parietem fistulæ oppositum pertingat, quod negligentia excoctorum nonnumquam sit, ut plurimum necesse erit, excoctionem sistere. Contra, si nasus producendus sit, satis erit, aut minorem carbonum copiam, aut materiam liquatu difficiliorem in fornacem imponere, aut statum leniorem inspirare. Idipsum interdum assequi possumus venâ cum carbonibus ad posteriorem fornacis partem injectâ, quæ, cum ibi ignis vi minus exposita sit, tenacior ad fistulam perveniet. At si nasus ita fleatur, ut vento impedimento sit; vel effringendus erit, vel rectus efficiendus. Excoctores optime se habere nasum existimant, si, qua parte

mediam fornacem spectat, sese dilatat, si ad margines quidem clare splendeat, sed versus fistulam obscurus sit, nec inflatus hic illic appareat. Ex naso quoque noscunt qua in parte ignis luculentius ardeat.

CIX.

Ad rectam denique inspirationem venti facit ipsa quoque folliis longitudo. Ex duobus enim folliis ejusdem capacitatis, qui longior est vehementiorem flatum, magisque ad fistulæ vel naris positionem directum inspirat, quàm qui est latior. Cujus rei hæc mihi videtur esse causa. Cum enim folliis versus caput angustetur, eo compresso, aer confertissimus ad narem confluit: ex quo fit, ut aeris bona pars in latera capsæ impingens quaqua versus reflectatur, certâque vi resuens opponatur aëri, qui priorem subsequitur, atque hujus impetum retardet, motibusque compositis directionem ejusdem turbet. Hæc autem detrimenta minora existunt in folle longiori quam in latiori. Nam si fingamus areas *q'mru*, *xgru* exhibere duos folles æque capaces, atque ducamus rectas *ul*, *ri* perpendiculares lateri *NQ*, perspicuum erit, aeris portionem, quæ rectâ nititur per caput *ur* crumpere, majorem esse in folle longiori, quam in latiori. Illam enim exhibet area *ilur*, istam area *khur*. Accedit ex reliquo aëre, qui nequit ad caput confluere, quin in capsæ latera impingat, minorem portionem, minorique vi urgere in latera folliis longioris; id quod, ductis rectis *No*, *TV*, ex angulis incidentibus facile quisque conficiet. Iste autem aeris refluxus quantus sit conicere licet ex novo quodam experimento, quod alterius rei causa instituebam. In narem folliis compositi, quem ad

Cur ex duobus folliis ejusdem capacitatis, ille qui longior est, vehementius & rectius ventum inspiciet, quam qui est latior.

Tab.
XVIII.
fig. 61.

venas experiundas adhibere soleo, tubum ferreum stanno dealbatum immisi, qui crucis figura erat. Vento autem in ipsum inspirato, sonum ille edebat tono musico consonantem; quodque mirabilis est, nullus aer per duos tubos, qui hinc inde a recto extabant, expirabat. Porro, cum fistulæ musicæ nullum sonum edere soleant, nisi flatus in ipsas inspiratus ope obturamenti, apteque fissuræ cogatur per arctius spatium transire, cogitavi sane aliquod ejusmodi obturamentum effici ab ipso aëris nimis arctè in tubum inspirati refluxu, quod quidem forte vetabat, ne aer ex tubis ad latera positis expiraret. Sed hæc viderint, qui hisce rebus delectantur.

CAPUT VI.

De venarum appositione.

CX.

Quæ venæ cito
vel tarde li-
queſcant.

VENARUM aliæ cito igni liqueſcunt, aliæ tarde. Primis accenſentur venæ plumbi, maxime ſi parumper ferri in ſe contineant, æque fere omnes, quibus ſulphur ineſt; inter ſecundas numerantur venæ ferri, itemque cupri, cui ferum inſit, æque venæ omnes, quibus Zincum admixtum eſt. Ac Zincum quidem liquatu difficilioreſ efficere videtur venas, quod cum alumine copulatum ſit. Novimus enim materiam ſale aluminoso imbutam ignem diutius tolerare; in Zinco autem ejusque venis alumen ineſſe, ex eo intelligimus, quod lixivium ex floribus Zinci, ejusque vitriolo conſectum alumen ſapiat. Varia hæc, & multiplex venarum natura poſtulat, ut ex, ante-

Quæ ex cauſa
zincum diffi-
ciliorem efficiat
venarum li-
quefactionem.

quam excoquantur, certis additamentis plerumque temperentur. Nam illarum quidem, quæ nimis cito liquantur, retardanda excoctio est, additâ materiâ, quæ tardius, quam vena, lique scat. Nisi enim hoc fieret, metallum cum recrementis commixtum in catinum destueret. Hujus autem additamenti loco usurpantur aut venæ ejusdem generis metalli, quæ paulo tardius lique scunt, vel alterius generis fossilia, quæ tamen metallo ex vena conflando non noceant. Contra venarum, quæ tarde liquantur, acceleranda excoctio est, addita materia facilius lique scente. Salsia quædam artificiosa ad hunc usum opportuniissima sunt; sed ne istis ad venarum excoctionem utantur Metallici, vetat eorum pretium. His autem substituant lapides facile lique scentes, cujusmodi est spatium fusile, seu *fluor mineralis*; plerumque autem recrementa metallica, vel etiam reliquias fornacum; quæ duo, quod fere in vitrum versa sint, facilius lique scunt. Hæc ipsa alias quoque Metallicis præbent utilitates. Cum enim metallis leviora sint, istis liquefactis innatant, atque adeo hæc ipsa ab igne eorum consumptore tumentur; ad hæc metallum, quod in se continere solent, dimittunt, quod cum reliquo ex venis conflato conjungitur. Sed aliud est additamenti genus, quo contendunt ex venis se jungere materiam excoctioni earum nocivam. Id vero ut assequantur, necesse est, illud multo magis affine esse, quemadmodum loquuntur Chymistæ, materiæ ex metallo separandæ, quam metallo, cum quo hæc juncta est. Hoc modo venis plumbi sulphure & arsenico redundantibus recte miscetur ferrum, aut vena ferri. Istud enim sulphuri, & arsenico maxime affine est, cum plumbo autem nullo modo. Quocirca duobus illis corporibus jungi potest, quin plumbo jun-

Vol. I. S

Quid præbeat
additamenta,
quæ venis
excoquendis
commisceantur.

Quæ cautio ad-
hibenda sit,
cum aliquo
additamento
contendimus,
materiam illi-
quam a vena
separare.

gatur: quod cum sit, eadem separantur a plumbo. Eundem usum habet & lapis calcarius, qui tamen urendus est, ne in igne dissiliat, neve aer, quem in igne dimittit, fornacem refrigeret. Similiter, si cum venis certi metalli, puta cupri, ferrum mixtum sit, quod metalli conflatuæ noceat, atque in venis tantum sulphuris non insit, quantum requiritur, ut ferrum absumatur, juvabit iisdem miscere alias venas ejusdem generis metalli, quibus aliquid sulphuris, vel etiam arsenici insit. Sed ad ferri additamentum quod spectat, prætereundum hoc loco non est, ferrum forma metallica prædictum, & minutim tufum, aut in globulos formatum, anteferendum esse venis ferri. Nam ferrum quo magis purum est, eo magis cum sulphure, aut cum arsenico conjungitur; hinc minor ejus moles necessaria est ad certam sulphuris vel arsenici portionem absorbendam, adeoque minori carbonum impensa vena, ad quam illud adjicitur, excoquitur, & minor recrementorum moles, atque adeo minor metalli jactura existit. Quod si in minutula fragmenta ferrum adjiciatur, ipsum magis miscetur cum materia, ex qua sulphur, vel arsenicum separare contendimus, omninoque facilius cum istis conjungitur. Quoniam vero difficillimum est ferrum jam purgatum in minutula fragmenta frangere, aut ipsum in globulos formare, ideo Metallicus ferro crudo uti poterit, quod ad hunc usum satis purum est, & cum fragile sit, facile comminui potest; atque ut facilius id faciat, curet ferrum, cum ex fornacibus, in quibus vena ferrea excoquitur, emittitur, in canales parum profundos derivari, aut ipsum in catinos vulgares derivatum in crustas detrahi. Utroque enim modo cum in tenues laminas aut braſſeas formatum sit, nullo negotio vel magnis & latis malleis, vel pilis comminuetur.

Ista venarum cum additamentis commixtio compositio appellatur; quæ qua proportionem facienda sit, experientissimi Metallici erit constituere. Sæpe enim ad quodlibet venæ centumpondium par additamentorum pondus adjiciendum est, aliquando duplum, non raro triplum. Quo in negotio ne erret, necesse est ipsi bene perspectam esse tum venæ naturam, tum additamenti vim. Sic si de vena plumbi agatur, ad quam ferrum adjicere oporteat, videat primo quantum sulphuris in ea usta remanserit, & difficile ne, an facile ipsum dimittat; deinde consideret ejus partem aliquam ex fornace evolare, quodlibet vero ferri centumpondium æquam fere sulphuris partem absorbere posse; atque ex his constituet quota ferri portio adjicienda ad venam sit. Additamenti vix eam quantitatem Metallicus adjiciat, quæ ei opus est, ut, id quod vult, assequatur. Nam si ejus plus æquo adjiciat, major carbonum copia comburitur, ac major recrementorum moles exiit, in quibus multum metalli remanet. Præstat autem additamenta æquabiliter cum vena miscere, ut compositionem in fornacem injectam æque ignis corripit & liquefaciat. Quocirca ea plus minusve tundere oportebit, prout res postulat. Porro in media officinæ parte, in qua fornaces sunt, aliove in loco ad id opportuno cumulus ad unius diei operam pareatur ex vena, & additamentis ei instratis, aut cum ea commixtis. Sed magister, antequam excoctionis opus exordietur, fornacem carbonibus compleat, tum carbunculum ardentem per fistulam inter nares follium in fornacem immittat, atque follibus ignem excitet: quo modo focus, & catinus aliquot horarum spatio calefiunt: quod nificet, ipsi ob humorem, quem in se continent, vi-

Qua proportione compositio ex vena & additamentis faciendâ sit.

Fornax calefiat antequam in ea vena injiciatur.

tium facerent, & metallum ad ipsos adhæresceret. Cum carbones ad certam altitudinem subsiderint, iterum carbones apponat, iisque superponat duo circiter recrementorum centumpondia, quæ liquefacta vitream quasi crustam parietibus, & foco inducent, sicque citius parietes calefient, & metallum, quod deinceps ex vena conflabitur, facilius ex ipsis defluet. Sed alii, carbonibus aliquantisper e muro posteriori remotis, ad singulos fornacis angulos venam statim injiciunt, ut liquefacta parietes incrustet, eoque hoc modo ab ignium vi tueatur. Juvat quoque carbones in fornacem conjectos complanare, ne quid vacuum in ipsis restet, per quod citius quam par est, vena versus fundum devolvatur. Sed si carbones citius subsidant versus mediam fornacis aream, ii ita imponantur, ut cumuli instar clementer assurgant. Cum denuo materia, qua fornax repleta est, aliquantulum subsiderit, carbones una cum vena in ipsam injiciat: quod iterum, & sæpius faciat, quoad excoctio perstat. Sed initio quidem, cum fornax nondum satis ardeat, unum alveum carbonum apponet, qui pedem cubicum capiat, eique superponet duos venæ vel compositionis alveos, quorum singuli libras circiter 50. pendant; in sequentibus autem appositionibus ad unum alveum carbonum tres venæ alveos adjiciet, tum quatuor vel quinque, seu quantam maximam venam poterit fornax recte excoquere. Quo in negotio excoctorem maxime solertem esse oportet. Si enim carbones redundent, eorum & metalli multum frustra consumitur; contra, si deficient, excoctio lente peragitur, & venæ, antequam ex iis metallum confletur, in focum delabuntur, atque ad eum adhærescunt. Experimentis autem constituat, quænam proportio inter ve-

Quo ordine venæ cum carbonibus in fornacem injicienda sit.

nam, & carbones ad optimam excoctionem magis conducat. Quem in finem vel ad eandem carbonum quantitatem majorem aut minorem venæ molem adjiciet, vel, eadem venæ quantitate servata, augebit aut minuet carbonum copiam, quoadusque noverit, se justam utriusque appositionem esse assequutum. Quo constituto, id quoque sciet, quoto tempore appositiones faciendæ sint. Cum enim fornax continuo plena esse debeat, statim atque materia apposita subsiderit, nova erit injicenda. Cum venarum partes tenues sunt, & pulvereæ, iis in fornacem injectis aliquot carbones superinjiciat, quibus tegantur partes illæ, quæ alioquin a flatu solium, & vi ignium agitatur, & sublatur cum fumo evolarent, vel eas aliquantulum madefaciet, aut cum pauca calce conglutinabit, ut ad se invicem, & ad carbones adhærescant. Quod si venæ ex partibus non æque magnis constent, primo in fornacem injiciet minutulam, deinde mediocrem, tum majusculam, ut hæc, quoniam difficilior liquefcit, diutius in igne persistet. Venam autem durioram ad posteriorem fornacis partem adjiciat, ubi, cum minor ignis sit, diutius calefiat, antequam liquefcit. Quin imo, cum ad venas, quæ tarde calefiunt, & liquefcunt, excoctori opus sit fornace multum calefacta, in ea, priusquam istas apponat, recoquat recrementa, vel pyritidem, si aliquid ejusmodi in promptu habeat, vel fornacem diutius calefaciat: secus enim venæ in ejus foco insidentes os obstruerent, & quasi suffocarent. Et quidem cum de venis ferri excoquendis agitur, necesse est ad plures dies fornacem igne sopito calefacere, quemadmodum paullo supra dictum est *, & suis locis magis explicabitur. Ceterum, interim dum vena excoquitur,

Qua ratione constitui possit optima proportio inter venam, & carbones.

Qua ratione preceatur, ne vena tenuior ex fornace evolet.

Quid prestandum sit cum agitur de vena excoquenda, quæ tarde liquefcit.

* §. 102.

Quo modo præ-
caveatur, ne
ad fornacis fo-
cum massa du-
riores adhæres-
cant.

magister ignem ac ventum temperet, prout sibi opus esse viderit; diligenter etiam in fornacem introspiciens videat, ne massæ duriores ad focum adhærescant. Quocirca sæpe, ac caute, ne focum perfringat, contum per os fornacis, aut per fistulam immissum in omnem partem verset, ut massas duriusculas, quas offendit, dimoveat, & dividat, easque eo retrahat, ubi vel liquefcere facilius possint, vel saltem impedimento non sint reliquæ materiæ defluentis. At, si vena cumuletur, & non liquefcatur, vel additamentis facile liquefcentibus, vel austro igne huic incommodo remedia afferet: quod si ne hoc quidem modo ea liquefcatur, scalis ad fornacem appositis ascendens, eam cuspidato vel uncinato conto dividat & dejiciat deorsum.

CXII.

Quid præstare
oporteat, cum
vena excoquen-
da sit, nec ta-
men recremen-
ta aut alia ad-
ditamenta in
promptu sint.

Paullo ante diximus additamenta ex recrementis maxime peti: at, si nihil ejusmodi nobis in promptu sit, eo quod tum primum venam recens inventam excoquere aggrediamur, alia ratione pro rerum opportunitate ejus excoctio peragi poterit. Ac si quidem vena ejus generis sit, ut nimis cito liquefcatur, veluti si multo pyriti sulphureo admixta sit, ei addes vel lapides difficile liquefcentes, vel lateres coctos minutim confusos. Quod si vena indigeat additamentis facile liquefcentibus, ad hunc usum adhibebis quartzum, ut vocant, vel pyritem sulphureum, ac præsertim fluorem mineralem. Singillatim vero, si agatur de vena argenti, vel plumbi, vel cupri, ad eam addere licebit venas ferri, vel scorias ferreas, quas forte vicina loca suppeditaverint. Ferrum enim, quod vehementiorem ignem concipiat, venarum calefaciendarum vim habet, atque, si non multum fuerit, facile in scorias abit;

aliunde vero venarum illarum excoctioni non nocet. Quod si locus nulla ejusmodi additamenta suppetaverit, secernes ex vena partem metallicam magis puram, ex qua excocta cum præter metallum constaveris recrementa, hæc ad reliquam venam additamenti loco adjicies: quæ cum fuerit excocta, alia præbebit recrementa ad sequentes excoctiones opportuna.

CAPUT VII.

De emissionē materiæ liquefactæ.

CXIII.

QUO tempore vena una cum carbonibus, atque additamentis in fornacem injecta ignis vi subjicitur, quod volatile in ea ineſt, magna ex parte una cum fumo evolat, quod terrenum eſt in vitrum ignis vertit, & cum aliis metalli purgamentis in ſcorias ſeu recrementa abit; metallum vero, quod in vena latebat, vel reducitur, ut Metallici loquuntur, & purum ſit, vel pyritidis ſimile efficitur, ex quo deinde recocto metallum purum educitur. Verum, etſi vena in fornace conſuſa eo mollior fiat, quo magis ſubſidet, perfecte tamen non liqueſcit, niſi cum ad fiſtulam pervenerit. Ac materia quidem cujuſque appoſitionis citius vel tardius ad fiſtulam uſque ſubſidet, prout fornax humilior, vel altior eſt, & carbonēs citius aut tardius conſumuntur. In fornace XVI. pedes alta ſpatio horarum circiter ſex, in media poſt duas horas a ſumma ejus parte ad fiſtulam pervenire ſolet, & poſt duas adhuc horas integre liqueſcit, atque ex ea in focum guttatim delapſa ſecernitur pars metallica a recrementis. Ma-

Quid vena accidat, cum liquefacta eſt.

Quoto tempore vena ad fiſtulam uſque deſcendat.

teria autem in focum delapsa vel in catinum continenter effluit, vel in foco eodem detinetur, quoad tanta ejus copia existat, ut eam emittere oporteat. Sed antequam dicam, quo modo hæc perficiantur, explicare juvabit, qua ratione reductio, ac præcipitatio metalli in fornacibus vulgaribus fiat: quæ duo non satis adhuc mihi videntur esse explicata. Altius autem repetenda res est.

CXIV.

Metallorum
natura adhuc
incompta est.

Quid intelligi
possit phlogisti
vocabulo.

Chymistarum plerique volunt, metalla constare ex quadam terræ singularis, & phlogisti, seu materiæ inflammabilis temperatione. Sed cum neutrius materiæ naturam nobis satis explicaverint, neque exposuerint quid fiat, ut ex utriusque varia temperatione multiplex metallorum varietas existat, satius fecisse eos arbitror, qui inter occulta naturam metallorum amandarunt: quæ quidem, ut ego censeo, numquam nobis erit comperta, ut quæ ex primis corporum elementis pendeat, in quibus constituendis Philosophorum acutissimos frustra adlaborasse video. Si tamen liceat in re tam difficili, tamque obscura aliquid conicere, dicemus phlogistum nihil esse aliud, quam ignem vel purum, vel aliquâ aliâ materiâ temperatum, qui fixus plus minusve in corporibus hæreat, in iisque ardere aptus sit tum maxime, cum ignis vivus ad ipsum accedat: quo modo non tam rem definiisse, quam vocabulo a Chymistis aliter atque aliter usurpato certum sensum me subjecisse profiteor, ne forte quis hæc legens hæreat in nomine, quo sæpe uti necesse habemus. Etsi autem ego non tantam vim huic phlogisto tribuam, quantam ei adscribunt, qui illud tamquam causam commodam potius, ut ego quidem arbitror, quam veram assumunt omnium fere effectuum, qui in

corporibus, cum ea aut solvunt, aut componunt, gignuntur; magnam tamen ipsum habere partem in metallorum proprietatibus temperandis non dubitaverim. Metalla enim, nisi omnia, at saltem pleraque si igni, aere quoque accedente, subjiciantur, in terram quamdam seu calcem resolvuntur, quæ nec nitet, nec ductilis est, atque cum terrenis corporibus conjungi potest. Contra, si calx quælibet metallica cum inflammabili materia, veluti cum pulvere carbonum, misceas, misturamque in vase conclusam igni subicias, calci demum rite liquefactæ forma metallica redit, seu illa, ut ajunt, reducitur. Quamobrem, cum ignis metalla in calcem vertat, si aer quoque ad ipsa accedat, quis ambigat in iis igni subjectis aliquid comburi? Id autem quid aliud esse dicemus præter inflammabilem materiam, quam plane constat ardere non posse, nisi ad ipsam aer appellat? * Quid vero quod in nonnullis, velut in zinco, & ferro, cum in igne comburuntur, ardens quædam flamma appareat? An ardere flamma potest in corpore, cui nulla inflammabilis materia insit? Cum autem, hac in metallis consumpra, ex ipsis calx restet, quis non dixerit, metalla ob id in calcem verti, quod phlogisto priventur? Id quod eo verisimilius videri debet, si ad ea animadvertamus, quæ in reductione metallorum fieri vidimus.

Quam partem
habeat phlogi-
stum ad ece-
ram formam
metallis indu-
cendam.

* §. 102.

CXV.

Atque his sane argumentis adducti Chymistæ omnes in hanc opinionem concessere a Sthalio usque derivatam, metallicam nempe formam in metallis idcirco interire, quod phlogisto privarentur, eandem vero ad ipsa redire, si illud iisdem adjungeretur. Verum ad calcis statum metallis inducen-

Vol. I.

T

Quam partem
ad rem eam
dem habeat aer.

Quibus præfer-
tim ex causis
mutatio quæ-
piam corpori
accidat.

dum aliud quidpiam advenire, ex eo primum erat suspicari, quod calces metallicæ sæpe non minimum pondere crescerent. Constabat enim, ut alia mittam exempla, ex centum pondio plumbi centum & undecim minii libras prodire: quam ponderis accessionem ex phlogisti interitu nullatenus proficisci posse aperta res erat. Sed hoc est commune fatum eorum fere omnium, qui in causis rerum inquirendis adlaborant, ut cum rem unam partem aliquam in effectu quopiam habere animadverterint, eam veluti unicam absolutamque ejus causam constituent, quasi vero plus una nec possit, nec soleat esse rerum causa: quod tamen secus plerumque se habet. Nam cum aliqua in corpore quolibet mutatio accidit, id primo fieri potest vel quod aliqua materia ex eo evoleret, vel quod nova ei adjungatur, vel quod una in ipso intereat, alia in ipsum se se insinuet; deinde quod materiæ, quæ vel eadem ut antea in corpore mansit, vel aucta, vel imminuta est, alia dispositio accedat: plerumque vero plures ejusmodi mutationes corpori accidunt, tum maxime cum igni subjicitur. Quotus autem quisque est, qui tam laboris patiens sit, ut, antequam mutationis causam assignet, hæc omnia, aliaque his similia animadvertat? aut qui hæc animadvertens tam sit felix, ut veras ex multis causas inveniat? Quid ergo miremur, si quemadmodum in ejusmodi rerum causis constituendis sæpe erratum est, ita in explicando formæ metallicæ interitu diu habita tantum sit ratio phlogisti intereuntis, non vero materiæ ad metalla accedentis? Ac istam quidem materiam, quæ in metalla, cum in calcem vertuntur, se se insinuat, nihil esse aliud præter aerem censuit egregius quidam Pharmacopola Michaël Reyus, quemadmodum in libello, quem anno MDCLXXX.

edidit, videre licet. Sed ejus opinio deserta jacuit, donec experimenta a præclarissimo P. Beccaria (1) primum instituta, deinde a præstantissimis viris Pryestleyo (2), & Lavoisiero (3), aliisque instaurata, & aucta omnem ea de re dubitationem sustulerunt. Observarunt enim, aërem in vase clausum imminui, cum plumbum in calcem vertitur; cum vero augeri, cum calx plumbi mixta cum pulvere carbonum reducitur: ejusdem vero plumbi majorem, minoremve portionem in calcem verti pro majori, minorive aëris copia, quam ad ipsum pertingere permittebant. Illud præterea ex suis experimentis confecit accuratissimus Lavoisierus, pondus nempe materię, quam plumbum, cum in minium, seu calcem vertitur, ex aëre absorbet, esse fere æquale ponderi, quod plumbo in minium verso accedit; aërem vero, qui ex minio, cum reducitur, evolat, illum fere æquare, quem idem plumbum, cum in minium verteretur, absorbuerat. Quæ omnia argumento sunt aërem, vel aliam quamlibet materiam aëri admixtam sese in plumbum insinuare, cum in calcem resolvitur: quod ipsum cum ipse expertus sit in stanno, & ferro, conjicere possumus, ceteris quoque metallis, quæ in calcem verti queunt, esse commune. Quamobrem firmum sit, metalla formam calcis induere non modo ob phlogisti privationem, verum etiam ob insinuationem aëris, quem fixum appellare solent Physici recentiores, vel, si mavis, alterius cujusque materię per aërem diffusæ. Hunc

T 2

(1) Vide *Miscellanea Taurinensia* tom. 2. pag. 176.

(2) *Recherches sur différentes espèces d'air.*

(3) *Opuscules physiques, & chimiques.*

enim non aliquid simplex, sed ex pluribus compositum esse perspecta res est.

CXVI.

Calx metallica
reduci nequit,
nisi aer ex ipsa
secernatur at-
que phlogistica
materia, qua
parte cæsetur,
iisdem accedat.

Quidam calces
metallice
reducuntur po-
tius ob ærem
ex ipsis expul-
sum, quam ob
phlogistum iis-
dem adjun-
ctum.

Hinc autem conficiemus, calces metallicas reduci non posse, nisi aer ex ipsis secernatur, ac phlogistica materia, si qua parte careant, iisdem accedat. Hæc porro æris actio aditum aperit tum ad plures effectus explicandos, qui uni phlogisto tribui solebant, tum ad novas rei metallicæ pertractandæ rationes vel ineundas, vel pertentandas. Ac primo constituere non dubitaverim, metalla nonnumquam induere calcis formam ob æris potius insinuationem, quam ob phlogisti privationem; atque adeo in pristinum statum tunc restituenda esse ob æris potius expulsionem, quam ob phlogisti adjunctionem. Rem ita plane evenire in plumbo, nemo negaverit, qui animadverterit, istud, cum in calcem vertitur, decima saltem ponderis sui parte augeri, ejusmodi autem calcem reduci posse, etsi nullum ei adjungatur phlogistum. Idipsum fit in hydrargyro [ut de zinco (*), aliisque taceam] quod violento, diuturnoque igni digestum sit, quodque præcipitatum per se appellari consuevit. Hoc enim externam metalli speciem prorsus amittit; hanc vero recuperat quidem, quin ei adjungatur inflammabi-

(*) Zincum forma metallica e suis glebis se eduxisse uno sabuli, aut quarzi additamento asserit Scopoli pag. 21. Tentaminis mineralogici I., additque reducendam vim sabuli, aut quarzi non aliter esse explicandam, quam ex adfinitate terræ siliceæ cum principio inflammabili, quod ex igne ad se trahere, & terris metallicis communicare videtur.

lis materia, sed maximam tunc aëris copiam dimittit. Hinc intelligimus, non rectissime facilitatem, qua calces plumbi ad metallicam formam perducuntur, ex eo derivatam fuisse, quod facile inflammabilem materiam recuperent. Hinc etiam soluta videri poterit celebris quæstio, utrum scilicet *præcipitatum per se* inter calces metallicas accensendum sit; imo vero aliæ huic affines quæstiones vel dirimi, vel saltem declarari poterunt, quæ de metallorum quorundam mutationibus agitantur. Istæ enim ex eo præfertim ortæ sunt, quod vel calcis metallicæ status satis clare definitus non fuerit, vel etiam, quod non recta vulgari *calcinationis* vocabulo significatio apposita fuerit. Sed hæc fusius persequi non est hujus loci.

CXVII.

Illud præterea constare mihi videtur, quidquid nimirum magnam habeat cum aëre affinitatem, eique ex calcibus metallicis igni subiectis absorbendo aptum sit, adjuvare debere earundem reductionem. Calx viva, & lapis calcarius habita hætenus sunt veluti corpora absorbendo venarum metallicarum sulphuri, vel accelerandæ aliorum lapidum fusioni accommodata: in quo non repugno. Sed contendo præterea, metallorum reductionem ab iisdem corporibus vel effici, vel adjuvari. Certe enim, si plumbi venæ in fornacibus concameratis liquefactæ calx viva in pulverem comminuta admisceatur, magna hujus metalli pars reducitur. Unde autem tanta hæc reductionis vis? An ex phlogisto calcis vivæ? Non puto, quempiam dicturum. Neque enim hanc phlogisticis corporibus quispiam adnumeravit. Ego vero dixerim, id ex eo proficisci, quod calx viva cum aëre multum affinis sit. Lapis enim calcarius

Quod aptum est absorbendo aëri ex calcibus metallicis, id non raro istarum reducendarum vim habet.

eatenus maxime in calcem vivam in igne vertitur, quatenus aërem, qui ei inest, dimittit: quod quidem adversus clarissimum Meyerum acidum quoddam pingue inducentem summus chymista Josephus Jacquinus (1) accuratissimis experimentis adseruit. Hinc est, ut illa aërem avidissime absorbeat, atque adeo hunc ex corporibus, quibus cum miscetur, debeat ad se attrahere. Ex quo fit, ut plumbum calciforme cum calce viva commixtum aërem, quem in se continet, facilius dimittat, sicque metallica ei forma redeat, eo quod, aëre inde expulso, vel statim ea sese exerat, vel saltem possint facilius in metallicam materiam sese insinuare inflammabiles particulæ per fornacem discurrentes. Eundem præstat effectum lapis calcarius una cum vena metallica & carbonibus in fornaces vulgares injectus. Iste enim quoad eum statum obtinet, quem a natura sortitus est, aërem certe non absorbet; ad id tamen aptus efficitur eo tempore, quo ignis vi subjicitur, antequam liquecat: siquidem per id temporis in vivam calcem ex parte vertitur.

CXVIII.

Non alia est ratio, cur plumbum formâ metallicâ educatur, tum ex galena, tum ex qualibet plumbi calce, si igni subjiciatur, uno addito alkali fixo (2). Et sane in istud sal aërem sese insinuare

(1) Vide periodicum opus Cl. Rozier ad an. 1773. tom. 1. p. 123., & alibi.

(2) Hoc experimentum commemorat quoque Cl. vir Jo. Antonius Scopoli in Tentamine mineralogico I. pag. 19., qui reductionem calcis plumbeæ tribuit phlogisto, quod sovet alkali fixum.

a plumbi calce dimissum facili experimento evincitur, quod ita se habet. In ampullam, cujus naris oblique in subjectam ampullam pertineat, impone certam plumbeæ calcis portionem, puta uncias XII.; in ampullam autem illi subjectam IV. circiter uncias olei ex vini sæcibus confecti, quod oleum tartari appellari consuevit, ac demum ampullæ priori ignem subicias. Post certum tempus oleum istud in coagulum abire videbis, non alia certe ex causa nisi, ob aerem, quem calx plumbi dimisit. Nam ope acidi cujusque potest iterum ex oleo tartari aer, quem istud absorbit, educi, quin aliud alkali fixum coagulare valet.

CXIX.

Quæ duo diximus ad calcis formam metallis inducendam requiri, causas aperiunt, cur ad id necessarius sit aeris accessus; iste autem prohiberi debeat in eorumdem reductione. Horum enim primum fieri oportet, non modo ut novo aeris appulsu ardere possit materia inflammabilis, atque ita e metallo evolare; verum etiam ut ille materiam suppeditet, quæ sese in metallum insinuet. Alterum vero præstandum est, ne novus aer metalla reducenda contingat, interim dum ignis vi illum dimittunt, quem in se continent: id enim si fieret, ad calcis statum magis magisque ea dejiceret.

CXX.

His constitutis, facile intelligitur, quo modo reductio metallorum contingat, sive hæc in vasculis operculatis, quemadmodum experimenti gratia fieri solet, sive in fornacibus instituatur. Hanc reductionem fieri non posse, nisi calces metallicæ liquescant comperta res est: quæ tamen regula nonnumquam fallit in venis ferri, cui ut forma metallica redeat, satis persæpe est, si illæ in igni

Quæ ob causas ad calcis formam metallis inducendam necessarius sit aeris ad ea accessus, iste autem prohibendus sit, cum reducuntur.

Quomodo reductio metallorum fiat in vasculis operculatis.

- molles evadant. Ac si quidem de vena experiunda agatur, hæc vasculo imponitur una cum aliis corporibus, quæ & fusionem accelerent, & materiam inflammabilem suppeditent, illudque operculatum in fornacem imponitur. Fusione demum rite peracta, restat metallum a reliquis corporibus secretum. Id porro fieri dicitur ob phlogistum, quod corpora adjecta suppeditant, atque in calcem metallicam transmittunt. At enim manifestum est, ex iis materiam inflammabilem erumpere non posse, nisi ardeant, ardere autem non posse, nisi continuo aer ad ipsa appellat; siquidem si pulverem ex carbonibus resolutum in vase concludas, atque istud igni, utut vehementi, subicias, eundem illum ad multos dies perstare, nec ipsum consumi animadvertes. Qui ergo fit, ut in vasculis clausis corpora phlogistica ardeant? Id ego tribuendum dixerim aëri, qui ex corporibus ibidem inclusis evolvitur, præsertim vero ex ipsa calce metallica. Nam metalla reducta eo pondere imminuta deprehenduntur, quod ex aëris insinuatione calcibus metallicis * accedere vidimus: neque id mirum censebimus, si in mentem revocemus causam, ob quam carbonēs in fornace clausos ardere diximus. Quod vero calx metallica aërem dimittat, non modo ardere potest materia inflammabilis, quæ in additamentis inest, atque in ipsam calcem sese insinuare; verum etiam ex eo aut efficitur, aut adjuvatur metalli reductio, quemadmodum * §. 117. paullo supra explicavimus *.

CXXI.

At in fornace duplici modo reductio fit, nimirum igne vel directo, vel reflexo. Qua ratione calces, vel venæ metallicæ in igne reflexo reducuntur explicabimus suo loco, cum de iis in fornace con-

camerata excoquendis sermo erit. Nunc exponam, quomodo id fiat in fornacibus vulgaribus. Diximus, reductionem calcis metallicæ fieri non posse, nisi materia aliqua ei adjiciatur, quæ reducendi vim habeat, omnisque aëri ad ea corpora accessus interclusus sit. Horum autem primum in fornacibus vulgaribus plane existit. Vena enim cum carbonibus mixta in ipsas imponitur, quorum phlogisto hæc reducendi vis est. Sed ad alterum quod spectat, primo intuitu non videtur aëri in fornacem aditus satis interclusus, cum pars summa camini pateat, atque in ima ventum folles inspient. Secus tamen rem se habere intelliget, qui animadverterit, aërem camino imminuentem impetu ignis quammaxime rarefcere, atque accessu in fornacem prohiberi; ventum autem a follibus inspiratum columnam æquare, cujus basis est fistulæ os; atque adeo exiguum aëris molem inspirari, comparate ad fornacis capacitatem. Accedit, aërem, dum per medias prunas diffunditur, quammaxime rarefcere, ejusque partem magnam ab iis absumi; atque adeo minimam ejus partem metallum posse contingere. Quocirca fornaces vulgares perinde se habent ac vasa perfecte clausa, in quibus, venarum experiendarum gratia, metallorum reductio instituitur. Nam in istis quoque aliqua aëris portio existit, ea nimirum, quam dimittunt corpora in iis conclusa, qui nisi adesset, ea ardere minime possent. Quoniam vero quo plus aëris materiam metallicam attingit, eo difficilius ista reducitur, patet hac quoque de causa non plus venti in fornaces immittere oportere, quam necesse sit ad venarum excoctionem peragendam.

CXII.

Metallum reductum ex recrementis, quibus commixtum est, secedere, seu præcipitari, eo

Vol. I.

V.

Quo modo reductio metalli fiat in fornacibus vulgaribus, et si aëris in eas pateat introitus.

Metalli reducti
præcipitatio
non fit ob id
solum: quod
illud recremen-
tis gravius sit.

quod illud istis gravius sit, asserunt Metallici: Quod si ita crude accipiat, quemadmodum proferri solet, videri poterit non admodum veritati consentaneum. Est sane metallum recrementis gravius; sed ut gravitati huic obsecundet, necesse est ipsum vincere cohæſionis vim, qua ad recrementa adhæret: quod præstare nequit, quoad in tenuissimas particulas dispersum, ac divisum est; ea plane ratione, qua aurum, licet sit multo gravius aqua, eidem tamen innatat, si ad certam subtilitatem perductum sit. Quamobrem, cum metallum, quo tempore ex venis reducit, in tenuissimas particulas dispersum per recrementa sit, istæ non poterunt sane vi gravitatis descendere, nisi inter se jungantur, atque in massulas abeant paullo grandiores, quæ proprio pondere impedimenta commemoratæ cohæſionis superare queant. Itaque præcipitationem antecedere debet conjunctio particularum in certas massas. Atque hoc ita fieri oculis sæpe ipsis subjiciunt recrementa, in quibus paullo tenacioribus factis magna globulorum metallicorum copia conspicitur. Hinc sua sponte consequitur, id omne, quod conjunctionem metallicarum particularum vel adjuvat, vel impedit, vel favere, vel nocere earumdem præcipitationi. Porro illarum conjunctionis ex affinitate, quæ inter ipsas intercedit, proficiscitur; cohæſio autem earumdem cum recrementis pendet, tum ex attractione quadam universali, quæ inter corpora omnia viget, tum ex quadam affinitate singulari, quæ inter illas, & corpora recrementis admixta existit. Ac si quidem in istis aliqua materia existat, quæ affinis sit cum terris in vitrum conversis, & metallo reducto, ea veluti *medium unionis* constituet, quod particulas metallicas

Verum ob id
etiam, quod
metallæ particu-
læ primum
in massas gran-
diores coales-
cunt.

junget recrementis, atque adeo erit tunc impedita earum conjunctio inter se, & præcipitatio. Ejus generis corpora sunt plerumque sulphur, & arsenicum, quandoque pars aliqua metalli nondum reducti. Ad hæc duo alia vel vetant, vel impediunt metallicarum conjunctionem particularum, adeoque & præcipitationem, nempe recrementorum tenacitas, ac nimia fluiditas. Horum primum patet non ratione tantum, verum etiam experimentis. Alterum vero primo intuitu mirum videri debet, atque inexplicabile iis, qui ex una gravitate præcipitationem derivant. Quo enim fluidiora sunt recrementa, eo minus obistere deberent descensui corporum in iis innatantium. Sed si ea diligenter attendamus, quæ paullo ante diximus, facile patebit hujus rei explicatio. Siquidem recrementa nimis fluida, calidissima sunt, atque æstu quodam agitantur; ex quo fit, ut particulæ metallicæ perturbatissimo motu circumlatæ, vel nequeant inter se jungi, vel non possint retinere eam molem, quam semel suscepserint. Accedit eo motu assidue ad superficiem materiæ liquefactæ metallum adduci, adeoque aëri ex folliis erumpenti subjici: ex quo fit, ut ejus pars aliqua in calcem vertatur, quæ, uti diximus, metalli reducti præcipitationem impedit. Neque illud prætereundum est, recrementa ejusmodi sulphure, & ferro sæpe redundare: quæ duo metallum arctius conjungunt cum recrementis.

CXXIII.

Cognitis autem causis, quæ præcipitationi metallorum obfunt, facilius huic incommodo afferri poterunt opportuna remedia. Hæc peti possunt vel ex certorum corporum additamento, vel ex ignis temperatione. Si enim tenaciora, quam oporteat,

Quaratione effici possit, ut particule metallicæ jungantur inter se, & præcipitentur.

recrementa evadant; vel aliquam portionem ad additamenti, quod venam liquefacit, pondus adjicies, vel additamenta his fluidiora in fornacem impones, vel ignem augebis, accelerato folium motu, aut carbonum aucta quantitate. Contra, si fluidiora sint, quam par est, huic detrimento occures, addita materia liquatu difficilior, vel detracta parte aliqua additamentorum facile liquefcentium, vel calore imminuto. Si demum aliqua materia metallis admixta sit, quæ eorum reductionem, præcipitationemve impediat, miscebis cum vena excoquenda corpus aliquod, quo illa ab eisdem separetur; atque hoc in negotio ea præcavebis, quæ diximus *, cum de additamenti ageremus. Aliæ præterea causæ sunt, quæ metalli præcipitationem adjuvant, veluti lenis quidam, & æquabilis motus, qui materiam liquefactam in tenues undas agat. Hoc enim motu primum minuitur ea vis, qua particulæ metallicæ ad recrementa adhærent, adeoque facilius inter se jungi queunt; deinde modo una modo altera materiæ liquefactæ pars vento objicitur; ex quo fit, ut ex massulis paullatim vento objectis, atque adeo subito frigore correptis citius sulphur, quo inquinantur metalla, evolet, atque, uti corporibus in congeliente fluido solutis contingit, facilius præcipitentur. Quocirca fistula ita dirigi debet, ut ventus vel directus vel reflexus in materiam liquefactam leniter inspiret, ita quidem ut in ipsa motus ille existat, nec tamen nimium refrigerando dure scat.

CXXIV.

Cur aliquid
metalli in re-
crementis sem-
per remaneat.

At enim, etsi modis omnibus contendamus metallum a recrementis secernere, aliqua tamen ejus portio in istis remanet. Cujus rei causa hæc

est præcipua, quod nempe, maxima metalli parte præcipitata, quæ particulæ restant, raræ innatant in magna recrementorum mole, atque adeo ita distant a se invicem, ut affinitas seu attractio earum mutua locum habere nequeat, nec proinde vim cohæsionis, qua trahuntur a reliqua materia, vincere queant.

CXXV.

Jam vero præcipitato ad fundum metallo, scoriarum, quod levissimæ sint, eidem supernatant; quod si pyritides aliquis præterea conflatus fuerit, iste, quod mediocriter gravis sit, medium locum inter metallum, & scorias tenet. Ac si quidem ore clauso peragatur excoctio, ea omnia in foco conclusa continentur, quoadusque eorum emittendorum tempus sit; quod in fornacibus mediis post octo horarum spatium fieri solet. Tum autem Magister conto cupidato aperiet os fornacis, ita quidem ut in catinum defluant primo recrementa, deinde pyritides, si qui sit, postremo metallum. Sed prius catinum calefiat vel prunis in eum injectis, vel scoriosis induratis & ardentibus ex proxima fornace allatis: quæ calefaciendi cautio adhibenda est, quoties in vas quodcumque metallica materia infundi debeat, ne scilicet repentino frigore aut illa dissiliat, aut istud vitium faciat. Cum autem ea, quæ effluerunt, aliquandiu in catino steterint, ut unum ab alio separari possit, primum recrementa, tum pyritidem detrahet, metallum vero in catino relinquet. Mox rursus claudat os fornacis, & metallum, quod in catino superiore reliquit, extrahet, aliâque venâ iterum appositâ, eâque excoctâ eundem laborem iterabit. At, cum vena ore fornacis aperto excoquitur, materia liquefacta continenter in catinum

Quo modo
emittatur ma-
teria lique-
facta, cum ex-
coctio sit ore
clauso.

Quemodo ma-
teria lique-
facta in catinum
effluit cum ex-
coctio sit ore
aperto.

effluit, eademque in eo relinquitur, quoad ipse fere plenus fuerit, ut nempe metallum a scoriis melius scerni possit. Tum vero scorix detrahuntur, ita tamen ut earum pars aliqua in catino restet, quæ metallum contegat, ne frigescat, neve aëris accessu, aut ignium vi in calcem vertatur. In tempore autem detrahantur, ut locus in catino sit materiæ, quæ continuo in ipsum influit. Alii tamen, maxime cum venas cupri excoquunt, materiam metallicam primum derivant in catinum inferiorem, scoriis in superiore relictis, quas deinde ex eo eximunt; id quod hanc præstat utilitatem, ut scorix metalli, quod in ipsis restat, majorem portionem dimittant.

CXXVI.

Multis autem modis recrementa detrahi possunt.

Quibus modis
recrementa ex
catino detra-
hantur.

Primo enim emitti queunt vel per planum declive ex pulvere carbonum, & argilla ad latus catini paratum, vel per foramen in catino factum, quod oblique sub recrementa eadem pertingat, vel denique per canaliculum in ea altitudine in catino cavatum, ex qua recrementa dumtaxat possint effluere: atque his præsertim modis præstat, ea recrementa emittere, quæ copiosa ex fornace effluunt, & fere nullum metallum in se continent; cujus generis ea sunt, quæ suppeditant venæ metalli multum egenæ. Nam ex una parte magno detrimento non est, si in catino diutius non consistent; ex alia vero, nisi continenter emitterentur, locus in catino non esset materiæ continuo in ipsum influenti. Ne vero refrigescant, semita, per quam defluunt, calefiat, inque eam prunæ identidem injiciantur. At quæ scorix metalli divites sunt, in crustas, prout duruerint, vel conto uncinato, vel furcilla ferrea

tollantur: quod si adeo calidæ sint, ac tam multæ, ut in tempore non durecant, pala lignea removeantur ex catino, vel cochleari ex eodem effundantur. Sit autem cochlear ferreum luto oblitum, & calefaciendo rursus siccatum. Dum autem Minister in scorias illud immittit, caveat ne metallum iis subiectum attingens hujus partem aliquam cum ipsis misceat. Scorias autem detrahas in terram projiciat, ut, quoniam hoc modo mox franguntur, labor earum comminuendarum minuatur.

CXXVII.

Quoniam vero, cum vena dives metalli fuerit, differentia est in recrementis, quod suprema paucum metallum in se contineant, media ejus plus, infima multum, singula separatim ab aliis in aliquo loco excoctor reponat, ut ad singulos venæ acervos, cum ea recocturus est, additamenta adjicere possit accommodata. Quinimo crustas, quas ultimo detrahet, mox in fornacem injiciat, ut ex iis statim metallum confletur. Ideo autem hæc differentia existit, quod in crustis inferioribus hæreat pars metalli, quæ ex superioribus secedit, ad infimas vero adhærescat portio aliqua metalli ad fundum præcipitati. Differunt præterea inter se recrementa, quod alia calida sint, alia frigida. Calida appellantur, quibus multum sulphuris, sæpe etiam ferrum inest; eaque ejusmodi evadunt, cum materia, quæ excoquitur, admodum fusilis est, & citius, quam oporteat, excoctio peragitur. Quæ vero frigida appellantur, reliquis tenaciora sunt, ac minus fusilia, quod conflentur ex venis difficile liquefcentibus, & in excoctione tardiori. Quæ in primo genere sunt, facile liquefunt, & venas magno opere calefaciunt; atque adeo ad venas illas,

Ad quem usum
reservanda sint
recrementa
pro diversis eo-
rum materiis.

quæ tardius liquantur, reserventur. Contra, quæ in secundo genere sunt, ad eas venas, quæ nimium fusiles sunt, adjicientur. Omnino autem recrementa, quibus multum metalli inest, recoquantur vel separatim, vel cum aptâ materiâ commixta: quæ, quôd facile liquecant, ore fornacis semper aperto recoquere utile erit. At ex recrementis metalli inanibus, præsertim vero ex iis, quæ ex venis ferri conflantur, quædam res effici possunt, quæ ex vitro solent confici, vel etiam lateres ad fornacum, vel parietum ædificationem opportuni. Ac lateres quidem hoc modo formari possunt. Duæ laminæ ex ferro crudo factæ, atque in rectum angulum flexæ parentur, quæ in rectangulum disponi possint, cui ea forma sit, quæ lateri cuilibet danda est. Hic modulus prope os fornacis, in qua recrementa liquefacta existunt, fabulo impositus ad libellam componatur. Tum ore fornacis recluso, permittatur modulus recrementis repleti. Quo facto os fornacis obstruatur, & lamina ferrea modulo imponatur, ut recrementa intus in eo coërceat, & lævem superficiem lateri inducat. Cum materia satis duruerit, modulo parum aquæ affundatur, & laminâ superius positâ detractâ, itemque unâ ex iis, ex quibus modulus constat, later eximatur. Tum modulo eadem ratione, ut ante dictum est, disposito, alii lateres consientur, quos omnes in loco calido, id est ad calidiorem fornacis partem coacervare oportet, ut paullatim refrigescant. Secus enim cum ex materia quasi vitrea consent, facile rimas agerent & frangerentur.

CXXVIII.

Peritus excoctor recrementa cum metallo, vel pyritide effluentia ab his distinguit vel calore, vel

motu quo effluunt, vel aliis ejusmodi signis, quæ multum variant pro diversa venarum natura: ex quibus etiam conjicit, quomodo se habeat venæ excoctio. Ac venas quidem nec cito nimis, nec nimis tarde excoquere oportet. Quod si in alterutro peccandum sit, levius erit in tarditate peccatum. Nam etsi tam tarde excoctio peragatur, ut vena non liquecat, facile est huic malo mederi, accelerato nempe follium motu, aliisque modis, quibus ignem augeri diximus *. At ex præcipiti excoctione major pyritidis moles, minor metalli conflare solet; quinimo pyritides conflatur, etiamsi venis admixtum sulphur non sit. Illud enim, quod in additamentis inest, cum brevi eo tempore, quo vena liquecit, nequeat totum exhalare, cum metallo conjungitur, idemque inquinat. Præceps excoctio id quoque efficit, ut massæ tenaciores ad focum adhærescant. Nam quæ materia facilius liquecit, cito liquefacta defluens, nequit materiam duriorē liquefacere, quæ idcirco in focum cruda devolvitur. Causæ autem, ob quas citius, quàm par est, excoctio peragitur, duæ præsertim sunt, vel quod vena parum usta fuerit, vel quod follium status nimium vehemens sit. Imperfectæ venarum utionis signum est, si recrementa densentur, multumque fument, vel si in ipsis magna globulorum metallicorum copia hæreat. Fumum enim ideo emittunt, quod sulphur, dum vena ureretur, non satis exhalaverint; globuli autem illi metallici ad scorias adhærent ob causam superius commemoratam *. In venis plumbi excoctis id ipsum innote-
scit, cum immisso in plumbum liquefactum cochleari ferreo, illud tenax deprehenditur, atque ad cochleare adhærescit. Tenax enim hoc metallum evadit, cum impurum, & sulphuratum est; idemque, cum

Quibus signis
ex materia e
fornace emissa
possit dignosci,
utrum lenta ni-
mis an, præ-
ceps excoctio
sit.

* §. 104.
& III.

* §. 122.

purum est, nullo modo ad ferrum adhæret. Cum itaque hæc, aliaque his similia excoctor detrimenta animadverterit, curet statim opportuna iis asserere remedia vel ex additamentis, vel ex venti, ignisque temperatione petita.

CXXIX.

Quibus modis
pyritides detra-
hantur.

* §. 126.

At scoriis detractis, pyritides, si qui sit, ex catino educitur. Quod sit iis fere modis, quibus scoriæ detrahuntur*. Sed cum ille plumbi dives est, præstat ipsum haurire cochleari crebris foraminibus perforato, ut plumbum, quod ad pyritidem adhæret, in catino recidat. Quo modo citius quoque labor perficitur. Ne vero metallum purum, quod subiectum pyritidi est, comburatur aut refrigescat, relinquitur in catino portio aliqua pyritidis, quæ illud contegat. Iisdem ex caussis juvabit quandoque materiæ in catino relictæ superponere vel lignum incensum, vel pulverem ex carbonibus resolutum.

CXXX.

Quo modo py-
ritides facile
in minutula
frustula fran-
gatur.

Quod si pyritides tantummodo ex venæ excoctione constatus sit, iste poterit, postquam refrigerit, in unam massam ex catino inferiore eximi, ut ejus detrahendi labor minuat. Quoniam vero metalli ex eo conficiendi causa recoquendus est, mox in minutula frusta frangatur, vel aquâ affusâ, vel eo conjecto in officinæ solum pulvere carbonum cum argilla mixto instratum. Qua autem ratione pyritides pro diversa ejus natura recoquendus sit, altera hujus operis parte dicam. Hoc loco id unum monere sufficiet, ipsum nempe spectari posse veluti venam facile liquecentem, & metalli satis divitem. Ipse enim constat ex iisdem rebus, quæ venæ, ex qua constatus est, inerant; sed metallum in se continet cum minori materiæ terrenæ, aut volatilis

mole commixtum, quæ materia, cum ignium vi jam liquefacta fuerit, facilius liquefcit.

CXXXI.

Recrementis atque pyritide, cum aliqua hujus portio extiterit, detractis, metallum denique ex catino educatur: quod fieri solet eo in catinum inferiorem derivato; isque, ut assolet, prius calefiat, ne metallum mox effundendum refrigescat. Excoctor autem emissurus metallum os fornacis misturâ ex argilla, & pulvere carbonum factâ obstruat, caveatque, ne, interim dum os clausum est, materia liquefacta fistulam subeat. Quocirca metalli emissionem cito peragat, vel etiam statu folium leni utatur, ut interim tardius vena liquefcit. Tum conto cuspidato, malleique ictibus adacto catinum oblique ad fundum usque perforet, ut materia in inferiorem defluat. Prius autem contum calefaciat. Si enim aliquid frigidum metallicæ materiæ admoveatur, ista repentino frigore correpta cum strepitu dissilit. Tum foramen iterum obstruat argillâ madefactâ, quam bacilli capiti imponet, ut quò opus est eam inferre possit. Tandem ex catino inferiori metallum effundat in alios catillos ferreos, aut æneos latos puta pedes duos, altos tres circiter digitos, sed interius luto oblitos, & calefaciendo rursus siccatos. Emissione metalli peracta, quod post octo vel novem horarum spatium iterari solet, si catinus vitium fecerit, vel a metallo recrementisque exarsus nimis ampliatus sit, eum reficere oportebit. Quocirca excoctor parum aquæ in eam partem, quæ reficienda est, inspergat, ut ad eam mistura adjicienda adhærescat, eandemque pilo bene tundat. Tum, prunis in catinum injectis, eum siccescere permittat; postremo os fornacis iterum aperiat, & ven-

Quibus modis
metallum e ca-
tino educatur.

Quæ præstanda
sint, postquam
metallum ex
catino fuerit
eductum.

Quo modo catinus vel focus refectiatur.

Quibus ex causis massæ duriores in foco subsident, & quomodo detrahantur.

tum lenem initio inspiret, ne, si catinus cito materiâ liquefactâ compleatur, mistura recens adjecta rimas agat. Quod si tam cito vena liquecat, ut in tempore catinus siccescere nequeat, eidem cineres inspergat, quibus vetet, ne metallum catinum madidum contingat: quod in cupri excoctione maxime præcavebit. Hoc enim metallum frigescendo plus ceteris dissilit. Os autem fornacis, si nimis exæsum atque ampliatur sit, eadem mistura coarctabit ad justam mensuram, quæ pollicis unius, & dimidii plerumque est. At, si præterea massæ duriores in foco subsiderint, quemadmodum sæpe accidit, vel quod fornax non satis initio calefacta fuerit, vel quod venæ liquatu difficiles excoquantur, vel denique quod excoctio præcipitanter peracta sit, eas excoctor, postquam metallum ex catino defluerit, evellat, atque in illam foci partem rejiciat, ubi non multo detrimento venarum excoctioni futuræ sint. Quod si tam multas, tamque duras inveniat, ut focum fere obstruant, easdem ex fornace eximere contendet. Ejusmodi sunt, quæ in fornacibus mediis præsertim subsident, cum venæ multo ferro admixtæ sunt. Ignis, enim qui in his fornacibus ardet, ferri perfecte liquandi vim non habet. Tum autem munere excoquendi necessarie intermisso, excoctor ministris adjutus massas contis fractas vectibus elevabit, & magnis forcipibus prehenas ex fornace extrahet: quem laborem, ut peragat, necesse plerumque erit materiam in fornace conclusam fulcris sustentare, id est lignis crassis, & madefactis, ne ignis cito ea comburat. Quoniam vero focus idcirco magna ex parte effringitur, consueto pulvere, eoque madefacto illum reficiet: qua in re caveat, ne pulverem eo inferat, ubi metallum aut pyritides existat. Os quoque,

si necesse sit, reficiat, adjectis ad pulverem scoriis comminutis, quæ cum in vitrum facile vertantur, citius ad illud adhærescent. Foco, & ore refectis, appositiones leviores initio fiant, idest ad quemlibet carbonum alveum minor venæ quantitas adjiciatur; lenis itidem ventus fornaci inspiretur, quoad usque pulvis satis siccatus calefactusque fuerit. Secus enim inflatus vitium faceret, atque vena, fornacæ ob humorem e pulvere madido erumpentem refrigeratâ, cruda in focum devolveretur. Ceterum massæ ejusmodi, si non multum noceant venarum excoctioni, satis erit post XXIV. horas e fornace eximere; ac si quidem altior idcirco factus fuerit focus, os altius perforare oportebit, ut per istud materia liquefacta in catinum effluat. Hæc fornacis purgatio ad aliquot horas perstat: quo tempore lente omnino excoctio peragatur. Cum vero tempus redibit metalli ex fornace, vel ex catino emittendi, eundem laborem, quem descripsimus, excoctor iterabit; quod iterum, & sæpius faciet, usquedum certa, & definita venæ pars fuerit excocta, & tempus operæ præterierit.

CXXXII.

Facile autem ex iis, quæ diximus, intelligitur, cur fere numquam omne metallum, quod artifex venæ experiundæ in venis dixerit inesse, ex ipsis excoctores eliciant, sed sæpe decima fere ejus pars ipsis desit, tum etiam cum optime excoctionem se peregrisse existimant. Pars enim metalli in scoriis remanet, pars comburitur ignium vi, pars una cum fumo evolat.

Quibus causis numquam totum metallum, quod in venis inest, ex ipsis excoctis educatur.

CAPUT VIII.

De excoctionis fine.

CXXXIII.

Quo tempore
excoctionis finis
imponatur.

Quid præstare
oporteat in ex-
coctionis fine.

Cum tempus operæ præterierit, aut fornax inepta excoctioni facta sit, vel quod focus ita exarsus fuerit, ut materia liquefacta in ipsum penetret, vel quod massæ grandiores, quæ eximi nequeant, ad ipsum adhæserint, vel alia demum ex causa, finis excoctioni imponendus est. Id vero cum facere oportet, Magister, si vena excocta metalli dives fuerit, & pretiosa, in fornacem injiciat aliquot recrementorum alveos, ut metallum, quod alioquin in cadmiis remaneret, cum ipsis liquefactis effluat: secus permittat carbones una cum vena ultimo imposita subsidere, vel parum lapidis facile liquefcentis imponat, ut massæ foco insidentes molles fiant, atque ita facilius eximi queant. Postquam autem metallum, quod vel ex recrementis, vel ex vena ultimo imposita conflatum est, detraxerit, folles sistat, & conto totum fornacis os perfringat, atque ex ea altero conto uncinato, & rastro quinquedenti cadmias, & carbones extrahat, quos Minister, aquâ affusâ, restinguet. Fornace refrigerata, (quod post aliquot dies ei accidit), cadmias ad parietes adhuc adhærentes decutiat spatha quadrangula longa pollices sex, lata palmum, priore parte acuta, quæ teres manubrium habeat longum pedes quatuor dimidia ex parte ferreum, ligneum ex dimidia. Massas quoque duriores, quæ ad focum adhæserunt, atque has omnes fornacis reliquias seponat. Istæ enim, quod pars aliqua metalli in se contineant, commi-

nuendæ, cribrandæ, ac lavandæ sunt, ut, terrena parte ex iis secreta, quæ metallica est, iterum recoquatur vel separatim, vel mixta cum venis ejusdem generis metalli; aliisque aptis additamentis: id quod fiet in fornace, cujus os semper pateat. Quoniam vero fornacis parietes, cum Minister cadmias decutit, hic illic franguntur, ipsius cava primo fragmentis saxorum vel laterum compleat, tum parietibus lutum lignea spatha illinat, & æquet. Veneri demum pulvere ex foco detracto, novum ei inducat, eumque rursus præparet, prout venæ excoquendæ ratio postulaverit.



LIBER TERTIUS

*De ratione Venarum excoquendarum
in fornacibus concameratis.*

CAPUT I.

De fornacibus concameratis.

CXXXIV.

Fornacis concameratæ descriptio.



Fig. 63.

Exhibens ichnographiam subtractionis.

Fig. 64.

Exhibens orthographum subtractionis.

Fornaces concameratas ad venarum excoctionem ii præsertim usurpant, quibus ob carbonum inopiam vel ligna, vel lithanthracem urere opus est. Cl. de Genfanne (*) plures ejusmodi fornaces protulit diversis rei metallicæ usibus accommodatas; ex quibus eam hoc loco describemus, in qua venæ facile liquefcentes excoqui quàm commodissime possunt. Sic autem extruitur. Ad domicilii parietem *Tb'* fossa rectangula agatur *PDCb* alta pedes VII., si in solo firmo ædificabitur. Pars *DAEF* tribuatur foculo, in quo ignis ex lithanthrace vel lignis fit, spatium *FEBC* foco, alterum *rabb* camino. In spatio *APar* sit fossa, ex qua aer per portam

(*) In opere superius laudato.

knlg in ignem inspiret, qui in foculo super cratem *hlni* ardet. In area hoc modo distributa erigantur parietes ad solum usque officinæ *GI*, ita ut sub foculo spiramentum aëris *R* existat, sub foco autem humoris spiraculum *La*, quod in area (*fig. 63.*) literis *omyt* signatum est. Ad caminum *fZ* sit porta *S*, vel *rf*, per quam ejus gula, cum opus est, purgatur; illaque occlusa sit, cum fornax ardet.

CXXXV.

Cum parietes solum officinæ exæquaverint, septem bacilla ferrea *et* crassa lineas VI., lata XV., quorum capita perforata sint, hoc modo disponantur. Eorum duo, quæ ceteris longiora sunt, secundum longitudinem fornacis parietibus superponantur, reliqua secundum latitudinem; eorundem autem capita perforata ex muris extent. Quo facto lapides insternantur aræ in eam altitudinem, quæ superficiem bacillorum summam æquet. Aræ vero *FEBC* latitudo *BC* in quinque æquales partes *L, M, N, O, P* dividatur, quarum duæ *M, O* humoris receptacula sint, quæ per fenestras *i, k* ad aërem pateant, in reliquis muri attollantur. At in foramina *p, q* bacillorum duo alia bacilla itidem ferrea, & quadrata lata XV. lineas longa pedes circiter sex cum una tertia recte infigantur; deinde parietes ducantur in altitudinem pedum duorum a solo officinæ incipiendo: quod dum fit, spiracula concamerentur, vel lapidibus regantur; in pariete autem *DC* cavum *P* relinquatur, in quo catinus locandus est. Aliquot itidem foramina in parietibus foculi fiant, quibus bacilla ferrea duos pollices crassa immitti possint, quæ cratem ferream sustentent. Atque hæc foramina a solo officinæ absint: pollices XXI., sed si lithanthrax deterior sit, focus capaxior extruatur, & forami-

Vol. I.

Y

Fig. 65.

Exhibens
ichnographiam
fornacis hori-
zontaliter secū
in solo officinæ.

Fig. 66.

Exhibens
ichnographiam
fornacis hori-
zontaliter se-
cū paulin su-
pra officinæ
solum.

na fiant a solo remotiora, ut in loco editiori bacilla,
& crates constituantur, sicque ignis a foco minus distet.

CXXXVI.

Fig. 67.
Exhibens
orthographiam
capacitatis
fornacis.

Cum parietes ex solo extant duos pedes, interior fornacis capacitas extruatur: quem in finem, si longitudo AB sit pedum quatuordecim, & dimidii, focolo $DAEF$ tribuatur latitudo AE pedum quinque, & dimidii; ex reliquis autem novem pedibus septem dentur longitudini cameræ RS , sex pollices habeat murus ST , qui cameræ fulcrimentum est, totidemque latitudo VX gulæ, per quam fumus eluctatur; paries denique X crassus sit pedem. Tum vero ex media recta RS , quæ foci seu cameræ est longitudo, ducatur OY eidem rectæ RS perpendicularis, fiatque ZO longa pedes duos & dimidium, totidemque recta ZY . Duæis vero rectis gf , tu parallelis rectæ OY , alteri rectæ fR longitudo pollicum XVIII. tribuatur, totidemque longa fiat Rg ; ac rectis ts , Su dentur XL pollices. Demum per puncta f , O , t , u , Y , g ducatur ellipsis a rectis fg , tu truncata, cujus area erit foci capacitas. Sed in solo, cui focus insternendus est, canaliculus caveretur a puncto Z versus punctum Y ductus, ut nempe, si forte materia liquefacta focum penetret, per solum in catinum P effluat.

CXXXVII.

Fig. 69.
Exhibens
orthographiam
fornacis scilicet
secundum rectam RX .

Fig. 67.
Fig. 69.

Ad circuitum ellipsis in area descriptæ erigantur parietes usque ad rectam PnT , ita nimirum ut horum pars summa absit a solo officinæ pedes tres, totidemque pollices. Sed, dum isti extruuntur, canaliculus Y fiat latus pollicem, & dimidium, per quem materia liquefacta in proximum catinum P derivatur. In longitudine muri ad , qui pons appellatur, alter canaliculus triangularis d sit cava-

tus, humoris exhalandi causa. In pariete *AB* sit porta *O* alta pedem, lata pollices *XV.*, per quam operarius in fornacem ingredi possit, cum focus reficiendus est; ea autem lateribus obstructa sit, cum fornax ardet. Altera quoque fenestra *v* exterius dilatata fiat, interius vero in foramen quadratum tres pollices latum desinens, in quam, cum opus est, fistula immittitur venti inspirandi causa. Sit autem fistula ita inflexa, ut venti directio *CZ* centrum foci *Z* spectet. Quinque præterea portæ sint, quæ a solo officinæ pedes duos, & pollices novem absint. Harum prima *C* ad foculum pertinet, per quam alimenta ignis crati imponuntur, estque lata quinque pollices, totidemque alta, sed exterius se dilatat. Reliquæ *p, q, r, X* versus interiora fornacis altæ sint quinque pollices, latæ sex; istæ autem idcirco fiunt, ut excoctor per eas instrumenta in fornacem immittere, eaque in fornacis partem quamlibet versare commodè possit. Unicuique autem sit obturamentum ex argilla factum, vel ex ea mistura, de qua paullo infra * dicemus, illudque in medio perforatum sit, ut ferro in foramen immisso detrahi possit. Ne vero calor ex eo exhalet, cylindro ex argilla facto claudatur. Portarum ejusmodi imæ parti imponatur lamina ex ferro crudo confecta, ne, dum excoctor ferrea instrumenta ad ipsam applicat, & versat, attritu labefiscatur. In eadem altitudine, in qua est porta *X*, fiat gula *V*, [fig. 70.] cujus latitudo *ut* sit pedum duorum, quæ [fig. 68.] ductu obliquo *Vg* in caminum *FI* penetrare debet. Huic gulæ [fig. 69. & 70.] proximum sit foramen *S* latum pollices vigintiduo, quo capacitas fornacis cum camini gula oblique communicat.

Fig. 70.

Exhibens
ichnographiam
fornacis in alti-
tudine, in qua
ejus fenestræ
sitæ sunt.

Fig. 70.

72.

* §. 140.

Fig. 69.

70. 72.

- Fig. 69.* His præstitis, duos adhuc pollices attollantur parietes, tum camera extruatur hoc modo. Pars posterior PO ad quadrantem circuli exigatur, ita quidem ut punctum O absit a vertice pontis n pollices decem, sicque flamma a foculo RZ in cameram transibit per spatium nO altum pollices decem, quod idem latum est pedes tres. Ut vero reliqua camera extruatur, armamentum, seu contignatio fiat asseribus contexta, quorum superficies plana per rectam PnT *horizonti* parallelam transeat. Super asseres ex argilla, vel arena tenuissima eaque madida & bene tufa modulus fiat, cujus forma ei similis sit, quam camerae dare volumus, cui gypsum illinire juvabit, ut lævior evadat. Ita autem camera efformari debet, ut punctum summum O absit a pontis vertice n pollices decem, punctum autem oppositum T sit in recta PnT , atque in summa parte vix eum flexum habeat, qui necessarius est, ut firma consistat. Quo modo cochlearis fere figurâ erit. Ea autem vel ex lateribus coctis, vel ex lapidibus nativis & in igne persistentibus argilla coagmentatis extruatur, pedemque crassa fiat. Ad ejus anteriorem partem gula camini Vf rectâ ducatur in altitudinem pedum duorum, & dimidii, deinde inflectatur, ut in caminum ft , qui a latere est positus, pertineat; in media autem camera sit foramen G , per quod vena in fornacem demittitur. Camerâ perfectâ, parietes attollantur, ita ut eorum suprema pars a solo officinæ absit pedes quinque; & quæ cava inter cameram & parietes restant minutulis lapidibus cum argilla mixtis compleantur; pars vero camerae suprema exæquetur lateribus instratis, & argillâ coagmentatis.
- Fig. 68.* Exhibens orthographiam fornacis sectæ secundum ce-
lam NM. in
fig. 70. duâx.

Istis exæquatis superponantur bacilla ferrea iis plane similia, quæ in ima parte locata sunt, eodemque modo ac ista disponantur, atque infima supremis conjungantur aliis bacillis ferreis rectâ in illorum capita immixtis, quibus tota fornax constricta injuriis ignium minime cedat.

CXXXIX.

Interim dum fornacis parietes attolluntur, caminus rectus TFt erigitur in altitudinem F , in qua gula obliqua gF cum camino recto conjungitur, quo in loco foramen FO erit altum pollices sexdecim, latum quatuordecim; gula autem obliqua tegatur lateribus leviter inter se coagmentatis; ut facile detrahantur cum purganda est: quod sæpe fieri oportet. At caminus rectus altus sit quinquaginta pedes, ejusque gula sit quadrata, & lata pollices quindecim. Ima ejusdem camini pars lata sit quinque pedes, sed cum ad altitudinem duodecim pedum ducta fuerit, retractio fiat pedis unius; ad altitudinem vero pedum XXV. alia retractio quinque pollicum fieri poterit, ut impensæ ædificandi minuantur.

CXL.

At, camerâ extructâ, armamentum diruitur, ac detrahitur. Tum vero fiat mistura ex æquis partibus calcis vivæ in aëre extinctæ, pulveris laterum coctorum, arenæ, & scobis ferreæ, vel squammarum, quæ ex ferro, cum procuditur, excidunt, eaque cribrata ita madefiat, ut mediocriter tenax evadat. Ei denique adjungatur parum argillæ; atque mistura hæc illinatur intimæ superficiei cameræ, atque parietum; quæ quidem cum in vitrum versa fuerit, fornacem ab injuriis ignium maxime tuebitur. Post aliquot dies, cum illa per se siccata fuerit, crates in foculo collocetur, ut fornax igne pro-

Fig. 72.

Exhibens figuram
nographiam
fornacis.

Fig. 68.

fus siccetur. Constat autem crates ex bacillis ferreis quadratis novem vel decem lineas crassis, iisque ita dispositis, ut eorum anguli se invicem spectent, unumque ab altero absit sex vel novem lineas, si quidem lithanthrax, dum ardet, in massas crassiores non coalescat. Ignis vero ex fascibus virgultorum fit, qui ad tres dies perstat, & eoque augetur, quoad camera fornacis candescat. Tum vero permittitur ignis restingui; cumque fornax refrigerit, ex argilla eaque pura & bene tusa focus fiat. Pulvis enim carbonum cum ea non miscetur, quod mollior idcirco facta facile frangatur, cum materia in fornace posita rutris agitur. Alii tamen in magna Britannia ad venas plumbi focum parant ex arena maris mixta cum leucargilla: quæ mixtura perstat ad integrum annum. Ne vero materia metallica ad focum adhærescat, præcavere possumus pulvere carbonum in focum instrato. At focus concavus sit,

Fig. 71. & versus canaliculum *Ly*, per quem materia in catinum *P* derivatur, aliquantulum declivis; foci autem margines ad verticem usque pontis, & sub imam portarum partem pertingant. Ut vero canaliculus, quem diximus, sub focum existat, antequam is paretur, lignum coni truncati figurâ ita collocatur, ut illius vertex *L* pollice uno absit ab humiliori parte foci, basis vero in catinum *P* oblique spectet. Tum focus paratur, eoque absoluto, conus retrahitur. Catinus *P* ex solo officinæ extet duos pedes, sitque factus ex duabus argillæ partibus, & una pulveris ex carbonibus resoluti. Postremo circa foramen *G*, quod latum est pollices quinque totidemque longum, quatuor lapides *a* locantur, iisque imponuntur aliquot tigna *b*, quibus sustentatur infundibulum *N*, ex quo vena in fornacem demitti-

Fig. 71.
Exhibens orthographiam
fornacis secundum
secundum re-
dam O T du-
ram in 6. 70.

tur. Istud autem capiat octo circiter pedes cubicos venæ minutim contusæ, ejus apertura inferior *r* mobili asserculo, quasi operculo, clauditur, operculo itidem tegitur foramen *G*. Cum autem vena in fornacem demittenda est, operarius scala lignea adscendens eam in infundibulum immittit, tum utroque operculo detracto permittit venam in focum delabi: quo facto opercula in pristinum locum retrahit.

Fig. 70.

CXLI.

Atque ita se habet fornax concamerata, in qua venæ omnes, venis ferri exceptis, excoqui possunt: cujus etsi non una esse possit magnitudo, juvabit tamen eam ut summum longam facere pedes XV., latam VIII., altam V. In grandioribus enim vis ignium nimis imminuitur: sed neque VIII. pedibus breviores sint, nec minus quam quinque latæ. In his enim, quod exiguæ sint, parum venæ certo definitoque tempore excoquitur, atque iidem fere ac in majoribus sunt lithanthracis, aut lignorum sumptus faciendi. Ab hac non multum differt fornax illa, quam laudatus de Gensanne ad venas quoque ferri excoquendas accommodavit; magnam vero metallicis afferet utilitatem, qui venas ejusmodi in hac fornace excoquere tentaverit, optimamque ejus rei peragendæ methodum adinvenerit.

CLXII.

Perficuum est autem in fornacibus concameratis aliter, ac in vulgaribus ignem in venas agere. Cum enim in his secundis venæ per medias prunas trajiciantur, igne directo liquefiunt. At in concameratis, cum separatim alimenta ignis in foculo ardeant, separatim venæ in focum impositæ sint, istæ

Quæ differentia sit inter fornacem vulgarem, & concameratam.

non alium quam ignem reflexum concipiunt. Calor nimirum vel flamma ex lithanthrace, lignifve in foculo ardentibus erumpens per aperturam, quæ inter summam pontis partem, & cameram existit, fornacem subit, & partim objectu parietum & cameræ, in venam reflectitur, partim in parietes penetrat, eosque vehementer calefacit, ex quibus iterum erumpens in venam reflectitur. Eatenus autem alimenta ignis in foculo luculenter ardent, quatenus magna aeris copia per cratem assiduo sese insinuat, & per camini gulam exire potest. Irruit enim in fornacem, atque ex ea erumpit magno impetu. Nam statim atque per medias prunas transit, ejus pars magna ad istis absumitur, atque adeo rarior in fornacem pervenit, ubi ob caloris vim magis adhuc rarefcit: quocirca partim vi sua, partim ab igne, & aëre densiori circa foculum existente ætus cogitur per camini gulam una cum fumo eluctari. Quo modo perinde res se habet, ac si ventus ope folium in fornacem inspiraretur. Sed ut maximus, qui potest, calor in fornace coërceatur, id ex duobus præsertim pendet, nempe ex minima cameræ altitudine, atque ex maxima celeritate, qua aër foculum subiens per caminum eluctatur. Nam quo depressior camera est, calor in arctius spatium cogitur, atque adeo luculentior ille existit. Ita tamen depressa esse debet, ut operarius in fornacem ingredi possit foci reficiendi causa. Quam autem partem habeat aëris renovatio ad ignem excitandum animandumque alibi dixi. Hoc loco id unum adjungam, celerius aërem in fornace concamerata renovari, quo rarior ille est, qui in camino existit comparate ad eum, qui focum subit. Id enim cum fit, columna aëris ad foculum existens, magis premit, quàm illa, quæ in camino est.

Quæ præven-
da sunt, ut ma-
ximus qui po-
test calor in
fornace coër-
ceatur.

Iste autem aer rarior sit, quo altior caminus est. Major enim hujus altitudo efficit primo, ut aer in ipso diutius calidus, atque adeo rarior permaneat, deinde ut brevior sit columna aeris camino imminens, atque ita minus premat: Ipsa quoque area, quæ camini capacitati tribuitur, non minimum ad accelerandum aeris motum habet momentum. Nam si nimis ampla sit, multus calor per ipsam dissipatur, minusque calidus permanet aer ipsam subiens. Contra si nimis arcta fuerit, aer libere nequit per ipsam eludari, constantemque cursum tenere. Præstat autem hanc camini arcem paullo ampliorem facere. Facile enim ejus gula coardari potest, prout opus fuerit. Cognoscitur autem aerem non rectum tenere cursum, si fornax fumosa sit. Non possumus sane certa lege definire, quæ proportio inter has fornacis partes existere debeat, ut maximum calorem ipsa concipiat. Ea tamen, quæ attigimus, sufficientiis, qui rem considerare ac pertentare voluerint. Ad hæc magis coercetur ignis, quo minus ipse ad aerem liberum atque solutum patet. Quamobrem portæ fornacis, cum in ea venam liquefacere contendimus, clausæ omnino sint, earumque modo unam, modo alteram operarius tum solum aperiat, cum in venam ferrea instrumenta immittere, & versare ei opus sit. Postremo ignis augetur, si ventus ope follium in fornacem inspiretur. Iste enim ignem per hanc excurrentem accelerat, efficitque, ut aer celerius ex eadem evolet, novusque, & copiosior per foculum se insinuet, qui ignem in eo ardentem magis animat, celeriusque ex materia, qua alitur, erumpere cogit. Atque hæc causa est, cur hanc identidem agitare oporteat, ne cratis foramina obstruat, adituque aerem intercludat: id

Vol. I.

Z

quod tum maxime facere oportet, cum lithanthrax in massas coalescit, aut cum calorem augere contendimus. Tantus autem calor in hac fornace opus folium excitatur, ut plurima corpora brevi in vitrum vertat. At non æque in omnem fornacis partem ignis se diffundit. Nam quæ proxima ponti est, luculentius ardet, quod densior ibi ignis existat, minimus vero ardor prope caminum existit, quod & rarior ignis eo perveniat, & ad aerem, qui camino imminet, magis pateat.

CAPUT II.

*De Venarum usione, & excoctione
in fornacibus concameratis.*

CXLIII.

Quomodo vena in fornacem concameratam imponatur.

Magister venam in fornace concamerata excocturus hanc paulatim calefaciat, quoad mediocriter rubescat; deinde portas omnes aperiat, & alveum pulveris ex carbonibus resoluti foco insternat, quo præcavebit, ne vena ad focum adhærescat. Tum minister, operculis detractis, venam infundibulo impostam in focum delabi permittat. Sit vero tam minutim contusa, ut quælibet particula semine canapis major non sit. Cum enim in altitudinem aliquot pollicum foco insternatur, eam ignis facile non penetraret, nec cito liquefaceret, nisi eadem rutiis agigaretur; facilius autem agitur cum minutula est, celeriusque ignis eam liquefacit. Prout autem vena in focum delabitur, eam magister æque explicet in altitudinem trium ut summum pollicum, si vena facile liquecat, minus vero quam trium, si liquatu difficilis sit. Nam quo mi-

nus alta est, eo magis ipsam ignis corripit, & facilius liquefacit. Sed versus pontem, quod ibi luculentius ardeat ignis, aliquantulum altior esse poterit. Ex capacitate autem foci facile erit conficere, quota venæ portio unâ operâ excoqui possit. Sic focus, cujus area sit pedum quadratorum triginta, cujusmodi est ille, qui ad fornacem paullo supra descriptam pertinet, capiet venæ pedes cubicos septem, & dimidium, si hæc in altitudinem pollicum trium ei instrata sit. Porro pes cubicus venæ plumbi minutim confusæ, & siccæ, cujus centumpondium in se continet plumbi libras XL. ad LX., est pondo librarum CLX., vel CLXXX.; pes autem cubicus venæ cupri pyriticæ similiter confusæ, & siccæ, cujus centumpondio insunt cupri libræ XV. ad XXX. pendet libras CL. vel CLX. Quamobrem in ejusmodi fornace XII. ad XIV. centumpondia venæ plumbi simul excoqui poterunt; venæ autem cupri XI. ad XII. centumpondia.

Quota venæ portio in fornacem imponi possit.

CXLIV.

Jam vero si vena, antequam excoquatur, urenda sit, magister id faciat leni igne, quo ipsa obscure rubescat; eumque tandem augeat, prout venarum natura postulaverit. Quo in negotio rationem habeat eorum præsertim, quæ §. XL. dixi. Sæpe autem ipsam rutro, aut rastro agitet, ut æqualiter cremetur; identidem quoque aliquantulum venæ palâ ferreâ extrahat, ut videat, utrum satis usta sit. At Magister, venam agiturus, portam, quæ e regione foculi est, aperiat. Secus enim ventus, qui per ipsum spirat, pulverem subtiliorem subcaminum raperet, atque per aëra dispergeret: quod detrimentum averteret, si portam, quam diximus, aperiat. Aer enim densior, qui huic imminet, obstitens vento ex foculo advenienti, pul-

Quo modo vena in fornace concematur.

verem eundem coërcet. Ex eadem vero porta commodè dimovebit venam, quæ sub aliis portis est, ad quam secus pertingere rutris non posset. Dum autem laborem venæ agitandæ peragit, si fornax tenebrosa sit, lignum incensum in ejus focum conjiciat, cujus flamma ipsam luce illustret.

CXLV.

Qua ratione
venæ præser-
tim plumbi in
eadem fornace
excoquantur.

Cum venam nec sulphur nec arsenicum olere animadverterit, quod venis plumbi post quatuor horarum spatio accidere solet, fornacis portas claudat, eisque lutum illinat, tum eousque ignem augeat, ut plane lique scat; ac, si fornax quidem bene ardeat, & vena plumbi, nec liquatu difficilis fuerit, hæc intra duas horas lique scet. Utrum recte ardeat fornax, conjiciet ex rumore, quem aëris foculum subeuntis impetus intus in ea excitat. An vero liquefacta vena sit, recognoscet introspeciendo per fo-

- * §. 117. ramen, quod in portarum obturamento est *. Ut primum venam liquefactam esse animadverterit, ipsam ex unaquaque parte rutro agitet, ut massas ad focum adhærentes cum materia liquata commisceat, atque ignis totam æque calefaciat. Sed dum portarum unam hunc in finem aperit, ceteræ clausæ sint: quæ cautio adhibenda est, quoties in materiam liquefactam instrumenta immittere necesse sit, ne scilicet fornax refrigescat. Ut vero metallum ex vena reduci, ac præcipitari possit, additamenta adjiciat opportuna, cujusmodi sunt lapis calcarius, calx viva *, pulvis ex carbonibus resolutus. Additamenta sint minutim confusa, vel etiam in farinam molita, eorumque non plus adjiciatur, quam necesse sit. Exempli causa, cum de venis plumbi agitur, cuilibet earum centumpondio satis erit addere misturam ex libris XVII. calcis vivæ, & duabus pul-

Quibus addita-
mentiis metal-
lum in vena li-
quefacta latens
reducatur.

veris carbonum factam, quam quidem batillo paulatim venæ inspergat. Nam, si totam simul in focum injiceret, materia refrigesceret, nimiumque tenax evaderet. Rutro autem ferreo omnia simul bene commisceat. Tum vero materiam inflari, & aliquantulum tenacem fieri conspiciet, pauloque post metalli guttulæ in ejus superficie apparebunt, quæ, cum vena optima est, cito fundum petent. Cum hæc ex inspicientis oculis se subdlexerint, aliam additamenti portionem in focum injiciat, atque eundem, quem diximus, laborem iteret, quoad materia, etsi batillis compressa, nullum metallum exsudaverit. Id cum animadverterit, recrementa, quæ tunc quidem tenaciora sunt facta, ad parietes fornacis rutro adducat, & reducat, ut eo motu metallum, quod forte ad ipsas adhæserit, dimittant. Quo facto, materiam metallicam, quæ in medio foco subsiderit, ex fornace emittat: quem in finem contum cuspidatum caute, ne focum labefactet, in canaliculum ad id paratum adigat, atque os fornacis aperiat, ex quo in catinum prius calefactum metallum effluet. Quoniam vero cum isto aliqua recrementorum pars in catinum effluit, hæc, prout duruerint, operarius detrahat, atque, si opus sit, pulverem carbonum metallo inspergat, & cum eo commisceat, ut quod impurum in eo remansit secernatur; metallum denique ita purgatum in catillos effundat, atque ad opportunos usus reservet. Interim dum ab uno hæc peraguntur, alter, statim atque metallum e fornace defluerit, os ejus claudat misturâ ex argilla, & pulvere carbonum factâ, quam in pilæ figuram formatam bacilli capiti imponens ad focum usque deferet. Recrementa itidem ex fornace extrahat, & pulverem carbonum foco

Quo modo
emittendum est
metallum re-
ductum.

inspergat, ut iterum alia venæ portio in ipsam injici, & excoqui possit. Perstat autem excoctionis opus sex diebus, toridemque noctibus. Si enim diutius sine intermissione protraheretur, ignis adeo penetraret fornacis parietes, ut eos labefacteret, tantusque ardor ex iis erumperet, ut venæ leni igne cremari minime possent.

CXLVI.

Quibus ex causis
sit materię
metallica in
fornace concamerata
liquefacta forma
metallica redeat.

Atque hæc generatim valent, quæcumque demum venæ excoquendæ sint. Ex quibus patet, in fornacibus concameratis aliter ac in vulgaribus metallum ex venis reduci. In vulgaribus enim metallum eatenus purum fit, quatenus materia reducens ex carbonibus erumpens sese in materiam metallicam insinuat, nullusque fere aer ad ipsam pertingit. At in concameratis, etsi flamma per ipsas excurrat, exigua tamen phlogisti quantitas in venam penetrat, tum quod ejus non multum flamma supeditet, tum quod una massæ liquefactæ superficiei eidem exposita sit. Quamobrem metallum reduci nequit, nisi venæ adjiciatur materia, cui hæc reducendi vis insit, cujusmodi est pulvis ex carbonibus resolutus; atque ea quidem cum vena liquefacta probe miscenda est, ut hanc, quam maxime potest, pervadat. Verum, quoniam agitatione tantummodo hæc commixtio fit, nequit sane materia reducens venam ita penetrare, ut omni metallo in ea latenti nativa redeat. Duæ præterea existunt causæ, ob quas in hac fornace manca sit metalli reductio, nimia scilicet tenacitas, quam paullatim additamenta recrementis inducunt, & magna aeris copia, quæ per tratem foculi fornacem subit, qui, etsi multum rarefiat, & superficiem

dumtaxat venæ liquefactæ attingat, aliqua tamen ex parte metalli reductioni obstitit, Quibus ex causis metalli reductio adeo manca est, ut ex tribus partibus plumbi in vena latentis non plus quam duæ reduci soleant; atque adeo scorias recoquere oporteat in fornace vulgari, ut, quod metallum in ipsis remansit, eliciatur. Necesse tamen plerumque non erit ad ipsas quidpiam additamenti loco adjicere, tum quia materia hæc, quod in vitrum jam conversa sit, facile per se liquecat, tum quia tam parum metalli in ipsa inest, ut istud satis eadem materia tueri ab igne possit.

Cur metalli reductio manca sit in fornace concamerata.

Cur, & quomodo scoria ex fornace concamerata educta recoqui in vulgari debeat.

CXLVII.

Exposui generatim venarum in fornace concamerata excoquendarum rationem; nunc sigillatim dicam de quorundam metallorum venis, quomodo ex ipsis metalla conficienda sint, orsus a plumbo. Ejus calces sive rubræ, sive albæ, sive virides fuerint, ustione prætermissa, mox excoquantur*; sed reliquæ venæ prius crementur, ac deinceps, si ejus naturæ sint, ut metallum facile dimittant, eo modo, quo diximus, excoqui poterunt. Verum, si cum sulphure vel arsenico ita sint commixtæ, ut ex ipsis primo excoctis parum vel nihil metalli confici possit, eas diutius urere oportebit; cumque liquefactæ fuerint, tantum materiæ reducentis eis adjiciatur, quantum sustinere possunt, quin durescant. Ac si quidem hoc modo metallum dimittant, id, quod volumus, assequuti erimus. Secus metallum ex ipsis aliquo additamento elicere contendemus, vel ea ratione ipsas tractabimus, quam de Genfanne præscripsit. Eæ nimirum urantur quoadusque nec sulphur, nec arsenicum oleant, tum ignis ita augeatur, ut in massam aquarum instar fluentem lique-

* §. 27.
Quomodo in fornace concamerata venæ plumbi liquari faciles excoquantur.

Quo modo excoquantur venæ plumbi, quæ metallum difficile dimittunt.

cant: quod cito ipsis accidit, cum venæ ejusmodi liquatu faciles sint. Massæ huic parumper calcis vivæ superinjiciatur, atque omnia simul bene misceantur; cumque fluida, ut ante, facta fuerit, in solum officinæ, quod prius verrere oportet, derivetur. Hæc, prout refrixerit, sua sponte in frusta frangitur, quæ malleis adhuc minutiora fiant, ut in fornace vulgari recoquantur, in qua metallum certe dimittent. Est autem materia hæc quasi media inter pyritidem, & recrementa.

CXLVIII.

Quomodo ex-
dem excoquan-
tur, cum nimis
calidæ sunt.

Quomodo ex-
coquantur,
cum liquatu
difficiles sunt.

Quod si præterea venæ ejusmodi, ut Metallici loquuntur, calidæ forent, periculum esset, ne, si in fluidam massam redigerentur, magnam metalli partem ignis combureret, atque consumeret. Quocirca istas leni igne cremato, quem paulatim augebis, quoad in tenacem massam abierint; tum vero ipsam rutro e fornace eximito, eademque, cum refrixerit, in frustula frangito, ex quibus in fornace vulgari recoctis metallum sine dubio conflabis. Postremo si venæ liquatu tam difficiles sint, ut eas flammâ nequeat cito liquefacere, ventum in fornacem inspirare necesse erit. Iste enim ignem accelerans vim adeo auget, ut plurima corpora brevi in vitrum vertat. Id autem facere opus est, eo quod diuturnior ignis multum metalli, ac lignorum, vel lithanthracis absumat.

CXLIX.

Quota venæ
portio dato
tempore exco-
quatur cum
facile liquefit.

Porro, si venæ liquatu difficiles non sint, earum XII. vel XIV. centumpondia cremantur, atque excoquantur X. vel XII. horarum spatio, quo tempore X. ad XII. centumpondia lithanthracis, duo centumpondia calcis vivæ, & XX. libræ pulveris carbonum consumuntur.

CL.

At eum venæ plumbi argentum in se continent, metallum, quod ex ipsis elicitur, in catillos effundatur, quorum forma ei fornaci accommodata sit, in qua argentum a plumbo seceretur, ne scilicet illud iterum liquefacere opus sit, ut hæc illi forma tribuatur. In his autem venis id singulare accidit, ut totum fere argentum, quod in ipsis inerat, cum plumbo, quod primo elicitur, jungatur, ita quidem ut ex plumbo, quod e recrementis recoctis conflatur, vix umquam e re sit argentum secernere. Cujus rei hæc causa est. Argentum in vena latens aut formam metallicam naturâ obtinet, aut hæc ei quam citissime redit. Quocirca, cum argentum magis sit affine cum plumbo formâ metallicâ prædito, quam cum sulphurato, aut cum recrementis, cum illo conjungitur, & una cum eo a reliqua materia secedit.

Quid præstare oportet, cum vena plumbi argentum in se continet.

CII.

Ad venas cupri quod spectat, distinguendæ sunt illæ, ex quibus primo excoctis cuprum nigrum mox conflare potest, ab iis, quæ, cum primo excoquuntur, nonnisi pyritidem suppeditant. Quæ in primo genere sunt, ita fere tractantur, ut venæ plumbi facile liquefcentes, nisi quòd illæ diuturniorem ignem postulant: atque hoc modo cuprum nigrum mox conficitur. Ejusmodi sunt venæ cupri vitreæ, piceæ, & fuliginosæ, itemque malachites, viride, ac cæruleum montanum. At quæ in secundo genere sunt, veluti pyrites cupreus, vena cupri nigra, aliæque ejusmodi, primum excoquendæ sunt, ut pyritides ex iis confletur; iste autem in eadem fornace concamerata uri, & excoqui deinde poterit, ut cuprum nigrum ex eo conficiatur: quæ de re alio loco dicam.

Qua ratione excoquantur venæ cupri.

CLII.

* §. 146.

& 147.

Utrum præstet
venas in fornace
concamerata
excoquere
an in vulgari.

Ad venas quoque stanni utilis erit fornax concamerata; sed venis argenti egenis parum est accommodata: id quod ex iis, quæ suis locis dicemus, perspicuum fiet. Quoniam vero, ut diximus, tum recrementum *, tum materiam, quæ inter pyritidem, & recrementa media est, recoquere in fornace vulgari oportet, ut metallum, quod in ipsis remansit, eliciatur, dubitabit fortasse quispiam, utrum vulgari venarum excoquendarum rationi anteferenda sit ea, quam nuper explicavimus. Verum dubitationem hanc ex Metallicorum animis eximet sumptuum supputatio, qui in alterutra excoctionis ratione faciendi sunt (*). Hunc in finem assumamus venam plumbi, ex qua, cum primo excoquitur, nonnisi pyritides conflare possit, sitque ea liquatu non multum difficilis. Hujus XXIV. centumpondia una cum additamentorum XLVIII. centumpondiis in fornace media excoqui solent spatio horarum XXXII., consumptis XXIV. mensuris carbonum, quæ ex decem mensuris lignorum, quarum quælibet æquat CXII. pedes cubicos, conficiuntur. Ex iis autem eliciuntur XII. circiter pyritidis centumpondia, quæ quater saltem spatio horarum XXIV. urere oportet; in eoque opere comburuntur duæ lignorum mensuræ atque horæ saltem sex impendi debent in convertendo pyritide, eoque ab uno foco in alium transferendo. Ex hac pyritidis quantitate una cum duplo fere additamentorum pondere recocta metallum conficitur XVI. horarum spatio, consumptis XII. mensuris carbonum, quæ V. lignorum mensuris

(*) De Genfanne cap. 3. vol. I.

æquivalent. Itaque vulgaris venæ hujus excoctio peragitur spatio horarum XLVIII., seu potius LIV., additis nempe VI. illis horis, quæ in transferendo pyritide infumuntur, consumptis XVII. lignorum mensuris.

CLIII.

At in fornace concamerata eadem venæ quantitas primo excoquitur horis XXIV. consumptis XXIV. centumpondiis lithanthracis, vel IV. lignorum mensuris, si lithanthracis loco vel ligna, vel carbones vulgares adhibeantur. Fingamus autem pondus recrementorum, quæ ex ejusmodi excoctione restant, minus non esse centumpondiis XXIV.: quod tamen secus plerumque se habet. Plus enim de venæ pondere detrahitur ob metalli partem ex ea constatum, & vapores, qui ex eadem exhalant, quam ad eam accedat ob calcis vivæ, & pulveris carbonum additamenta. Itaque XXIV. recrementorum centumpondia recoquenda restant in fornace media; cumque nullo additamento indigeant, hæc quantitate eadem carbonum recoqui poterunt, qua recoquuntur VIII. centumpondia pyritidis vulgaris mixta cum XVI. additamentorum centumpondiis. Hinc, servata ea proportione, quam initio assumpsimus, conficiemus ea recoqui posse horis $10. \frac{1}{4}$, consumptis VIII. mensuris carbonum, atque ita integrum excoctionis opus peragetur horis $34. \frac{3}{4}$, consumptis $7. \frac{1}{4}$ mensuris lignorum. Ex his autem facile quisque intelliget, hanc venarum excoquendarum rationem esse vulgari utiliore, eoque magis, quod omne fere metallum hoc mo-

do ex vena eliciatur; cum e contra ii, qui vulgari excoquendi ratione utuntur, rem optime sibi cessisse putent, cum ex quolibet centumpondio metalli in vena latentis decem, vel duodecim libræ in recrementis remanent.



LIBER QUARTUS

De purgatione, & secretione Metallorum.

CLIV.



Venarum excoctio eo spectat, ut metalla pura ex ipsis conflentur, quorum nempe singula neque cum materia minime metallica, neque cum alterius generis metallo mixta sint. At non omnes venæ primum excoctæ metallum ejusmodi præbent. Aliquæ enim pyritidem suppeditant, quem recoquere oportet; aliquæ metallum impurum, quod purgari debet; aliquæ demum mixturam plurimum metallorum, quæ a se invicem secernenda sunt. Ex quo intelligitur ad venarum excoctionem pertinere tum pyritidis recoctionem, tum purgationem secretionemque metallorum. Ac recoctio quidem quoniam iisdem nititur principiis, quibus prima excoctio, nihil est, quod adjiciam ad ea, quæ hætenus hac de re explicavi. Purgatio autem & secretio metallorum multum variat pro diversa eorum natura, quæ quidem quibus artificiiis peragantur alibi exponam. Hoc loco ea tantum explicanda mihi sunt, quæ ad eas operas optime peragendas generatim conducunt,

Quo spectet
venarum ex-
coctio.

Quo spectet
venarum ex-
coctio.

CAPUT I.

*De iis, quæ generatim ad purgationem
& secretionem Metallorum faciunt.*

CLV.

Qua in re dif-
ferat secretio a
purgatione.

Metallum impurum facit vel terra, vel bitumen, vel alterius generis metallum. Cum a metallo vel terram vel bitumen, vel etiam alterius generis metallum ita separamus, ut hoc vel pleraque ejus pars pereat, tunc illud proprie purgari dicendum est. Cum vero metalla a metallis ita secernuntur, ut nullum eorum pereat, tunc id opus secretio est appellanda. Duplex autem iis secernendis nobis patet via, *sicca* nempe, ut loquuntur Chymistæ, & *humida*, quarum prima igne, altera liquidis certa corpora solventibus peragitur. At nos primam secretionem siccam dicemus, alteram udam.

Item secretio
uda a sicca.

CLVI.

Cur ad secretionem metallorum solutio necessaria sit.

Utraque suscipitur in mistura duorum vel plurium metallorum, eaque perfici nequit, nisi fluidum aliquod unum saltem corporum in mistura latentium solvat. Cum enim hæc existat ex conjunctione minimarum particularum plurium corporum, istæ a se invicem secerni nequeunt, nisi eæ, quæ unius sunt generis, locum mutant, atque ex massa earum, quæ sunt alterius generis, secedant: quod ut fiat, necesse est, ut fluidum aliquod in misturam penetret, & unum saltem corpus in ea existens solvat, hujusque partes minimas ad se rapiat. Ac in udis quidem secretionibus fluidum illud, quod ad misturam consulto adjicitur, unius saltem corporis solvendi

vim habet; in siccis vero ignis pro solvente est. Hic enim, cum materiam aliquam fundit, in ipsam penetrat, eandemque plane solvit. Animadvertere autem oportet iis corporibus, quorum unum ab altero solvi dicitur, mutuam proprie esse solvendi vim. Sic enim cum aqua valens in æs infunditur, non modo illa istud solvit, verum etiam ab isto ipsa quoque solvitur. Plerumque tamen ex duobus corporibus se mutuo solventibus illud, quod fluidum est, vel si ambo fluida sint, illud, cui majus volumen est, pro solvente haberi solet.

CLVII.

Ex his patet aliquo semper additamento secretionem metallorum fieri. Verum cum ignis sua sponte facile secedat ex corporibus, quæ solvit aut fundit, ideo illum inter additamenta non numeramus. Porro ea secretio fieri potest vel simplici solutione unius saltem metalli in mistura latentis, vel solutione simul & præcipitatione unius, vel plurium metallorum, quæ in ea insunt. Cum massa ex certa cupri, & plumbi mole conflata leni igni subjicitur, plumbum liquefcit, cuprum vero nequaquam, atque illud ex isto exsudans secernitur. Id autem fit simplici solutione plumbi, quam ignis peragit. Simili modo si in certam misturam auri & argenti aqua valens infundatur, hæc solvet argentum, quod in ea hærebit suspensum, aurum nequaquam; atque ita simplici solutione metallum unum ab altero erit secretum. At si mistura cupri & plumbi in catino liquefiat, deinde permittatur paulatim refrigescere, cuprum, quod refrigescendo citius durefcet, quam plumbum, atque isto levius fit, summa petet, plumbum ima: quo modo unum metallum ab altero secerni-

Secretio fieri potest vel simplici solutione, vel præcipitatione.

tur præcipitatione unius metalli, idest plumbi, quod una cum cupro erat solutum.

CLVIII.

Quæ necessaria
sint ad præci-
pitationem pera-
gendam.

Itaque secretio, quæ præcipitatione fit, postulat primo, ut mistura solvatur; quo modo nova mistura existit ex corporibus antea commixtis, & ex fluido eam solvente: deinde ut ex nova hac mistura unum metallum descendendo secedat, seu ut præcipitetur. Præcipitatur autem additamento uno, vel pluribus, aut sine ullo. Sic plumbum ab ære sua sponte præcipitari paullo ante dixi. Verum, si loco plumbi argentum in ære insit, ex mistura ab igne soluta metallum pretiosum non præcipitabitur, nisi apta materia ad ipsam adjiciatur, cujusmodi est plumbum, quod argentum ex ære combibit, & una cum eo residet.

CLIX.

Quæ cause
præcipitatio-
nem impe-
diant.

Quoniam præcipitatio nihil est aliud, quam corporis in fluido soluti descensus, ea locum habere nequit, nisi corpus præcipitandum gravius sit fluido, in quo innatat, nihilque præterea prævalentem ejus gravitatem impediat. Gravitationem autem cum dico, eam intelligi volo, quam Physici *specificam* dicunt. Nam, quam ipsi *absolutam* appellant, pondus ego vocabo. Porro, cum corpus in fluido solutum est, ejus descensui obstat primo densitas fluidi, deinde vis, qua solventis particulæ tum inter se, tum cum partibus soluti, seu præcipitandi cohærent. Eo autem major est vis, qua solutum cum solvente conjungitur, quo illud tenuius divisum est, & quo major est ejusdem affinitas cum solvente. Quinimo hæc plane præcipua causa est, cur corpus, etsi gravius sit fluido, in quo solutum est, attamen in eodem hæreat suspensum. Quamo-

brem, cum præcipitare volumus metallum, vel rarius faciemus fluidum, in quo solutum est, vel dabimus operam, ut solutum in massulas grandiusculas coëat, quarum pondus possit cetera impedimenta descensus superare, vel tollemus, aut saltem minuemus affinitatem, seu attractionem, quæ soluto cum solvente est.

CLX.

Rarius fiet fluidum, si congelaverit, si cum eo misceatur aliud fluidum minus densum, cujus tamen magna pars inter particulas solventis nequeat se recipere, si denique certæ quædam mutationes in ipsum inducantur. Ac congelatio quidem quid sit in liquidis patet. Dura autem corpora, quæ ignis liquida, vel potius fluida facit, perinde fere se habent, cum refrigerando iterum durefcunt, ac liquida, cum congelant. Certe enim metallum quodlibet, quod ignis fluidum fecerit, gravius est, seu densius, quàm cum est durum. Ex majori autem raritate fluidi solventis fit primo, ut corpus solutum præ eo gravius evadat; secundo, ut ejus massa minus resistat præcipitandi corporis descensui; tertio, ut magis distent particule solventis a partibus soluti, atque adeo minus illæ ab istis attrahantur; ex quo etiam fit, ut soluti partes magis se invicem trahere possint, atque in massulas grandiusculas confluere. His ex causis plura corpora præcipitantur ex fluido ipsa solvente, cum istud congelat (*): quod, ut fiat, necesse est, ut cor-

Quibus modis rarius fiat fluidum, in quo corpus solutum est.

Cur congelatione corpora præcipitentur.

Vol. I.

Bb

(*) Scopoli pag. 146. Princ. miner.: *Præcipitatio spontanea duplex est, nempe physica, & chemica. Illa*

pus solum nequeat congelare eo frigore, quo solvens congelat. Secus enim eodem tempore tota mistura duresceret, atque adeo nulla secretio existeret. Sic itaque salia congelante fluido, in quo soluta sunt, præcipitantur: quòd nempe etsi congelando durescat, non tamen condensetur, sed rarefcat; plumbum item una cum cupro solum, refrigerante mistura, ex isto secernitur: nam æs refrigerando citius durescit, seu, si mavis, congelat quàm plumbum, atque isto levius est; argentum denique secedit ex plumbo in lithargyrum mutato: etsi enim certa moles plumbi, cum in lithargyrum mutatur, pondere crescat, quoniam tamen ejus volumen multo magis augetur, is rarior ac levior plumbo est: quod idcirco maxime fit, quia aërem, idest fluidum rarius sorbet. Si autem causam quæras, cur fluidum congelando durescat quidem, verum non condensetur, imo rarefcat, dicam ob congelationem partes minimas corporis, quæ ejusdem generis sunt, in novas figuras coire crystallorum similes, hæque crystallos ex particulis constare validius inter se cohærentibus, ob quas durius corpus existit: verum crystallos quaslibet minimas magis a se invicem distare ita quidem, ut summa vacuorum, quæ in massa congelata restat,

separat soluta corpora absque ulla alteratione fluidi, cui immersa fuerunt; hæc vero id operatur diminuto volumine, aut consumpta parte solventis humoris. Primo modo secedunt particule metallicæ a mineris liquatis, alio autem separantur salia tam terrea, quam metallica liquore, cui innatant, vel a frigore condensato, vel parte ejus aliqua ab igne dissipata.

major sit ea, quæ in fluida foret: ex quo fit, ut rarior massa existat. At, cum dicimus corpora, congelante fluido ea solvente, præcipitari, id ita intelligendum non est, ut præcipitatio fiat, postquam congelatione massa duruerit. Id enim contingit, cum in fluido ob imminentem congelationem incipiunt particulæ solventis ad se invicem accedere, ut in crystallos abeant. Tunc enim, istis recedentibus a soluti corporis partibus, hæ se invicem attrahunt, & proprio pondere resident.

CLXI.

At particulæ soluti corporis in massulas grandiusculas abeunt duplici ex causa, quod nempe eæ arctius jungantur inter se, vel quod conjungantur cum alia materia. Verum, ut hæc conjunctio cum altero corpore, adjuvet soluti corporis descensum, necesse est illud tam grave esse, ut compositio, quæ ex utriusque conjunctione existit, gravior fluido solvente remaneat. Facilius autem soluti partes jungentur inter se, si, ut dixi, rarius fiat fluidum solvens, vel si minuatur aut tollatur affinitas, vel attractio, qua particulæ solutæ cum solvente cohererent.

Cur solutum in massulas grandiusculas abeat.

CLXII.

Hoc autem postremum assequemur adjectâ ad solutionem materiâ, quæ vel cum solvente conjungatur, & efficiat compositionem, cui vis non sit solvendi corpus antea solutum, vel quæ cum soluto ita jungatur, ut existat compositio, quæ a priori solvente solubilis non sit. Sic si in aquam valentem, in qua argentum solutum sit, æs immittamus, istud solvetur, & argentum præcipitabitur, quod nempe ex aqua valente & ære existat compositio, quæ argenti solvendi vim non habet. At si loco æris

Quomodo mixta affinitas soluti cum solvente.

in eam solutionem infundamus acidum salis marini, istud conjungitur cum argento & præcipitatur; quòd scilicet argentum cum acido marini salis conjunctum non sit solubile in aqua valente.

CLXIII.

Quæ sit vulgaris regula corporum præcipitandorum.

Cur ea manca sit.

Regulæ præcipitandorum corporum hætenus a Chymistis traditæ ad hoc principium revocantur, ut nempe ad solutionem adjiciatur aliquid, quod magis affine sit vel cum corpore soluto, vel cum solvente. Nam si primum fiat, tunc, inquiunt, jungitur solutum cum additamento, & descendendo secernitur a solvente. Sin alterum, tunc fit nova solutio, ob quam additamentum cum solvente conjungitur, & solutum præcipitatur (*). At causas, ob quas ex conjunctione additamenti cum solvente, vel cum soluto, hujus præcipitatio consequatur, vel nullo modo, vel non veras dixerunt. Nam qui arbitrantur ex conjunctione additamenti cum soluto hujus gravitatem *specificam* augeri non advertunt, id fieri non posse, nisi cum additamentum gravius corpore soluto lest, aut cum ex ea conjunctione ita in eo mutatur partium situs, ut massa densior fiat: quæ duo in materia præcipitata non accidunt. Nam exempli causa acidum salis marini, quod cum argento conjungitur, non est sane isto gravius; atque argentum una cum hoc sale præcipitatum majus volumen præfert, quam cum eidem forma nativa insidet.

(*) Scopoli p. 146. §. 200. Princ. miner.: *Præcipitatio coacta fit iterum duplici modo: vel enim præcipitans cum soluto conjungitur, vel cum solvente. In primo casu augetur gravitas specifica solutæ substantiæ, in secundo autem fit nova solutio.*

CLXIV.

Ad hæc, qui sine ullo discrimine præcipiunt, ut, præcipitationis peragendæ causâ, ad solutionem adjiciatur materia, quæ magis affinis sit vel cum soluto, vel cum solvente, rem præcipiunt duplici ex capite ancipitem. Primo enim non distinguunt affinitatem, quam *via humida* corpora præferunt, ab ea, quam produnt in sicca: qua tamen in re magna sæpe est differentia (*). Deinde assumunt eandem esse unius corporis cum alio affinitatem, sive istud solutum jam sit, sive non: quod sæpe secus se habet. Nam argentum, cui nativa forma sit, nullam cum liquore ex acido salis marini parato præferat affinitatem; at, postquam solutum in aqua valente est, magis affine se prodit cum acido eodem, quam cum ista; id quod in plumbo quoque aliisque corporibus accidit.

CLXV.

Non ego tam valde me amo, ut principium proxime a me positum sine exceptione accipi velim, aut eo præcipitationem corporum prorsus declarari putem. Eo tamen rem hanc paullo clarius explicari, atque ad nova tentamenta faciliorem viam aperiri constabit, si illud paullo diligentius declaravero. Dixi itaque corpus solutum præcipitari ex fluido, in quo innatat, si ad solutionem adjiciatur materia, quæ vel cum soluto conjuncta compositionem efficiat, quæ solubilis non sit in fluido, in quo inest, vel cum priori solvente conjuncta compositionem efficiat, in qua soluta materia amplius solubilis non sit. Cujus rei ratio est

(*) V. Baumé *Chymie* pag. 42. vol. I.

sane perspicua. Nam, si mutua solvendi vis in corporibus, quæ mixta sunt, cesset, illud quod gravius est, residere, seu præcipitari debet, si quidem cetera impedimenta descensus sublata sint. Sic cum in aquam valentem, in qua æs solutum sit, ferrum imponimus, solvitur ferrum, & æs præcipitatur. Quid ita? Quia nempe aqua valens ferro saturata æris solvendi vim non habet. Erit fortasse qui objiciat, æs, addito ferro, mox præcipitari ex aqua valente, etsi hæc nondum saturata ferro sit. Verum neque omne æs mox præcipitatur, sed paulatim. Primum enim ferro saturatur pauculum illud fluidum, quod ferro in ipsum immisso proximum est, atque adeo æs dimittit; tum ejusdem fluidi pars in reliquam massam se diffundit, ejusque locum subit alia solventis fluidi portio, in qua idipsum contingit, quod in primo; & sic deinceps, donec omne fluidum ferro ferme saturatum sit, & omne fere æs dimiserit. Atque id est in causa, cur eo tardior præcipitatio æris fiat, quo plus ferri in solutionem se recepit; contra æs citius resideat, si ferri squammæ aut globuli in solutionem immergantur, aut si lamina ferrea per ipsam celeriter circumducatur.

CLXVI.

Quæret hoc loco quispiam quibus additamentis ea proprietas sit, ob quam, cum conjuncta fuerint vel cum soluto vel cum solvente, compositiones existant, quæ in alterutro solubiles non sint. Equidem arbitror eam proprietatem iis additamentis inesse, quæ vel cum soluto vel cum solvente affinitatem præferunt majorem eâ, qua solutum cum solvente conjungitur: quod cum dico ita intelligi volo, ut affinitas æstimanda sit ex eo statu,

quem habent corpora, cum additamenta ad ipsa adjiciuntur. Hinc autem præcipitatio, quæ additamenti fit, hoc modo explicabitur. Ad solutionem adjiciatur materia, quæ magis sit affinis vel cum soluto, vel cum solvente. Si fuerit cum solvente magis affinis, cum isto conjungetur, & fiet compositio, cui vis non erit solvendi corpus antea solutum; sin autem, cum soluto conjungetur, atque ex ea conjunctione compositio existeret in priori solvente non solubilis. Quare, si corpus præcipitandum gravius fuerit fluido, in quo innatat, quemadmodum esse solet, suo pondere descendens præcipitabitur. Si itaque compertum nobis esset, quid sit illud, ex quo major vel minor inter quædam corpora affinitas existit, præcipitationis leges ex causis physicis satis jam notis explicarentur.

CLXVII.

Utut vero res ejusmodi se habeat, certe si quis principio superius posito uti voluerit in novis tentamentis ineundis non frustra laborabit. Fingamus Chimistas adhuc latere rationem argenti in aqua valente soluti præcipitandi. Qui eo principio nixus id invenire institueret, ita se gereret. Ad solutionem nempe vel materiam adjiciat, a qua cum aqua valente conjuncta argentum minime solvi sciat, vel quam cum argento conjunctam ab aqua valente minime solvi neverit; atque hoc modo præcipitatio argenti fiet. Quod si nesciat, cui materię ea proprietas sit, hanc quæret ista ratione. Sumat nempe aquam valentem, eamque materiã aliquã saturaret, tum in solutionem argentum imponat. Quo factò vel illud solvetur, vel non, vel solvetur primum, deinde per se præcipitabitur, vel denique illud materiam in aqua valenti solutam præcipita-

bit. I. si argentum non solvatur, quod accider, si materia cum aqua valenti primum commixta sal alkalicum fuerit, signi erit hoc sal esse præcipitans argenti. II. si solvatur quidem, sed mox præcipitetur, quemadmodum fiet, si cum aqua valenti acidum salis marini commixtum fuerit, conficiendum erit, alterutrum horum fluidorum aptum esse præcipitando argento, quod in uno solutum sit. Tum vero inquirere oportebit, quodnam sit fluidum illud, a quo argentum solvitur pro diversa forma, quæ huic esse potest. III. si viderit argentum solvi, nec præcipitari, argumento erit fluidum illud id proprium habere, ut hoc metallum solvat. Si denique ab argento præcipitetur materia in aqua valenti soluta, uti fiet si hæc stannum fuerit, conficiet argentum conjungi cum alterutro corpore in mistura existente; atque adeo quærere oportebit, quod nam ex duobus sit, cum quo argentum conjungitur.

CLXVIII.

Hæc autem, quæ perspicuitatis gratiâ in re nota assumpsi, si industrius Metallicus accommodet ignotis, quorum in secretionem metallorum multa plane sunt, facilius, ut arbitror, & certius quasdam præcipitandorum corporum rationes, imo vero plurium affinitates ignotas deteget, quàm si regulis hæcenus receptis utatur.

CLXIX.

Sed hæc, quæ multis forte non erunt probata, mittamus; & reliqua persequamur, quæ usum certiores habent. Patet autem ea, quæ de corporum præcipitatione explicavi, spectare ad eam quod secretionis rationem, quam simplici solutione fieri dixi, si quidem ab iis discesseris, quæ propria

Quid faciat ad
secretionem,
quæ simplici
solutione fit.

sunt ejus corporis, quod in hac altera secretionis ratione non solvitur, aut non liquefcit. Nam hæc quoque fieri potest vel cum additamento, vel sine ullo. Additamentum autem ejusmodi esse debet, quale ad præcipationem corporum requiritur; nempe necesse præsertim est, ut fluidum solvens magis affine sit cum solvendo corpore, quam cum altero: id quod non in udis modo, verum etiam in siccis secretionibus fieri intelligemus, si assumamus, ignem magis esse affinem cum eo metallo; quod facilius fundit. Sic si plumbum certo igne ex ære exsudat, id fit, quia ignis facilius liquefacit plumbum, quam æs, seu cum illo majorem habet affinitatem quàm cum isto. Major enim affinitas fluidi unius cum definito corpore ex eo maxime æstimari solet, quod illud facilius cum isto conjungatur, idemque solvat. Ignis autem, cum citius calefaciat & fundat plumbum quàm æs, cum illo facilius conjungi, ipsumque solvere dicendum est.

CLXX.

Quocumque tandem secretionis genere utamur, ea fieri potest in mistura non duorum tantum, verum etiam plurium metallorum. Misturæ, quas tractare solent Metallici in se continent I. vel argentum cum plumbo, aut cum ære, aut cum auro; vel aurum cum ære, aut cum plumbo; vel æs cum plumbo; II. argentum cum auro & ære, aut cum auro & plumbo, aut cum ære & plumbo; vel aurum cum ære & plumbo; III. denique aurum cum argento ære & plumbo. Cum secretio sit ex mistura duorum metallorum, neque ullum additamentum ad ipsam adjicitur, unâ operâ ea perficitur; at, si additamento uno vel pluribus ea instituatur, necesse erit aliis operis additamentum ad misturam adji-

cere, & post secretionem illud ex metallo, cum quo se conjunxerit, separare. Sic cum æs a plumbo secernitur, unâ operâ id peragitur, quòd nullo additamento fiat. At cum argentum ab ære separandum est plumbi additamento & sulphuris, oportet primo æs argentosum una cum plumbo & sulphure miscere; deinde plumbum argentosum ex ære sulphurato secernere; demum argentum ex plumbo, æs ex sulphure separare. Quod si aliqua in opera forma metallica cuipiam metallo pereat, huic eam reddere oportebit, uti sit cum argentum ex plumbo secernitur, quod in lithargyrum vertitur. Quia etiam cum in unaquaque materia, quæ in mistura inerat, aliquid restare soleat de reliquis corporibus, metalla post secretionem diligentius purgare plerumque oportebit.

CLXXI.

Si tria metalla in mistura insint, uno opere vel singula a singulis, vel duorum misturam ab uno separare possumus. Si hoc alterum peragamus, aliâ deinde operâ duorum misturam tractabimus. Ac si quidem nullo additamento alterutrum perfecimus, nihil præterea nobis erit agendum, nisi metalla diligentius sint purganda. Quod si additamentis usi sumus, secretionem peractâ unum vel alterum eorum inerit vel in uno aliquo ex secretis metallis, vel in mistura duorum; atque adeo pluribus operis unumquodque metallum purum deinde faciemus. Cum denique quatuor metalla in mistura insunt, uno opere vel singula a singulis, vel duorum misturam a mistura itidem duorum, vel duorum misturam a reliquis duobus a se invicem separatis, vel trium misturam ab uno secernere possumus: quod si sine additamentis peregerimus, tot aliæ operæ ad perfe-

Eam secretionem nobis restabunt, quot sunt misturæ in prima secretionem restantes; sin autem additamenti rem aggressi sumus, tot insuper operæ nobis erunt peragenda, quot necessariae sunt, ut additamenta ex metallis secernantur. Quæ autem secretionis ratio alteri anteferenda sit, peritus Metallicus pro diversa metallorum natura statuet. Qua in re nonnulla quoque suis locis attingam: Generatim vero id teneat, plerumque secerni perfecte non posse unum metallum ab alio; sed secretionem peracta in quolibet remanere certam quantitatem uniuscujusque metalli, quod initio in mistura inerat, vel ad eam secretionis peragenda causa consulto adjectum fuit. Cujus rei causa eadem est, ob quam in recrementis aliquid metalli semper remanere diximus *: * §. 124. quæ quidem multo magis valet in metallis, quorum fere unumquodque non mediocrem habet cum reliquis affinitatem. Hinc ea secretionis ratio optima habenda est, qua peracta in unoquoque metallo secreto minima, quæ potest, alterius metalli portio restat.

CAPUT II.

De operis, quibus metallum quodlibet ab uno aliquo, vel a pluribus secernitur.

CLXXII.

AD secretionem, quæ vel simplici solutione, vel præcipitatione, vel partim uno, partim altero modo peragitur, revocantur ea omnia secernendorum metallorum artificia, quæ in usu metallico sunt: quod quidem patebit, si principia, quibus ea nituntur, explicavero. In iis tamen præsertim con-

Quibus operis
secretio metal-
lorum peragi
solet.

sistam, quæ ad secretionem siccam pertinent. Reliqua enim, quoniam de excoctione metallorum, quæ igne fit, scribere suscepì, ad institutam a me rationem non multum faciunt. Operæ autem, quibus ea artificia continentur, hæ sunt: plumbatio nempe, liquatio, lustramentum (sic enim voco, quam alii *cupellationem* dicunt), exhalatio sicca, quæ *sublimationis* nomine designari solet, stibiamentum, partitio sicca, coactio.

CLXXIII.

Multa sane ad optimum harum operarum exitum, quæ sicca secretionem sunt, conducunt; præsertim vero Metallorum gravitas, major vel minor facilitas qua liquefcunt, celeritas qua refrigescunt, affinitas quæ inter ipsa intercedit; itidem ignis ratio, effectus, quos in corpora ei subiecta gignit. Quæ sit affinitas unius metalli cum altero, vel cum aliis corporibus, quæ cum metallis misceri solent, tabula hunc in finem a Chymistis confecta docet. Quamquam ea multum adhuc imperfecta est non modo ob causas superius commemoratas (§. 164.); verum etiam quia ex ea cognosci nequit, quodnam ex duobus vel pluribus quibuslibet corporibus in tabula commemoratis majorem habeat affinitatem cum tertio quolibet, aut cum unoquoque ceterorum. Nam, ut in metallis tantum consistam, ex ea tabula hæc tantum cognosces, I. plumbum majorem habere affinitatem cum argento, minorem cum auro, adhuc minorem cum stanno, minimam cum cupro, nullam cum ferro, II. stannum magis esse affine cum ferro, minus cum cupro, adhuc minus cum argento, minime omnium cum auro; III. ferum magis esse affine cum auro, minus cum argento, adhuc minus cum cupro. IV. Cuprum ma-

quæ sit metal-
lorum affinitas.

gis esse affine cum auro, quam cum argento; V. denique argentum esse affine cum auro. At utrum ferrum magis quam plumbum affine cum argento sit; argentumne an plumbum majorem habeat cum auro affinitatem, & alia permulta ex ea tabula numquam conficies. Ideo autem ipsa hoc in capite peccat, quod forte ejus Auctores non adverterint ad eas omnes permutationes, quæ in conferendis affinitatibus corporum facere oporteret. Ac rem quidem Metallicis maxime utilem faceret, qui tabulam uberiores conficeret, in qua eorum saltem corporum affinitates conferrentur, quæ frequentius usuveniunt, cujusmodi sunt illæ, quæ ad metalla, & acida quædam salia, sulphur item & arsenicum pertinent.

CLXXIV.

At, ut ad rem nostram redeamus, gravitatis metallorum idem est ordo, quem ego in iis appellandis sequor, ita ut gravius sit illud, quod primum nomino: dico autem Aurum, Plumbum, Argentum, *Æs*, Ferrum, Stannum. Quoad liquefcendi facilitatem, ferrum ceteris difficiliter liquefcit, isto minus difficile aurum, postea cuprum, tum argentum, deinde plumbum, denique stannum. Eodem autem ordine, quo difficiliter liquefcunt, tardius quoque calefcere, tardiusque refrigerari Buffonius animadvertit (*). Sed aliud est, quidpiam, postquam calefactum, aut liquefactum est, ita refrigerari, ut nullo caloris sensu tactum moveat, aliud eatenus refrigerari, quatenus liquefactum, immixto aut subtracto igne, dumtaxat durefcet. Primo

Quæ sit metallicorum gravitas

Quæ metalla difficiliter liquefcant, & refrigerant.

(*) Supplement à l'Hist. nat. tom. I.

modo non negaverim Buffonio ea metalla, quæ tardius, vel citius calefiunt, tardius quoque, vel citius refrigerari. Sed in altero patet eam legem locum non habere. Nam plumbum, exempli gratia, citius ferro calefit, & liquefit, nec tamen isto citius ex liquido durum evadit. Imo vero generatim metalla contrario fere ordine liquefiunt, quo refrigerando durefcunt, itaut illud citius durefcant, quod tardius liquefit. Nos autem dum refrigerari metalla dicemus, intelligemus eam refrigerationem, qua ex liquidis dura fiunt. Hinc alia patet cauffa, cur ex duobus metallis, puta plumbo & cupro, fimul liquefactis, quorum unum citius altero refrigeret, & levius fit, illud, quod tardius refrigeret, & gravius est, præcipitetur. Nam quod levius est, & citius refrigerando durefcit, statimque duruerit, summa petit alterius adhuc liquidi, ea plane ratione, qua dura quæque corpora superinnatant fluido graviori, in quod fuerunt demerfa. Quinetiam, ex quo plumbum multo levius ferro fit, & multo tardius quàm istud refrigeret, cauffa præcipua, ut ego arbitror, exiftit, cur hæc duo metalla inter fe non conjungantur, nullamque inter fe affinitatem præferre videantur. Siquidem in liquefacta ferri, & plumbi miftura, ferrum, mox ut mifturæ luculentus ignis fubtrañtus fuerit, quamcitiffime refrigeret, plumbum vero liquidum perftat eo calore, quo ferrum vix ac ne vix quidem rubefcit. Quocirca, cum multo gravius ferro fit, mox ex isto feceffit, & fundum petit. Quamobrem, ex quo duo hæc metalla in igne nullo modo inter fe jungantur, non ita facile concefferim, nullam inter ipfos affinitatem intercedere. Certe enim quis negaverit plumbum cum cupro non mediocrem habere affinitatem? aut aquam

cum salibus esse valde affinem? Quis tamen nesciat plumbum ex ære minime liquefcente leni igne exsudare, aut secedere, in misturâ item liquefactâ plumbi, & æris illud residere, salia denique ex aqua congelata præcipitari? Hæc porro ex eadem causa existunt, ob quam ferrum cum plumbo non coniungi diximus.

CLXXV.

At metallum quodlibet citius liquefit, quo minor ejus moles est, & quo luculentiori igni subjicitur. Quod si plura metalla inter se commixta sint, illud, quod facilius liquefcit, ceterorum accelerat liquefactionem, eoque magis, quo major illius præ istis quantitas est. Idem contingit, si alia quælibet materia facile liquefcens, veluti sulphur, in mistura insit. Ex hac autem mixtione plurium corporum, quorum alia aliis magis fusilia sunt, mistura existit mediâ quadam ratione fusilis, atque adeo ut liquefcatur, eum ignem non postulat, quo corpus liquatu difficilius solet liquefcere, sed ei sufficit ignis, qui plus minusve major sit eo, quo materia liquatu facilius liquefcere solet.

CLXXVI.

Ad ignem quod spectat, is corpora fundit, vel in calcem vertit, vel in vitrum mutat, vel in sublimem fert: quos effectus gignit pro diversa natura corporum, quæ ejus vi subjiciuntur, & ratione, qua ad ipsa applicatur. In his vero effectibus magnam sæpe partem habet ipse quoque aer, qui vel solutus ac liber, vel venti instar ad ignem aspirare solet, quemadmodum fit cum plumbum in lithargyrum vertitur.

Qui sunt ignis
effectus.

CLXXVII.

His præstitutis, ad operas ipsas, quibus sicca

Quid sit Lu-
stramentum.

Cur in lustra-
mento argen-
tum vel aurum
a plumbo se-
cedat.

metallorum secretio continetur, accedamus. Ordiamur autem a lustramento, quo argentum, vel aurum, vel utrumque simul ex plumbo secernitur. Ad hoc opus catinus cinereus paratur, in quem eorum metallorum mistura imponitur, eaque igni reflexo, & follium flatui subjicitur: istoque modo plumbum paulatim in lithargyrum vertitur, ex quo metallum pretiosum secedit, quod purum restat, postquam cunctus lithargyrus evanuerit. Plura autem ad hanc metalli pretiosi ex plumbo secretionem faciunt. Primo enim necesse est, plumbum in calcem, seu in materiam quasi vitream verti, quæ lithargyrus appellatur. Quamobrem materia quælibet inflammabilis, qualis in carbonibus inest, arcenda a plumbo est. Secus enim vel in calcem istud non verteretur, vel mox ut ejus pars aliqua in calcem mutata esset, huic pleræque forma metallica rediret, atque adeo labor multum produceretur. Hinc opus ejusmodi peragere oportet igne reflexo, ex quo calor quidem, non vero materia phlogistica ad materiam liquefactam perveniat; atque is tantus saltem esse debet, quantus exquiritur, ut vena plumbi liquecat. Quin etiam præstat flammam ex lignis excitare, utpote quæ facilius plumbum in calcem aut vitrum vertat, quod nempe cum aëre, & subtili humore, ob quem præsertim metalla in calcem vertuntur, sit admixta. Eundem in finem aërem ad plumbum continuo aspirare opus est; atque ut ejus major copia existat, simulque luculentior ignis fiat, folles continenter flatum inspirare in materiam liquefactam debent. Sed ob causam proximè commemoratam arbitror ego, ad hoc opus magis esse accommodatum flatum humiferum a tubo hydraulico inspiratum, quàm siccum ex follibus erumpen-

tem. Quoniam vero lithargyrus penetrat, & corrodit cujusque ferme generis vasa, ideo catinus paratur ex materia, quæ etsi ipsum forbeat, attamen ab eo perforari nequeat: quem usum habent cineres vel ex plantis, vel ex animantium ossibus combustis facti.

CLXXVIII.

At ratio, cur argentum ex plumbo forma metallica prædito secedere nequeat, hæc est, quod nempe istud sit argento gravius, atque cum eo magnam habeat affinitatem. Quod vero ex lithargyro argentum præcipitetur, id Schlüterus (*), alique ex eo derivant, quod ille plumbo levior, & magis fluidus sit. Est sane plumbo levior, magisque fluidus lithargyrus *; at nisi iste levior quoque argento foret, numquam hoc ex illo præcipitaretur. Est autem ille argento quoque levius, præsertim cum æstuando se dilatat. Verum ne ista quidem lithargyri præ plumbo, & argento levitas sufficit argenti præcipitationi explicandæ. Nam aurum est sane gravius plumbo, nec tamen in hoc liquefacto residet. Quid igitur est aliud, quod ad metalli pretiosi a lithargyro secretionem facit? Paucis dicam. Perspecta res est, metallum pretiosum, sive aurum sit, sive argentum, in igne quoque vehementissimo formam metallicam non deferere, atque vix ullam, vel certe paucam cum lithargyro habere affinitatem. Quamobrem ut primum certa plumbi portio in lithargyrum vertitur [neque enim totum uno eodemque tempore ejusmodi evadit], auri vel argenti particulæ junguntur inter se, vel cum particulis plumbi, quæ ad

Vol. I.

D d

(*) Cap. LXIII. vol. II.

huc in lithargyro remanent, atque adeo ex isto se recipiunt in subiectum plumbum tum vi prævalentis gravitatis, tum ob maximam affinitatem, quæ inter metallum pretiosum & plumbum intercedit: quam quidem præcipitationem adjuvat quoque follium flatus, quo liquefacta materia in tenues undas agitur *, & facilius metallum pretiosum quasi congelat. Porro lithargyrus, qui primo apparuit, partim in vapores exhalat, partim in catinum cinereum penetrat, partim a follium flatu extra eum propellitur, atque ab operariis detrahitur, postquam nempe metallum pretiosum ex eo secessit. Hinc ignis, & ventus in aliam plumbi ac lithargyri portionem agunt, cui id ipsum accidit, quod proxime dictum est. Atque hoc modo eo tandem res perducitur, ut in materia, quæ in catino restat, major sit metalli pretiosi, quam plumbi moles; ac tum æstu quodam agitur tota, itaut quod reliquum plumbi est, continuo subjiciatur follium flatui, atque adeo facilius exhalet, aut in lithargyrum vertatur, quem cineres absorbent. Sic denique, plumbo evanescente, unum restat, illudque purum metallum pretiosum.

CLXXIX.

Patet itaque lustramentum consistere in tarda quadam præcipitatione metalli pretiosi, quæ existit ex mutatione materiæ, in qua ipsum inest; qua quidem mutatione ea in fluidum rarius, & cum metallo pretioso vel nullo modo, vel vix affine vertitur; idque præsertim fieri ob additamentum quasi occultum, cujusmodi est aer. Quamobrem quælibet materia, quæ ita mutari possit, apta erit lustramento peragendo. Quoniam vero lithargyrus in scorias vertit terrenam quamlibet materiam, imo & metallicam, exceptis auro, argento, & illo recens detecto

Cur lustramentum metallum pretiosum a vi li purget.

metallo, cui *Platinæ* nomen est, hinc si hæc metal-
la cum aliqua ejusmodi materia commixta sint, lu-
stramento secerni aut purgari ex eadem poterunt: id
quod fiet adjecta ad misturam ea plumbi mole, quæ,
cum in lithargyrum mutata fuerit, sufficiat materiæ
illi combibendæ, & in scorias mutandæ.

CLXXX.

At si argentum ex ære secernendum sit, id mul-
tis modis fieri potest, nempe lustramento, vel plum-
batione, vel liquatione, vel coactione. Lustramen-
to res peragitur, uti proxime dictum est, adjecta nem-
pe ad æs argentosum certa plumbi mole, quæ major
vel minor esse debet, prout major, vel minor est æris
mole præ argento. Sed quoniam plumbum multum
consumitur non modo cum in lithargyrum verti-
tur, verum etiam cum huic forma metallica red-
ditur, multum præterea æs perit, & unumquodque
metallum deterius fit ob eam portionem alterius,
quæ vicissim in utroque restat, ideo hæc secretionis
ratio non peragitur, nisi cum æs argenti ditif-
simum est; imo vero tum etiam, cum æs ejusmo-
di est, peritus Metallicus alia utiliori via id, quod
vult, assequi curat.

Argentum ab æ-
re secretionis quot
modis fieri pos-
sit.

Quomodo fiat
lustramento.

CLXXXI.

Plumbatio triplex est, alia pyritidis cuprei,
alia æris nigri, alia æris minime sulphurati. Una-
queque in hoc sita est, ut plumbum una cum æ-
re argenteo liquefiat, quod argentum combibat, &
formâ metallicâ præditum ex liquefacta materia suo
pondere præcipitetur. Cum enim paucum præ ære
argentum esse soleat, istud ex eo liquefacto aut
nullo modo aut paucissima mole per se præcipita-
retur, præsertim cum valde affine cum ære sit.

Item Plumba-
tione.

Quotplex sit
plumbatio.

Itaque necesse est plumbum ad æs argentosum ad-
 jicere, quod magis affine est cum argento, quàm
 cum ære. Ex quo fit, ut metallum hoc pretiosum
 ad se ex ære attrahat. Hinc autem intelligitur,
 lustramentum a plumbatione in eo præsertim differ-
 re, quod in lustramento æris argenti metallum
 pretiosum ex plumbo in lithargyrum mutato & cum
 ære commixto per se præcipitur; in plumbatio-
 ne autem illud ipsum una cum plumbo formâ me-
 tallicâ prædito præcipitur ex ære.

CLXXXII.

Plumbatio py-
 ritidis cuprei &
 argenti modo fit.

Sed quid proprium habeat unaquæque plum-
 bationis ratio videamus. Cum in pyritide argento-
 so, qui ex vena cuprea conflatus est, labor susci-
 pitur, ille ter vel quater crematur, tum recoqui-
 tur cum plumbeis additamentis, qualia sunt venæ
 plumbi, lithargyrus, & cinis plumbatus, nempe
 fragmenta comminuta catini cinerei, quibus lithar-
 gyrys inest. Neque enim juvat plumbum purum ad
 pyritidem adjicere, eo quod nimis cito liquefcens
 defluat, & multum ejus in fornace comburatur.
 Tanta autem eorum additamentorum moles adjici-
 tur, ut quodlibet plumbi ex iis conflandi centum-
 pondium non plus quam IV. argenti uncias in se
 contineat. Secus enim argenti nimis multum in
 pyritide remaneret. Nam argentum quidem, quod
 cum plumbo magis quam cum ære affine sit, ex
 isto recedit, ut cum illo conjungatur. Verum quo
 minor est plumbi moles, eo minus pyritidem cu-
 preum potest pervadere, atque adeo minorem ar-
 genti quantitatem ex eo combibit: unde in isto ma-
 jor argenti portio remanet. Ad hæc, quo minor est
 plumbi moles, eo ditius argenti fit comparate ad
 ejus volumen; cumque aliqua plumbi argenti

Quæ plumbi
 portio ad pyri-
 tidem adjicien-
 da sit.

quantitas in ære semper remaneat, patet istud hac quoque ex causa argenti ditius esse, quo minor plumbi quantitas cum pyritide miscetur. Solet autem quodlibet æris in plumbatione conflati centumpondium tantum metalli pretiosi retinere, quantum in quolibet centumpondio plumbi, quod in eodem ære remanet, inest.

CLXXXIII.

Jamvero ex pyritide una cum plumbea materia excocto conficitur plumbum argentosum, quod veteres (*) stannum appellare consueverunt, & pyritides alter. Atque illud quidem ex isto præcipitatur, quod gravius sit, & tardius refrigescat. Eo autem facilius plumbum ex pyritide cupreo argentum combibit, quod ob interpolationem sulphuris, cujus multum in pyritide inest, argentum cum ære minus arte cohæreat. Porro plumbum argentosum ita conflatum vix quidpiam æris in se continet, si ejus multa moles ad pyritidem adjecta fuerit; secus ære inquinatum est. Omnino autem lustramento subjicitur. At pyritides ille alter, qui ex priori confectus fuit, præter æs plumbum quoque in se continet, atque adeo plumbeus vocatur, vel etiam, quod in eo minus argenti quam in priori insit, depauperatus dicitur; atque is bis vel ter ustus recoquitur, ut quod reliquum plumbi argenti in eo est, eliciatur: cui quidem pyritidi iterum materia plumbea adjungitur, si mediocris argenti quantitas in eo remanserit, secus sine ea. Ex hac recoctione iterum conficitur plumbum argentosum una cum alio pyritide, qui æreus appellari solet, quod ex eo recocto æs nigrum confletur, quod demum purgatur.

Cur plumbum
argentosum ex
pyritide præci-
pietur.

(*) Agricola lib. IX.

Quæ incommoda
in plumbatio-
ne pyritidis
existant.

Quando ea uti-
lis sit.

Plumbatio æ-
ris nigri cur-
rit.

Hæc argenti ex pyritide cupreo, id est ex ære multum impuro secernendi ratio valuit apud veteres. At ex quo liquatio inducta fuit, quod non multo ante Agricolaæ ætatem factum est, illa fere deserta jacet. Ea certe suis incommodis non caret. Nisi enim pyritides pro diversa ejus natura apte uratur, periculum est, ne nimis argenti in tertio quoque pyritide restet, itaut necesse sit illum denuo plumbare. Quæ res efficit, ut multum plumbi, æris, & carbonum comburatur. Accedit in pyritide ultimo non minimam argenti portionem plerumque remanere, quæ negligi solebat. Verum etsi utile non sit secretionem cuncti argenti cum pyritide cupreo commixti plumbatione perficere, illius tamen portionem, cum pyritides valde dives argenti est, ea ratione ex isto elicere juvabit, ut alio opere id, quod restat, facilius secernatur.

CLXXXV.

Hunc plane in finem recentiores quoque Metallici æs nigrum plumbant, tum nempe cum argenti tam dives est, ut una aut altera liquatione istud totum ex eo elici nequeat. Cum enim ad liquationem necesse sit, ut quodlibet plumbi centumpondium minus quam uncias argenti $3\frac{1}{4}$ ex ære combibat, atque ut plumbum ad æs adjiciendum ne quadruplo quidem majus ære sit, labor iste nimium produceretur, si ex ære argenti ditissimo iteratis liquationibus metallum hoc pretiosum eliciendum foret. Quocirca præstat primo plumbatione ipsum depauperare. Id vero ut fiat, opus est, ut in quolibet centumpondio æris nigri non plus quam 85. vel 90. æris puri libræ insint; reliquum fere totum sulphur sit, cujus interpositione argenti

affinitas cum ære minuatur, atque ita magis habere locum possit argenti cum plumbo affinitas. Hinc, si in ære nigro non sit commemorata sulphuris portio, aut si æs jam purgatum, quale est monetarium, ea ratione tractandum sit, utrumque, antequam plumbetur, ea proportionem, de qua dixi, sulphurare oportebit: quod ut fiat, sufficiet æs liquefacere cum certa pyritidis cuprei, aut pyritidis sulphurei, seu ferrei, aut alterius materiæ sulphureæ mole. Tam autem sulphuratio, quam plumbatio optime peragetur in fornace concamerata. In hanc porro imponatur certa æris moles, cum qua, si opus sit, materia sulphurea, ut dixi, commiscebitur. Ut primum massa liquefcere cœperit, paulatim ad ipsam adjiciatur plumbum, quod tantum sit, ut quodlibet æris puri centumpondium cum sex plumbi centumpondiis commixtum sit. Hoc factò acrior ignis excitetur, quo mistura omnia bene liquefcant, eaque rutris agitur, ut rite omnia misceantur. Denique mistura liquefacta ex fornace in catinos derivetur, in quibus ob caussas supra commemoratas plumbum argentosum ex ære paulatim refrigefcente præcipitabitur. Plumbum autem ad lustramentum reservetur; æs, si argenti multum adhuc dives sit, iterum eodem modo plumbetur; secus liquationi subjiciatur.

Quomodo ea
peragatur.

CLXXXVI.

Eadem fere ratione plumbatur æs argentosum, quod jam purum sit; sed nulla materia sulphurea ad ipsum adjicitur. Id quod aliqui in ære monetario argenti multum diviti faciunt, ut ipsum depauperent, atque ita aliis operis facilius ex eo reliquum argentum eliciant: qua de re paullo post dicam.

Plumbatio æ-
ris puri quo
modo fiat.

Secretio argen-
ti ab ære, quæ
liquatione fit

Quia re diffi-
rat a plumba-
tione.

Quoties ex
fit.

Quæ cautiones
adhibendæ in
liquatione.

Additamento plumbi peragitur ipsa quoque li-
quatio, quæ eo pariter spectat, ut argentum ex
ære nigro secernatur: sed in hoc differt a plum-
batione, quod liquatione plumbum dumtaxat una
cum argento leni igne liquecat, atque ex ære mi-
nime liquato exfudet. Est autem hæc vel imper-
fecta vel perfecta. Imperfecta est cum adhuc restat
in ære tantum argenti, ut e re sit illud ex illo se-
cernere: id quod accidit cum æs nigrum argenti
nimis dives est, aut cum æs vel purum vel nimis
parum sulphuratum liquationi subijcitur. Perfecta
habetur, cum, eâ peractâ, non plus quam argen-
ti semiuncia in quolibet æris centumpondio reman-
net; atque hanc explicare nunc aggredior. Ad hanc
necesse est primo æs argentosum cum plumbo mi-
scere, ut panes certæ molis fiant: quod opus refri-
geratio æris vocari solet, nomine scilicet ex vete-
rum opinione derivato, qui putabant plumbo vim
refrigerandi inesse. Tum panes isti leni igni subji-
ciendi sunt, ut plumbum dumtaxat argentosum ex
ipsis exfudet: quod alterum opus magis proprie li-
quatio dicitur. Hæc porro nequit recte succedere,
nisi quædam leges servantur. Ac primo æs purum
non fit, sed sulphuratum. Nam cum eo, quod pu-
rum est, argentum arctius conjungitur, quam cum
sulphurato, & ita quidem, ut plumbum, dum li-
quationis igne funditur, nequeat argentum ex eo
ære combibere, quin hujus pars aliqua liquecat;
contra, cum argentum minus cum sulphure, quam
cum ære affine sit, ob hujus bituminis interposi-
tionem, ad æs sulphuratum minus adhæret, atque
adeo plumbum potest metallum hoc pretiosum com-
bibere, quin æs liquecat. Atque hæc causa est,

cur in ære sulphurato seu nigro liquatio instituat-
tur, atque in æs nigrum vertere oporteat æs pu-
rum, cum ex hoc argentum secernendum est: quod
ut fiat, sufficiet ipsum una cum pyritide, vel cum
alia materia sulphurea liquefacere.

CLXXXVIII.

Deinde tantum esse debet plumbum compa-
rate ad æs purum, quod in nigro inest, ut certo
ignis gradui illud quidem, non vero æs liquecat:
ex alia autem parte tantum esse debet comparate
ad argentum in ære latens, ut illius maximam,
quam potest, copiam ex isto combibat. Siquidem
quo major plumbi moles ad æs adjicitur, magis uti-
que pervadit hujus massam, atque plus argenti
combibit; at vero cum in massa ex diversis met-
tallis conflata illud, quod facilius liquefcit, cete-
rorum acceleret fusionem, eoque magis, quo major
est illius quantitas, periculum est, ne, aucto plum-
bo, quod facillime liquefcit, cupri quoque lique-
factio consequatur. Porro experimentis compertum
est, cuprum in igne, qui in vulgari liquatione pa-
nibus metallicis admovetur, partim liquefcere, si
cum quolibet ejus centumpondio plusquam IV.
plumbi centumpondia commixta sint. Qua in re
animadvertendum est, cupri nomine hoc loco æs
purum venire, quod in nigro inest, ita quidem ut
si in 105. cupri nigri libris 100. puri libræ insint,
hujus dumtaxat ponderis habenda ratio sit. At non
omne æs eandem fert plumbi molem: majorem
enim sustinet, quod difficilius liquefcit, veluti il-
lud, quod minus impurum est, quodque ex venis
non multum sulphureis profectum fuit, item quod
cum mediocri ferri quantitate commixtum est. Fer-
rum enim, eo quod difficillime liquefcit, æris li-

Quæ esse de-
beat proportio
inter æs ni-
grum & plum-
bum cum eo
miscendum.

quefactionem retardat. Qua quidem ex caussa præstat certam ferri quantitatem in ære relinquere; secus enim liquatio non optime succedit. Generatim autem æs nigrum ejusmodi esse debet, ut possit ferre $3. \frac{1}{4}$ centumpondia plumbi quin liquecat: quod accidet, si cuilibet illius centumpondio insint 90., vel ut summum 95. libræ æris puri.

CLXXXIX.

Hoc præcepto id quoque assequemur, ut maximam, quam potest, argenti molem plumbum ex ære combibat. Nam experimentis compertum est, non omne argentum ex ære secerni, si cum quolibet hujus centumpondio $3. \frac{1}{2}$ centumpondia plumbi misceantur. Quare si hujus $3. \frac{1}{2}$ centumpondia ad unum æris adjiciantur, certius ex isto omne seceretur argentum, quin periculum sit ne æs liquecat.

CXC.

Quota argenti
portio æri inesse
debeat, ut illud
omne ex
illo uno opere
secernei possit.

At illud quoque animadverterunt Metallici, argentum una cum plumbo ex panibus metallicis stillans ære inquinatum esse, cum plumbi quodlibet centumpondium uncias argenti $3. \frac{1}{2}$ in se continet, eo quod scilicet, dum plumbum nimiam metalli pretiosi quantitatem combibit, plures e sede sua dimovet, ac fundit æris particulas. Quamobrem, ut una liquatione argentum omne ex cupro eliciatur, quin ullum ex commemoratis detrimentis existat, necesse est, ut quodlibet æris puri in nigro latentis centumpondium non plus quam 13. circiter argenti uncias in se contineat. Nam hoc modo cum $3. \frac{1}{2}$ plumbi centumpondia ad unum æris adjecta sint, eorum quodlibet, liquatione peracta, uncias circiter $3. \frac{1}{2}$ argenti in se continebit.

CXCII.

Hæc itaque haberi poterit veluti generalis

quædam regula, ut nempe quodlibet centumpondium cupri nigri 90. ad 95. libras puri in se contineat; cuilibet autem centumpondio cupri puri non plus quam 13. onciæ argenti insint, atque cum eo misceantur 3. $\frac{1}{2}$ plumbi centumpondia. Hinc si æs sulphure redundet, ad eum statim, quem dixi, ustione adducetur; si vero æs purum sit, sulphurandum erit: quod fiet, si ipsum una cum certa pyritidis, aut alterius materiæ sulphuræ mole liquefiat *. Item si æs argento ditius sit quam oporteat, tunc vel iteratis liquationibus istud ex eo elicietur, vel æs depauperandum erit. Hoc alterum fiet, si æs magis egenum cum ditiori misceatur, itaut mistura 13. plane argenti uncias in se contineat: quæ commixtio fiet eodem tempore, quo æs cum plumbo in fornace conjungitur. Numquam vero cum ditiori miscebis illud, quod argento careat. Neque enim majores sumptus postulat iterata ditioris, quam una ita depauperati cupri liquatio. Ad hæc cuprum ex liquatione restans deterius est eo, quod liquationi subiectum non fuit. Illud enim plumbo inficitur, atque de ejusdem pondere magis diminuitur, cum purgatur. Quibus ex causis perspicuum est, satius esse, æs minime argentosum separatim purgare, illudque, quod justo ditius est, iteratæ liquationi subicere. Verum, cum argenti ditissimum est, veluti si ejus centumpondium 8. vel 10. argenti marcas in se contineat, hoc modo nimium protraheretur argenti ex eo eliciendi labor; atque adeo ipsum primo depauperare oportet, ut supra explicavi §. 185.

Quæ regula ex
statu principii
consequen-
tur.

§. 185.

Quid præface
oporteat, cum
æs argenti di-
tissimum est.

CXCII.

Si æs argenti tam egenum sit, ut hujus minus quam 13. uncia in quolibet ejus centumpon-

dio insint, tunc juvat illud ditius facere, adjecto ad ipsum vel ære ditiori, vel plumbo argenti egeno, vel utraque simul ratione, ita tamen ut, si fingamus omne argentum in mistura latens in uno ære esse, hujus quodlibet centumpondium non plus quam 13. argenti uncias in se contineat.

CXCI.

Porro artificia, quibus Metallici uti solent in liquatione peragenda, atque inconmoda, quæ ex ipsis existunt, in operis præmio attingi; qua autem ratione ea emendari possint suo loco dicam. Nunc quædam animadvertam, quæ etsi propria sint hujus operæ multum sane ingeniosæ, attamen ad alias utiliter transferri possunt. Perspicuum est argentum liquatione secerni additamentis sulphuris, & plumbi. Quo modo mistura existit ex quatuor corporibus constans, quibus plerumque accedit & ferrum, quod in ære nigro, cum excoquitur, restare solet; atque hæc omnia certo igni subjiciuntur, ad quem aer quoque aspirare solet. Itaque æs, argentum, plumbum, ferrum, sulphur, ignis, aer in liquatione interveniunt. Uniuscujusque vero corporis proprietates ex aliorum admixtione ita temperantur, ut quod uno in capite utile est, noceat in altero. Sulphur nempe ad æs adjicitur, ut ejus cum argento affinitatem minuat, atque ita istud facilius cum plumbo jungatur: quam ad rem utile sane est. At bitumen ejusmodi mixturæ fusionem accelerat, ut proinde difficilior sit, eum ignem panibus metallicis admovere, quo plumbum dumtaxat liquefcat una cum argento, atque ex ipsis exfudet. Hinc curant Metallici paucio illo ferro, quod in ære consulto relinquunt, panum fusionem retardare; quod idem, quoniam magis est affine cum ar-

Animadvertio-
nes ad opti-
mam liquatio-
nis peragenda
rationem.

gento quam cum ære, cum plumbo autem non conjungitur, id efficit, ut facilius a plumbo argentum combibatur. Deinde etsi sulphur magis affine cum ære, quam cum plumbo sit, ejus tamen pars cum isto conjungitur, ex quo plumbum sulphuratum existit, quod idcirco cum argento minus est affine, quàm cum purum est. Hinc fit, ut illud nequeat argentum facile combibere, nisi forma metallica ei redeat. Quoniam vero non potest inflammabilis materia, cui metallorum reducendorum vis est, in intimos panum recessus facile penetrare, idcirco certam argenti partem plumbum non combibit.

CXCIV.

Similiter plumbum cum ære miscetur, ut argentum, quod maxime ob paucitatem non posset per se ex ære sulphurato secedere, ad se rapiat. At plumbi pars comburitur, sive cum panes parantur, sive cum ex ipsis exsudat; ac præterea ob illam æris portionem, quæ, liquatione peracta, in eo restat, deterius fit.

CXCV.

Æs porro argentosum, si jam purum fuerit, sulphurari debere diximus. Hinc iterum illud purgare oportet; atque ejus multum comburitur non modo cum purgatur, verum etiam cum in panes una cum plumbo formatur, & plumbum ex eo exsudat. Denique ipsum quoque deterius fit eo, quod liquationi subjectum non fuit.

CXCVI.

Ignis denique, qui necessarius est, ut plumbum liquecat, nisi apte administretur commemorata detrimenta majora facit. Necesse est autem primo, ut ipse in quamlibet panum partem æquabiliter ac leniter penetret, deinde ut ipsis phlogisticam mate-

riam suppeditet, denique ut minimus, qui potest, aer ex ipso ad panes adspiret. Si in horum primo peccatum fuerit, æs cum plumbo in una parte liquefcit, dum in altera vix ille ignis existit, qui aptus sit plumbo liquando. Si alterum defuerit, plumbo difficilius forma metallica redit, atque adeo minus argenti combibit. Si denique aer multus ad panes aspi-ret, plus æris & plumbi comburitur, atque plum-bi pars in lithargyrum vertitur, quæ ad superficiem panum adhærens vetat, ne plumbum libere ex ipsis exsudet.

CXCVII.

Hæc porro in vulgari liquatione præcaveri non solent. Nam, ut reliqua mittam, ad panes, cum primo igni in foco fere aperto subjiciuntur, continuus existit aëris cursus, qui per rimam, quæ in ima parte foci est, itemque per eas fissuras, quæ in parietibus foci existunt, in medios carbonēs penetrat, atque ex iis versus superiora evolat. Hinc autem fit, ut ignis æquabilis in omni parte esse non possit, præsertim cum panes carbonibus nullo fere ordine in fornacem impositis circumdati sint. Quocirca ple-raque, quæ exposui incommoda, existunt: quæ quidem peritus Metallicus vel prorsus tollere, vel saltem, quantum possit, minuere studebit. At mihi quidem videtur, id nos posse assequi hoc artificio. In fornace concamerata loculamenta quædam, quasi capsæ, fiant tam lata, ut duos, vel tres panes erectos capere possint. Ea in ima parte pateant, ut plumbum, quo panes stillaverint, in communem canalem influere possit, qui in solo fornacis sit cavatus, quique ad catinum exteriorē pertineat. Ea loculamenta pateant quoque in suprema parte, ut panes in ipsa imponi, in iisque

apte statui possint; sed postquam panes fuerint in locum repositi, ea claudantur tegulis, vel lateribus stratis ex eadem facilis materia, ex qua loculamentorum parietes esse debent. Hanc autem materiam oportet esse argillam cum pulvere carbonum commixtam, & cum pauca aqua madefactam. Hoc modo ignis, qui ex foco in centro fornacis posito per hujus capacitatem se diffundet, æquabiliter in panes penetrabit, quod nempe is primo calefaciat loculamenta, atque ex istis calore rubescentibus in panes se diffundat. Deinde cum carbunculi, qui in parietibus loculamentorum insunt, ardendo tardius ob argillæ admixtionem consumantur, ii continenter ac diu materiam inflammabilem suppeditabunt. Ad hæc cum aëri in loculamenta unus tantum pateat aditus, nullum ille poterit ad panes tenere cursum, atque adeo ejus vix quidpiam ad ipsos appellet. Quocirca hac ratione facilius plumbum combibet argentum, atque plumbi, & æris minus comburentur. Sed quibus artificiis hæc omnia peragenda sint, & qua ratione administrandus ignis sit, ut non duplici, ut hætenus fieri consuevit, sed, uno opere, tota liquatio peragatur suo loco explicabo.

CXC VIII.

Liquatio non secus ac plumbatio his principiis nititur, primo quod argentum minus sit affine cum ære sulphurato, quam cum puro, deinde quod plumbum majorem habeat cum argento quàm cum ære affinitatem. Differt autem una ab altera, primo quod in illa argentum una cum plumbo seceratur ab ære simplici solutione, in ista autem seceratur præcipitatione. Utraque autem suscipitur in ære argenti satis divite. At cum tam parum argenti in ære inest, ut quod ex isto elicitur, nequeat

Quid commune habeat liquatio cum plumbatione.

Quid sit argenti
ex ære coactio.

Coactio argen-
ti in paucam
æris molem
quomodo pera-
gi debeat.

plumbationis aut liquationis impensas compensare, tunc danda opera est, ut argentum in paucam æris molem cogatur, ex qua deinde alio opere possit illud utiliter secerni. Hæc argenti coactio postulat, ut æs valde sulphuratum sit; atque adeo, si æs jam purum fuerit, aut cum pauco sulphure commixtum, illud in pyritidemvertere oportet additamento materiæ sulphuræ, ut nempe argentum ob sulphuris interpositionem minus cum ære cohæreat, utque certa tantum æris nigri moles ex pyritide recocto confici possit. Deinde necesse est, pyritidem hunc cupreum ita urere, ut, cum recoquetur, parum æris nigri suppeditet, quod combibat pleramque saltem argenti partem in illo latentem. Ideo autem argentum in illam æris portionem, quæ ex pyritide conflat, se recipere potest, eo quod æs nigrum minus sit sulphuratum, quam pyritides, atque adeo cum illo majorem quàm cum isto affinitatem præferat. Quocirca, statim atque æris portio certam sulphuris molem dimiserit, ea argentum, quod per reliquam massam magis sulphuratam diffusum est, combibit, & una cum eo subsidet. Hinc ita urendus pyritides est, ut tantula dumtaxat sulphuris portio ex eo evolet, quanta sufficiat, ut ex eo recocto vix æs illud confletur, quod vel per se, vel una cum plumbo, si quod forte in pyritide inest, conjunctum possit fere totum argentum ex isto combibere. Nam si nimium uritur, multum æris conficitur, quod idcirco argenti parum dives est; si nimis parum crematur, tam paucum æs conflat, ut non multum argentum possit ad se attrahere, quod idcirco in pyritide remanet.

CXCIX.

Porro æs in pyritidem vertitur, si excoquatur,

vel cum alio pyritide cupreo multum sulphureo, vel cum vena æris mediocriter sulphurea. Qua autem proportionem id peragi debeat pro diversa venæ, aut pyritidis natura, majoreque vel minore argenti mole in ære latente peritus Metallicus statuere. Quod si in materia, qua æs sulphuratur, parumper argenti jam insit, eo ditius argenti fiet æs, quod ex pyritide recocto conflabitur. Juvabit quoque recrementa plumbea ad æs, cum sulphuratur, adjicere, ut plumbum, quod ea dimittent, una cum paucis ære, quod ex recocto pyritide conflatur, argentum facilius combibat.

CC.

Ratione ab ea, quam modo exposui, non multum absimili asserit Jarsius, se æs ex liquatione restans, cujus centumpondium semiunciam argenti continebat, in pyritidem vertisse adjecta ad ipsum vena ærea quater usta; atque ex hoc recocto conflasse æs, cujus centumpondium argenti uncias quatuor in se continebat. Addit vero argenti aliquid in vena extitisse quidem, atque adeo ex isto auctam fuisse argenti molem, quam in ære conflato invenit; sed nihilofecius veram argenti coactionem peractam fuisse contendit.

CCI.

Argenti ex ære coactionem primus omnium excogitavit Joannes Cramerus (*), qui, vulgari liquatione rejecta, argentum ex ære secernere instituit partim plumbatione, partim imperfecta quadam liquatione, vel potius plumbi argentioli sudatione,

Quæ sit ratio argenti ab ære secernendi a Cramero adinventæ.

Vol. I.

F f

(*) V. Jarsii *commentariolum in Commentariis Acad. Paris.* ad an. MDCCLXX. pag. 433.

partim coactione. Hanc rationem tradidit quoque Schefferus (*), eademque Jarsio maxime probatur. Eam autem Cramerus maxime usurpat ad æs monetarium argenti ditissimum: quem in finem officinas ad Blankenburgum extrui curavit. Ac si quidem massa constet ex paribus saltem argenti, & æris portionibus, lustramento illud ex isto secernit. At, si minus quam dimidium argenti in ea insit, tunc primo maximam, quam potest, argenti partem ex ære elicit hoc modo. Misturæ nempe centumpondia quatuor in fornacem concameratam imponit, cumque illa incandescit, ad ipsam adjicit XII. plumbi centumpondia. Postquam vero materia omnis liquefacta fuerit, eam in catinos derivat, in quibus plumbum argentosum secedit ex ære, quod una cum paucis plumbo, & argento ei supernatat. Æs ejusmodi despumat, tum plumbum argentosum ex catinis extrahit, quod lustramento subjicit. Illud vero æs in aliam fornacem concameratam sine ullo additamento imponit, ut leni igne, quo æs non lique scat, plumbum argentosum ex eo exsudet: quod quidem imperfecta quadam liquatione fit. Istud vero plumbum argentosum lustramento reservat; atque ex ære restante, quoniam adhuc in se continet plumbum cum argento, metallum pretiosum elicit hac ratione. Ipsum nempe una cum pyrite sulphureo excoquit in fornace media, ut ipsum in pyritidem vertat. Hunc vero crudum, idest minimeustum, recoquit, adjectis ad ipsum crementis plumbeis, & globulis ferreis. Ex quo fit, ut ferrum, quoniam magis est affine cum sulphure, quam plumbum aut

(*) *V. Comment. Acad. Svedicæ.*

argentum, ex pyritide ad se attrahat sulphuris partem, atque ita plumbum, quod in ære inerat, quodque plumbea recrementa dimiserunt, una cum argento sublidat. Quo in opere ita fere res se habet ac vetus plumbatio pyritidis, nisi quod in hac veteri plumbatione major plumbi moles ad eum adjici consueverat, nec ferri additamento adjuvabatur argenti cum plumbo conjunctio, ejusque præcipitatio. Porro in pyritidis recoctione plumbum argentosum conflatur, cui supernatat reliquum pyritidis. Quare, hoc detracto, illud cochlearibus effundit in catillos, atque lustramento reservat. Quod si una cum plumbo argenteo aliqua æris portio commixta sit, hanc, quoniam refrigescendo illi supernatat, despumat; cumque in his spumis restet aliqua plumbi & argenti pars, idcirco eam seponit, ut in fornace concamerata plumbum argentosum ex ea exfudet ea plane ratione, qua paullo ante dixi.

CCII.

At pyritidem, quem detraxit, quoniam adhuc quidpiam argenti & plumbi in se continet, tractat tandem eo opere, in quo proprie coactio sita est. In hunc finem ipsum urit ter vel quater, vel etiam quinquies, seu quoad globuli ærei in ipso appareant, qui argenti multum divites esse solent. Tum eundem recoquit in fornace media, exque eo conflatur paucam æris portionem cum plumbo, quod ille in se continebat, commixtam, in qua totum fere argentum, quod in pyritide remanserat, inesse debet. Huic autem mixturæ argenteæ supernatat reliqua pyritidis portio, quæ in ære versa non est. Hunc vero detractum in æs nigrum de more excoquit, in quo vix particula argenti inest. At æs argentosum, si argenti satis divitem invenit, una cum triplo plum-

bi pondere in fornace concamerata, quemadmodum supra dixi, fundit, ut præcipitatione plumbum argentofum ex ære secernat. Quod si argenti nimis egenum esse deprehenderit, illud iterum in pyritidem vertit, quem tractat eadem ratione, qua priorem illum pyritidem tractari dixi.

CCIII.

Argenti ex auro
secretio quod
duplex sit.

Uda partitio
quo modo
peragatur.

Coactione argentum quoque ex auro secerni potest. Ac argenti quidem ex auro secretio generatim partitio appellari consuevit, quæ duplex est, uda nempe & sicca. Uda iterum duplici ratione peragi potest, scilicet vel aqua regia, vel aqua valenti. Sicca quoque duplex est, cæmentitia & sulphurata: atque hæc postrema maxime peragitur, vel sibiamento, vel coactione. Uda partitio, etsi ad institutam a me rationem non spectet, quoniam tamen sine ea absolvi nequit metalli unius pretiosi ex alio secretio, non est a me prorsus prætermittenda. Aquæ regię, quæ ex tribus aquæ valentis partibus & una salis ammoniaci, aut acidi salis marini constat, auri solvendi non vero argenti vis est. Sed quo major moles argenti cum auro mixta est, eo difficilius istud solvit, ita quidem ut, si plus argenti quàm auri in mistura insit, nulla fere existat auri solutio. Quocirca mistura solvenda multo plus auri, quam argenti in se continere debet. Hæc autem ut facilius solvatur, in subtiles bracteas, aut in globulos formatur, atque una cum aqua regia, quæ duplum misturæ pendat, in ampullas vitreas ad id accommodatas imponitur; hæ vero leni igne calefiunt. Solutione peracta argentum in fundo ampullarum remanet, ex quo aqua regia, in qua aurum solutum inest, caute effunditur, ut totum argentum in ampullis restet. Huic vero parumper

aquæ regię iterum affunditur, ut, quod restavit auri, solvat; cumque solutio omnis cessaverit, aqua regia cum auro commixta iterum ex ampullis effunditur, & ad priorem adjicitur, ut destillatione aurum ex omni eliciatur. Destillatione peracta aurum siccum restat; quod detractum una cum borace in pulverem comminuto, paucis nitro, & cinere alkalico miscetur, ut liquecat, eique liquefacto forma nativa redeat.

CCIV.

At si aqua valenti, quæ ex acido nitri constat, partitio fiat, tunc argentum, non vero aurum solvitur. Hæc autem partitionis ratio, non prior illa in usu metallico est, utpote quæ eadem certior & commodior sit. Nam aqua regia, quod acidum nitrosum in ea insit, non minimam argenti portionem ad se attrahit, quæ cum auro miscetur. Ut porro aqua valenti partitio recte fiat, ex multis pendet. Primo aurum certa proportionem esse debet cum argento commixtum, nempe cum una auri duæ saltem argenti partes, tres ut plurimum mixtæ sint. Quocirca si in mistura minor argenti moles insit, ei liquefactæ adjiciatur certum argenti pondus, aut ex ea aurum in minorem argenti molem ea ratione, qua proxime dixi, cogatur; si vero nimis parum argenti in auro sit, partitio aquâ regiâ peragatur. Secundo aqua valens probata, seu ut ajunt, præcipitata sit, id est nihil acidi salis marini, aut vitriolici habeat admixtum. Horum enim utrumque iterum præcipitat argentum, quod ab acido nitroso solvitur; atque adeo ipsum rursus miscet cum auro. Ad hæc acidum salis marini cum nitroso conjunctum partem auri solvit una cum argento commixti. Tertio aqua valens nec diluta

nimum, nec nimium valida sit. Utrâque enim ex causa argentum non bene solvit. Cognoscitur autem aptam esse solutioni peragendæ, si mistura ex duabus vel tribus argenti portionibus & una auri facta in bracteas formetur, & harum una revoluta in aquam valentem imponatur: quæ si argentum ita solverit, ut bractæ prior forma remaneat, signi erit rem optime peragi.

CCV.

His præstitutis mistura ex auro & argento vel in globulos, vel in bracteas formatur, atque una cum duplo aquæ valentis pondere in ampullas ad hunc usum paratas imponitur, in quibus permittitur leni igne solutio fieri. Hac absoluta, in alias ampullas infunditur aqua valens argento fere saturata; & auro, quod in fundo subsidit, aqua valens rursus affunditur, quæ dimidium prioris æquet; & igni iterum subjicitur, ut, ebulliendo, quod reliquum argenti in eo est, solvatur: id quod tertium quoque fiet, si opus sit. Hac altera solutione peracta, aqua valens, cui argentum inest, ad priorem argento saturatam adjicitur; aurum vero, quod in ampullarum fundo restat, aquâ fontanâ eluitur, quod demum coquitur, ut in unam massam coeat. At argentum, quod in aqua valente inest, ex earse cerni potest vel destillatione vel præcipitatione. Præcipitatio pluribus modis perfici potest; quæ quidem si acido salis marini fiat, argentum valde purum suppeditat. Nam acidum ejusmodi nequit præcipitare aurum, neque æs, quorum certa portio argento inesse solet. At tunc, argento præcipitato, restat acidum salis marini una cum nitroso conjunctum. Quare aut liquor hic reservandus est, ut aqua regia ex eo paretur, aut aliis operis unum

acidum ab altero fecernere oportet, ut utrumque rursus usui esse possit. Hinc ejusmodi præcipitationis ratio ad operas metallicas non valde est opportuna. Nam aquæ regiæ non multum esse solet usus, secretio autem unius acidi ab alio non sine novis sumptibus & curis peragi potest. Quamobrem destillatione utilius fecernitur argentum ex aqua valente. Hæc enim ad partitionem iterum est utilis. Argentum porro, quod ex destillatione restat, cum paucis saponibus, atque alkali fixo commixtum igni subjicitur, ut ei liquefacto forma nativa redeat: quæ quidem salia ideo adjiciuntur, ut ad se attrahant illam acidi nitrosi portionem, quæ solet in argento remanere.

CCVI.

Jam ut ad siccas partitiones veniamus, ea, quam cæmentitiâ diximus, peragitur cæmento, quod constat ex quatuor argillæ coctæ, & in pulverem comminuatæ partibus, una atramenti futorii, seu, ut vocant, vitrioli bene usti, una itidem salis marini, aut nitri. Salia ejusmodi ideo usurpantur, quod eis metalli cujusque, excepto auro, solvendi vis insit; argilla vero cocta hunc usum habet, ut salia contineat, atque coërceat, ne nimis cito in massam metallicam penetrent; deinde ut calorem, quem concipit, æqualiter in eandem transmittat. Hoc porro cæmentum paucâ aquâ madefit, atque in vas imponitur, interpositis laminis aureis, quod operculo tectum horis XVIII. continenter ei igni subjicitur, quo mediocriter rubescat. Neque enim metallum liquefcere debet. Quo tempore elapso aurum ex cæmento eximitur, quod purum est. Nam salia, quæ in cæmento insunt, in massam metallicam molliorem fa-

Partitio cæmentitia.

Cur et aurum
secestratur ab
argento vel ab
aliis metallis.

Etiam penetrant, & simplici solutione argentum ex ea secerunt. Acidum nitri id maxime præstat; sed in ea re partem habet acidum quoque vitrioli, aut salis marini, si istud loco nitri usurpetur. Quamvis enim viâ, ut ajunt, humidâ acidum vitrioli vix argentum, cui forma nativa sit, solvat; acidum vero salis marini nullo modo; attamen, cum hæc salia ignis maxime attenuet, & calefaciat, possunt sane diuturno ac luculento igni subiecta argentum solvere, atque ad se ex auro attrahere. Quin hæc causa est, cur acidum nitri, quod in uda partitione nequit argentum pauca mole cum auro mixtum solvere, in sicca hac partitione argentum licet paucissimum eliciat ex auro. At aurum non solvitur, nisi acidum salis marini cum acido nitri mixtum sit, quæ commixtio ne in cæmento existat, maxime cavendum est. Secus enim tota massa, aut ejus saltem pars aliqua solveretur, atque adeo nulla aut imperfecta secretio fieret. Patet autem hac ratione non modo aurum ab argento secerni, verum etiam ab alio quolibet metallo purgari posse. Nam salia, quæ in cæmento insunt, vim habent solvendi cujuslibet metalli, auro excepto. Ex hoc porro ita purgato sal, quod ad ipsum adhæret, aqua ebulliente eluitur; cæmentum item lavatur, ut argentum ex eo excocto eliciatur. Quod si aurum satis purum non fuerit, iterum purgabitur eodem modo.

CCVII.

Aliam habet causam ea partitio, quæ vel sulphure puro, vel eo cum altera materia commixto peragitur. Ac veteres quidem (*) cum animadver-

(*) Agricola *lib. X.*

tiffent in uda secretionē auri ex argento magnam impensam, multam operam, summiāque curam esse ponendam, aliam minus sumptuosam, minusque operosam rationem excogitarunt, quæ ita se habet. Mistura in globulos, vel in bracteas formatur, tum ad ipsam adjicitur certa sulphuris puri portio, atque lenissimo igni subjicitur, ut mistura non lique scat, sed in eam sulphur tantummodo penetret. Hæc ita sulphurata una cum pauca æris mole in vas imponitur, quod operculo tectum igni subjicitur, ut materia lique scat. Ad hanc liquefactam iterum adjiciuntur globuli ærei cum pulvere, qui habet pares portiones lithargyri, globulorum plumbeorum, salis, & recrementorū vitri. His adjectis, iterum vas operculo tegitur, globulisque æreis liquefactis, alii in ipsum injiciuntur cum eodem pulvere. Quo modo aurum præcipitatur, sed cum certa argenti portione commixtum, ita quidem ut hæc opera dici potius debeat coactio auri in paucam argenti molem, quā unius metalli ab altero secretio. Ac ratio quidem, cur aurum ex argento secedat, petenda ex sulphure est, quod nullam habet cum auro affinitatem. Verum, quoniam ob hujus bituminis interpositionem non prorsus tollitur ea affinitas, qua aurum cum argento cohæret, idcirco non multum auri residet, nisi certa argenti portio illud combiberet, unaque cum eo præcipitaretur: quod nequit argentum præstare, nisi prius sulphur dimittat. Dimittit autem ob additamenta æris, & plumbi, quæ, quod cum sulphure magis sint affinia, quā argentum, bitumen illud ex metallo hoc pretioso ad se attrahunt. Cum istis vero salia miscentur, ut mistura facilius lique scat, atque huic materia aliqua instar recrementorū supernatet, quæ ipsam contegens vetet,

Vol. I.

G g

Sulphurea partitio veteribus usitata.

ne sulphur nimis cito evolet. Hæc auri ex argento secretio, quemadmodum a veteribus peragi solebat, erat sane imperfecta. Nam primo aurum cum non pauca argenti mole residebat, atque adeo hanc misturam iterum, ut prius, tractabant, ut aurum magis purum facerent. Deinde non mediocris auti portio in massa sulphurata restabat, quæ idcirco eadem fere ratione, qua prius, secernenda erat. Denique æs, & plumbum cum argento jungebantur, atque adeo liquationi, vel plumbationi misturam subjicere oportebat, ut plumbum argentosum ex ære conflaretur.

CCVIII.

Sibiamentum
qua in re situm
sit.

Cur eo aurum
tum ab argento
rum ab aliis
metallis secer-
natur.

Altera partitione, quæ, quòd stibio peragatur, sibiamentum a nobis dicitur, non modo aurum ab argento secernitur, verum etiam ab alio quolibet metallo purgatur. Stribium enim constat ex duabus circiter sulphuris partibus, & una materiæ quasi metallicæ, quam regulum stibii vocant. Iste autem regulus multo minus affinis est cum sulphure quàm reliqua metalla, si hydrargyrum & aurum excipias. Quamobrem si mistura ex auro & argento, aliisve metallis constans cum stibio excoquatur, consequens erit, ut sulphur ex regulò stibii secedat, atque cum aliis metallis jungatur. Quo factò, cum aurum nullo modo sit affine cum sulphure, ex ipsis recedet; tantoque facilius, quod istud ad se attrahat regulus stibii, cum quo multum est affine. Quare aurum una cum isto conjunctum ex reliqua materia facile præcipitabitur. Itaque cum hic labor peragendus est, massa aurea in catinum fictilem imponitur, ut ignis eam liquefaciat; tum ad ipsam paullatim adjicitur duplum stibii pondus. Cumque omnis mistura liquefacta fue-

rit, effunditur in conum ferreum & incrassatum, cujus vertex terram spectet: in quo quidem aurum una cum paucis stibii regulis relidet, eique supernatat reliqua materia sulphurata, quæ detracta seponitur, ut ex ea argentum secernatur. Aurum vero, si purum non sit, iterum vel etiam tertio eadem ratione tractatur. Ut denique ex eo regulus stibii secernatur, ipsum in catino minime operculato liquefit, tum in materiam liquefactam continenter inspiratur flatus parvi folliis, quo stibium, utpote volatile, fumi instar exhalat. Cumque aurum fumare desierit, ei paulatim superinijcitur parum boracis, vel mistura ex borace & nitro, deinde iterum nitrum, quoad nullus motus in eo appareat; ac tum refrigescere permittitur. Quod si hoc ductile non fuerit, iisdem salibus eodem modo tractabitur.

CCIX.

Hæc sulphurationis ratio posset uno sulphure, eoque puro peragi. Verum quoniam istud facile comburitur, & evolat, nisi alia materia ipsum coercet, idcirco utilius perficitur stibio, cui sulphur jam inest. Ad hæc sulphur, quod purum est, id unum præstat, ut nempe ob ejus interpositionem minuat auri cum argento aliisque metallis cum illo commixtis affinitas. At cum hanc prorsus non tollat, auri portio in ipsis restaret, nisi aliam materiam offenderet, cum qua facile jungi posset, & una cum ea residere. Ejusmodi autem est regulus stibii, qui eo quoque ex capite præcipationem auri adjuvat, quod istud maxime liquidum fervet. At eo major sulphuris portio ex stibio secedit, quo plus illius ad se attrahunt metalla cum auro commixta, seu quo major est istorum moles. Tunc ve-

Cum sulphure puro non præstet aurum ab argento secernere.

ro aurum cum nimis multo stibii regulo residet, ob quem labor ejus purgandi nimium producitur. Quocirca cum aurum tam paucum in mistura inest, ut, si hæc in XXIV. æquales partes divisa intelligatur, auri XVI. tantum partes in ea existant, tunc e re erit sulphuris puri certam portionem ad misturam adjicere, ut nempe ea, quantum satis est, sulphuretur, quin multus stibii regulus existat.

CCX.

Coactio auri in
paucam argen-
ti molem quan-
do utilis sit.

Qua ratione
peragitur.

* §. 207.

His itaque modis, qui veteribus quoque comperti erant, peragitur auri ex argento partitio, cum illius fatis multum in isto inest. At cum argentum tam parum auri in se continet, ut e re non sit istud ex illo aut aqua valenti, aut stibio, aut cæmento secernere, tunc danda opera est, ut in paucam argenti molem cogatur. Hanc auri ita cogendi rationem attigerunt Schlüterus (1) Cramerus (2) Ellerus, & Jarsius (3). Ac Cramerus quidem ea in re eandem fere rationem sequitur, quam veteribus usitatam fuisse paullo ante dixi.* Sed rem diligentius ac veteres ipse peragit. Nam, quemadmodum ipse scribit, operæ pretium est, si carbonēs caro pretio non emantur, secernere aurum ex argento, cum in qualibet mistura selibra belgica ex 288. granis constante unum vel alterum auri granum inest: ex quo opere, si rite peractum fuerit, in qualibet argenti selibra vix auri particula restat, quæ decimam unius grani partem æquat. Schlüterus autem uno sulphure coactionem perficit, quin

(1) *Cap. XLVI. Vol. I.*

(2) *Elemens de Docimastique Vol. III.*

(3) *In Commentariolo supra laudato.*

aliud metallum additamenti loco ad misturam adjiciat. Quo modo ex argento sulphurato, quod, opere perfecto, restat, facilius metallum secernitur. Sed, quod Cramerus testatur, aurum cum majore argenti mole præcipitatur, ac major argenti quantitas perit. Jarsius porro arbitratur auri coactionem nonnisi in pauca materiæ mole, quemadmodum sit experimenti gratia, fuisse hætenus tentatam; sed vetus illa auri ex argento secernendi ratio, de qua paullo supra dixi *, in multa sane materiæ mole suscipi solebat. Ea autem nihil est aliud, quàm auri coactio. Ut ut autem id se habeat, laudatus Metallicus hanc ejusdem rei in multa quoque materiæ mole peragendæ rationem tradit. Fiat, inquit, parva fornax mediæ similis. Sed catinus interior coni truncati figuram habeat, cujus vertex terram spectet; hujusque similis sit catinus exterior. Tertius quoque catinus esse poterit, in quem exonerare ex interiore possit materia liquefacta, si in isto hæc redundaverit. Fistula, in qua nares follium locantur, sit in margine catini interioris, atque ita declivis, ut flatus ad tertiam partem altitudinis, quæ catino eidem est, pertingat. His paratis, in fornacem carbonem imponantur, & flatus in eam inspiretur; eaque calefacta pyrites sulphureus, sive ferreus, in ipsam conjiciatur, qui tam multus sit, ut, postquam liquefactus fuerit, dimidium interioris catini repleat. Deinde in fornacem imponatur argentum auriferum una cum alio pyrite sulphureo. Cum catinus interior plenus materiâ liquefactâ fuerit, nova non adjiciatur, sed per fistulam in catinum conjiciatur certa globulorum ferreorum portio, aut alia materia, quæ sulphur absorbens possit pauci argenti una cum auro præcipitationem adjuvare. Hoc

* §. 207.

facto, catinus interior perforetur, ut ex eo in exteriorem materia omnis liquefacta influat, eaque in isto permittatur sua sponte refrigerare. Hinc aurum una cum paucis argento relidebit, reliquum argentum in pyritide restabit, qui, utpote levior, ei mixturæ supernabit. Interim dum hæc peraguntur, alia materia, ut proxime dictum est, in fornacem imponatur, idemque opus iteretur. Experiri autem oportet in mixtura, quæ resedit, an argentum factis dives auri factum sit, ut partitioni udæ subijci possit: quod tunc maxime existet, si cum una auri duæ vel tres argenti partes commixtæ sint. Si autem argentum tam dives auri non fuerit, illud reservetur, ut eadem iterum ratione aurum cogatur. Quoad pyritidem argenteam, qui ex auro præcipitato restat, si ille multum auri adhuc in se continet, eodem modo recoquatur auri cogendi causa, sed sine pyritis additamento: id quod tertium & sæpius fiet, si opus sit. Secus argentum ex eo conflabitur, quemadmodum fit, cum in materia sulphurea inest.

CCXI.

Quibus principis ea nitatur.

Hujus laboris ratio nititur iisdem principiis, quæ sæpius commemoravi. Cum enim aurum nullam habeat cum sulphure affinitatem, argentum aliquam, sulphur, quod in adjecto pyrite inest, jungitur cum argento, atque adeo ex isto aurum secedit, vel saltem minus arte ad ipsum adhæret. Quare, si aurum multum in eo inesset, hujus magna pars per se resideret. Sed cum paucum sit, danda opera est, ut, postquam argentum sulphuratum fuerit, hujus pars aliqua, sed pauca, sulphur dimittat, atque ita aurum, cum quo est valde affine, combibat, unaque cum eo subsidat. Id porro

efficitur additamento, quod cum sulphure magis sit affine, quam cum argento & auro. Cum enim illud partem sulphuris ex argento ad se attrahat; quæ hujus metalli portio libera a sulphure est, cum auro conjungitur, quod in reliqua materia sulphurata inest. Hunc plane usum habent globuli ferrei, qui ad materiam liquefactam adjiciuntur. Sed cum in pyrite, qui ad argentum auriferum adjunctum fuit, jam ferrum inest, & sulphuris pars per se in igne evolet, necesse plerumque non erit hoc additamento uti.

CCXII.

Itaque ut labor iste recte succedat, danda opera est, ut mixtura æque sulphuretur, utque ex ea argentum paucum una cum auro resideat: quo autem plus auri cum minore argenti mole conjungatur, eo rectius peractum opus erit. Priorem ob causam, antequam argentum auriferum in fornacem imponatur, permittitur catini dimidium pyrite liquefacto repleri, ut nempe, si in mediis carbonibus pars aliqua argenti una cum sulphure non conjungatur, possit in catino sulphurari a pyrite, in quem illud guttatim devolvitur. Præcipitationem vero auri, & argenti adjuvat primo levitas pyritidis, deinde flatus folium, non quòd, ut Jarsius arbitratur, iste in materiam liquefactam irruens eam magis calidam, fluidamque servet, sed quòd leni motu in tenues undas eandem agat, atque adeo modo unam modo alteram hujus partem vento objiciat; ex quo fit, ut ex massulis paullatim vento objectis, atque adeo subito frigore correptis, & quasi congeliantibus *, citius sulphur evolet, & metalli * §. 160. pars formam nativam recuperet, quæ eo facilius subsidet, quòd eo motu minuatur vis, qua cohæret cum reliqua materia adhuc sulphurata.

CCXIII.

Hanc auri in paucam alterius metalli, in quo inest, molem cogendi rationem multo magis habere locum debere, si aurum non cum argento, sed cum ære commixtum sit, arbitratur Jarsius, quòd nempe sulphur magis sit affine cum ære, quam cum argento, atque æs levius argento sit. Verum duobus præsertim ex capitibus mihi videtur difficilior coactio auri ex ære, quàm ex argento. Primo quòd aurum magis sit affine cum ære, quam cum argento; deinde quòd ex pyritide æreo æs purum mox non conficiatur, sed tantum æs nigrum, quod ob sulphur ei admixtum minus est affine cum auro, quam æs purum, atque argentum.

CCXIV.

Auri ex ære secretio cur nequeat liquatione perfici.

Certe auri ex ære secretio non minimam habet difficultatem, præsertim cum illius parum in isto inest. Schlüterus (*) liquatione secretionem hanc tentavit, perinde ac si ageretur de argento ex ære secernendo. Sed votis tentamen non respondit. Ac multæ quidem sunt causæ, cur liquatione argentum fere omne, non vero aurum ex ære secedat. Primo enim æs majorem præsefert affinitatem cum auro, quam cum argento; deinde plumbum cum auro minus quam cum argento affine est; denique aurum difficilius, quam argentum liquescit. Horum autem primum efficit, ut æs nigrum, quod liquationi subjicitur, difficilius aurum dimittat quam argentum; alterum est in causa, cur aurum minus quam argentum cum plumbo conjungatur. Postremum efficit, ut plumbum ne-

(*) Cap. CXI. Vol. I.

queat aurum ex ære combibere, quin hujus partem simul liquefaciat. Attamen, si cum ære aurifero argentum quoque mixtum sit, tunc aliquanto plus auri plumbum combibit, quòd nempe illud cum argento primum conjungatur, atque hujus adjumento in plumbum se facilius recipiat.

CCXV.

Lustramento facile quidem aurum ex ære discernitur; sed nimis multa plumbi & æris moles perit. Ut vero alia aptiori ratione ejusmodi metallorum secretio peragatur, necesse est primo auri cum ære cohæſionem seu affinitatem tollere, vel ſaltem, quantum fieri poteſt, minuere: id quod aſſequemur, ſi æs multum ſulphuretur. Deinde oportet ad æs ita ſulphuratum materiam adjicere, quæ facile cum auro conjungatur, unàque cum eo in miſtura liquefacta reſidere poſſit: quæ materia quo magis erit affinis cum auro, eo aptior ad id præſtandum erit. Plerumque plumbum in hunc finem uſurpatur, eo quod ex una parte magis ſit affine cum auro, quam cum ære, ex altera non magno pretio ematur, & facile ex eo aurum rurfus ſeparetur. Atque ex hoc quidem ære plumbato conficitur plumbum auriferum, quod ex reliqua materia ſulphurata ſubſidet. Nam quamvis aurum magis ſit affine cum ære, quam cum plumbo; quia tamen ſulphur ad æs potius, quam ad plumbum adhæret, facilius cum iſto puro, quam cum illo ſulphurato aurum conjungitur. Tam autem ſulphuratio, quam plumbatio æris auriferi eodem fere modo peragitur, ac in ære argentoſo. Sed quoniam plumbum magis eſt affine cum argento, quam cum auro, ideo non tam perfecta eſt auri ac argenti ex ære ſecretio. Si plumbei additamenti loco uſurpetur vena plumbi ſatis

Auri ex ære ſecretio quid poſtulet.

Vol. I.

H h

sulphurea, necesse non erit æs separatim sulphurare; sed sufficiet hoc ipsum una cum illa excoquere. Nam sulphur, quod in vena inest, cum magis affine sit cum ære, quàm cum plumbo, isto relicto, cum illo conjungetur, atque hoc modo æs sulphurabitur. Hinc ea plumbi portio, quæ sulphur dimisit, formam metallicam recuperabit, atque adeo aurum combibet, unaque cum eo ex reliqua materia liquefacta subidet.

CCXVI.

Coactio auri in
æs qua ratione
perfici possit.

Itaque ut aurum purum, cujus non multa portio in ære inest, conficiatur, necesse est primo æs sulphurare, deinde aurum in plumbum cogere, denique ipsum ex plumbo secernere. At si tam parum auri in ære sit, ut plumbationis, & lustramenti impensas nequeat cum scœnore refarcire, tunc danda opera est, ut illud primo in paucum æs cogatur: Nam ex paucò aurum minore plumbi mole secer-nitur, quàm ex multo. Quamquam autem, ut dixi, coactio auri ex ære valde difficilis sit, ea tamen tentari poterit hac ratione. Æs tam multum sulphuretur, ut ob sulphuris interpositionem aurum vix cum illo cohæreat. Illud ita sulphuratum cremetur, quò tanta sulphuris portio exhalet, ut ex eo recocto certum æris nigri pondus cum minima, quæ potest, sulphuris mole conjunctum existat. Quem in finem juvabit quoque paucum ferrum ad materiam, cum recoquitur, adjicere, quod sulphuris partem absorbeat. Nam quo minus æs nigrum sulphuratum est, eo majorem auri molem ex reliqua materia magis sulphurata combibit. Utile itidem erit cum recementis plumbeis æs recoquere, ut plumbum, quod ea dimittent, cum ære nigro, quod conflagabit, conjungatur, atque ita

major auri quantitas præcipitetur . Quod si in mistura argentum insit, ditius auro æs fiet. Nam argentum, cum facile sulphur dinitat, atque cum auro jungatur, in æs una cum auro se recipiet. Hoc ergo modo conflabitur paucum æs cum auro conjunctum, in quo inerat plumbum paucum, vel etiam argentum, si alterutrum in mistura fuerit. Ex isto autem ære aurifero aurum secernere oportebit vel plumbatione, vel lustramento, prout magis e re esse Metallico videbitur.

CCXVII.

Quòd liquatio inepta sit auro ex ære secer-
nendo, quodque plumbationis, atque lustramenti
impensæ non mediocres sint, in causa est, cur
Metallici certam auri portionem in ære relinquant.
Sic etsi in vena cuprea, quæ ad Neufolam in Un-
garia excoquitur, tantum auri sit, ut non raro sim-
plici lotura ex eo eliciatur, attamen ex ære, quod
illa suppeditat, aurum confici non solet. Utile au-
tem foret, nec difficillimum eam ita tractare, ut
quædam auri coactio in paucam æris molem exi-
steret, ex quo deinde plumbeis additamentis non
multâ impensâ illud secerni posset.

CCXVIII.

Cum aurum in plumbo inest, vidimus illud
lustramento secerni. At si paucum illud sit, per-
se præstaret, illud primò in paucam plumbi mo-
lem cogere, ut nempe minoribus sumptibus lu-
stramentum perficiatur. Idipsum utiliter quoque pe-
ragi posset, si loco auri argentum paucum in plum-
bo inesset. Oporteret autem plumbum primùm sul-
phurare, deinde illud ita recoquere, ut exigua ejus
moles existeret, quæ plerumque metalli pretiosi par-

Auri ex plum-
bo secretio.

Auri vel argen-
ti in plumbum
coactio.

tem combibat. Certe argentum facile in plumbum cogitur, eo quòd cum hoc valde affine sit. Hinc est; ut tum præsertim, cum vena plumbi argentosi in fornace concamerata excoquitur, plumbum, quod primo conficitur, pleramque argenti in vena latentis partem in se contineat, minorem quod secundo ex fornace effluit, minimam quod istud consequitur. Aurum vero etsi minus, quàm argentum affine cum plumbo sit, quoniam tamen cum sulphure nullam habet affinitatem, plumbo autem facile forma metallica redeat, cum isto conjungetur, reliquâ reliquâ materiâ sulphuratâ.

CCXIX.

Metalli unius in alterum, cum quo mixtum est, coactionem generatim spectare debet Metallicus, utpote quæ utilis accidit tum præsertim, cum paucum metallum pretiosum a vili secernendum est. Quoniam vero id sulphuratione metallorum maxime perficitur, hæc autem sulphurata perinde fere se habent ac venæ metallicæ, idcirco, quoties opus erit, studebit, metalla cogere in ipsa venarum excoctione.

CCXX.

Æris ex plumbo secretio.

Secretio ex mistura trium vel plurium metallorum.

Ex his, quæ hætenus dixi, patet, qua ratione tractandæ sint reliquæ metallorum misturæ superius commemoratæ. Sic si æs a plumbo secernendum sit, & utriusque multa moles in mistura fuerit, ex hac liquefacta plumbum residebit; si vero paucum æs in ea insit, despumatione detrahetur; si denique parum plumbi in se contineat, istud, ex ære, cum purgabitur, in scorias se recipiet. Quod si tria vel plura metalla in mistura insint, plerumque ea secernere oportebit hac ratione. Nempe si argentum cum auro, & ære, vel plumbo mixtum sit, primò aurum

cum argento ex ære vel plumbo separetur, deinde aurum ex argento. Si argentum vel aurum cum ære & plumbo mixtum sit, primo plumbum argenteum vel auriferum ex ære eliciatur, deinde argentum vel aurum ex plumbo. Si denique mixtura in se contineat aurum, argentum, æs, & plumbum, tunc primò plumbum cum auro & argento ex ære secernatur, deinde auri & argenti mixtura ex plumbo, denique aurum ex argento. Quæ omnia quibus operis perficienda sint, satis est a nobis explicatum.

CCXXI.

Restat ut de sicca exhalatione dicam. Ac exhalatio quidem, seu evaporatio nihil est aliud quàm volatilis materiæ explicatio, quæ ascensu in aërem plerumque fit. Ideo autem materia aliqua volatilis est, quod vel levior aëre sit, vel in aëre solubilis. Ignis ipse, etsi mobilitatem summam præferat, attamen ob recensitas causas volatilis est. Certe enim levior est aëre, atque in eo solubilis, neque ardere potest, seu ex inflammabilibus, & ardentibus corporibus evolare, nisi assiduus aer ad ipsum aspiret. Quoniam vero ex corporibus, quæ se nobis in conspectum dant, unum ignem novimus levio-rem aëre, in eoque maxime solubilem, ideo ille unus per se volatilis haberi debet; reliqua ab ipso volatilia fieri dicemus. Attamen cum alia aliis facilius ignis vi evolent, Chymistæ ea, quæ in primo genere sunt, volatilia dixerunt, fixa, quæ in secundo. Verum quemadmodum nullum corpus præter ignem per se volatile est, ita nullum existit, quod adjumento ignis volatile non sit. Nam ipsum quoque adamas, quod ceteris magis fixum videtur, in luculentissimo igne evolat. Quamobrem,

Exhalatio quid sit.

Cur materia aliqua volatilis sit.

cum corpus aliquod fixum appellatur, id eatenus accipiendum est, quatenus in luculentis fornacum, ignibus in vapores non resolvitur: quinimo id nihil aliud sonat, quàm collationem corporis minus volatilis cum alio magis volatili, vel potius corporis magis fixi, cum alio, quod minus fixum sit.

CCXXII.

Quibus ex causis ignis volatilia faciat corpora.

Quæ corpora magis volatilia sint.

Multis autem ex causis corpora ignium vi evolvant; primo quòd calore ad ipsa accedente, magis solubilia in aëre sint, deinde quòd ignis, dum certa vi evolat, eam cum corporibus, quibus cum conjungitur, aut quæ offendit, communicet. Accedit ea ob calorem rarefcere, ita quidem ut, etsi forte leviora aëre non evadant, tamen semel in aëre sublata, in eo facilius hæreant suspensa. Quocumque tandem modo id corporibus accidat, certe hæc evolare non possunt, nisi in subtiles particulas, seu vapores resolvantur. Hinc magis volatilia haberi debent, quæ ignis facilius in vapores resolvere, atque elevare potest. Facilius autem ita resolvuntur ea, quorum minimæ partes minus inter se cohærent, quæ præterea minus gravia sunt, quæ denique magis dilatari queunt. Nam, quo minus arcte corporum partes inter se cohærent, eo minus igni resistunt; quo leviora sunt, facilius ignium vis attollit, & in aëre sustentat; ex quo denique magis dilatari possint, fit, ut eorum majus præ massa volumen evadat, atque ita ad aeris raritatem magis accedant. Quamobrem, cum fluidorum partes vix inter se cohæreant, ea magis volatilia sunt, quàm firma corpora; atque adeo intelligitur, cur ex quatuor vulgaribus corporum elementis, aëre nempe, aqua, igne, & terra, hæc tantum postrema fixa sit. Quin etiam, cum corpus quodlibet ex

his elementis constet, patet ea minus esse volatilia, quibus minor terræ portio inest. Inde etiam liquet, cur aurum magis quàm cetera metalla fixum sit, cur inter *femimetalla* seu quasi metalla Bismutum, Cobaltum, & Nicolum ceteris minus volatilia sint; iisdem vero omnibus magis volatile sit hydrargyrum. Aurum enim ceteris corporibus gravius est, atque ex partibus constat tenacissime inter se coherentibus, utpote quod maxime ductile est, & liquatu multum difficile; Bismutum vero est gravius reliquis quasi metallis, quæ firma sunt; Cobaltum vero & Nicolum valde gravia sunt, & liquatu difficilia; hydrargyrum denique fluidum est & multum dilatatur.

CCXXIII.

Hæc exhalandi facilitas, quæ in quibusdam corporibus se prodit, facit, ut cum materia aliqua ex multis constet, una ab alia possit exhalatione secerni. At ut id recte fiat, necesse est, ignem vel calorem accommodare tum ad facilitatem, qua volatile exhalat, tum ad coherentiam, qua volatile cum fixo conjungitur, tum ad vim, qua fixum in igne persistit. Nam si igni nimium leni corpus subji-ciatur, quod difficile exhalat, aut nimis tarde, aut nullo modo secretio fiet; contra si ignis plus æquo luculentus corpori admoveatur, cujus pars volatilis facile in vapores resolvitur, ex hoc non modo ista erumpet, verum etiam fixam secum pertrahet, præsertim vero si hæc aut multum cum illa cohereat, aut in igne non multum persistat. Generatim tamen satius erit, initio lenem ignem corporibus admove-re, quo primum ea vis minuatur, qua volatilis materia cum fixa conjungitur; quo facto certius illa ab ista evolebit, cum ignis augebitur.

Quid præca-
vendum sit,
cum volatile a
fixo secernitur.

Quibus modis
materia volati-
lis a fixa secer-
ni solet.

Quibus ex caus-
is volatilis a fi-
xa citius evol-
let.

Hinc porro plura adinventa sunt artificia, quibus Chymistæ, ac Metallici contendunt volatilem materiam a fixa secernere. Ea tamen ad duo præsertim revocantur, quorum unum peragitur in vasis apertis, alterum in clausis. Ac primum illud *evaporatio*, alterum *destillatio* appellari consuevit, quæ, cum materiam suppeditat minime humidam, *sublimationis* nomine singillatim designari solet. Quæcumque tandem ratione hoc secretionis genus perficiatur, id quod volatile in mistura inest, eo citius exhalat, quo ampliorem illa obtinet superficiem. Hoc enim modo major vaporum copia uno eodemque tempore ex ea evolare potest. Hanc ob causam plerumque materia minutim comminuenda est, & sæpius aliquo instrumento agitanda, & versanda, ut modo una modo altera ejus pars in superficiem retrahatur. Itidem eo magis materia exhalat, quo magis aer ad ipsam renovatur, isque densior est. Nam cum recens aer ad ipsam accedit, is certo motu fertur: quocirca ex ea depellit, ac detrahit vapores, quamquam crassiusculos, quos ignis vis attollere difficile posset; deinde aliò transfert priorem aërem, qui vaporibus quasi saturatus horum vix quidpiam potest in se recipere. Quo autem densior aer est, eo facilius vapores, etsi crassi, possunt ab eo sustentari, atque adeo ex fixa materia evolare. Hinc si aut ventus, aut flatus folium, quo densus aer renovatur, in eandem inspiret, hæc quàm citissime exhalat; sed præcavendum est, ne volatilis materia fixam quoque secum pertrahat.

Ex his intelligitur tardius exhalare corpora in

vasis clausis, quàm in apertis. Hinc Metallicus tunc solum clausis utetur, cum materia volatilis pretiosa fuerit, aut alio ex capite ei utilis futura sit, veluti cum hydrargyrum, quod aurum vel argentum ex venis, aut alia qualibet materia combibit, ex hisce metallis pretiosis secernere debet, aut cum aquam valentem, in qua solutum argentum est, ex isto separare contendit. At si volatilis materia vilis fuerit, aut non multa, præstat plerumque sinere, ut in aëre soluto, & libero evolet. Atque hac quidem exhalatione sicca, ac soluta Metallici plura perficiunt, veluti ustionem venarum, purgationem æris ex plumbo, secretionem stibii ex auro: quæ omnia principiis hætenus explicatis nituntur.

Quando ea secretionis in vasis clausis perfici debeat.

Quando in aperta.

CCXXVI.

At destillatio, sive uda, sive sicca, recte peragi nequit, nisi in receptaculis ad id apprime accommodatis, quorum unum excipiat materiam, cui ignis subjiciendus est, alterum vapores, qui ex illa evolabunt. Illud vero cum isto ita debet esse conjunctum, ut hoc alterum in loco frigidiusculo sit. Nam vapores, qui calore rarefiunt, & attenuantur, nisi refrigerentur, nequeunt densari & subsidere: quod si non subsidant, per capacitatem receptaculorum vi ignis hærent suspensi, atque adeo vel nullo modo, vel nimis tarde ex fixa materia possunt attolli, aut sublatis, iterum in ipsam recidunt. Refrigerati autem vel guttatim destillant in alterum receptaculum, si humidi sint, vel, si sicci fuerint, florum instar ad illud adhærent. Quoniam vero periculum est, ne vapores ignium vi dilatati, & in angustum spatium conclusi receptacula frangant; idcirco præstat exitum aliquem ipsis parare: id quod assequemur, si foramen, vel

Quæ cautiones adhibendæ, cum in clausis ea peragitur.

tubus mobili obturamenti instructus in eo receptaculo existat, in quod materiam imponi diximus: qui tubus hanc quoque utilitatem præbet, ut per ipsum quidpiam aliud ad materiam adjici, eademque aliquo instrumento agitari, & versari possit. Quin etiam quandoque utile erit receptaculis uti, quibus duo tubuli sint, ut per eos cursus aëri pateat: quo modo pars volatilis materiæ peribit quidem, verum citius exhalabit.

CCXXVII.

Secretio volatilis a fixo simplici solutione fit.

Hoc loco quæret fortasse quispiam, cui secretionis rationi accensenda sit destillatio, seu exhalatio. Cui respondebo, hanc ad eam referendam esse, quæ simplici solutione fit. Ignis enim vel per se, vel aëris adjumento materiam volatilem solvit, quæ admixta fixæ est; eaque ex hac minime soluta evolvendo secernitur. Quoniam vero eo facilius evolat, quo levior aëre est, idcirco hæc secretionis ratio est quasi contraria præcipitationi, quæ perfici nequit, nisi præcipitandum corpus gravius sit fluido, in quo solutum est.



LIBER QUINTUS

*De optima rei Metallicæ gerendæ
ratione.*

CCXXVIII.



Agnum sane opus, ac difficultatis plenum aggreditur, qui metallicam colere instituit. Nam & ipsa per se venarum fossio, & metallorum conflatura non sine magnis sumptibus, multisque curis peragi potest, & ei quoque, qui ex ordine, & ratione operas metallicas susceperit, aliquando res male cedit. Ac quatuor omnino sunt causæ, ob quas ejusmodi res in discrimen vocatur, nempe imperitia aut negligentia dominorum, eorumque qui laboribus præfunt; fraudes, quibus isti interdum utuntur; immoderati sumptus, quos domini existimantes se brevi ditissimos ex metallis evasuros faciunt; improvisi denique casus, qui aliquando incidunt, veluti cum fodina repente desinit metalla effundere. Hæc tamen ejusmodi non sunt, ut quemquam, qui facultatem habeat id, quod opus est, in sumptus erogandi, a cultu rei metallicæ deterere debeant. Profecto nullum est negotium, quod sub incertos fortunæ casus non nutet; nec, si repente fodina desierit metalla effundere, id gra-

Quibus ex causis res metallicæ aliquibus detrimentis sit.

Quomodo præcavendum id sit.

vius metallico est, quam mercatori; si navis mercibus onusta naufragio perierit. Quis tamen audiens navim naufragio periisse, mercaturam damnosam arbitrabitur? Non ergo improvisos casus ita verebitur Metallicus, ut ob id desperet de lucro ex metallis faciendo. In reliquas autem detrimentorum causas, quas commemoravi, non incurret, si non modo omnes artificii metallici partes, quas hoc opere explicandas suscepi, in animi notione reponat; verum etiam impensas consideraverit, quæ faciendæ sunt in metalla, & operam dederit, ut quodque opus efficiatur rite & diligenter. Quocirca, ne quidquam ad metallicum perfecte informandum deesset, de optima rei metallicæ gerendæ ratione, ac præsertim de ratione ac moderatione impensarum singillatim agere hoc libro constitui, in quo tamen ea dumtaxat persequar, quæ privatos homines facere decet. Nam si regiis sumptibus metalla consentur, ii non tam ex rebus ipsis, quam ex Principum munificentia æstimandi sunt.

CAPUT I.

*De iis, quæ Metallicus spectare debet,
antequam venæ alicujus fossionem
aggrediatur.*

CCXXIX.

In venarum
fossione septem
spectanda sunt.

Loci genus.

Metallicus, quemadmodum Georgius Agricola monet, fossionem venæ non suscipiat, nisi prius septem secum cogitaverit; loci genus, habitum, aquam, viam, salubritatem, dominum, vicinum. Loci quatuor sunt genera, montanum, collinum, vallestre, campestre, ex quibus priora duo,

nisi in præcipiti fuerint, fodiuntur facilius, quod in ea cuniculi agi possint, per quos exitus patet aquis, quæ fossionem laboriosam reddere, aut omnino impedire solent: posteriora vero difficiliora, præsertim cum in ea cuniculi nulli duci possint, atque adeo machinamentis, ad quæ magni sumptus necessarii sunt, aquam ex iisdem extrahere oporteat. Ad habitum loci quod spectat, videat nemorosus ne sit, an non. Ligna enim ad substructiones, quæ in fodinis fiunt, ad machinas, ad ædificia, ad venæ excoctionem necessaria sunt. Si locus sylvis careat, ejus fossionem omittat, nisi prope sit flumen, aut torrens, quod devechat ligna. Locum tamen etiam non sylvestrem subvertet, si illic vena auri, vel argenti fuerit, ex qua vel lavatione, vel hydrargyro metallum elici possit; aut si non multis impensis vena in vicinia devehere liceat, ubi omnes ad excoquendum opportunitates sint. Quod si locus vestitus arboribus sit, videat quoto tempore certam lignorum quantitatem suppeditare poterit. Ex eo enim conficiet, an & quatenus venæ fossio, atque excoctio ibi perstare possit. Consideret præterea, habeat ne perpetuo fluentem aquam, an semper vel aliquo tempore aqua careat, nisi torrens a vertice montium largo imbri conceptus defluerit. Si aqua careat ad operas metallicas necessarii, fossio erit deferenda, aut vena effossa devehenda erit in proximum locum, qui aquam suppeditet, aut denique ex fluvio, aut rivo, qui non longe absit, aqua canalibus excepta eo ducenda erit, ubi officinæ metallicæ extruuntur. Horum tamen utrumque auget impensas, eoque magis, quo longius absunt aquæ perpetuo fluentes. Idipsum faciet, si tam brevi tempore aqua in loco fluat, ut

Loci habitus

Aqua.

labores nimis cito intermittere debeant. Tunc vero videat, an aquæ in stagnum colligi possint, ex quo defluere permittantur, cum reliquæ deficient. Viam quoque, qua a proxima regione, & vicinitate itur ad fodinas & officinas metallicas, perlustret, ut cognoscat bona ne sit, an mala, brevis an longa, equis ne, & plaustris quoque accommodata sit. Nam mala, & longa via auget rerum invehendarum impensas, præsertim si equis, & plaustris inaccesa sit. Multa autem sunt, quæ in loca metallis secunda invehere, atque ex iis evehere oportet, maxime cum pleraque eorum nullas ferant fruges, atque adeo necesse sit, ut mercenariis importentur omnia, quæ expetuntur ad usus vitæ necessaria. Quamvis porro loci metallis abundantes plerumque salubres sint, omnino tamen, si certa pestilentiae signa ostenderint, sapientis Metallici erit, eos vel fructuosissimos non fodere, nisi facile possit huic malo afferre remedium, veluti si pestilentia oriatur ex aquis stagnantibus, quæ vapores noxios exhalent, videbit, an ipsas possit in proximum lacum vel flumen derivare. Satis autem non habeat certus esse de salubritate loci, in quo officinas metallicas ædificare constituit; sed insuper consideret, an a ventis circumfluetur. Secus enim fumus, quem una cum noxiis vaporibus quædam venæ, cum uruntur, aut excoquuntur, exhalant, valetudini incolarum, atque operatorum infestus esset. Metallicus præterea dominum loci intueatur, bono ne animo, & in metalla propenso sit, & quibus conditionibus eorum fossionem permittat. Vicinum denique spectet, quem si habeat inimicum, incursionibus hostium metalla erunt exposita.

viz.

Salubritas.

Dominus loci.

Vicinus.

CAPUT II.

De impensis in metalla faciendis :

CCXXX.

CUM quis metalla ex venis conficere instituit, eas vel ipse quærit, vel ab aliis inventas emit. Qui præditi sunt parvis opibus & facultatibus, soli non audeant impensas in venis inquirendis facere. Nam plerumque venæ non facile se subjiciunt in aspectum quærentis, sed intus latent in terræ visceribus. Itaque fit, ut illi, dum indicia venæ persequuntur, omnem pecuniam confundant in fibris secandis, ac lapidibus eruendis; atque ita cogantur a vena recedere tum plane cum propius ad ipsam accesserint: quo modo isti non sibi, sed aliis, qui postea in fodinam venerint, viam, qua ad venam itur, aperiunt. Plures sunt homines ejusmodi, qui parvis præditi opibus, & plerumque nulla arte instructi, quadam tamen cupiditate divitiarum mox congerendarum obcæcati omnem pecuniam suam in venis inquirendis exhausserunt: quos quidem ex ipsorum ore, incessu, sermonibus facile est cognoscere. Perridiculum vero imprimis est, ipsos audire de fortuna sua loquentes. Alii dolent se in effodienda vena, quæ initio metalli divitem se ostenderat, omnia profudisse; alii maledicunt fortunæ, quæ nihil umquam ne mediocre quidem ipsis obrulerit, alii denique oleum, & operam se perdidisse conqueruntur, sed adhuc aliquid ipsis restasse ajunt, quod in fossione certæ venæ ponere cogitant. Hanc vero commemorant virgulâ divinatoriâ, cujus mira quædam proferunt, detectam fuisse; narrant historias vel potius commenta hominum, qui clam in ea vena laborantes

Cut venarum
inquisito non
multum utilis
sit.

Est venæ in-
venæ emptio
Metallico uti-
lior sit.

Metallus
sumptum co-
mune sibi
cum aliis po-
nat in venæ
fossione.

divites facti fuerint. Sed relinquamus homines istos, quorum fortunam commiserari potius decet, quam irridere; atque istorum exemplo discant alii venas non consecrari, nisi tantis opibus sint præditi, ut fossionem ad optatum exitum possint perducere. Quæ spes quoniam multos sæpe fallit, idcirco magis sibi consulat Metallicus, si venas ab aliis jam detectas emat. Id vero pluribus modis facere potest. Vel enim venam, quam domini fodinarum effodiunt, emet; vel locatione conductione acquirat jus venæ in ipsis effodiendæ; vel denique ipse aut emptione aut alio titulo fiet fodinarum dominus, in quibus venam ipse secari curet. Ac venæ quidem jam effossæ emptores minus sane divites fiunt, quod carius eam solvant, quàm si suo periculo eam effoderent. At certius faciunt rem, quod nonnumquam fodinæ inopinato desinant metalla effundere. Hinc, qui metalla suis sumptibus fodit, certiorum agendi rationem tenebit, si eos ponat non in fossione venæ unius, sed plurium. Nam si uni tantum fodinæ fidat, spes sæpe eum frustrabit; contra plurium fodinarum spes ipsum non deferet. Ex his enim aliquæ damnum in una aut altera factum cum sænore resarcient. Hoc præterea rationibus Domini non ditissimi maxime conducit, sumptum communem sibi cum aliis ponere in earumdem fossione. Cum enim multum pecuniæ in eo opere infumendum sit, nec semper votis fodinæ respondeant, non decet quempiam omnes suas opes certas & bene constitutas committere dubiæ fortunæ. Socios autem negotii quærat, cum fodinæ venam metalli satis divitem, & copiosam adpromittunt. Nam in partem negotii ancipitis non facile quis venit, nisi cum secunda spes ipsi affulgeat.

CCXXXI.

Sive autem quis solus, sive cum aliis communiter pecuniam in fodinarum fossione, ac venarum excoctione ponere cogitaverit, id facere non aggregiatur, nisi prius ea consideraverit, quæ capite præcedenti exposui. Ad hæc in fodinas ipsas veniat, vel aliquem in ea re bene versatum ac probum virum mittat, & diligenter venarum naturam contempletur, præsertim vero si de ipsis emendis agatur. Nam venditores fodinarum eas sæpe efferunt fictis, commentitiisque laudibus, ut eas carius, quam æstimentur, possint divendere. Contra alii detrahunt de earum æstimatione, ut ceteros ab emptione deterreant, atque ita parvo pretio eas ipsi mercari possint.

CCXXXII.

Porro cum Metallicus locum ad fossionem venarum idoneum, & venas, quarum vel forte, vel emptione, vel alio titulo dominus factus fuerit, fodere, & excoquere constituerit, tunc cogitet de fossionis modo, de extruendis ædificiis, fornacibus, ceterisque ad ea opera necessariis. Quo in negotio impendendi est modus quidam ei diligentissime retinendus, ne [quod multis solet accidere] in his rebus præparandis argentum omne profundens, aut cogatur grave ære alieno se obstringere, aut a suscepto negotio cum magno detrimento recedere. Ac meo quidem consilio eas tantum impensas initio faciet, quarum fœnus metallorum contiatura mox reddere possit. Nam si secunda fortuna ipsi venam abundantem metallis elargiatur, domicilia, fornaces, machinas, ceteraque augere facile poterit; sin adversa inopem, & sterilem, aut excoctioni ineptam, non magno detrimento ei erit, a venarum fossione,

Vol. I.

K k

Qui firmpendendi modus retinendus in ædificiis extruendis.

vel excoctione recedere. Est autem viri non modo in re metallica multum versati, verum etiam ingeniosissimi, maximeque solertis impensas ejusmodi apte moderari. Nam oportet & ædificia ita extruere, ut commodè amplificari possint, & efficere, ut res multæ, quæ unum dumtaxat usum solent præstare, pluribus initio inserviant. Sed hæc quoniam diversis rerum, ac locorum opportunitatibus accommodata esse debent, attigisse sufficiat; reliqua paulo fusius persequamur.

CCXXXIII.

Atque imprimis cum, qui suo periculo metallicam colit, monitum faciam, ut diligentiam nimiam nullam putet in deligendis viris idoneis ad ea munera, ex quibus optimus rei metallicæ exitus maxime pendet. Triâ autem sunt munera ejusmodi, quorum alterum sustinet fodinarum Præfectus, alterum Præses operarum metallicarum, tertium denique Præfectus rationum. Quod si aliquod horum vel ipse dominus, vel aliquis eorum, cum quibus communes impensas in metalla facit, possit & velit sustinere, id ipsi magis accommodatum, atque utile erit.

Quanti interitû
dominos labo-
ribus viros ido-
neus præficere.

Triâ sunt præ-
cipua munera
metallica.

Fodinarum
præfectus.

Præses opera-
rum metalli-
carum.

Fodinarum Præfectus omnibus laboribus præest, quæ sub terra sunt; atque adeo ad ipsius officium pertinet fossoribus venas secandas, & locum, quo vena secta transferenda sit, assignare; præscribere, qui putei, & cuniculi ducendi sint; videre, an qua parte fodina fulcienda sit; cognoscere de venarum directione, situ, & natura; machinas sive spiritales, sive tractorias, sive scanforias extruere. Operarum metallicarum Præses curam gerit eorum omnium, quæ sunt ad metalla jam effossa; venarum nempe delectus, comminutio, lavatio, ustio, excoctio, metallorum purgatio, artificia venarum ex-

periundarum, fornaces, instrumenta, machinæ, quæ ad has operas metallicas usurpantur, in ejus officio sunt. Denique Præfectus rationum curam gerit officinarum, in quibus ea asservantur, quæ operariis sive ad operas metallicas, sive ad victum necessaria sunt; ejus est hæc ipsa illis suppeditare, mercedem eisdem solvere, conclavia, quibus vel carbones; vel ligna, vel metalla concluduntur, custodire, dati denique & accepti rationes in libros diligenter referre. Cuique horum munerum, cum in fodina recenti labor suscipitur, poterit unus sufficere aliquot ministris adjutus. At cum fodinæ venam abundantem suppeditaverint, & operæ metallicæ multum creverint, necesse erit unumquodque munus, prout res postulaverit, in plures viros partiti, quorum singulis certum officium attributum sit.

Præfectus rationum.

CCXXXIV.

Præfectis autem laborum metallicorum ac ministris mercedem dominus non constituat in diem, aut in mensem, aut in annum; sed loco mercedis, aut saltem ejus partis aliquæ, eos certa proportionem participes faciat lucri, quod ex metallis capiet. Hoc enim modo fiet, ut, quoniam plerumque sua quisque curat, aliena negligat, non possint illi sua curare, quin aliena curent, nec aliena negligere, ut sua non negligant: ac nisi omnes mali sint, & in domini detrimentum conspiraverint, alius non patietur alterius negligentia, aut fraude ejus res perire.

CCXXXV.

Ad fossiores quod pertinet, pluribus modis cum ipsis pacisci dominus potest. Vel enim certam mercedem in diem, aut in mensem, aut in annum cui-

Qua ratione possit dominus pacisci cum fossoribus.

que eorum assignabit, vel pacta mercede certam operam, quæ vel in definita venæ mole secanda, vel in definito ejus pondere effodiendo sita est, ipsis locabit. Quocumque modo cum ipsis paciscatur, in eos rejiciat onus sibi comparandi ea omnia, quæ ad venæ sectionem sunt necessaria, cujusmodi sunt ferramenta, pulvis *pyrius*, quo venæ, & lapides duriores subvertuntur, oleum, vel alia pinguis materia, qua lucernarum flamma alitur. Multi enim operariorum aut fraudulenter vendunt res, quas ipsis dominus suppeditat, aut eas per desidiam sinunt frustra perire. Atque has quidem res omnes dominus habebit in promptu, ut easdem ipsis det; at pretium earum detrahet de mercede, quam ipsis solvere debet. Quod idem faciat, si ipsis suppeditaverit, quæ ad victum necessaria sunt. Id autem facere utile ipsi erit. Nam lucrum illud ipse faciet, quod in venditione earumdem rerum alii facerent.

CCXXXVI.

Primus paciscendi modus domino est multum periculosus. Cum enim operarii, sive parum, sive multum laboraverint, de pacta mercede certi sint, negligenter munus suum perficiunt, atque, ut negligentiam celent suam, aliquando, si venam duriusculam offendant, ejus loco saxa metalli inania secant. Quocirca sibi magis providebit dominus, si altera ratione cum fossoribus paciscatur. Ac si quidem agatur de cuniculis agendis, vel puteis duendis, ex quibus metallum non elicitur, aut si vena effodienda metalli *ëgena* sit, certum pretium ipsis constituat pro definita venæ mole, aut mensura, puta sex pedes æquante, quam effodient; iisque, cum in vena secanda laborare debent, hanc

conditionem adjiciat, ut ipsorum sit venam a lapidibus secernere: quod si diligenter non fecerint, eorum sumptibus secretio perficienda sit. At si vena metalli satis dives fuerit, utilius ei erit, certam pecuniam fossoribus solvere pro quolibet centumpon-
 dio venæ ex lapidibus delectæ, quam secuerint, & in definitum locum transfulerint. Ut vero ipsos alacriores ad laborandum faciat, hanc conditionem adjiciat, ut si intra datum tempus, exempli causa intra mensem, certum venæ pondus, puta non plus quam centum centumpon-
 dia secuerint, certam mercedem accipiant pro unoquoque centumpon-
 dio; si fere ducentum centumpon-
 dia, octava vel sexta pars mercedis cuilibet centumpon-
 dio accre-
 scat; quarta autem vel etiam tertia, si plus quam ducentum centumpon-
 dia venæ intra illud tempus suppeditaverint. Ad hoc opus operarios quasi in manipulos dividat, itaut ii, qui cuique manipulo adscripti sunt, communiter definitam operam con-
 ducant, & mercedem accipiant. Hoc enim modo fiet, ut unus alterum non patiatur esse aut desi-
 dem, aut fraudulentum; atque dum suas quisque utilitates curabit, domini quoque utilitati interserviet.

CCXXXVII.

Merces autem variabit pro diversa duritie ve-
 næ secandæ, ac distantia loci, in quem transferen-
 da est. Quamobrem dominus imprimis consideret,
 quoto tempore certum venæ pondus effodi possit. Exempli causa si venâ durissima fuerit, quinquaginta operarii poterunt quolibet mense effodere du-
 centum ejus centumpon-
 dia, si pulvere pyrio utan-
 tur. Nam sine eo vix octo vel decem centumpon-
 dia secare possunt. Ex hoc autem conficiet, unum-
 quemque per mensem posse effodere quatuor venæ

Quota venæ
 portio possint
 per mensem ef-
 fodi.

centumpondia. Cum itaque in regione, in qua res ad victum necessariæ mediocri pretio emuntur, fossorum quisque saltem libras XXX. lucrari unoquoque mense debeat, facile erit conficere quota mercede ipsis certa opera locanda sit. Ad hæc mercedi cuiusque fossoris adjungenda est pecunia, quam impendere debet in oleo, pulvere pyrio, feramentis, aliisque instrumentis comparandis, quæ impensæ XII. circiter libras quolibet mense æquant. Denique quinquaginta fossoribus quindecim saltem ministri necessarii sunt, qui venam a lapidibus deligant, eamque ad præfinitum locum transferant; horum autem unusquisque XVIII. vel XX. libras lucrari per mensem debet. Quocirca, si fossorum sit istos solvere, necesse erit, cum certa opera illis locatur, hujus quoque impensæ, quas in ministros facere debent, habere rationem. Eos autem moneat, ne a præscriptis fodinarum Præfetti discedant, cujus est ipsos docere, quæ ad rectam fossionis rationem conducunt. Imprimis autem ipsos doceat, quomodo agendi sint cuniculi illi, quibus ope pulveris pyrii saxa, & venæ facile franguntur. Fossores enim solent foramen valde latum facere, cum unum sufficiat, quod latum sit duas tertias, vel tres quartas pollicis partes; iidemque sæpe bini in quolibet cuniculo agendo laborant, quorum unus acum ferream, alter malleum gerit, cum tamen unus idemque utramque rem præstare possit. Quæ quidem emendatio consuetudinis in utilitatem domini cedit. Cum enim hac laborandi ratione minus temporis pulverisque pyrii infumatur, minorem mercedem operariis constituet, quam si aliter opus peragerent. His bene perpenſis Metallicus cognoscet, quota impensa singulis mensibus

ei faciendā sit in fossione venarum, cui adjunget alias impensas minores, quæ in itinera, quæ in machinas, aliaque facere oportet: quæ simul sumptæ ducentum & quinquaginta libras fere æquabunt.

CCXXXVIII.

Sunt aliqui fodinarum domini, qui uni locant operam venæ effodiendæ ea conditione, ut ei pro quolibet ejus centumpondio certum pretium solvant. Hi certe multis molestiis curisque hoc modo se liberant. Verum, cum operæ conductor id unum spectet, ut nempe minimis, quibus potest, impensis venam effodiat, non curat substructionibus fodinam, cum opus est, fulcire, atque eam quoque venam effodit, quæ fulcri loco in fodina esset relinquenda: quibus ex causis periculum saepe est, ne fodinæ pars aliqua corruat, quod dominis magno detrimento est. Fit etiam nonnumquam, ut conductor, si plures venas inveniāt, earum aliquam metalli divitem obtegat, ut deinde, postquam locationis tempus præterierit, & domini fodinam aut metallo vacuam, aut ejus non multum divitem putaverint, ipse fodinam parvo pretio emat: quam fraudem fodinarum quoque Præsides, vel aliquem fossorum aliquando adhibere plura exempla loquuntur.

CCXXXIX.

Dixi de impensarum moderatione, quæ in fossione venarum sunt, nunc eas exponam, quæ in venam jam effossam faciendæ sunt. Primum autem ædificare oportet domicilia, in quibus locantur fornaces, pila, lavacra, & foci, in quibus vena, aut pyritides uritur. Officinæ præterea extruantur, in quibus ferramenta, aliaque instrumenta ad operas metallicas necessaria, itemque res omnes, quæ ope-

Quæ preparanda sunt ad venæ excogitationem.

rariis suppeditari debent, asservantur, atque ad has officinas domus sit, in qua Præfectus rationum, aliique Ministri habitent, & in qua locus quoque sit dominis fodinarum, cum eo se contulerint. Quod si nulla in vicinia sit regio, quo se noctu conferre operarii possint, casæ extruendæ erunt, in quas ipsi se recipiant. Casa denique carbonaria paratur, itemque lignaria, si lignis opus sit vel ad venas urendas, vel ad eas in fornacibus concameratis excoquendas. Ædificia ea ratione dominus extrui curet, quam suis locis exposui, atque ita, ut facile, cum opus fuerit, amplificari possint. Quocirca eorum quoque, quæ postmodum adjicere cogitat, effigies diligenti delineatione exprimi curet, ut ex ordine omnia procedant.

CCXL.

Impensæ in
preparatione &
excoctione ve-
narum.

Postquam omnem ædificiorum impensam consideraverit, videat quot, & qualibus operariis opus habeat ad operas metallicas peragendas. Venarum delectum, & lavationem mulieribus quoque demandare poterit, quibus minor quam viris merces tribui solet. Cum lotoribus paciscatur, ut certum pretium ipsis solvat pro quolibet centumpondio venæ diligenter lotæ. Experimentis autem constituat, quot centumpondia ejus venæ, quam ipsi fodina suppeditat, possint dato tempore lavari, ne scilicet in pretio lotoribus constituendo multum erret. Plerumque autem impensæ, quæ per mensem fiunt in lavatione venæ a machina ex novem pilis composita comminutæ, æquant fere libras tercentum. Ad venæ ustionem quod spectat, huic si in focus peragatur, unus alterve præerit, qui initio operum alia quoque munera gerere poterunt, veluti venæ delectum, aut comminutionem. At unaquæque for-

nax, in qua vena excoquitur, duos excoctores, duosque ministros plerumque postulat. Excoctoribus aut definitum stipendium assignet, aut certam mercedem constituat pro quolibet centumpondio metalli, quod constabunt, atque in ipsos quoque poterit onus rejicere mercedis solvendæ eorum ministris. Sed cum de eo metallo agitur, quod purgare oportet, uti ferrum est, aut cum vena excocta pyritidem sive æreum, sive plumbeum suppeditat, eam conditionem adjiciat, ut ex quolibet centumpondio venæ definitum pondus aut metalli purgandi, aut pyritidis conficere debeant. Facile enim est excoctionem ita moderari, ut plus ferri crudi, aut plus pyritidis existat. Sed id dominis nullo emolumento esse solet. Nam plus de ferri pondere, cum purgatur, aut pyritidis, cum recoquitur, perit.

CCXLI.

Impensis hætenus commemoratis alias adjiciat, quæ in vectores, bajulos, instrumenta, ligna, carbonēs, aliaque faciendæ sunt. Imprimis rationem habeat carbonum molis, qua indigebit. Consideret autem ligna cum in carbonem vertuntur $\frac{1}{2}$, vel etiam $\frac{1}{3}$ ponderis sui amittere, eoque in opere carbonariis pro qualibet lignorum mensura CXII. pedes cubicos æquante mercedem unius saltem libræ solvendam esse.

CCXLII.

Atque hæc generatim dicta sint. Nunc pauca adjiciam de impensis præcipuis, quæ ad singula venarum metallicarum genera facere oportet. Ac primo si venæ auri vel argenti excoquendæ sint, pa-

Auri vel argenti.

Vol. I.

L I

fornax, in qua lithargyrus in plumbum iterum re-
ducitur. Sit quoque in promptu plumbum, quo me-
tallum pretiosum ex venis elicitur. Si præterea au-
rum ab argento secernendum sit, aliud domicilium
extruatur, in quo aqua valens conficitur, & ea se-
cretio peragitur. At si aurum vel argentum hydrar-
gyro eliciendum ex vena sit, Metallicus his indigebit:
primo pilis vel molis, quibus vena comminuitur,
secundo lavacris, si vena metalli egena fuerit, ter-
tio molendinis, in quibus aurum vel argentum cum
hydrargyro jungitur, demum fornacula, in qua hy-
drargyrus, qui cum metallo pretioso post expressio-
nem junctus remansit, destillatione, ab isto secerni-
tur, ipsumque metallum pretiosum in massulas fun-
ditur.

CCXLIII.

Cupri. Venarum cupri excoctio postulat pila, lava-
cra, focos venæ, & pyritidi urendis, altam vel
mediam fornacem, focum, in quo æs nigrum pur-
gatur. Si præterea metallum pretiosum, puta ar-
gentum in se contineant, ea quoque parare oport-
tebit, quæ ad ejus secretionem faciunt. Sunt autem
fornax, in qua æs nigrum cum plumbo conjungi-
tur, & in panes formatur, altera fornax, in qua
panes isti leni igni subjiciuntur, ut plumbum ar-
gentosum dimittant, denique ea, quæ paullo ante
dixi necessaria esse ad secretionem metalli pretiosi a
plumbo.

CCXLIV.

Plumbi. Ad excoctionem venarum plumbi requiruntur
abaci, pila, lavacra, foci, in quibus vena vel py-
ritides uritur, fornax alta vel media. Sed pro fo-
cis, & fornace vulgari, utilius usurpabitur fornax
concamerata. Si argentum vel aurum in plumbo

insit, ad ejus secretionem ea quoque erunt in promptu, quæ paullo ante dixi.

CCXLV.

Venæ stanni eundem fere rerum apparatus Stanni. postulant ac venæ plumbi; sed fornax alta esse debet VIII. vel X. pedes, lata unum.

CCXLVI.

Denique, ut ex venis ferri metallum purum constet, hæc plerumque necessaria sunt. Ferri. Latus malleus venæ comminuendæ, si dura fuerit; lavacra si vena palustris & impura est; alta fornax; foci vel fornaculæ, quibus ferrum purgatur; malleus, quo purgatum procuditur. Foci duo cum malleo uno, vel etiam duobus in eadem officina locantur, in qua sex vel ut summum septem operarii laborant, nempe magister unus, quatuor ministri, & duo famuli, quorum munus est, carbones in officinam invehere, & scorias ex ea evehere. Officinæ dominus cum magistro paciscatur, ut ei definitam pecuniam solvat pro quolibet centumpondio ferri puri, & procusi, quod conficiet, atque in ipsum rejiciat onus solvendi ministros, & famulos. In loco autem carbonibus non abundanti poterit quoque cum magistro pacisci, ut ei certam carbonum molem pro quolibet centumpondio ferri crudi supeditet, ita quidem ut, si majorem aut minorem quantitatē combuserit, ei damno vel emolumento sit. Consideret autem dominus ad ustionem 1500. vel 2000. centumpondiorum venæ comburi solere 8500. pedes cubicos carbonum, quorum pretium æquat libras circiter 225.; in amplissima autem fornace unoquoque mense excoqui posse molem venæ, quæ æquet 2200. pedes cubicos, seu quæ sit pondo 2200. centumpondiorum, atque ex ea confici 1220.

centumpondia ferri crudi, ex quibus, cum purgatum & procusum fuerit, 900. circiter centumpondia restabunt. Porro in duobus illis focis unoquoque mense purgari simul & procudi solent 300. ad 360. centumpondia ferri, & ad unumquodque centumpondium ferri procusi comburuntur 100. circiter pedes cubici carbonum.

CCXLVII.

Quæ agere debeant Metallici, ut labores recte procedant.

Itaque qui in aliquam venam metalli participem impensas facere instituit, primum consideret ejus naturam, & decernat, quam rationem ejus tractandæ tenere velit, tum videat impensas, quæ unoquoque mense in eam rem faciendæ sunt, & quam metalli quantitatem eo tempore ex ea constitutus sit; deinde in unam summam congerat pecuniam, quam in metalla conflanda impendere debet, itemque eam, quam ex metallo conflato conficiet; atque hoc modo cognoscet, utrum metallorum conflatura ei possit cum sænore pecuniam reddere, quam in ea impendet, an vero plus in illa detrimenti sit, quam in metallo conflato emolumentum. Quod si cognoverit e re sua esse, venam non deferere, tunc demum operarios ad operas metallicas mittat, ædificia construat, & reliqua ex ordine præparet, quæ ad hanc rem facere dixi. Postquam vero omnia bene disposuerit, & labores incœpti fuerint, non abjiciat eorum cogitationem, neve eam omnem in Præsides rejiciat. Magni enim refert ipsum interesse operibus, & præsentem videre omnia, quæ effici jussit. » Quamobrem, ut Georgius Agricola » Libro II. monet, aut ad fodinam domicilium habeat, ut se in conspectum operariis semper dare possit, semperque cavere, ne quis suum munus negligenter exequatur, aut habitet in propinquis

„ locis, ut & crebro metallicas operas invifat, &
 „ crebrius ad metallum se venturum, quam sit
 „ venturus, operariis per nuncium significet, Et-
 „ enim suo adventu vel ejus denunciatione merce-
 „ narium fere quemque sic terrebit, ut numquam
 „ non diligenter negotium suum agat. Sed cum
 „ inviserit metallum, diligentes operarios laudet,
 „ & interdum eis det munera, ut & ipsi & alii
 „ alacriores ad laborandum fiant. Contra negligen-
 „ tes objurget, atque aliquos ex metallis amoveat,
 „ & in eorum locum sedulos substituat. Quin etiam
 „ dominus sæpenumero dies noctesque maneat in
 „ metalla: quæ non sit mansio desidiosa, & mol-
 „ lis: nam metallici in re familiari augenda dili-
 „ gentis interest, frequenter descendere in fodinam,
 „ & aliquid temporis conferre ad naturam venarum,
 „ fibrarumque cognoscendam, & tam intus quam
 „ foris omnes laborandi rationes intueri atque con-
 „ templari. Nec id solum agere debet, sed interdum
 „ aliquos labores suscipere, non ut in iis se fran-
 „ gat, sed ut sua diligentia mercenarios excitet, &
 „ eos doceat artem. Etenim bene se habet metal-
 „ lum in quo quid faciendum sit non Præses mo-
 „ do, verum dominus etiam docet.

CAPUT III.

De experimentis metallicis.

CCXLVIII.

DUO sunt experimenti genera, quæ Metallicis
 maxime utilia sunt. Unum sit in pauca, al-
 terum in multa materiæ metallicæ mole. Quo spe-
 ciet primum illud experimentum, breviter, sed apte

Quo spectent
 experimenta,
 quæ in pauca
 materiæ mole
 sunt.

explicat Georgius Agricola Libro VII. ita scribens:
 » Metallici ex istius generis experimento cognoscunt
 » de venis, utrum aliquod quodpiam metallum,
 » an nullum in se contineant, aut, si ipsæ nobis in-
 » dicia unius metalli, vel plurium ostenderint, mul-
 » tum an paucum in eis insit: qua ratione etiam
 » unius venæ partes metalli participes ab his, quæ
 » ejus expertes sunt, separari possunt; atque illæ
 » rursus, in quibus multum est, ab his, in quibus
 » paucum. Verum metalla jam excocta experiri
 » solemus, ut exploratum habere possimus quota
 » argenti portio insit in centumpondio æris vel plum-
 » bi, aut quotam auri particulam libra argenti in se
 » contineat; & contra quotam æris vel plumbi por-
 » tionem habeat argenti centumpondium, aut quo-
 » ta argenti particula sit in auri libra, atque ex ea
 » re conicere licet utiliter possit nec ne metallum
 » pretiosum a vili secerni». Quocirca artificem ex-
 » periundæ venæ necesse est paratum, & instructum
 » rebus necessariis ad experimentum venire. Quæ au-
 » tem istæ sint, & quibus artificii materiam metal-
 » licam experiri oporteat, ex aliquo eorum Scripto-
 » rum, quos in Operis Proœmio commemoravi, fa-
 » cile cognoscet.

CCXLIX.

Experiri autem oportet aut venas, aut metalla
 ex iis conflata, quoties fodinæ diversi generis met-
 talla, aut venas magis vel minus divites ac antea
 suppeditant, itemque quoties Metallicus aliquid novi
 in conflatura metallorum molitur, aut vetera emen-
 dare studet.

CCL.

Alterum experimenti genus, quod in magna
 materiæ mole suscipi diximus, situm est in pertem-

tandis diversis venarum excoquendarum, aut metallorum purgandorum, ac fecernendorum rationibus, ut tandem in optima, vel in utiliori consistamus. Hæc tentamenta multum variant pro diversa venarum, & metallorum natura, ac pendent omnino ex iis, quæ de cujusque metalli conflatura suis locis exponam. Quocirca ea tantum hoc loco commemorabo, quæ Metallicus in ejusmodi experimentis spectare debet. Perspicuum est, ex venæ cujusque excoctione eo majorem utilitatem existere, quo citius, & minori carbonum mole major metalli, ejusque puri quantitas conflatur. Itaque tempus, carbonum molem, pondus metalli conflati, ejusque puri una simul considerare oportet, ut de utiliori excoquendi ratione judicemus. Fieri enim potest, ut certa excoquendi ratio utilior accidat in una vel altera istarum rerum, sed in reliquis majus sit detrimentum, quam in illis utilitas. Sic exempli causa fiet fortasse, ut quis citius quidem venam excoquat, & majus metalli pondus ex ea conflât; sed majorem carbonum molem comburat, & metallum minus purum conficiat, itaut quod lucratur in tempore, & metalli quantitate, amittat in majori carbonum mole, quam consumpsit, & in metallo minus puro, quod conflavit. Quamobrem ex summa rerum omnium, quas commemoravi, æstimare oportet, istane an illa excoquendi ratio utilior sit. Pendet autem ex mercede, quæ operariis tribuitur, ex pretio carbonum, itemque metalli conflati constitutæ, quo in capite major existat utilitas: quæ quoniam in diversis locis multum variant, idcirco in ea re decernenda habere oportet rationem loci, in quo operæ metallicæ peraguntur. Hinc fit, ut non omnibus æque accommodata sit certa excoquendi ra-

Item experi-
menta, quæ in
multa materie
mole sunt.

tio. Nam eorum, qui exempli gratia carbonēs carius emere debent, e re magis erit minorem istorum molem consumere, etsi idcirco minus metalli puri, & tardius conflent.

CCLI.

Quomodo hæc
instrui debeant,
cum vena recens
excoquenda est.

Porro hæc tentamenta Metallicus aggredietur, vel cum primo venam aliquam excoquere incipit, vel cum perficere aut emendare contendit certam excoquendi rationem usu jam receptam. Si in primo tentamenti genere laborare debeat, ita se gerat. Videat primo an vena, quam habet in promptu, accedat ad aliquod venæ genus, cujus excoquendi rationem vel ego tradidi, vel ipse novit; atque hac plane ratione eam primum excoquat. Notet autem pondus venæ & carbonum, quod in fornacem imponet, tempus, quod in certo venæ pondere excoquendo præterierit, pondus metalli ex vena conflati, itemque ejus, quod in additamentis, si quid horum ad venam adjecerit, forte inerat. Consideret deinde, utrum metallum ex vena conflatum fere æquet illud, quod artifex venæ experiundæ in ea dixerit inesse, an parum vel multum de eo desit. Si primum, bene res se habet; atque adeo eandem excoquendi rationem retinebit, nisi forte aliqua in re eam adhuc perfici posse intelligat. Sin alterum, certe metallum, quod deest, vel in recrementis mansit, vel cum fumo sublatum evolavit; ejus vero, quod evolavit pars aliqua in cadmiis inerit. Quamobrem artifex venæ experiundæ experiatur, quota metalli portio in recrementis restaverit, quota in cadmiis hæserit; deinde in unam summam colligat metalli pondus, quod in utraque materia invenerit, atque illam adjiciat ad pondus metalli conflati. Denique summam hanc oranem sub-

trahat a metalli pondere, quod in vena inesse cognovit, atque ita conficiet, quota metalli portio per aërem dispersa perierit.

CCLII.

Postquam Metallicus hæc cognoverit, consideret, quibus ex causis ea detrimenta potuerint existere. Ac primo, si multum metalli in recrementis restaverit, videat an id acciderit, quod vel parum usta vena fuerit, vel nimia venæ moles comparate ad carbonum quantitatem in fornacem imposita fuerit, vel cum aptis additamentis non fuerit commixta, vel denique excoctio in nimia tarditate aut celeritate peccaverit. Si multum metalli evolaverit, inquirat an forte nimium materiæ volatilis in vena remanserit, eo quod parum usta fuerit, an nimium tenuis vena sit, an vehementior quam par est, ignis & flatus follium extiterit. Meminerit præterea, metallum interdum evolare ex vena cum uritur; atque adeo videat, an aliquid metalli, & quibus ex causis in venæ ustione perierit. Hæc, & alia ejusmodi postquam diligenter consideraverit, studeat id, in quo peccatum esse intelligit, emendare, & iterum definitam venæ molem excoquat, eoque in opere ea omnia adnotet, quæ supra dixi; tum collato inter se utriusque excoctionis exitu intelliget utra tandem utilior sit: id quod, si opus fuerit, iterum & sæpius faciet. Porro mutationes omnes, quæ fieri possunt, cum de vena in certa fornace excoquenda agitur, ad sequentia capita præsertim revocantur. Sunt autem ustio venæ, additamenta, proportio inter venæ & carbonum pondus, quantitas venti, qui in fornacem inspiratur, fistulæ declivitas ac situs, foci præparatio. Itaque cum voluerit aliquid experiri, mutationem primo inducat in unam

aliquam ex rebus commemoratis, tum in plures, quoad id, quod voluerit, assequutus sit. Quo in negotio rationem habeat eorum, quæ pro diversa venarum natura, diversoque cujusque excoctionis exitu facere oportet.

CCLIII.

Item cum quis
veterem vena-
rum tradenda-
rum rationem
emendare stu-
det.

Quæ hætenus dixi de experimentis, quæ in excoctione venæ recens suscepta fieri possunt, valent quoque ad ea tentamenta, quibus Metallicus veterem excoquendæ venæ, vel etiam metallorum purgandorum aut secernendorum rationem vel emendare vel perficere studet. Hæc ipsa si spectaverint ii, qui discendi causa officinas metallicas invisunt, multum sane proficient. Profecto in artibus, quæ ante oculos vulgi positæ non sunt, qualis metallica est, magnum aliquid, ac mirabile latere homines arbitrantur, atque adeo nisi ipsi artifices artem prodiderint suam, [quod facere non solent] quisque desperat se posse, quamvis laborandi rationes inspectet, artificia prorsus detegere. Id quod procul dubio iis accidit, qui nesciunt quibus ex rebus operarum exitus pendeat. At qui istas tenens labores inspectaverit, etiam tacentibus artificibus res ei loquentur ipsæ.

CCLIV.

Qua ratione
operarii allu-
ciendi ad nova
tentamenta
sint.

Commemorata experimenta maxime industrium ac solertem Metallicum postulant tum ut ipse apte præcipiat, quæ facienda sunt, tum ut ea, quæ præcepit, operarii rite exequantur: quod postremum quam difficile factu sit, nemo credit, nisi qui id expertus sit. Operarii enim iis tantum artificii fidunt, quibus ipsi uti solent, atque hæc ipsos quoque magistros ac laborum præsides latere volunt. Hinc fit, ut tentamentis, quæ isti proponunt, pertinaciter

semper obfistant, vel si ea aggredi coacti sint, ea aut negligenter peragant, aut de industria incassum iri studeant (*). Quamobrem plerumque e re domini magis erit, tyrones informare, quam operarum magistris ad res novas uti. Omnino tamen duo sunt operariorum genera, unum eorum, qui tam rudes & hebetes sunt, ut ex iis, & fornace, ad quam laborant, unam eandemque machinam existere diceres. Atque hi præceptis cogendi, muneribusque alliciendi ad officium sunt. Alterum est eorum, qui paullo acutiores ad videndum sunt. Istos primum erroris convincat, qui in recepta laborandi ratione est, tum ejus emendandi rationem non ipse præcipiat, sed eam ita ipsis persuadere studeat, ut tandem ultro se ad experimentum offerant. Quod cum assequutus fuerit, eis munera adpromittat, si res bene cesserit. Postquam vero experimentum votis responderit, ipsos laudet, eisque det munera; insuper addat, eorum industria fieri posse, ut & alia emendentur; idque non sine ipsorum emolumento futurum. Hoc modo operarios ejusmodi faciles habebit & industrios.

(*) Il est mal [*inquit Schlüterus cap. CXXX. operis superius laudati*] de se prévenir contre les opérations nouvelles qu'on propose; & il n'est que trop ordinaire que les Employés, & les Ouvriers agissent de concert pour les faire manquer.

ERRATA

CORRIGE

Pag. 12. lin. 20. *mercurio elicitur ex
venis hydrargyro*

*hydrargyro elicitur ex
venis Alagnia*

39. lin. 27. *pila*

pila

41. lin. 18. *que forma*

que forma

65. lin. 20. *area*

area

113. lin. 28. *novumque*

novum

119. lin. 21. *undique*

undique

150. lin. 9. *calciforme*

calcis forma præditum

197. lin. 22. *declari*

declari

202. lin. 25. *At*

Ac

208. lin. 26. *ob quæ*

ob quæ

209. lin. 17. *levius*

levior

215. lin. 18. *omnia*

omnis

219. lin. 5. *1*

1

231. lin. 4. *multum*

multus

	<i>ERRATA</i>	<i>CORRIGE</i>
Pag. 57. lin. 8.	LXXXII.	XXXXII.
140. lin. 25.	50.	10.
145. lin. 10.	misceas	misceatur
151. lin. 12.	quin.	qui
160. lin. ult.	calore	colore
166. lin. ult.	pars aliqua	partem aliquam
205. lin. 22.	aurum,	cuprum,
	postea cuprum	postea aurum
211. lin. 14.	mole	moles

AN 1456666

2. The first of these is the
 fact that the system is not
 self-sufficient. It is not
 possible to produce all the
 goods and services needed
 for the system to function
 properly. This is because the
 system is not able to produce
 all the goods and services
 needed for the system to
 function properly. This is
 because the system is not
 able to produce all the
 goods and services needed
 for the system to function
 properly. This is because the
 system is not able to
 produce all the goods and
 services needed for the
 system to function properly.

Fig. 1.





Fig. 2.



Tab. II.





Fig. 5.



10 12 14 16 Pcd. Parisienses



Fig. 7.




Fig. 11.




Fig. 12

Fig. 13. n. 1

Fig. 13.




Fig. 14



Fig. 15.




Fig. 17.






Fig. 17. n° 2



Fig. 18





1871
1872
1873
1874
1875
1876
1877
1878
1879
1880
1881
1882
1883
1884
1885
1886
1887
1888
1889
1890
1891
1892
1893
1894
1895
1896
1897
1898
1899
1900

1901
1902
1903
1904
1905
1906
1907
1908
1909
1910
1911
1912
1913
1914
1915
1916
1917
1918
1919
1920
1921
1922
1923
1924
1925
1926
1927
1928
1929
1930

1931
1932
1933
1934
1935
1936
1937
1938
1939
1940
1941
1942
1943
1944
1945
1946
1947
1948
1949
1950
1951
1952
1953
1954
1955
1956
1957
1958
1959
1960











Fig. 33






Fig. 32.

5 12 18 24. Ped.




6.



25 Ped.






Fig. 38.



Tab. X.

Fig. 39.








Fig. 43





Fig. 46.




20

30 Ped




Fig. 47.



Tab. XV

Fig. 48.






Fig. 50





Fig. 55. n.º 1



Fig. 54





Fig. 53



Fig. 52



51.

5. n.º 3

o

c

17

n.º 2.

g



Fig. 59.






Fig. 58







Fig. 63




Fig. 64




Fig. 65.




Fig. 66.




Fig. 67




Fig. 68




Fig. 69.





Fig. 70.







Fig. 72.



XXIX
F

